

— 37

VERITATES PRACTICÆ,

EX VITA DOMINI IESV, SANCTO-
RVMQVE GESTIS IN SINGVLOS ANNI DIES.

LEGENDÆ, CONSIDERANDÆ,
PRÆDICANDÆ.

OPVS QVADRIPERTITVM.

PARS PRIMA, PARS HYEMALIS.

A Dominica j. Aduentus, ad Septuagesimam.

*Authore P. JULIANO HAYNEVEVE,
Societatis IESV Sacerdote.*



ROTHOMAGI,

Sumptibus RICHARDI LALLEMANT, Illustrissimi Ar-
chiepiscopi & Collegij Societatis IESV Typographi.

M. DC. LII.

CVM PRIVILEGIO REGIS, ET APPROBATIONE DOCTORVM.

Cyrenitarum Samaritanensium Montis Regalis ad Varsavia.

VERITATES

PRACITICAE

EX VITA DOMINICAE, SANCTO

RODOLPHO DE S. VINCENZO

EXCISENDI CONSIDERANDI

PRACITICAE

EX VITA DOMINICAE

EX VITA DOMINICAE

EX VITA DOMINICAE

EX VITA DOMINICAE

K. VI. 3.

R. O. L. H. O. M. A. G. I.

EX VITA DOMINICAE

EX VITA DOMINICAE

M. H. C. D. I.

EX VITA DOMINICAE

EX VITA DOMINICAE



INCREATÆ

ET

INCARNATÆ

VERITATI.

IBI, ò Increata & Incarnata Veritas; Tibi hoc debetur opus; Tibi referri debent hæ Veritates practicæ. Cui enim iustiùs quàm illi, à quo sunt singulæ veritates creatæ: in quo conquiescunt omnes: & ad quem tendunt vniuersæ? Atenim cùm sis Vnigenitus Dei Filius, Homo factus, Tu ille es, à quo velut à fonte manant; in quo velut in centro sistunt; & ad

quem velut ad suum finem conspirant. Tibi
ergo has deberi Tibique referendas omnes,
vna est omnium certissima veritas. Et illæ
quidem sicut à Te sunt, vt cognoscantur;
ita sint, oro, vt amentur. Sicut in Te sunt
æternus splendor & ardor, ita in nobis sem-
per resplendeant & ardeant. Sicut ad Te di-
riguntur affectu, ita & effectū perueniant.



PRÆFATIO.



QVOD dixit Psalter Regius: *Diminuta sunt Veritates à filiis hominum*, duplicem habet sensum qui in vnum & eundem recidens, Veritatem proponit valde considerandam. Primus est, quod cum fidei Veritates partim sint speculatiuæ, partimque Practicæ, sic diminuuntur ab hominibus vt qua parte sunt speculatiuæ, teneantur; non quæ sunt Practicæ.

Secundus est, *Diminuta sunt Veritates seu fidelitates*, Id est, fideles imminuti sunt, iam pauci sunt qui credant fide diuina, & quibus credatur fide humana. Ex quo duplici sensu, hic vnus eruitur, quod defectu fidei deficiat Sanctitas quæ est necessaria ad Salutem, Vnde & salus omnium damnose periclitatur; quamobrem & ipse Dauid sibi timens: *Saluum me fac*, inquit, *Domine, quoniam defecit sanctus*, quoniam *diminuta sunt Veritates à filiis hominum*: quasi diceret, perij simul cum aliis, nisi me singulari serues gratia: quia hoc inter homines tam frequens & commune malum est, diminuere Veritates, & quam quisque velit partem, admittere; vt vix vllus vniuersas admittat, vix vllus integrè credat, neque recogitet in quo versetur salutis periculo.

Quod confirmat ex his quæ addit: *Vana loquuti sunt vnusquisque ad proximum suum, labia dolosa in corde, & corde loquuti sunt*: id est, sic se mutuis inter se colloquiis omnes prouocant ad diminuendas Veritates, vt malignè quidem & dolose loquantur loquentes contra Veritatem: quia tamen sic omnes loquuntur, nullus aduertit ad dolos, & sic miserè pereunt.

Sic & alius Propheta grauitè: *Corruit in platea Veritas, & facta est Veritas in obliuionem, & qui recessit à malo, praeda patuit: & vidit Dominus, & malum apparuit in oculis eius, quia non est iudicium, & vidit quia non est vir, & aporiatus est, quia non est qui occurrat*. Tale, inquit, malum est, vt prope mirum & stupendum videatur Deo, quod cum omnes attingat homines, nullus tamen aduertat ad illud auertendum.

Hoc ipsum est quod Apostolus de Antiquis illis qui cum cognouissent Deum, non sicut Deum glorificauerunt, *VERITATEM Dei,*

P R Æ F A T I O.

ait, *in iniustitia detinent* : non tollunt omnem Veritatem; credunt esse Deum, Deum esse immortalem & alia quædam speculatiua: sed quæ sunt Practica, vt colere Deum vera pietate & sanctitate vitæ quam commendat, non credunt, non profitentur, non id agunt: atque in hoc manifestam Veritati faciunt iniuriam, quia sicut monstrabat Veritas esse Deum, ita & demonstrabat esse colendum: sed quia illis facilius videbatur credere Deum quam colere, idcirco dimidiatam quandam Veritatis partem retinentes, reliquam velut captiuam, otiosam & inutilem detinuerunt.

Sic plane modò Christiani; sic Veritates diminuunt, sic eas in iniustitia detinent; Facile quidem credent Christum esse natum in præsepi, atque in cruce mortuum, cæterosque fidei & Veritatis speculatiuæ articulos, quia in his credendis nulla, aut vix iam vlla naturalis Concupiscentiæ repugnantia: sed an credunt sic propterea natum & mortuum vt nos exemplo suo instrueret quod verbo docuit, fugiendos honores potius quàm quærendos; amandam potius paupertatem quam diuitias, & vitæ asperitatem quam delicias? an sic ex fide credunt sibi æque necessariam esse humilitatem & diuitiarum contemptum, sicut Christum fuisse humilem, pauperem, & despectum? Certe id patet euidentissime quàm in hac Practica Veritatum parte deficiant; Tam pauci sunt qui hæc reuera credant quàm multi sunt quos pridem deflet Apostolus, *qui ambulant inimici crucis Christi, quorum finis interitus, quorum Deus venter est, & gloria in confusione ipsorum qui terrena sapiunt.* Quibus & ipse Dominus exprobrat: *Quid vocatis me, Domine, Domine: & non facitis quæ dico?*

Quamobrem vt hæc tanta perniciēs posset quoquo modo cohiberi, & cum diuina caueri gratia, sic persuasum multis fuit, fore opportunum si Veritates illæ Practicæ fierent notiores, & ad caput, vsumque familiarem paratiores. Non defuerunt certe ex omni Eorum ordine qui alienæ vacant salutis quin dicendo scribendoue hoc studium tam salubre susciperent; & à nobis in hunc finem iam tentatum aliquid fuit in illis vernaculis meditationibus quæ de Christi vita sanctorumque gestis prodierunt: sed cum fusiores essent & laxiores quàm vt his solis Veritatibus declarandis astringerentur, sic visum est, commode contrahi & renouari posse opus, dum hæc duntaxat Veritates Practicæ proponeren-

Phil. 3.

Luc. 6.

P R Æ F A T I O.

tur Legendæ breuius, Considerandæ facilius, & Prædicandæ uti-
lius.

Quia vero, vana illa quæ loquitur unusquisque ad proximum suum, loquendoque diminuit diuinas Veritates vt dictum est, modo quodam tam suaui & humano pertractantur vt ipsa loqui videatur Ratio, totque censeantur in mundo leges & edicta, quot sunt mundanorū dicta pro diuitiis contra Paupertatē, pro deliciis contra Temperantiam, pro gloria & honore contra Humilitatem, pro carne denique & mundo contra Spiritum & Euangelium: Idcirco etiam aduersus illos adumbratos mundi discursus & effictas rationes vera & euident Ratio fuit apponenda vt quod ait Apostolus, *omne os obstruatur, & subditus fiat omnis mundus* Rom. 34
Deo.

At quænam est vera & euident Ratio nisi quæ R A T I O C I-
N A T I O dicitur quæ duo significat ad nostrum propositum, id est, ad declarandas Veritates Practicas valde idonea. Primum est, cum ex duobus rite pronuntiatis certa & manifesta infertur Conclusio. Alterum est cum vt ait sanctus Augustinus, *diligens & con-* L. de Im-
siderata faciendi aut non faciendi aliquid, excogitatio adhibetur. At- mori. an-
qui hoc ipsum est quod hîc agimus, hoc vnum quod intendimus me.
& spectamus vt quid sit ex lege diuina faciendum aut non facien-
dum diligenter excogitemus & considerate perpendamus. Pro-
pterea namque practicæ seu factiux Veritates dicuntur quia totæ
in praxi & factis consistunt; Vt verè autem Veritates esse con-
stent & sua luceant omnibus luce, quid aptius & quid accommoda-
tius quàm vt forma illa obseruetur quæ ex duabus rite & legiti-
me præmissis propositionibus, illa infertur quæ Conclusio dicitur
quod veritatem in se concludat & notam faciat? Sic enim di-
uina iuuante Gratia, Intellectus conuincitur, voluntas attrahitur,
appetitus cedit, & praxis seu actio sequitur, quæ est ipsa Practica
Veritas sic per Ratiocinationem cognita, vt simul sit persuasa, si-
mul admissa, simul in actum deducenda quo se primum obtulerit
agendi loco & tempore.

Sic dilectus Apostolus: *filioli mei non diligamus Verbo, neque lin-* 1. Ioan. 3.
gua, sed opere & Veritate: in hoc cognoscimus quoniam ex Veritate
sumus: ET IN CONSPECTU EIVS SVADEBIMVS CORDA
NOSTRA. Quasi diceret, sicut in hoc cognoscimus quod in Ve-
ritate sumus quando reuera operamur & agimus quod agendum

PRÆFATIO.

est: ita etiam ut hanc veritatem cognoscamus & faciamus, suadenda sunt corda nostra, coram Domino, id est, verus & sincerus persuadendi modus est adhibendus, quo fit ut non modo veritas à falsitate cognoscatur, & virtus à vitio: sed in illa etiam cognitione, magna persuasi cordis tranquillitas & quies persentiat. *Propterea*, inquit S. Ioannes Chrysostomus, *ala sunt auribus ut effugiant laqueos: propterea Ratiocinationes hominibus, ut peccata fugiant.*

Quod autem sanctus Paulus affirmat, se Evangelizare non in sapientia verbi, ut non euacuetur crux Christi: & sermonem suum fuisse non in persuasibilibus humana sapientia verbis, sed in ostensione spiritus & virtutis, ut fides nostra non sit in sapientia hominum, sed in virtute Dei; Ac rursus, in captiuitatem velit redigi omnem intellectum, in obsequium Christi; moneatque Colossenses, ut videant ne à quaquam decipiantur per Philosophiam & inanem fallaciam. Quod item sancti Patres his affine dicunt, negantes locum esse argumentis ubi fides exigitur: nec ibi esse meritum ubi humana ratio præbet experimentum: Sic intelligenda sunt hæc omnia, quando vel contra fidem ratio fingeretur; vel quando plus rationi quam fidei, plus naturæ quam gratiæ tribueretur: vel quando denique sophistice ageretur id est captiose, malignè, dolosè quo qui loquitur modo, meritò à Sapiente odibilis dicitur. *Sed absit à nobis hoc scelus ut recedamus à Domino & eius vestigia relinquamus.* Semel sit dictum, nos ratiocinatione sic uti ut Fidei & Gratia, humana ratio feruiat & subiiciatur: non ut rationi Fides subdatur aut Gratia. Sicut naturalis inclinatio deseruit Charitati, & aliis donis supernaturalibus, ut expresse docet sanctus Thomas: Neque enim gratia naturam destruit sed perficit: sic autem eam perficit, dum in usum & obsequium suum ita illam impendit ut quidquid est intellectus & voluntatis, totum eò refundatur ut fides & gratia magis colantur & valeant.

Sic ipse Apostolus Episcopum, aut alium verbi diuini ministrum, vult esse amplectentem eum qui secundum doctrinam est, fidelem sermonem, ut potens sit exhortari in doctrina sana, & eos qui contradicunt arguere. Quid est autem arguere & potenter exhortari, nisi vel conuincere falsitatis, & mendacij errantes à veritate; vel conuictos ad veritatem praxim inducere? Quo verò id potentiori modo fiet nisi quo euidentius & certius veritas patet, & quidquid ei opponitur, falsum, absurdum, & nullum esse conuincitur?

Nonne

P R Æ F A T I O.

Nonne sic Idem Apostolus sæpissimè ab vno concessio vel euidenti ad aliud non concessum & euidens argumentatur? vt cum primæ Corinthiorum decimo quinto, probat futuram omnium resurrectionem ex eo quod Christus resurrexerit: atque ibidem vt nobis persuaadat portandam imaginem cælestis hominis, sicut portauimus imaginem terreni; Nonne sic aperte discurret & ratiocinatur: Idcirco portauimus imaginem terreni, quia qualis terrenus, tales & terreni: Sed qualis cœlestis, tales etiam esse debent cœlestes. *Igitur sicut portauimus imaginem terreni, portemus & imaginem cœlestis.* Sic Romanorum decimo tertio, vt persuaadat abijcienda esse opera tenebrarum, nonne sic euidenter discurret: Die appropinquante abiiciamus oportet opera tenebrarum: Atqui dies appropinquauit: *Abiiciamus ergo opera tenebrarum.* Sic Idem passim in aliis epistolis de quauis pene materia, vt sanctus Augustinus declarat in libris de doctrina Christiana, vbi expressè ait hanc differendi artem, quam vocat *disputationis disciplinam*, ad omnia genera questionum quæ in literis sanctis sunt penetranda & dissoluenda, plurimum valere; ac propterea vt quæ sunt dubia, certificent, sic ratiocinandum esse, sic conuincendum errorem, sic stabilendam veritatem. Verba eius producentur commodius suo infra loco.

L. 2. c. 31.
L. 4. c. 4.
20. 26.

Quod & Christo Domino fuit admodum familiare, non tantum quando cum Iudæis de sua missione, de suis miraculis ac doctrina disceptabat, vt videre est præsertim apud Ioannem à quinto capite vsque ad decimum tertium: sed cum suis etiam agendo discipulis vt patet Mathæi decimo septimo vbi concludens ex præmissis, se immunem esse à tributo persoluendo, *Ergo*, inquit Petro, *liberi sunt filij.* Et Marci decimo tertio dum suos ad vigilantiam vehementius exhortatur, nonne hic est apertus eius discursus: Serui qui nesciunt aduentum Domini sui debent vigilare. Sed vos nescitis quando Dominus vester venturus sit. *Vigilate ergo: Quod autem vobis dico, omnibus dico, vigilate.* Sic expressa sæpe Dominus rationali particula, sæpe autem suppressa sed inuoluta & complicata, de cunctis differebat. Quod illi tam frequens fuit vt ipsæ Euangelicæ Beatitudines in quibus summa Christianæ simplicitatis consistit, non alio proponantur modo, aut certe non aliter intelligantur esse Beatitudines quàm isto ratiocinandi modo. Creduntur quidem ita esse quia Christus dixit, sed cum ipse

PRÆFATIO.

Dominus rationem adjunxerit qua volebat nos scire & intelligere quod dicebat: Ratio illa qua utitur mera est ratiocinatio, aut nulla est ratio seu nulla est alioquin rationis intelligentia. *Beati, inquit, pauperes spiritu, quoniam ipsorum est regnum Cælorum. Beati mites, quoniam ipsi possidebunt terram*, & sic de aliis. At quomodo valere poterit ista quæ affert Ratio, aut quomodo propterea intelligam Beatos illos esse quos dicit, nisi mihi permittat sic ratiocinari, Beati sunt illi quorum est regnum cælorum: vel qui possident terram. Sed regnum cælorum est pauperum: sed mites possidebunt terram. Ergo illi Beati. Ex quibus manifeste vides quantum hoc differendi genus obsecundet Euangelio & gratiæ, cum sic magis Evangelicæ veritates elucescant & valeant.

Quod imprimis necessarium est persuadendis Veritatibus illis Practicis quæ à mundo expugnantur, & in quibus exercendis maior est naturæ corruptæ repugnantia. Tunc enim opus est ardenti voluntate, quæ ut sic ardeat oportet ut cum diuina gratia per intellectum magis ac magis illustretur & vrgeatur: quod aliter efficacius ordinarie loquendo non fit quam per attentam considerationem veritatis in ratiocinio repræsentatæ, vbi simul colligatæ notiones & motiua magis mouent cum Gratia quam si seorsim seu separatim proponerentur.

Quid notius quàm Deum esse timendum & honorandum? & tamen quàm multi nec eum timent nec honorant? Quid illis factas & quid dicas ad hunc honorem & timorem prouocandum? *Mal. i.* Vide quid ipse Deus faciat & dicat: *Filius, inquit, honorat patrem, & seruus Dominum suum. Si ergo pater ego sum, vbi est honor meus, & si Dominus ego sum, vbi est timor meus?* Nonne hic est aperta ratiocinatio? nonne sic saltem necessario aperienda est ut intelligatur, & ut intellecta vim & pondus suum habeat: Filius honorat, seu honorare debet patrem suum, & seruus Dominum. Atqui ego sum pater vester, vos filij mei: Ego sum vester Dominus, vos mei serui. Ergo me certe honorare debetis & timere; aut me negabitis vestrum esse Patrem & Dominum; aut negabitis Patrem & Dominum esse honorandum & timendum à filiis, & à seruis; quæ postrema duo cum negari non possint, oportet omnino concludere Deum esse honorandum & timendum. Quem certe discursum qui sibi attente & diligenter coram Domino applicaret, aut illum oporteret esse Atheum vel insanum, aut ad veri-

PRÆFATIO.

tatem amplectendam excitatum cum gratia quæ hoc facili medio
vritur ad sese magis insinuandam. Ac propterea sic Deus ipse no-
bilcum in materia tam clara ratiocinatur, non modo vt sic effi-
caciùs nos ad se attrahat, sed vt doceat sic in aliis minus notis ca-
sibus proponendas & applicandas esse nobis Veritates, vt sic ab eo
attrahamur. *Videte & considerate vehementer.*

Ier. 2.

Quæ quidem omnia sic dicta velim non quasi ad rigorem &
censuram formæ illius Syllogisticæ quæ in scholis exigitur, redi-
gendum existimem omnem nostrum discursum, quasi non liceret
vllam in propositionibus vel omittere vel postponere, vel mutare
particulam; quasi essent iidem prorsus termini, vel eodem ora-
tionis contextu semper proferendi. Non hoc inquam suscipio,
nec si susciperem, perficiendum præsumo. Nemo sanus ambigat
multa præsupponi posse, ac subinde ex aliis alia colligi quæ com-
modiùs reticentur, vel breuius efferuntur. Satis proinde ad insti-
tutum fore putauerim si ex morali subiecta materia formam il-
lam educerem quæ discursum probabilem ac fide dignum conti-
neret quo Practica Veritas Deo bene iuuante suaderetur: & in
quo duntaxat discursu si quid verborum deesset, tam facile sup-
pleri posset à quouis, quàm facile quiuis intelligeret, quid deesset.

Quod si tamen vni particulatim aut alteri tota ista discurrendi
ratio minùs æqua & commoda videretur, certe is abstineat, sed
an illam propterea condemnabit quasi non sit omnino commo-
da nec expedita? Sicut enim iudicari non vult neque condemnari,
quod ab istis dissentiat; neque profecto is meritò iudicare aut
condemnare potest sic sentientes. Hæc sunt videlicet de quibus
Sapiens: *Non omnia omnibus expediunt: & non omni animæ omne ge- Ecclesi. 37.*
nus placet. Hæc sunt media & indifferentia de quibus Apostolus, *Rem. 14.*
vnusquisque in suo sensu abundet: Id est, vt sancti Basilii & Am-
brosii interpretantur: *quisque suo consilio remittatur.* Quis enim
nescit quod sancti Gregorij Romanus & Nazianzenus docent: *Prologo 3.*
Non vnā eandemque cunctis rationem congruere, & sæpe aliis officere *partis 1.*
quæ aliis prosunt? *pastor.*

Quamobrem in ea vellem esse animi moderatione & æquita-
te, vt quaecumque scribendi, loquendi, meditandive genus vsur-
pem & commendem, sic aliis commendatum velim, non quasi
illud præ omnibus sit eximium & singulare: non quasi alia manca
sint & imperfecta; non quasi denique non esset *Spiritus sapientiæ Sap. 7.*

PRÆFATIO.

1. Cor. 12. *unus & multiplex, diuidens singulis prout vult:* Sed quasi debitor, ne
 1. Petr. 4. *dicam bonus dispensator eius gratia quam accepi, sic aliis administrem,*
 vt videant an ea sibi conueniat. Idcirco etiam diuersa sæpe subie-
 ci vno & eodem die diuersis proponenda pro varietate locorum
 & personarum quibuscum agitur. Atque in illo Indice quem de
 progressu Veritatum per triplicem perfectionis viam contexui,
 sic inter se ordinantur Veritates, non quasi certum & statum ea-
 rum ordinem velim statuere, sed quod ita videantur posse com-
 modius ordinari.

1. Thess. 5. Sapiens autem est, quod ait Apostolus, *probare omnia, & quod
 sibi bonum est, retinere.* Hæc sapientia sic Veritati Practicæ conne-
 xa est vt ab ea numquam sit disiungenda, proptereaque Sapiens
 dixerit, VERITATEM EME, ET NOLI VENDERE
 1. Prom. 23. SAPIENTIAM.



SVMMA VERITATVM PRACTICARVM.

ET STATUS EORVM QVI SE IN ILLIS EXERCENT.

Ex S. Augustino, lib. i. de Serm. Domini in monte. Cap. 2.

*Qui omnes animi sui motus componentes & subijcientes Rationi,
 id est, menti & spiritui, carnalesque concupiscentias habent edo-
 mitas, fiunt regnum Dei. In quo ita sunt ordinata omnia, vt
 id quod est in homine præcipuum & excellens, hoc imperet cæ-
 teris non reluctantibus quæ sunt nobis bestiisque communia: at-
 que id ipsum quod excellit in homine, id est, Mens & Ratio
 subijciatur Potiori, quæ est ipsa Veritas, Unigenitus Filius Dei.
 Neque enim imperare inferioribus potest nisi Superiori se ipse
 subijciat. Et hæc est pax quæ datur in terra hominibus bonæ
 voluntatis: hæc vita consummati perfectique Sapiensis.*

PRÆFATIO.

VSUS TOTIVS OPERIS MAGIS DETERMINATIVS.

TRiplex totius operis designari potest vsus : Lectio, Meditatio, Concio. Quæ tria suo Timotheo commendabat Apo-^{r. Tim. 4.}
 stolus : *Attende lectioni, exhortationi & doctrina. Hac meditare, in
 his esto, ut profectus tuus manifestus sit omnibus. Attende tibi & doctri-
 nae, insta in illis : hoc enim faciens, & te ipsum saluum facies, & eos qui
 te audiunt.*

Sunt itaque qui sola lectione contenti non vltra progrediantur :
 Quibus hoc vnum Sapientis sit monitum, vt sibi, quæ legunt, ap-
 plicent : *Cor fatui quasi vas confractum, & omnem sapientiam non tene- Eccles. 2. 1.*
 bit : verbum Sapientis quodcumque audierit sciens, laudabit ; & ad se ad-
 jiciet ; Non ad alios, nec ad se jactitandum, sed ad se cognoscen-
 dum & se cognitæ veritati conformandum. Ne alioquin id acci-
 dat, quod de sciolo quodam Iobi amico scribit S. Gregorius, *Dum
 sequitur bonum, quo benè dicere appetijt ; bonum quo bene viuere po- L. in c. 36.
 tuisset, amisit. Iob.*

Qui verò Lectioni Meditationem simul aut seorsim iungat ;
 quid sit meditari veritatem, discat ab ipsa Sapientia. *Veritatem, Prov. 8.*
 inquit, *meditabitur guttur meum, & labia meâ detestabuntur impium*
 seu impietatem ; Id est, non leuiter, non præproperè, non trans-
 cursim, seu pensiculatè, quantum res exiget, suis omnibus dime-
 tiar numeris & rimabor partibus, nihil vt me fugiat nos appen-
 sum aut excussum. Non ore tantum quasi qui cibum ad solam gu-
 stet delectationem ; sed ipso gutture, quasi qui ruminet, & salu-
 brem solummodo nutritionem spectet. Vel sic interpretare : Ve-
 ritatem sic mecum meditabor, quasi tum loquerer, & quasi tum
 agerem inter homines ; vt cum reipsa mihi loquendum & agen-
 dum erit cum hominibus, sic veritatem loquar & profitear, quasi
 tum eam meditarer, aut sicut illam fui meditatus. Vel quasi dice-
 res clariùs : Nullû volo esse discrimen inter meditationem meam
 ac locutionem : inter conuersationem meam cum Deo ac cum ho-
 minibus. Meditari volo coram Deo quod cum hominibus loquar :
 & hoc ipsum loqui volo cum hominibus, quod coram Deo medi-
 tatus fuero ; sicque tandem, propitio fiet Deo, vt ex illo frequenti
 fidelique vsu meditandi & agendi, tam firmum Veritatis Practicæ
 contraham habitum, vt si forte in quouis humano congressu con-

PRÆFATIO.

trà se aliquid ingerat, statim id aduertam, & velut ipsam impietatem non oderim modò, sed detester; non corde tantum, sed & ipsis labiis, quasi qui vnā profiteretur Veritatem.

Hoc est sapienter verèque meditari Veritates practicas, cū ita praxim præcedit meditatio, vt ipsa meditationem sequatur praxis: cū sic effectus affectum agendo sequitur, sicut affectus meditando sequutus est intellectum: cū sic denique faciēda præcogitatur veritas, sicut reuera debet fieri, sicque reuera fit, sicut præcogitata est.

2. Thess. 2. Hoc est *in his esse*, hoc est *sibi attendere & doctrinā*, hoc est *instare*
Ephes. 4. *in illis*, hoc est *veritatem charitatis recipere*, seu *veritatem in charitate facere*, sicut monebat Apostolus. Hoc est, vno verbo veritatem practicā verè meditari, nec aliter nisi falsò. Quod paucis, sed efficacibus verbis S. Bernardus summo commendās Pontifici:
L. 2. de Summe, inquit, *exemplum de summo omnium patre, Verbum suum &*
Conf. 63. *emittente & retinente. Verbum tuum, consideratio tua, quæ si procedit, non recedat: sic progrediatur, vt non egrediatur; sic exeat, vt non deserat.* Sic in *intellectibus & consilio manuum suarum* Scriptura passim dicit fieri, quidquid à quoquam fieri melius, & verius dici potest.

Si quis porrò ad alios deriuare possit & velit, quod meditando hinc hauserit, quia tale est opus, vt multis Authorum & præceptorum adminiculis egeat: Authorem inter ceteros, quem imitetur, sibi proponat sanctum Chrysostomum: quem vt imitetur facilius, atque in vsum suum has practicas veritates fructuosè possit conuertere, Præceptorem habeat Diuum Augustinum: cuius vel vnus liber, qui de doctrina Christiana quartus est, hæc diuina subministrat Effata & Monita, quæ compendiarìò sic ex singulis eius libri capitibus expressa sunt, vt suis ipse vnus loquatur verbis. Audi & vtere.

Cap. 1. PRIMO expectationem legentium, qui fortè me putant Rhetoricæ daturum esse præcepta, quæ in scholis secularibus & didici & docui, ista prælocutione prohibeo, atque vt à me non expectentur, admonéo: non quod nihil habeant utilitatis, sed si quid habent, seorsum discendum est.

§. 2. NAM cū per artem Rhetoricā & vera suadeantur & falsa, quis audeat dicere aduersus mendacium in defensoribus suis incriminem debere consistere veritatem? illi fallacibus argumentis veritatem oppugnent, asserant falsitatem: isti nec vera defendere, nec falsa valeant refutare? illi animos audientium in errorem mouentes impellentesque dicendo ter-

D. Augustini de doctrina Christiana libri quarti compendium.

reant, contristent, exhalarent, exhortentur ardentem: isti pro veritate
lenti frigidique dormitent! Quis ita despiat, ut hoc sapiat? Cum ergo
sit in medio posita facultas eloquij, quæ ad persuadenda seu praua seu
recta valeat plurimum; cur non bonorum studio comparatur, ut milites
veritati, si eam mali ad obtinendas peruersas vanasque causas in usus
iniquitatis & erroris usurpant?

SI acutum & feruens adsit ingenium, facilius adhæret eloquentia le- c. 32
gentibus & audientibus eloquentes, quàm eloquentia præcepta sectanti-
bus. Nec desunt Ecclesiastica litera, etiam præter canonem in authorita-
tis arce salubriter collocatum, quas legendo homo capax, etsi id non agat,
sed tantummodo rebus quæ ibi dicuntur, intentus sit, etiam eloquio, quo
dicuntur, dum in his versatur, imbuatur: accedente vel maxime exer-
citatione siue scribendi siue dictandi, postremò etiam dicendi quæ secun-
dum pietatis ac fidei regulam sentit.

DE BET igitur diuinarum Scripturarum tractator & doctor, de- c. 4
fensor rectæ fidei, ac debellator erroris, & bona docere, & mala dedoce-
re: atque in hoc opere sermonis conciliare aduersos, remissos erigere,
nescientibus quid agatur, quid expectare debeant, intimare. Vbi autem
beneuolos, intentos, dociles aut inuenerit, aut ipse fecerit, cetera pera-
genda sunt sicut causa postulat. Si docendi sunt, qui audiunt, narratione
faciendum est, sit athen indigeat ut res, de qua agitur, innotescat. Ut
autem quæ dubia sunt, certa fiant, documentis adhibitis, ratiocinandum
est. Si verò qui audiunt, mouendi sunt potius quàm docendi, ut in co,
quod iam sciunt, agendo non torpeant, & rebus assensum quas veras esse
fatentur, accommodent, maioribus dicendi viribus opus est. Ibi obsecra-
tiones & increpationes, concitationes & coerciones, & quæcumque
alia valent ad commouendos animos.

ET hac quidem cuncta quæ dixi, omnes ferè homines in iis quæ elo- c. 50
quendo arguunt facere non quiescunt: sed cum alij faciant obusè, de-
formiter, frigide: alij acute, ornatè, vehementer; illum ad hoc opus
unde agimus, iam oportet accedere, qui potest disputare vel dicere sa-
pienter, etiam si non potest eloquentem, ut prosit audientibus. Qui verò
affluit insipienti eloquentia, tantò magis cauendus est, quanto magis ab
eo in iis quæ audire inutile est, delectatur auditor, & cum quoniam di-
fertè dicere audit, etiam verè dicere existimat. Hac autem sententia
nec illos fugit qui artem Rhetoricam docendam putarunt: facti sunt
enim sapientiam sine eloquentia parum prodesse ciuibus: eloquentiam
verò sine sapientia, nimirum obesse plerumque, prodesse nunquam. Si

D. Augustini de doctrina Christiana libri quarti compendium.

ergo hoc illi qui praecepta Eloquentia tradiderunt, in eisdem libris in quibus id egerunt, veritate instigante coacti sunt confiteri; veram, hoc est, supernam, quae à patre Luminum descendit, sapientiam nescientes: quanto magis nos non aliud sentire debemus, qui huius sapientia filij & ministri sumus? Sapienter autem dicit homo tanto magis vel minus, quanto in Scripturis sanctis magis minusve profecit. Non dico in eis multum legendis memoriaeque mandandis, sed bene intelligendis & diligenter earum sensibus indagandis. Quanto se pauperiorem cernit in suis, tanto eum oportet in istis esse ditiores, ut quod dixerit suis verbis, probet ex illis, & qui propriis verbis minor erat, magnorum testimonio quodammodo crescat: PROBANDO ENIM DELECTAT, QVI MINVS POTEST DELECTARE DICENDO.

C. 6.

HIC aliquis forsitan quaerit, utrum Authores nostri quorum scripta diuinitus inspirata canonem nobis saluberrima autoritate fecerunt, sapientes tantummodo, an eloquentes etiam nuncupandi sint? Quae quidem quaestio apud meipsum & apud eos qui mecum, quod dico, sentiunt, facillime soluitur. Nam ubi eos intelligo, non solum nihil eis sapientius, verum etiam nihil eloquentius mihi videri potest. Et audeo dicere, omnes qui recte intelligunt quod illi loquuntur, simul intelligere, non eos aliter loqui debuisse. Illud magis admiror & stupeo, quod ista nostra eloquentia ita vsi sunt, per alteram quamdam eloquentiam suam, ut nec eis deesset, nec emineret in eis: quia eam nec improbari ab illis nec ostentari oportebat, quorum alterum fieret, si vitaretur: alterum putari posset, si facile agnosceretur.

C. 7.
Rom. 5.

QVIS enim non videat, quid voluerit dicere, & quam sapienter dixerit Apostolus gloriamur in tribulationibus, &c. Sicut ergo Apostolum praecepta eloquentiae secutum fuisse non dicimus, ita quod eius sapientiam secuta sit eloquentia, non negamus. Sed forte quis putat tamquam Eloquentem nostrum, elegisse me Apostolum Paulum. Dicendum ergo mihi aliquid esse video, & de eloquentia Prophetarum; & ex illius Prophetæ libro potissimum hoc faciam, qui se pastorem vel armentarium fuisse dicit, atque inde diuinitus ablatum atque missum, ut populo Dei prophetaret. Vae vobis qui opulenti estis in Sion, &c. Hac diuina mente sunt fusa & sapienter & eloquenter, non intenta in eloquentiam sapientia, sed à sapientia non recedente eloquentia.

Amos 6.

C. 8.

SED nos etsi de literis eorum quae sine difficultate intelliguntur, nonnulla sumimus elocutionis exempla, nequaquam tamen putare debemus imitandos eos nobis esse in iis quae utili ac salubri obscuritate dixerunt.

Sic

D. Augustini de doctrina Christiana libri quarti compendium.

Sic quippe illi locuti sunt, ut posteriores qui eos recte intelligerent & exponerent, alteram gratiam, disparem quidem, verumtamen subsequentem in Dei Ecclesia reperirent. Non ergo expositores eorum ita loqui debent, ut tamquam se ipsi exponendos simili auctoritate proponant: sed in omnibus sermonibus suis primitus ac maxime, ut intelligantur, elaborent ea quantum possint perspicuitate dicendi, ut aut multum tardus sit qui non intelligat, aut in rerum quas explicare volumus difficultate, non in nostra locutione sit causa quo minus tardiusve, quod dicimus, possit intelligi.

SVNT enim quædam; quæ sua vi non intelliguntur aut vix intelliguntur, quamvis planissime dicentis versentur eloquio, quæ in populi audientiam vel raro si aliquid urget, vel numquam omnino mittenda sunt.

EVIDENTIAE diligens appetitus aliquando negligit verba cultiora, nec curat quid bene sonet, sed quid bene indicet atque intimet quod ostendere intendit. Vnde ait quidam cum de tali genere locutionis ageret, esse in ea quamdam diligentem negligentiam. Hac tamen sic detrahit ornatum, ut sordes non contrahat. Sed de modo delectandi nunc non ago. De modo autem quo docendi sunt qui discere desiderant, loquor. Is autem est optimus, quo fit, ut qui audit, verum audiat; & quod audit, intelligat.

QVOD cum adepti fuerint (qui quæ discenda sunt, scire desiderant) ipsa delectabiliter veritate pascuntur: bonorumque ingeniorum insignis est indoles, in verbis verum amare, non verba: Quid enim prodest clavis aurea, si aperire quod volumus, non potest? aut quid obest lignea, si hoc potest, quando nihil quarimus nisi patere quod clausum est?

Sed quoniam inter se habent nonnullam similitudinem vefcentes atque discentes, propter fastidia plurimorum, etiam ipsa sine quibus vini non potest, alimenta condienda sunt.

DIXIT ergo quidam eloquens & verum dixit, ita debere dicere eloquentem, ut doceat, ut delectet, ut flectat. Deinde addidit, docere necessitatis est, delectare suauitatis, flectere victoria, si nempe auditor amet quod polliceris, timeat quod minaris, oderit quod arguis, quod commendas amplectatur; quod dolendum exaggeras, doceat; cum quid letandum predicas, gaudeat; misereatur eorum quos miserandos ante oculos dicendo constituis, fugiat eos quos cauendos terrendo proponis, & quidquid aliud grandi eloquentia fieri potest ad commouendos animos Auditorum, non quid agendum sit ut sciant; sed ut agant, quod agem.

D. Augustini de doctrina Christiana libri quarti compendium.

dum esse iam sciunt. Si autem adhuc nesciunt, prius utique docendi sunt, quàm mouendi. Et fortasse rebus ipsis cognitis ita mouebuntur, ut eos non opus sit maioribus eloquentia viribus iam moueri. Et ideo flectere necessitatis non est, si tantum docenti vel etiam delectanti consentit auditor. Ideo autem victoria est flectere, quia fieri potest ut doceatur & delectetur & non assentiatur. QUID AUTEM ILLA DVO PRODERVNT, SI DESIT HOC TERTIVM?

SED neque delectare necessitatis est, quandoquidem cum dicendo vera monstrantur, quod ad officium docendi pertinet, non eloquio agitur, neque hoc attenditur, ut vel ipsa vel ipsum delectet eloquium; sed per se ipsa quoniam vera sunt, manifestata delectant. Vnde plerumque delectant etiam falsa patefacta atque conuicta; neque enim delectant quia falsa sunt, sed quia falsa esse verum est; delectat & dictio, qua hoc verum esse monstratum est.

e. 13.

PROPTER eos autem quibus fastidientibus non placet veritas, nisi eo modo dicatur, ut placeat & sermo dicentis, datus est in eloquentia non parvus etiam delectationi locus. Quae tamen addita non sufficit duris, quos nec intellexisse, nec docentis elocutione delectatos esse profuerit; cum nempe id docetur quod agendum est, & ideo docetur ut agatur, frustra persuadetur verum esse quod dicitur, frustra placet modus ipse quo dicitur, si non ita dicitur ut agatur. Oportet igitur Eloquentem Ecclesiasticum quando suadet aliquid quod agendum est, non solum docere, ut instruat, & delectare ut teneat; verum etiam flectere, ut vincat.

c. 14.

IN populo autem grani de quo dictum est Deo, in populo graui laudabo te, nec illa suauitas delectabilis est, quae non quidem iniqua diliguntur, sed exigua & fragilia bona spumeo verborum ambitu ornantur, quali nec magna neque stabilia decenter & grauitate ornarentur. Est tale aliquid in Epistola beati Cypriani, quod ideo puto vel accidisse vel consulto factum esse, ut sciretur à posteris quam linguam Doctrinae Christianae sanitas ab ista redundantia renocauerit, & ad eloquentiam grauiorem modestioremque restrinxerit, qualis in eius consequentibus literis securè amatur, religiosè appetitur, sed difficillimè impletur.

e. 15.

AGIT itaque noster ille eloquens cum & iusta & sancta & bona dicit; neque enim alia debet dicere, agit ergo quantum potest cum ista dicit, ut intelligenter, ut libenter, ut obedienter audiatur: & hac se posse pietate magis orationum quàm oratorum facultate non dubitet, ut orando pro se ac pro illis quos est allocuturus sit orator antequam Doctor.

D. Augustini de doctrina Christiana libri quarti compendium.

Cum enim de unaquaque re multa sint quae dicantur, & multi modi quibus dicantur, quis nouit, quid ad praesens tempus, vel nobis dicere, vel per nos expediat audiri, nisi qui corda omnium videt? Et quis facit ut quod oportet & quemadmodum oportet, dicatur à nobis, nisi in cuius manu sumus nos & sermones nostri? Ac per hoc discat quidem omnia quae docenda sunt, qui & nosse vult & docere, facultatemque dicendi, ut decet virum Ecclesiasticum, comparet: Ad horam vero ipsius dictionis illud potius bonae menti cogitet conuenire quod Dominus ait: Nolite cogitare quomodo aut quid loquamini; dabitur enim vobis in illa hora quid loquamini: Non enim vos estis qui loquimini, sed spiritus patris vestri qui loquitur in vobis. Si ergo loquitur in eis Spiritus sanctus, qui persequentibus traduntur pro Christo, cur non & in eis qui tradunt discipulis Christum?

QVIS QVIS autem dicit non esse hominibus praeipiendum quid c. 16. vel quemadmodum doceant, si Doctores Sanctus efficit Spiritus; potest dicere, nec orandum nobis esse; quia Dominus ait, scit pater vester quid vobis necessarium sit, priusquam petatis ab eo. Aut Apostolum Paulum Timotheo & Tito non debuisse praecepere quid praeiperent aliis.

Sicut enim corporis medicamenta quae hominibus ab hominibus adhibentur, non nisi eis prosunt, quibus Deus operatur salutem, qui & sine illis mederi potest, cum sine ipso illa non possint; & tamen adhibentur, & si hoc officiosè fiat, inter opera misericordiae vel beneficentiae deputatur: ita & adiumenta doctrinae tunc prosunt animae adhibita per hominem cum Deus operatur ut prosint, qui potuit Euangelium dare hominibus, etiam non ab hominibus, neque per hominem.

QVI ergo dicendo nititur persuadere quod bonum est, nihil horum c. 17. trium spernens, ut scilicet doceat, ut delectet, ut flectat: oret atque agat, ut quemadmodum supra diximus, intelligenter, libenter, obedienterque audiatur. Quod cum aptè & conuenienter facit, non immerito eloquens dici potest, etsi non eum sequatur auditoris assensus. Ad haec enim tria, id est, ut doceat, ut delectet, ut flectat, etiam tria illa pertinere videtur voluisse idem Ipse Romani Author eloquij, cum itidem dixit, Is igitur erit eloquens, qui poterit parua submisè, modica temperatè, magna granditer dicere, tamquam si adderet illa etiam tria, & sic explicaret unam eandemque sententiam, dicens: Is erit igitur eloquens qui ut doceat, poterit parua submisè; ut delectet, modica temperatè: ut flectat, magna granditer dicere.

HAEC autem tria ille sicut ab eo dicta sunt, in causis forensibus c. 18.

D. Augustini de doctrina Christiana libri quarti compendium.

posset ostendere, non autem hoc in Ecclesiasticis questionibus, in quibus huiusmodi quem volumus informare, sermo versatur. In illis enim ea parua dicuntur, ubi de rebus pecuniariis iudicandum est: ea magna ubi de salute ac de capite hominum: ea verò, ubi nihil horum iudicandum est, nihilque agitur ut agat siue decernat, sed tantummodo ut delectetur auditor, inter utrumque quasi media, & ob hoc modica quasi moderata dixerunt; modicis enim modus imposuit; nam modica pro paruis abusue non proprie dicimus.

In istis autem nostris, quandoquidem omnia, maxime qua de loco superiore populis dicimus, ad hominum salutem, nec temporariam sed aeternam referre debemus, ubi etiam cauendus est aeternus interitus: omnia magna sunt qua dicimus.

C. 19.

ET tamen cum Doctor iste, debeat rerum dictor esse magnarum, non semper eas debet granditer dicere; sed submisit cum aliquid docetur, temperate cum aliquid vituperatur siue laudatur: cum verò aliquid agendum est, & ad eos loquitur qui hoc agere debent, nec tamen volunt, tunc ea qua magna sunt, dicenda sunt granditer & ad flectendos animos congruenter. Et aliquando de una eademque re magna, & submisit dicitur, si docetur; & temperate, si predicatur: & granditer, si auersus inde animus ut conuertatur, impellitur.

C. 20.

Gal. 4.

SVBMISSAE dictionis exemplum est apud Apostolum Paulum: Dicite mihi sub lege volentes esse, legem non legistis? scriptum est enim, &c.

Pertinet ergo ad docendi curam non solum aperire clausa, & nodos soluere questionum, sed etiam dum hoc agitur, aliis questionibus qua forte inciderint, ne id quod dicitur, imputetur, aut per illas refellatur, occurrere; si tamen & ipsa earum solutio pariter occurrerit, ne moueamus quod auferre non possumus.

1. Tim. 5.

In illis autem Apostolicis verbis dictio temperata est; Senioreni ne increpaueris, &c. & in illis, obsecro autem vos fratres per misericordiam Dei, ut exhibeatis corpora vestra, hostiam viuam, sanctam, Deo placentem, &c.

Rom. c. 2.

Grande autem dicendi genus hoc maxime distat ab isto temperato genere, quod non tam verborum ornatibus comptum est quam violentum animi affectibus. Nam capit etiam illa ornamenta penè omnia, sed ea, si non habuerit, non requirit. Fertur quippe impetu suo, & elocutionis pulchritudinem, si occurrerit, vix erum rapit, non curâ decoris assumit. Satis est enim ei propter quod agitur, ut verba congruentia

D. Augustini de doctrina Christiana libri quarti compendium.

non oris elegantur industria, sed pectoris sequantur ardorem. Nam si aurato gemmatoque ferro vir fortis armetur, intentissimus pugnae agit quidem illis armis quod agit, non quia pretiosa, sed quia arma sunt.

AGIT Apostolus ut pro Evangelico ministerio patienter mala huius temporis, cum solatio donorum Dei omnia tolerantur. Magna res est, & granditer agitur, nec desunt ornamenta dicendi. Ecce, inquit, 2. Cor. 6. nunc tempus acceptabile, &c. Itemque ad Romanos agit ut persecutiones huius mundi charitate vincantur, spe certa in adiutorio Dei. Agit autem & granditer & ornate. Scimus, inquit, quoniam diligenti- Rom. 8. bus Deum omnia cooperantur in bonum, &c. Ad Galatas autem quamvis tota ipsa Epistola summisso dicendi genere scripta sit, nisi in extremis partibus, ubi est cloquium temperatum, tamen interponit quemdam locum eo motu animi, ut sine ullis quidem talibus ornamentis, qualia sunt in his quae modo posuimus, non posset tamen nisi granditer dici: Dies, inquit, observatis, & menses, & annos, & tempora, &c. Ad Gal. 4.

SED Apostolica ista sic clara sunt, ut & profunda sint, atque ita conscripta, memoriaeque mandata, ut non solum lector vel auditor, verum etiam expositor opus habeant, si quis in eis non superficiei contentus altitudinem querat. Quapropter videamus ista genera loquendi in iis qui istorum lectione, ad rerum divinarum atque salubrium scientiam profecerunt, eamque Ecclesiae ministrarunt. Beatus Cyprianus submisso dicendi genere utitur in eo libro, ubi de Sacramento calicis disputat, &c. Sanctus quoque Ambrosius cum agat rem magnam de Spiritu sancto, ut cum Patri & Filio demonstret aequalem, submisso tamen dicendi genere utitur, quoniam res suscepta non ornamenta verborum, aut ad flecendos animos commotionis affectum, sed rerum documenta desiderat. c. 21.

De genere temperato est apud Cyprianum Virginitatis ista laudatio. Nunc nobis ad Virgines sermo est, &c. Ambrosius etiam genere dicendi temperato & ornato professis Virginibus proponit, tamquam sub- De Virg. l. 2.
exempli forma, quod moribus imitentur, & dicit, Virgo erat non solum corpore sed etiam mente, &c. Haec etiam propterea in exemplo generis temperati posuit, quia non hic agit, ut virginitatem voueant quae nondum voverunt, sed quales esse debeant quae iam vota sunt.

Verum ex eo quod ambo egerunt, dictionis grandis exempla memorabo: ambo quippe inuerti sunt in eas, quae formam pigmentis colorant

D. Augustini de doctrina Christiana libri quarti compendium.

De habitu Virg. *vel potius decolorant: quorum prior ille cum hoc ageret, ait inter ceteras; Si quis pingendi artifex vultum alicuius & speciem & corporis qualiter æmulo colore signaret, & signato iam consummatoque simulachro, manus alius inferret; ut iam formata, iam picta quasi peritior reformaret; grauis prioris artificis iniuria, & iusta indignatio videretur. Tu te existimas impunè laturam tam improba temeritatis audaciam, Dei artificis offensam? &c. Ille vero posterior ut in tales diceret: Hinc illa, inquit, nascuntur incentiua vitiorum, ut quasitis coloribus ora depingant, dum viris displicere formidant, & de adulterio vultus, meditantur adulterium castitatis, &c. Satis, ut existimo, apparet feminas, ne suam suavis adulterent formam, & ad pudorem & ad timorem hac facundia vehementer impelli. Proinde neque submissum neque temperatum, sed grande omnino genus hoc elocutionis agnoscimus.*

C. 22. *NEC quisquam prater disciplinam esse existimet ista miscere, imò quantum congruè fieri potest, omnibus generibus dictio varianda est. Nam quando proluxa est in uno genere, minùs detinet auditorem: cum vero sit in aliud ab alio transitus, etiamsi longius eat, decentius procedit oratio. Verumtamen, facilius submissum solum quàm solum grande diutius tolerari potest: commotio quippe animi tantò magis excitata est, ut nobis assentiat auditor, tantò minùs in ea diu teneri potest, cum fuerit, quantum satis est, excitata.*

C. 23. *In grandi genere semper aut penè semper temperata debent esse principia. Et in potestate est eloquentis, ut dicantur nonnulla submissè etiam quæ possent granditer dici, ut ea quæ dicuntur granditer, ex illorum fiant comparatione grandiora, & eorum tamquam umbris luminosiora reddantur. In quocumque autem genere, aliqua questionum vincula soluenda sunt, acumine opus est, quod sibi submissum genus propriè vendicat.*

C. 24. *NON sanè, si dicenti crebrius & vehementius acclametur, ideo granditer putandus est dicere, hoc enim & acumina submissi generis & ornamenta faciunt temperati. Grande autem genus plerumque ponderare suo voces premit, sed lachrymas exprimit. Denique cum apud Casaream Mauritania, populo dissuaderem pugnam civilem, vel potius plusquam civilem, quam cateruam vocabant; neque enim ciues tantummodò, verum etiam propinqui & fratres, postremò parentes ac filij lapidibus inter se, in duas partes diuisi, per aliquot dies continuos, certo tempore anni solenniter dimicabant, & quisque ut quem-*

D. Augustini de doctrina Christiana libri quarti compendium.

que poterat, occidebat: egi quidem granditer quantum valui, non tamen egisse aliquid me putavi, cum eos audirem acclamantes, **SED CUM FLENTES VIDEREM**: acclamationibus quippe se doceri & delectari, flecti autem lachrymis indicabant. Numquid omnes qui delectantur mutantur? sicut in grandi genere omnes qui flectuntur, agunt; & in submisso genere, omnes qui docentur, sciunt, aut credunt verum esse quod nesciunt.

VNDE colligitur illa duo genera, quod efficere intendunt, hoc eis c. 25. esse maximè necessarium, qui sapienter & eloquenter volunt dicere: Illud verò quod agitur genere temperato, id est, ut eloquentia ipsa delectet, **NON EST PROPTER SE IPSVM VSURPANDVM**. Nam cum eloquentia sit vniuersale officium in quocumque istorum trium generum, dicere aptè ad persuadendum: finis autem, id quod intenderis, persuadere dicendo. In quocumque istorum trium generum, dicit quidem eloquens aptè ad persuasionem, sed nisi persuadeat, ad finem non peruenit eloquentia. Persuadet autem in submisso genere vera esse quæ dicit. Persuadet in grandi, ut agantur, quæ agenda iam esse sciuntur, nec tamen aguntur. Persuadet in genere temperato, pulchrè ornatèque se dicere. **QVO FINE NOBIS QUID OPVS EST?** appetant eum qui lingua gloriantur, & se in panegyricis iactant; **NOS VERO ISTVM FINEM REFERAMVS AD ALTERVM FINEM**, ut scilicet quod efficere volumus cum granditer dicimus, hoc etiam isto velimus: id est, **VT BONA MORVM DILIGANTVR, VEL DEVTENTVR MALA**. Ita fit, ut etiam temperati generis ornatu non iactanter sed prudenter utamur: non eius sine contenti quo tantummodo delectatur auditor, sed hoc potius agentes, ut etiam ipso ad bonum quod persuadere volumus, adiuuetur.

ILLA itaque tria quæ suprà posuimus, eum qui sapienter dicit, c. 26. si etiam eloquenter vult dicere, id agere debere ut intelligenter, ut libenter, ut obedienter audiatur, non sic accipienda sunt tamquam singula illis tribus dicendi generibus ita tribuantur, ut ad submissum intelligenter, ad temperatum libenter, ad grande pertineat obedienter audiri: sed sic potius ut hæc tria semper intendat, & quantum potest, agat: etiam cum in illorum singulo quoque versatur. Nolumus enim fastidiri, etiam quod submisè dicimus, ac per hoc volumus non solum intelligenter, verum etiam libenter audiri. Quid autem agimus diuinis testimoniis docendo quod dicimus, nisi ut obedienter audiamur, id est, ut credatur eis, opitulante illo cui dictum est: testimonia tua credibilia

D. Augustini de doctrina Christiana libri quarti compendium.

facta sunt valde? quid etiam cupit, nisi ut sibi credatur, qui aliquid licet submisso eloquio discipulis narrat? Et quis eum velit audire, nisi auditorem nonnulla etiam suauitate detineat? nam si non intelligatur, quis nesciat nec libenter eum posse, nec obedienter audiri?

Plerumque autem dictio ipsa submissa dissoluit difficillimas questiones, & inopinata manifestatione demonstrat: dum sententias acutissimas de nescio quibus quasi cauernis, unde non sperabatur, eruit & ostendit: dum aduersarij conuincit errorem, & docet falsam esse quod ab illo dici videbatur inuictum: maximè quando adest et quoddam decus non appetitum, sed quodammodo naturale, & quando nonnulla, non iactatiuncula, sed quasi necessaria, atque ut ita dicam, ipsis rebus extorta numerositas clausularum, tantas acclamationes excitat, ut vix intelligatur esse submissa. Non enim quia neque incedit ornata neque armata, sed tamquam nuda concreditur, ideo non aduersarium neruis lacertisque collidit, & obsistentem suburit ac destruit membris fortissimis falsitatem, unde autem crebrò & multum acclamatur ita dicentibus, nisi quia VERITAS SIC DEMONSTRATA, SIC DEFENSA, SIC INVICTA DELECTAT? Et in hoc igitur genere submisso iste noster Doctor & dictor id agere debet, ut non solum intelligenter, verum etiam libenter & obedienter audiat. Illa quoque eloquentia generis temperati apud eloquentem Ecclesiasticum nec inornata relinquitur, nec indecenter ornatur: nec solum hoc appetit ut delectet, quod solum apud alios proficitur: verum etiam in iis quæ laudat siue vituperat, istis appetendis vel firmitus tenendis, illis autem vitandis vel respuendis, vult utique obedienter audiri. Si autem non auditur intelligenter, nec libenter potest. Proinde illa tria, ut intelligant qui audiunt, ut delectentur, ut obediant, etiam in hoc genere agendum est, ubi tenet delectatio principatum. Iam verò ubi mouere & flectere grandi genere opus est, auditorem; quod tunc est opus, quando & veraciter dicit & suauiter confitetur, & tamen non vult facere quod dicitur, dicendum est procul dubio granditer: sed quis mouetur, si nescit quod dicitur? aut quis tenetur ut audiat, si non delectatur? unde & in isto genere, ubi ad obedientiam cor durum dictionis granditate flectendum est, nisi & intelligenter & libenter qui dicit, audiat, non potest obedienter audiri.

e. 27.

HABET autem ut obedienter audiat quantacumque granditate dictionis maius pondus vita dicentis. Multis profuit dicendo quæ non faciunt, sed longe pluribus prodesse faciendo quæ dicunt. Abundant
eujm

D. Augustini de doctrina Christiana libri quarti compendium.

*enim qui mala vita sua defensionem ex ipsis suis Praepositis & Doct-
ribus querunt respondentes corde suo, aut etiam si ad hoc erumpunt ore
suo, dicentes, quod mihi praecepis, cur ipse non facis? Ita fit, ut cum
non obedienter audiant, qui se ipse non audit, & Dei Verbum quod eis
pradicatur simul cum ipso pradicatore contemnant.*

*IN ipso etiam Sermone MALIT REBUS PLACERE QUAM C. 28.
VERBIS, nec existimet dici melius, nisi quod dicitur verius, nec
DOCTOR VERBIS SERVIAT, SED VERBA DOCTORI.
Hoc est enim quod Apostolus ait: non in sapientia verbi, ne euacue-
tur crux Christi. Ad hoc enim valet etiam quod ait ad Timotheum,
noli verbis contendere, ad nihil enim vtile est, nisi ad subuersio-
nem audientium: Verbis enim contendere est, non curare quomodo error
veritate vincatur, sed quomodo tua dictio dictioni praeferatur alterius.
Porro qui non verbis contendit siue submisit, siue temperate, siue granditer
dicat, id agit verbis, ut veritas pateat, veritas placeat, veritas moveat,
quoniam nec ipsa quae praecepti finis & plenitudo legis est Charitas vlla
modo recta esse potest, si ea quae diliguntur, non vera sed falsa sunt. Sicut
autem cuius pulchrum corpus & deformis est animus, magis dolendus
est quam si deforme haberet & corpus: ita qui eloquenter ea quae falsa
sunt, dicunt, magis miserandi sunt, quam si talia deformiter dicerent.
Quid est ergo non solum eloquenter, verum etiam sapienter dicere,
nisi verba in submisso genere sufficientia, in temperato splendemia, in
grandi vehementia, veris tamen rebus quas audire oporteat, adhibere?
Sed qui utrumque non potest, dicat sapienter quod non dicit eloquenter,
potius quam dicat eloquenter, quod non dicit sapienter.*

*SI autem ne hoc quidem potest, ita conuersetur, ut non solum pra- C. 29.
mium sibi comparet, sed etiam praebeat aliis exemplum & sit eius quasi
copia dicendi, forma viuendi. Sunt sane quidam qui bene pronuntiare
possunt, quid autem pronuntient, excogitare non possunt; quod si ab
aliis sumant eloquenter sapienterque conscriptum, memoriaque com-
mendent, atque ad populum proferant, si eam personam gerunt, non
improbè faciunt. Sic enim quod profecto vtile est, multi Pradicatores
veritatis fiunt, nec multi magistri, si unius veri Magistri id ipsum di-
cant omnes, & non sint in eis schismata. Nec deterrendi sunt isti voce
Ieremia Propheta, per quem Deus arguit eos qui furantur verba
eius, unusquisque à proximo suo: qui enim furantur, alienum aufe-
runt: verbum autem Dei non est ab eis alienum qui obtemperant ei, po-
tiusque ille dicit aliena, qui cum dicat bene, vivit malè. Quaecumque*

D. Augustini de doctrina Christiana libri quarti compendium.

enim bona dicit, eius excogitari videntur ingenio, sed ab eius moribus aliena sunt. Eos itaque dixit Deus furari verba sua, qui boni volunt videri, loquendo quæ Dei sunt, cum mali sint faciendo quæ sua sunt. Cum verò boni fideles bonis fidelibus hanc operam commodant, utrique sua dicunt, quia & Deus ipsorum est, cuius sunt illa quæ dicunt: & ea sua faciunt, quæ non ipsi componere potuerunt, qui secundum illa compositæ viuunt.

C. 30.

SIVE autem apud populum, vel apud quoslibet iam iamque dicturus: siue quod apud populum dicendum, vel ab eis qui voluerint aut potuerint legendum est, dictaturus: oret ut Deus sermonem bonum det in os eius. Si enim Regina orauit Esther pro sua gentis temporaria salute locutura apud Regem, ut in os eius, Deus congruum sermonem daret: quanto magis orare debet, ut tale munus accipiat qui pro æterna hominum salute, in verbo & doctrina laborat? Illi verò qui ea dicturi sunt quæ ab aliis acceperunt, & antequam accipiant, orent pro eis à quibus accipiunt, ut eis detur quod per eos accipere volunt: Et cum acceperint, orent ut bene & ipsi proferant, & illi ad quos proferunt, sumant; & de prospero exitu dictionis eidem gratias agant, à quo id se accepisse non dubitant, ut qui gloriatur, in illo gloriatur, in cuius nutu sunt & nos & sermones nostri.

C. 31.

LONGIOR euasit liber hic quàm volebam quàmque putaueram, sed legenti vel audienti cui gratus est, longus non est: cui autem longus est, per partes eum legat, qui habere vult cognitum.

QUÆ posteriora S. Augustini verba non id tantum significant, ut per partes quæ sunt libri capita, separatim & otiosè liber legatur; sed siue per capita separatim, siue simul totus legatur, curet lector sic partes libri retinere, ut cum ad parandam concionem accesserit, libri partem cum parte concionis conferat & accommodet: Non est enim idem ordo libri partium & concionis; ac proinde ad ipsam praxim & vsum quotidianum quæ cuique pars parti respondeat, probè est intelligendum. Sic autem simul videntur componi posse.

PRIMUM omnium agendorum est Caput decimum quintum, vbi de orando Deo agitur; Licet itaque sint parata hic ad singulos dies omnia, vel licet tu ipse de quouis iam argumento scripseris & dixeris: quoties tamen agetur de paranda primò concione, numquam deliberes aut decernas seu generatim seu particulatim quod sis dicturus, nisi post orationem, in qua ex ani-

P R Æ F A T I O.

mo plane religioso sic probes, *qua sit voluntas Dei bona, beneplacens & perfecta*, vt non aliud quàm quod sincerè putes Deum velle, dicas; nec alio dicas modo quàm velit, nec alio fine quàm quod sic velit.

SECVNDVM, ex capite decimo octauo desumendum est, & fixe tecum statuendum, hanc esse Dei voluntatem, vt quidquid ex occurrenti Euangelio vel celebrando festo selegeris, aeternam auditorum salutem spectet, sicque tractando suscipiatur, quasi de sempiterno animorum interitu tum ageretur.

TERTIVM conformiter quarto capiti, mala sunt potiùs dedocenda, quàm docenda bona; nam in illis deferendis & maior est difficultas & maius damnum nisi deferantur: Plures sunt aduersi quos concilies, & remissi quos erigas, qua de re pòst in fine apertiùs.

QVARTVM ex eodem capite ad seligendam malis dedocendis aptiorem materiam, præter illa quæ in nostro hoc opere, tali occurrent die proposita, vel ex Euangelio, vel ex continuata dicendorum serie; possunt videri cuiusque partis indices, & opportunis verbis perlustratis, inde illa deduci, quæ non gratiora, non splendidiora, *sed utiliora in Domino videbuntur*.

QVINTVM, si aliquam ex propositis veritatibus placet eligere, cogitandum est maturè quibus vernaculè terminis possit enuntiari, & tum habendum præ oculis quod dicitur capite 28. de natiuo decore, sed magis etiam quod capitibus octauo & nono de perspicuitate dictionis.

Idem esto iudicium de forma quæ est adhibenda materiæ, seu de apta totius concionis dispositione, quam hîc vnam in omnibus ratiocinatiuam reddimus, non quòd fortè semper sit ita discurrendum; sed quod frequentius, si caput sequeris quartum, quintum, & quorquot de dicendi officiis tractant, quæ sunt docere, delectare & flectere, nihil enim ad hæc tria conuenientius; Quod & quique scriptores docent, in quibus vide Carolum Regium, qui Orator Christianus inscribitur, vbi de variis agit concionis dispositionibus, quarum hanc primam statuit vt maximè congruentem. Quia verò non ita facile cunctis occurrit, idcirco fortè ratiùs adhibetur; ac propterea constantius in illa tradenda forma hîc est elaboratum, vt quod utilius est quærere, & difficilius inuenire, præsto esset volenti; nolenti verò pro suo cuique

P R Æ F A T I O.

genio maneret liberum, formam sibi aliam præscribere, vel variare, vel obumbrare: dum tamen memor capitis decimi, quicquid proponat se dicturum, clarè intimet, distinctè, sapienter, non nimis cultè, nec incultè, non vt latinè solet in scholis proponi strictius, sed vt grauitè & moratè viros inter prudentes & maturos, quantum scilicet satis esse iudicatur ad id quod agitur, exponendum. Et verò antequam spernas hunc ratiocinandi modum, experire quid valeat; & agnosce, quantum non modo intellectui & voluntati, sed & memoriæ cum dicentis tum audientis conferat. Neque timendum est auditoris fastidium, si semper aut sæpius eundem serues dicendi modum, cum mutetur materia, & ita sæpe accadat vt vni semel assuetus auditor modo quem libenter audit, mirum quantum in eo semper acquiescat, paratoque auidè animo quod expectabat, hauriat.

SEXTVM, sic statutis illis quæ concionis antecedunt structuram, iam componatur ipsa concio, iam quod capite decimo septimo dicitur, in praxim veniat, *vt qui dicendo nititur persuadere quod bonum est, nihil horum trium spernens, vt scilicet doceat vt delectet, vt flectat: oret atq; agat vt intelligenter, libenter, obedienterq; audiatur.* Hoc autem agitur, totam ordinando concionem suas in partes. Ordinatur verò, vel solà mente, vel breui scripto, vel longiori discursu. Quocumque ex his modo fiat, breue sit semper illud quod præmitti solet ante Salutationem Angelicam. Nihil eorum attingatur quæ hîc habentur in exordiis: Sola sacra Scripturæ verba quibus proponenda Veritas continetur, religiosè proferantur, & quantum satis est ad delibanda & præmonstranda quæ dicentur, exponantur: non variis adductis sententiis aut interpretationibus; non tota Euangelij vel rei gestæ narratione, nisi sit admodum breuis; non forma seu dispositione dicendi declarata: hæc enim sunt exordij vel narrationis propria, quæ quidem concionis partes nec debent multiplicari, neque à se vel ab aliis disungi partibus. Ac proinde procœmium illud religiosè quidem & grauitè, sed non profusè producat, nec in ipsam penetret altius rei dicendæ materiam, ne quid sit repetendum.

Quando hîc itaq; designatum est primum punctum, quidquid tùm exponi solet antequàm fusiùs denuntietur & declaretur Veritas, locum habet exordij, cui vix aliquid detrahi possit, at verò

P R Æ F A T I O.

addi nonnihil deceat, dum sit aptum, breue, concinnum, qualis esset Psalmi versiculus, sacrum prouerbium, propheta grauis sententia, cohærens denique scripturæ locus, vnde in dicenda sit procliuius & expeditus aditus. Atque hîc illud quod breuiter capite quarto commendatur de auditorum attentione & beneuolentia, breuiter etiam expediatur: satis enim se ipsa quæ proponitur veritas, auditori conciliat.

Q V Æ porro sequitur ex eodem primo puncto, declaratio veritatis, primam duntaxat propositionem continet exponendam, quæ cum plerumque sit magis vniuersalis quàm sequens, magis etiam docendi munus exercet, & submissum dicendi genus, de quibus multa sunt capita, quorum illud numquam de memoria vel ex oculis effluat, quo dicendi ornatus temperatur, seu temperandus, & ad finem qui est salus animæ tantum vsurpandus, commendatur; quod quidem ita commendatum sibi persuadeat Christianus concionator, vt bonam quæ ab eo exigitur in adimplendo prædicatoris officio fidelitatis partem, hoc vno vel maximè credat consistere. Si nimius enim sit iste ornatus, non spectabit tantummodo finem propositum: si quid autem aliud spectet, vix aut ne vix ipsum intendet finem, quia illò aliò quod sibi simul inordinatè proponit, hic finis etiam rectè propositus sit obruetur, vt planè desinat esse rectus. *Nemo potest*, inquit sanctus Chrysostomus, *finem prædicationis assequi nisi popularem auram aspernetur. Et profecto abundans*, ait idem, *illi fuerit laboris solatium, idemque omnium ceriè maximum, si sibi ipse conscius esse potuerit ad hanc se rationem, doctrinam eloquentiamque suam composuisse atque adaptasse, vt Deo illa placens acceptaque fiat.* L. 5. de Sacerdotio
L. 6.

SEPTIMVM, in secundo puncto quo secunda propositio demonstratur, assurgat quidem paulò altiùs oratio, sed simul premat strictiùs auditorem in particulari casu proposito, dilucidèque fiat quod habent capita decimum & vndecimum, *qui audit, verum audiat, & quod audit ita intelligat*, vt sibi dictum non dubitet; *appareat quod latebat*, nempe inclusum vlcus, deprauata cupiditas, error oppositus veritati, pauenda inde perniciēs. Atque illa duo puncta sunt instar narrationis cuiusdam quâ intelligenter edocetur Auditor, suauiterque paratur ad assensum totius Veritatis, quem exigit in Tertio puncto, tertia quæ ex aliis

PRÆFATIO.

infertur Propositio, quæ est ipsa Conclusio seu Veritatis euidentia, quæ apertè prodit ex collecto in vnum breui complexu totius ratiocinationis expositæ, quam si placet firmitus confirmare, placeat & quod habet caput vigesimum, vt potenter refellantur quæ contra possent objici: & quod de grandi genere mouendis apto cordibus passim est dictum, hic potissimum adhibeatur, hic illæ obsecrationes & increpationes, concitationes & coercitiones, de quibus vniuersim primis capitibus, & particulatim vigesimo, vigesimoque primo, cùm ex Apostolo, tum & sanctis Doctoribus.

Quod vt fiat etiam efficacius, si fortè non in ipso discursu satis intellexisset Auditor se in causa inuolutum seu in proposita veritate, damnisque consequentibus, hic vel apertè intelligat sentiatque prorsus sua multum interesse quod dictum est: agnoscat sibi deesse illud quod suadetur, aut id inesse quod dissuadetur: agnoscat quæ inde sibi vel iam in præsentì vita, vel in morte ac iudicio, coramque Deo verè immineant damna, pericula, detrimenta. Pudeat eum suæ circa hoc dementiæ: pæniteat suæ negligentæ, suæ culpæ, proponatque seriò resipiscentiam. Nihil alioquin aut vix quidquam efficies: nec quantumuis bonum aut malum sit illud quod proponitur, nisi se Auditor priuatum illo bono vel affectum malo sentiat: aut nisi quid damni ex illa boni priuatione vel mali affectione timeat, nil persuadebis. Quamobrem quod supra dictum est de malis dedocendis, hic etiam atque etiam in primis habe, vt quàm fieri frequentissimè possit, ex multis quæ dicenda occurrent, id feligas potiùs, quod sit dissuadendum quàm quod persuadendum. Nam vniuersim loquendo, faciliùs dissuademur à malis, quàm ad bona suadeamur, faciliùs permouemur ad cauenda damna, quàm ad commoda quædam comparanda. Cum enim in vtrisque sit difficultas, non ita difficultatem perrumpit futuræ commoditatis persuasio, quàm imminentis damni siue periculi dissuasio. Tunc nempe natura minùs resistit gratiæ, quando cedit causa resistendi, quæ resistendi causa cùm in timore difficultatis seu pænæ subeundæ sit ordinariè posita, timor hic timore grauioris mali quod intentatur facile vincitur. Sic iam audiuiisti sanctum Augustinum dicentem sibi nihil vnquam dicendo felicius accidisse, quàm cùm aliquorum vitium dissuasisset. Sic dum accuratè legeris sanctum Chry-

PRÆFATIO.

sofotomum, in hoc vno præsertim illum esse Chrysofotomum, & illum esse discas, quem propterea Christianus prædicator imitetur, si velit esse Christianus prædicator.

Et verò in fine post vehementiores motus, adhiberi possent lenes, quibus emergendi via patefiat, difficultates explanentur, spes detur & confidentia, si tantum hoc aut illud abstineant vel sustineant auditores, quod facillimè, si velint, poterunt cum diuina gratia: debet autè velle pro rei de qua dictum est grauitate. Sic Amos ille Propheta cuius vehementiam affectus exposuit octauo capite S. Augustinus, paulò post admodum suauiter: *Ecce dies veniunt, dicit Dominus, & comprehendet arator Messorem, & calcator vine mittentem semen; & stillabunt montes dulcedinem & omnes colles culti erunt. Et conuertam captiuitatem populi mei Israël, &c.* Sic alius post multa grauitè dicta: *Conuertimini & agite penitentiam, & non erit vobis in ruinam iniquitas. Et quare moriemini Domus Israël, quia nolo mortem morientis, dicit Dominus Deus, reuertimini & viuite.*

Sic ipse Christus Dominus nullibi vnquam suauius quàm vbi dixit grauius: *Va tibi Corozaim, va tibi Betsaida! Et tu Capharnaum, numquid vsque in calum exaltaberis? vsque in infernum descendes.* Quid his & aliis adiunctis similibus potest esse grauius? At quid his suauius quæ post addit, *venite ad me omnes qui laboratis & onerati estis, & ego reficiam vos.*

Si tamen ad conuersionem minus flecti viderentur animi, vel ad pietatem emolliri, ne tunc quidem esset neganda suauitas, sed quæ deploraret potius mala imminèntia quàm quæ nulla mala prædiceret. Talis est illa Christi Domini comploratio post tam multa coniecta in Iudæos anathemata, quæ leguntur Mathæi vigesimo tertio: *Ierusalem, Ierusalem qua occidis Prophetas & lapidas eos qui ad te missi sunt, quoties volui congregare filios tuos, quemadmodum gallina congregat pullos suos sub alas & noluit? Ecce relinquetur vobis domus vestra deserta.*

Sic metum inter & spem coniecti Auditores sunt dimittendi, vt metu à malo, & spe ad bonum conuertantur. Atque ita quod commendat dilectus discipulus, *Cooperatores simus omnes veritatis.* 3. Ioan.

Hic est vnicus finis, & scopus totius huius operis, de cuius partitione restat aliquid dicere.

PARTITIO TOTIVS OPERIS.

IN quatuor diuisum partes totum hoc esse opus iam ex præ-

PRÆFATIO.

mo limine patuit, quæ quidem distinctæ partes sicut numero rerumque tractandarum proprietate, quatuor anni conveniunt tempestatibus, ita & ipso nomine designantur, servatis iisdem prorsus regulis & statutis quæ ab Ecclesia sunt ordinata.

PARS PRIMA, quæ pars est hyemalis, à prima Dominica Adventus vsque ad Septuagesimam, tribus his fermè conclusa mensibus, Decembri, Ianuario & Febuario, refert ex vita Christi quicquid ab illo gestum narratur in Euangeliiis, vsque ad sermonem de Beatitudinibus in monte habitum.

Deinde verò Sanctorum dies festos, qui tum incidunt, exhibet; Ac postremo quæ sunt communes diuersis Sanctorum ordinibus Considerationes seu Veritates proponit.

PARS SECUNDA, pars verna, tribus his ordinariis affixa mensibus, Martio, Aprili & Maio, ducit initium à Dominica Septuagesimæ, repræsentatque mysteria patientis Christi, resurgentis, ascendentis in cœlos, & descendentis Spiritus sancti, nec proinde finitur, nisi cum Paschali tempore, Sabbato quod præcedit Dominicam sanctissimæ Trinitatis, quæ est prima post Pentecosten.

Tum Sanctorum festi dies qui ad illam spectant partem, memorantur; Ac communes variis statibus proponuntur Veritates, quas in suo commodiùs indice licet intueri.

PARS TERTIA, pars æstiva, tres complexa menses, Iunium, Iulium, Augustum, à Dominica Sanctissimæ Trinitatis ad Decimam quintam post Pentecosten, resumit seriem Euangelicæ narrationis ab illo sermone Domini, quem in monte habuit; & colendos Sanctorum dies illis ascriptos mensibus celebrat; quibus & communes Religioso statui considerationes adjicit.

PARS QUARTA, pars Autumnalis, tribus qui restant definita mensibus, Septembri, Octobri & Nouembri, quicquid etiam superest de Vita Christi Sanctorumque gestis commemorat; & si quæ plura proprio designabuntur indice.

Duplex unicuique parti connexus est index: alter dierum, alter rerum: Tertius verò in fine totius operis additur, qui Veritates eo proponat ordine, quo per tres illas, quas vocant, perfectionis vias, acquiri faciliùs & aptiùs usurpari possint, siue ad proprium, siue ad proximi, cum Diuina gratia, spiritualem profectum.

SVMMA PRIVILEGII REGIS CHRISTIANISSIMI.

CAutum est auctoritate Regis, ne quis in Regno suo, aliisue locis suæ ditioni subiectis, intra nouem proximos annos, librum qui sic inscribitur, *Veritates Practicae, opus à P. Iuliano Hayneusue Societatis Iesu, compositum* absque Richardi Lallemant Illustrissimi Archiepiscopi Rothomagensis & Collegij Societatis Iesu Typographi permissu imprimat, aut diuendat, à die publicationis horum exemplarium. Qui secus fecerit, multa indicta, prout amplius in deplomate Regio continetur, coercebitur. Datum Genabi, die 8. Aprilis 1652. Signatum, LE BRVN.

Hæc prima Editio absoluta fuit 15. Maij 1652. à Laurentio Maurry Typographo Archiepiscopali.

APPROBATIO DOCTORVM.

EGo infra scriptus, *ANTONIUS GAVLDE* Presbyter, Domus ac Societatis Sorbonicæ Doctor, Ecclesia Rothomagensis Præcentor & Canonicus, nec-non Illustrissimi ac Reuerendissimi in Christo Patris ac Domini D. Francisci Archiepiscopi Rothomagensis, Normaniæ Primatis, in Spiritualibus ac Temporalibus Vicarius Generalis, testor hunc librum qui Authore Patre Iuliano Hayneusue Societatis Iesu Sacerdote, *VERITATES PRACTICAE*, Inscribitur, non modo nihil continere repugnans orthodoxæ fidei, & bonis moribus: sed valde pium esse, & vtilem: atque omnes, quæ in eo continentur, Veritates, verè dignas esse quæ legantur, considerentur, & prædicentur. Datum Rothomagi, in Palatio Archiepiscopali, anno Domini millesimo sexcentesimo quinquagesimo secundo, die verò Martij vndecimâ.

GAVLDE
Vicarius Generalis.

Idem testor.

FRATER CHRISTOPHORVS CASTEL
Doctor Theologus Ordinis FF. Prædicatorum.

FACULTAS SUPERIORVM.

EGo Claudius Delingendes Societatis Iesu in Prouincia Franciæ Præpositus Prouincialis, potestate ad id mihi ab admodum Reuerendo Patre nostro Francisco Piccolomineo Generali Præposito factâ : facultatem concedo, vt opus inscriptum, *VERITATES PRACTICAE, ex vita Domini Iesu, sanctorumque gestis, in singulos anni dies*, à P. Iuliano Hayneufue eiusdem Societatis Iesu Sacerdote compositum, & ab aliquot patribus eiusdem Societatis lectum & approbatum, typis mandetur. In quorum fidem has literas manu nostra subscriptas & sigillo nostro munitas dedimus. Parisiis, sexto Aprilis 1651.

CLAVDIVS DELINGENDES.

EGo Idem Præpositus Prouincialis, Societatis Iesu, iuxta Priuilegium eidem Societati à Regibus Christianissimis Henrico III. 10. Maij 1583. Henrico IV. 20. Decembris 1606. & Ludouico XIII. 14. Februarij 1611. concessum, quo Bibliopolis omnibus prohibetur, ne libros ab hominibus nostræ Societatis compositos, absq; Superiorum eius permissione imprimant, permitto Richardo Lallemant, Illustrissimi Archiepiscopi & Collegij Rothomagensis Typographo, vt opus quod inscribitur, *VERITATES PRACTICAE*, à Patre Iuliano Hayneufue Societatis Iesu Sacerdote compositum, ad decem proximos annos imprimere ac liberè diuendere possit. Datum Rothomagi, decimo Augusti 1651.

CLAYDIVS DELINGENDES.



INDEX VERITATVM

IN SINGVLOS DIES, PRIMÆ PARTIS.

DOMINICA PRIMA ADVENTVS. *Ad*

Euangelium de extremo iudicio.

Nemo Christianus Christi iudicio condemnabitur, nisi
qui prius suo Christū iudicio condemnauerit. pag. 1.
Primus Christi Aduentus mundano tam timendus quam
secundus.

Tam formidandum Mundo præsepe Christi nascentis,
quàm Tribunal iudicantis. 5.

Nihil in futuro iudicio magis metuendum peccatori,
quàm quòd minùs metuit. 13.

Sicut ad secundum Christi Aduentum renouabitur
mundus, ita modo animus noster æquè est renouan-
dus. 14.

*Hac hebdomade in considerationem veniunt eæ Personæ, quæ pro-
piùs spectant & attingunt Mysterium Incarnationis Christi
Domini.*

FERIA 2. *De Æterno Patre Filium nobis dante.*

Sic Deus dilexit Mundum, vt sic Mundus diligeret
Deum, sicut dilectus est. 17.

FERIA 3. *De Filio seipsum offerente.*

Quam in se attrahit gratiam qui se Deo libens offert,
eamdem sibi detrahit qui quod offert, non reddit.

20.

FERIA 4. *De Spiritu sancto, quantum ad opera-*

ū ij

tionem Mysterij Incarnationis.

Nulla in re frequentiùs Spiritui sancto resistitur, quàm
quòd infrequentiùs de Christo cogitatur. 24.

*FERIA 5. De desiderio Sanctorum Patrum circa
Aduentum Domini.*

Vix ullus est qui non se vere putet desiderare Christum,
& vix ullus est qui Eum verè desideret. 27.

*FERIA 6. De Sanctissima Virgine Maria Matre
D. N. Iesu Christi.*

Sicut omnis à Maria respectus, impossibile est vt pereat:
ita omnis ab ea despectus, necesse est vt intereat. 32.

*SABBATO. De S. Iosepho, Sponso Virginis Ma-
tris. Ad illud Gen. 41. Ite ad Ioseph.*

Melius itur ad Sanctum Ioseph, imitatione virtutis
eius quàm laude. 33.

*DOMINICA 2. ADVENTVS. Ad Euan-
gelium de S. Ioanne Baptista laudato à Christo
Domino, quòd esset propheta & plusquam pro-
pheta.*

Hoc est verè laudabile, laudari ab officio.

Ad hæc Verba, Ioannes in vinculis.

Liberior & beatior est Ioannes in vinculis quàm Hero-
des in epulis.

Multi cum Herode Ioannem in vinculis tenent.

Beatus qui non fuerit scandalizatus in me.

Sicut scandalizans, ita peccat scandalizatus.

*Hac hebdomade consideratur Annuntiatio Angelica, vbi sex gra-
dus humilitatis annotantur.*

FERIA 2. De primo gradu humilitatis, qui ex his

verbis ducitur : MISSVS EST GABRIEL ANGELVS A DEO.

Nulla re homo quantumuis gloriosa, gloriari potest. 50.

FERIA 3. De secundo humilitatis gradu, ad hæc Angeli verba : AVE GRATIA PLENA DOMINVS TECVM.

Nulla res est in humanis verè gloriosa. 53.

FERIA 4. De tertio humilitatis gradu, qui apparet in turbata Virgine ad laudes suas.

Ad laudes nostras, tremere potius conuenit, quàm exultare. 56.

FERIA 5. De quarto humilitatis gradu, considerando in his Mariæ ad Angelum verbis. QVOMODO FIET ISTVD, QVONIAM VIRVM NON COGNOSCO.

Humilitas ita pugnat cum honoribus, vt non repugnet obedientiæ. 59.

FERIA 6. De quinto humilitatis gradu, qui est maximè proprius Beatissimæ Virgini dicenti se ancillam Domini.

Quò quis est maior, eò & humilior. 62.

SABBATO. De sexto humilitatis gradu in Verbo Incarnato.

Se anteponit Christo, qui se omnibus non postponit. 65.

DOMINICA 3. ADVENTVS. Testimonium S. Ioannis Baptiste de Christo Domino.

Quàm benè de Christo humilis, tam malè meretur arrogans. 69.

Ad hac Euangelij verba. TV QVIS ES?

Tres hominum status ad perfectionem tendentium, his tribus verbis, TV QVIS ES: eò valde promouentur. 72.

Ego vox clamantis in deserto.

Vox clamantis in deserto post peccatum, peccati conscientia peccatori audienda. 75.

Hac hebdomade consideratur Verbum Incarnatum residens in utero Virginis Matris. Varij eius status sub numero septenario sigillatim in dies recensentur. Vnde Veritates Practicæ ad Amoris Diuini gradus & effectus pernosceudos eruuntur.

FERIA 2. Septem præcipui tituli quibus Christus Dominus dignosci potest.

Affectu potius quàm studio Christus cognoscitur. 79.

FERIA 3. Septem singulares perfectiones verbi Incarnati residentis in utero Virginis Matris, quæ singularem à nobis dilectionem exigunt.

Aurum ignitum est amor Christi, in quo non tam ardor quàm puritas quæritur. 82.

FERIA 4. Septem donorum Spiritus sancti plenitudo in Verbo Incarnato.

Si spiritu viuimus, spiritu & ambulemus. 86.

FERIA 5. Septem ordinariæ infirmitates infantium, quas in utero pati voluit verbum Incarnatum.

Non viuitur in amore Christi, sine dolore. 90.

FERIA 6. Septem virtutes quas Christus Dominus in utero Virginis Matris exercuit.

Nunquam est Dei amor otiosus. 94.

SABBATO. Septem virtutes præcipuæ in cultum & amorem verbi Incarnati exhibenda.

Amor non nisi amore compensatur.

97.

DOMINICA 4. ADVENTVS, & tota seq.

hebdomada: De preparatione ad gratias Nascentis Christi Domini recipiendas: Iuxta illud Evangelij, PARATE VIAM DOMINI. Ista preparatio fit per virtutes & veritates oppositas septem capitalibus vitiis. Ac primum hodie de Temperantia quæ opponitur vitio gula, seu vita laxiori, & quæ satis evidenter apparet in S. Ioanne Baptista commorante in deserto & penitentiam predicante.

Sibi, non Domino viuit, qui temperatè non viuit. 102.

Licet omni peccatori sit necessariò pænitendum: vix tamen vllus est, qui necessariam agat pænitentiam. 105.

Erunt praua in directa & aspera in vias planas.

Sic facta sunt aspera in vias planas, vt tam iucundè per aspera, quàm per plana viuamus. 109.

Maius est Christi beneficium, amaritudines nobis reliquisse amabiles, quàm nullas nobis reliquisse. 111.

Aut non amatur Christus, aut amatur asperitas. 112.

Cui nimis adhuc durum videtur pati pro Christo, nimis etiam durum videtur amare Christum. ibid.

In propria venit, & sui eum non receperunt.

Non minus modo quàm olim Christus in propria venit, nec sui magis eum recipiunt. 114.

FERIA 2. *De diligentia seu deuotione quæ est opposita vitio Acedia, & quæ apparet in B. Virgine, abeunte in montana cum festinatione.*

Quicquid offerendum Deo sciet vera Deuotio, differre nesciet.

119.

FERIA 3. De Charitate quæ est opposita vitio invidia: Et quæ apparet in B. Virgine salutante cognatam suam Elisabeth.

Charitas alienis bonis gaudet vt propriis.

FERIA 4. De humilitate quæ est opposita superbiæ: Et quæ apparet in his S. Mariæ verbis: MAGNIFICAT ANIMA MEA DOMINUM.

Quantò se humilis minorem facit, tantò magis magnificat Deum.

FERIA 5. De Virtute quæ est opposita vitio Auaritiæ. Ad hæc Virginis Matris verba, ESURIENTES IMPLEVIT BONIS, ET DIVITES DIMISIT INANES.
Omnis copia quæ Deus non est, egestas censenda est.

129.

FERIA 6. De Castitatis custodia, exemplo sanctissimæ Virginis, quæ ante partum Elisabeth reuersa est in domum suam.

Securior est castitatis victoria fugiendo, quàm pugnando.

132.

SABBATO. Et in vigilia Natiuitatis. De Mansuetudine quæ est iræ opposita, Et quæ in sancto Iosepho clarè elucet.

Mansuetudo parat hospitium Christo venturo.

136.

In nocte Natiuitatis Domini. ET RECLINAVIT EUM IN PRÆSEPIO, QVIA NON ERAT EI LOCUS IN DIVERSORIO.

Aut Christus fallitur, aut mundus errat.

140.

In die Natalis Domini. MAGNIFICATVS EST REX PACIFICVS

*PACIFICVS SUPER OMNES REGES VNIVERSAE
TERRAE.*

Christus in præsepi, & Christianus in humilitate, magis
magnificatus est quàm Salomon in throno suo. 144.

*In Festo S. Stephani. STEPHANVS PLENVS GRATIA
ET FORTITVDINE, &c.*

Iniuriam infert gratiæ maximam, qui pro ferenda iniu-
ria non certat fortiter. 149.

*In Festo S. Ioannis Apostoli & Euangelista. DISCI-
PVLVS QVEM DILIGEBAT IESVS.*

Qui diligit cordis munditiem, habebit amicum Regem.
Prou. 22. 153.

*In Festo SS. Innocentium. HERODES IRATVS OCCI-
DIT OMNES PVEROS QVI ERANT IN BETHLEEM.*

Inimici nostri magis prodesse possunt odio, quàm pro-
fuissent obsequio. 157.

*DOMINICA INFRA OCTAVAM NA-
TIVITATIS. Ecce positus est hic in ruinam
& in Resurrectionem multorum in Israël.*

Vel nouus homo Christus, veteris nostri hominis est
ruina: vel vetus noster homo ruina est nascentis ho-
minis. Alteruter alterius est ruina. 160.

Triduo sequenti de Pastoribus.

*DIE 29. DECEMBRIS. De celeri pastorum profectio-
ne ad præsepe Domini.*

Sicut discursum nostri intellectus statim sequi debet
affectus voluntatis; ita & affectum effectus seu exe-
quutio. 162.

*DIE 31. DECEMBRIS. De reditu pastorum & relatione
eorum quæ audierunt & viderunt.*

Ne quid nimis, aut quid minus cum proximo. 170.

*DIE 1. IANVARIJ, ET ANNI. In Circumcisione
Domini. De nomine Jesu, & de pura intentione
renouanda.*

*De pretio Nominis Iesu, tantò plus circumciditur &
nobis deperit; quantò minùs perfectè nos circumci-
dimus.*

*Discedat ab iniquitate omnis qui nominat nomen Do-
mini. 2. Tim. 2.* 179.

*Quanta est modò nobis obligatio ad non suscipiendam
circumcisionem legalem, tanta est ad suscipiendam
spiritualem.* 182.

*Triuo sequenti. De tribus puræ intentionis conditionibus, quæ ex
effectis antiquæ circumcisionis eruuntur.*

*DIE 2. IANVARIJ. Quæ est Octaua S. Stephani, de
prima conditione puræ intentionis ut sit pura à
peccato.*

Non sunt facienda mala ut eueniant bona. 184.

*DIE 3. JANVARIJ. Quæ est Octaua S. Joānis Euang.
De secunda conditione puræ intentionis, ut stu-
dium continuum reprimendæ concupiscentiæ com-
prehendat.*

*Totius difficultatis de pura intentione solutio, studium
est continuum reprimendæ concupiscentiæ.* 189.

*DIE 4. IANVARIJ. Quæ est Octaua SS. Innocentiū.
De tertia conditione puræ intentionis, ut sit uni-*

uersim in omnibus.

Aut nullam vitæ partem, aut totam Deo debes. 194.

DIE 5. IANVARI. Quæ est Vigilia Epiphaniæ. De stella tribus magis apparente.

Dum lucet, ambulandum; ne tenebræ fiant. 197.

DIE 6. IANVARI. In Epiphania Domini. De Christo Rege à Magis adorato cum oblatis muneribus.

Non nisi tribus oblati concupiscentiis Rex Christus recognoscitur. 201.

Non à magno Regno Rex magnus, Christus ita est prædicandus, quàm à magno Rege, magnum eius Regnum. 206.

Quocumque die sequentium occurrat Dominica prima post Epiphaniam, habetur infra, die 12. propria eius meditatio.

DIE 7. IANVARI. De reditu Magorum in patriam suam, per aliam viam.

Non aliud, sed aliter. 212.

DIE 8. IANVARI. De præsentatione pueri Iesu in templo, & Purificatione Virginis Matris.

Non quid liceat, sed quid magis expediat. 215.

DIE 9. IANVARI. De occurſu Simeonis in templo, & de iis quæ ventura Christo ac Virgini Matri prædixit.

In pace amaritudo, & pax in amaritudine. 220.

DIE 10. IANVARI. De fuga sancti Ioseph in Ægyptum.

Non cōtristabit iustū quicquid ei acciderit. *Prou. 12. 223.*

DIE II. IANVARI. De reditu ab Ægypto in Nazareth.

Meliore rerum statu non magis gaudet iustus, quàm deteriore doluit.

227.

DIE 12. IANVARI. De Triduana commoratione pueri Iesu duodennis in templo.

Sensitiuæ deuotionis subtractio, veræ & solidæ deuotionis est probatio.

231.

Nemo iam Christum amittit, nisi qui dimittit.

Nemo tibi Christum auferre potest, nisi te illi auferas.

234.

EODEM DIE, De mansione Nazarethana & subiectione D. Iesu, usque ad annum trigesimum.

Nisi te subdas Deo, Deum tibi subdis.

235.

DIE 13. IANVARI. Quæ est Octaua Epiphaniæ. De Baptismo Christi D.

Exemplo suo Christus nos magis vrget quàm Imperio.

238.

Quocumque deinceps die occurrat Dominica 2. post Epiphaniam, illi standum, prætermisiss aliis antecedentibus Feriis.

DIE 14. IANVARI. De solitudine Christi D. per quadraginta dies in deserto.

Nemo securè apparet, nisi qui libenter latet.

Nemo securè loquitur, nisi qui libenter tacet.

242.

DIE 15. IANVARI. De tentationibus Domini.

Nemo periculose magis tentatur, quàm qui se non putat tentatum.

247.

DIE 16. IANVARI. Ad hæc S. Ioannis de Christo D. ECCE AGNVS DEI, &c.

Iniuriosum est Christo, Agno Dei, si nulli quidem velis inferre iniuriam, nolis tamen illatam ferre. 251.

DIE 17. IANVARI. Ad hac primorum Christi D.

Discipulorū verba, MAGISTER VBI HABITAS?

Qui dicit se in ipso manere, debet sicut ille ambulauit, & ipse ambulare. 256.

DIE 18. IANVARI. De Christo Domino communicato, seu de conuocatis aliis ad ipsū Discipulis.

Nemo magis sibi Christum seruat, quàm qui minus sibi soli seruat.

Nemo minus sibi Christum seruat, quàm qui magis sibi soli seruat. 260.

DIE 19. IANVARI. Ad hac Christi D. de Nathanaële verba, ECCE VERE ISRAELITA, IN QVO DOLVS NON EST?

Veras virtutes magis times quàm amas. 265.

DOMINICA 2. POST EPIPHANIAM,

De aqua in vinum mutata, à Christo D. ad nuptias inuitato.

Si vis quod non habes, da quod habes. 269.

Sicut in tristibus, sic in lætis; sicut in aduersis, ita in prosperis, aduocandus est Iesus. 274.

Non est magis fidendum humano gaudio quàm homini mentienti. 275.

Hac hebdomade quæ diuersa occurrunt ex Euangelica serie consideranda, eò præcipuè tendunt, ut affectus humanos ratione & gratia discamus regere.

FERIA 2. De prima Christi D. predicatione, in Ciuitate Nazareth habita, & à ciuibus malè accepta.

Si ad humanam gratiam diuina postulas, diuinam ipsam repellis gratiam. 277.

FERIA 3. De altera vocatione Apostolorum.

Magis tenemur omnes affectu nostra relinquere, quàm effectu Apostoli. 280.

FERIA 4. De damone immundo eiecto ab homine.

Non tam à damone quantumuis immundo, immunda fit anima, quàm à seipsa. 285.

FERIA 5. De socru petri febricitante & sanata à Christo D.

Febris animi, animo longè periculosior, quàm febris corporis, corpori. 288.

FERIA 6. De prädicationibus Domini vniuersim consideratis.

Si quid nos reuocat à Doctrina Christi, vel ob id maxime recipienda est. 291.

SABBATO. De his Petri verbis ad Dominum: PRÆCEPTOR PER TOTAM NOCTEM LABORANTES NIHIL CEPIMVS.

Nisi diligenter aduertas, stulto labore consumeris. 295.

DOMINICA 3. POST EPIPHANIAM.

De leproso mundato.

Non dixeris, per Deum abest. Ecclesi. 15. 301.

Pleræque aliæ veritates ad idem Euangelium referuntur. 305.

Hac hebdomade iuxta verbum Domini ad leprosum, VADE, OSTENDE TE SACERDOTI, &c. sex referuntur, de quibus conueniendus est unicuique sacerdos vel director.

FERIA 2. De aduendo sacerdote seu direttore pro

sana & recta conscientia in dubiis sibi formanda.
Multorum est conscientia cauteriata & peruersa, nisi se
sinant dirigi. 307.

*FERIA 3. De recurſu ad ſacerdotem pro rite obeun-
da confeſſione.*

Quod magis confert ad faciendam confeſſionem, mi-
nus efficitur, niſi cum ſacerdote prius conferatur.

312.

*FERIA 4. De neceſſitate recurrendi ad Sacerdotes
pro remediis ſpiritualibus.*

Ne dicas, ſufficiens mihi ſum. *Eccleſi. II.* 316.

*FERIA 5. De conſulendo Sacerdote pro bonis operi-
bus faciendis.*

Grande malum propria voluntas, quæ ſe in bono benè
faciendo non finit dirigi. 319.

*FERIA 6. De ſinceritate qua requiri debet Sacerdos
ad participanda eius ſacrificia, ſive ad quiduis
aliud cum ipſo communicandum.*

Væ duplici corde. *Eccleſi. 2.* 324.

*SABBATO. De conueniendo ſacerdote pro debito uſu
ſacræ communionis.*

Suam ille veſtem nuptialem recuſat induere, qui recu-
ſat inſtrui de debito Sacramenti uſu. 329.

DOMINICA 4. POST EPIPHANIAM.

De ſedata maris tempeſtate, imperio Chriſti.

Non quia mala ſunt, perturbamur in aduerſis: ſed quia
perturbamur, aduerſa mala ſunt. 334.

Domine ſalua nos, perimus.

Peregrinantis in corpore animæ maius est periculum,
quàm periclitantis in naui corporis. 339.

Designantur & alia quædam opportuna huic Euange-
lio. 343.

*Hac hebdomade, in historia paralytici sanati apud Capharnaum
consideratur progressus quidam vitæ spiritualis per tres perfe-
ctionis acquirendæ vias.*

*FERIA 2. De paralytico summisso per tegulas in con-
spectum Domini; & de primo vitæ purgatiue gra-
du, quo impedimenta perfectionis quantocumque
perfringuntur.*

Quo longius differes, difficultatem longius tolles. 344.

*FERIA 3. De remissis paralytico peccatis: & de ra-
tionabili sollicitudine circa nostrorum remissionem.*

Sicut non est habenda sollicitudo anxiosa & scrupulosa de
peccatis remissis, ita rationabilis non est deponenda.
348.

*FERIA 4. De cogitationibus phariseorum detectis à
Christo D. & de nostris ad virtutem perfecte diri-
gendis.*

Nisi, quod monet Sapiens, omni custodia serues cor
tuum, non omnino seruas. 354.

*FERIA 5. De integra sanitate paralytici portantis
lectum à quo portabatur: & de nostro progressu
spirituali qui in eo figuratur.*

Tantum proficies, quantum à te deficies. 359.

*FERIA 6. De perfecta paralytici obedientia: & de
ea quæ dicitur obedientia charitatis, quæ perfe-
ctam*

etiam cum Deo facit unionem.

Est quidem certum in charitate unionem esse perfectionis ; sed non est certò dicenda hæc Charitas neque hæc unio, nisi in obediētia quæ dicitur Charitatis. 364.

SABBATO. De magnificato post miraculum, ab omnibus, Deo : Et à nobis semper magnificando in omnibus.

Si non semper, nunquam magnificas Deum. 369.

DOMINICA 5. POST EPIPHANIAM.

De zizaniis in medio tritici seminatis, quæ Christus ipse Dominus declaravit esse malos hic viuentes inter bonos.

Sicut non sunt amanda vitia propter amicos homines : sic non sunt odio habendi homines propter eorum vitia. 363.

Multæ aliæ veritates ad idem spectantes Euangelium indicantur. 375.

Hac hebdomade occurrit consideranda vocatio S. Mathæi Apostoli, unde eruntur sex veritates, quæ spectant ad singularem vniuscuiusque vocationis statum, ut in eo sua saluti et perfectioni commodè vacet.

FERIA 2. De S. Mathæi nostraque vocatione, in qua est salutis nostræ summa.

Salutis animæ nulla est certior certitudo, quàm in certo vocationis gradu attingendo. 379.

FERIA 3. De gratitudine animi pro beneficio vocationis.

Gratitudo animi nulla formari potest digna beneficio vocationis, nisi se animus dignè cōformet vocationi. 386.

FERIA 4. De perfecta mortificatione secundum propriam cuiusque vocationem.

Non est minus perfectæ mortificationis, bene vti rebus, quàm omnino non vti. 391.

FERIA 5. De bono sensuum seu sensualium usu, ex propria cuiusque vocatione.

Si quid interdum sensibus licitè indulgetur; non ut sensuale est, sed ut est licitum, accipiendum est. 395.

FERIA 6. De preparatione animi ad qualibet aduersa, in vocatione, ferenda.

Nisi probè paratus sis ad aduersa, nec ad ipsa prospera benè paratus es. 400.

SABBATO. De puritate & excellentia Christiana religionis in quocumque viuendi statu.

Sicut à veteri lege, sic à veteri homine, unicuique Christiano est abstinendum. 404.

DOMINICA 6. POST EPIPHANIAM.

Parabolæ grani sinapis & fermenti, quibus veritates Euangelicæ designantur.

Quò tibi veritates Euangelicæ minùs dignæ apparent, quæ considerentur; hoc ipso magis sunt considerandæ. 411.

Huic affines & Euangelio conformes aliæ producuntur veritates. 416.

Hac hebdomade Mystéria quæ occurrunt considerata continent sex Christi D. titulos seu qualitates consideratione dignissimas.

FERIA 2. De primo Domini in templum ingressu, unde eiicit vendentes, & ubi se ostendit summum Dominum.

Quantò minùs murmuramus, aut omnino tacemus flagellati à Domino, tantò altiùs altissimum eius Dominium prædicamus.

418.

FERIA 3. De Colloquio Nicodemi cum Domino Iesu, qui se tum verè Magistrum exhibuit.

Qui non renuntiat omnibus, non potest esse Christi discipulus.

422.

FERIA 4. De accusatis à Phariseis Apostolis, quos Christus Dominus, ut supremus Iudex absoluit, & accusantes condemnat.

Qui nimis humana timet iudicia, non satis reueretur diuina.

427.

FERIA 5. De sanitate restituta omnibus ad Christum accedentibus, qui se Medicum animarum aqùe ac corporum fecit.

Frustra multiplicas medicamina, sanitas non erit tibi: quod grauius in te est malum, hoc minus vis sanari.

431.

FERIA 6. De producto ab Euangelista, Propheta testimonio, in quo Dominus, electus Dei seruus declaratur.

In paruis, maior est serui Dei fidelitas.

436.

SABBATO. Ad hæc S. Ioannis Baptiste verba, de Christo D. QUI HABET sponsam, sponsus est.

Hæc sponsæ fides est, ut sicut neminem præter sponsum velit diligere, ita velit à nullo diligì.

440.

DIE 30. NOVEMBRIS. In Festo S. Andree Apostoli, ad hæc eius verba. O BONA CRUX.

è è ij

CruX non esset bona, nisi bonum esset cruciari. 447.

DIE 2. DECEMBRIS. De S. Francisco Xaverio Societatis Iesu, Indiarum Apostolo, ad hac eius verba, cum ageretur de bonis sensibilibus abstinendis: SATIS EST DOMINE, SATIS EST. Et cum de malis sustinendis. AMPLIVS, AMPLIVS.

Hæc sunt Apostolatûs & perfectioris vitæ duo signa certiora, velle abstinere libenter ab omnibus bonis, & omnia mala sustinere.

452.

DIE 6. DECEMBRIS. In Festo S. Nicolai Episcopi & Confessoris. DOMINE QVINQUE TALENTA TRADIDISTI MIHI, &c.

Nunquam melius sibi prouidet fidelis Dei seruus, quam si nihil sibi retinens, totum se Domino, suaque omnia consecret.

462.

DIE 8. DECEMBRIS. In Festo Conceptionis B. Mariæ Virginis.

Conceptio sine macula, non potest verè coli cum macula. *Vel sic,*

Præuaricatorem esse oportet qui Conceptionem sine macula, colat cum macula.

465.

Non intrabit in eam aliquod coinquinatum. Apoc. 21.

470.

Aut puritatem Beatissimæ Virginis neget impurus, aut concedat se abnegatum à tam pura Virgine.

471.

Nemo amans impuritatis amat Beatam Virginem.

474.

Quam in se amat Beata Virgo puritatem, in nobis amat; & quam in se odit impuritatem, in nobis odit.

475.

Sicut Lilium inter spinas, &c.

Quod sis tanquam spina natus, potest quidem Beata

Virgo compati ; sed quòd modò tanquam spina viuas
inter lilia, non potest pati. 476.

Venite filij, audite me, timorem Domini docebo vos. Psal. 33.

Quem docet Virgo timorem Domini tantò meliùs con-
cipitur, quantò meliùs edocetur Immaculata eius
Conceptio. 477.

Nondum erant abyssi, & ego iam concepta eram. Prou. 8.

Periculum in mora : *Qua* quis videlicet moratur colere
Beatam Virginem. 484.

DIE 21. DECEMBRIS. In Festo S. Thomæ Apostoli ;

AFFER manũ tuam & mitte in latus meum, &c.

Ex vulnere remedium.

Proponuntur complures aliæ veritates. 493.

*DIE 25. IANVARIJ. In Festo Conuersionis S. Pauli
Apostoli ; DOMINE quid me vis facere ?*

Sicut frequenter dicendum cum Dauide, Dixi nunc cœ-
pi ; sic simul cum Apostolo, Domine quid me vis fa-
cere? 495.

*DIE 2. FEBRVARIJ. In Festo Purificationis B. Ma-
riæ Virginis. Nihil excusauit cum multa potuisset
quæ Virgo erat & Mater : ac proinde contra excu-
sationes exemplum est luculentissimum. Triplex
autem earum est genus : Primum à dignitate vel
conditione personæ petitur. Contrà verò*

Indignum sua dignitate se ipse profert, qui dignitatem
suam legi præfert. 502.

Secundò contra excusantes aliquid difficilius

Qui à lege excludit aliquid, excludit à se totam legē. 503.

Tertiò contra eos qui culpam referunt temporì.

Qui culpam refert tempori, pœnæ tempus nō aufert. 505.

De purificandis affectibus.

Qui se hodie non purificat, se magis inquinat. ibid.

Hæc est magis aut minus puræ mentis nota certior, velle
magis aut minus purificari. 509.

Tuam ipsius animam pertransibit gladius. Luc. 2.

Doloris gladium animæ Virginis acerbiores infert vita
peccatoris, quàm mors filij.

*Communes omnibus sanctis Veritates, præterquam Apostolis &
Evangelistis, quorum sunt singulares propriæ.*

De sanctis Martyribus.

Sicut martyrio vita naturalis, sic mortificatione vita sen-
sualis; Id est, sicut ne pereat fides, perdenda est marty-
rio vita naturalis: sic ne pereat fidelitas, perdenda est
mortificatione vita sensualis. 513.

*De sanctis Confessoribus Pontificibus. NON EST IN-
VENTVS SIMILIS ILLI QVI CONSERVARET LE-
GEM EXCELSI.*

Et communia singulariter, & singularia communiter.
508.

De sanctis Doctores.

Sic cauendum ne scientia præferatur Virtuti, vt tamen
scientia non negligatur. 522.

*De sanctis Confessoribus non Pontificibus. SINT LV-
CERNÆ ARDENTES IN MANIBVS VESTRIS.*

Quantum cuique est vigilantia, tantum virtutis & me-
riti. 527.

De sanctis Fundatoribus Religiosi Ordinis.

Virtutum Patris Nostri gratia non tam sermonibus ex-

primenda, quàm operibus comprobanda. 531.
*De sanctis Virginibus. PRVDENTES acceperunt oleum
in vasis suis cum lampadibus.*

Virgo sponsa Christi, aut est vigilans ad integram perfe-
ctionem, aut non est prudens. 535.

*De sanctis non Virginibus. MVLIEREM fortem quis
inueniet?*

Qua ratione difficile est Mulierem fortem inuenire, eâ-
dem facile est inuentam prædicare. 539.

In Dedicatione Ecclesiæ.

In loco sacro non pauere, pauendum est. 543.

Ad sacrum locum sicut ad Sacramentum. Iuxta illud
Ecclesiastici officij: *Locus iste à Deo factus est, inestima-
bile Sacramentum, irreprehensibilis est.* 554.



ERRATA PRIMÆ PARTIS.

Pagina.	Linea.	Erratum.	Correctio.
22	18	verum, est	verum est
32	7	priuatus	priuatur
40	33	administratio	administrato
42	21	qua	quæ
47	22	causa sui peccati	sui & alterius peccati
75	16	quadam	quædam
96	20	verè	benè
130	2	abundantiores	abundantiores
141	28	Sermone 7	Sermone 3
	37	Elem 4	Elem 4
157	19	varia	vana
160	13	sequens inciderit	sequens, inciderit
164	10	effectum	affectum
	17	festiuus	festinus
187	6	bonitate	bonitati
195	31	monemur	mouemur
205	14	interpretatione	interpretationem
216	17	tunc	tum
229	19	& fides	& Fides
	20	rudix	radix
232	30	que	quæ
244	27	periculus	periculis
268	26	condemnante: te	condemnante te
320	24	Serm 7. 5	Serm 71
329	19	afferre lam	afferre illam
334	8	perturbamur, in	perturbamur in
336	13	caelum: ascendit	caelum ascendit:
	15	coinquinatis	coinquinatis
	36	aduersitatis, usus	aduersitatis usus,
343	14	pugatiua	purgatiua
379	2	certior salutis	certior certitudo
	30	vocantes	vocantem
392	31	constitutum	constitutum.
455	16	missus, fuerat	missus fuerat,
487	2	pedetentium	pedetentium.
	9	ostendas	offendas
488	8	perfinitur	perficitur
491	15	quàm nos	quam
502	5	dignitate	dignitatem.
510	2	puritatis, affectu	puritatis affectu,
550	4	Encæmiorum	Encæniorum.
553	17	certæ	certè.
584	34	procurandum	procurandam.

DOMINICA



DOMINICA PRIMA ADVENTVS.

DE EXTREMO IUDICIO.

*Tunc videbunt Filium hominis venientem in nube,
cum potestate magna, & maiestate. Luc. 21.*

VERITAS PRACTICA.

Nemo Christianus Christi iudicio condemnabitur, nisi
qui prius suo Christum iudicio condemnauerit.

*RATIO EST, Quia nemo Christianus condemnabitur, nisi
qui prius Euangelicas Veritates neglexerit.*

*Sed negligere Veritates Euangelicas, hoc est Christum indicare
& condemnare.*

*Ergo nemo Christianus Christi iudicio condemnabitur, nisi qui prius
suo Christum iudicio condemnarit. Quod certe est vel ad terro-
rem iudicij concitandum, vel ad cultum Christianæ Virtutis
persuadendum, non parum efficax.*

I. PUNCTVM.



*QVÆ duo plurimum valent ad commouendos ani-
mos, Amor & Timor, hodierna die, quæ prima est
anni Ecclesiastici, proponuntur ab Ecclesia cunctis
fidelibus. Amor in primo Christi aduentu quem
celebra reincipit: Timor in secundo, quem commemorat, dum*

- Ps. 33. exhibet Euangelium venturi ad Iudicium Domini. *Venite filij, audite me, timorem Domini docebo vos.* En pater futuri sæculi, princeps pacis, Christus vester quem filij diligatis. En idem Dominus & Iudex vester quem serui timeatis, ne vobis aliquando id exprobrat: *Filius honorat patrem, & seruus Dominum suum, si ergo Pater ego sum, ubi est honor meus? & si Dominus ego sum, ubi est timor meus?*
- Is 9.
- Mal. 1.

Et quidem tria hæc separatim possent expendi, meditando fufius, quanta in Patre vel Fratre bonitas! quanta in Domino & Iudice Iustitia! quanta in nobis duritia qui nec Bonitate nec Iustitia, qui nec amore nec timore moueamur! sed forte efficacius cum diuina gratia simul considerata valebunt, prout simul iuncta continentur Veritate Practica quæ idcirco attentius consideranda proponitur. Quale enim illud est, si ita est, quàm stupendum & ad omnem animorum inflexionem potens, si verum est, *Quod nemo Christianus Christi iudicio sit condemnandus, nisi qui prius suo Christum iudicio condemnarit!* Itane Christianus Christum iudicet? Itane Christus iudicium hoc patiat? Itane impius non timeat Iudicem suum à se iudicatum & condemnatum!

Quàm porro ita sit, hæc suadet Ratio; Nemo præsertim ex Christianis, iudicio Christi damnandus est, nisi qui veritates Euangelicas neglexerit vel audire, vel credere, vel seruare. Licet enim vnum lethale peccatum sufficiat, in quo quis mortuus condemnatur: possit autem Christianus in eo peccato mori quo nihil tale neglexerit: tamen ordinariè loquendo, vix vllus moritur non confessus: & vix vllus moritur in peccato qui rite confessus sit. Quamobrem oportet eum qui in peccato morietur, & iudicio Christi damnabitur, vel non confessum esse, vel non rite confessum. Quid est autem quod Christianum magis impediat à recta Confessione, quàm inordinatus affectus ad peccatum, seu ad rem amatam cui peccatum annectitur, quod non deponit in Confessione, & quo non deposito nulla est Contritio, nulla Confessio? Vndenam verò ille inordinatus affectus, nisi ex neglecta veritate Christiana & Euangelica, quæ hunc deprauatum affectum iubeat deponi aut temperari? *Non enim vllum peccatum,* inquit sanctus Augustinus, *committi potest, nisi dum appetuntur ea quæ Christus contempsit, aut fugiuntur ea quæ ille sustinuit.* Quæ si vera sunt de ipso actu quo primo peccatum committitur, quanto ve-

riora de ipso habitu seu habituali affectu, quo fit ut peccator peccatum confitendo non deponat! Talis enim habitus & affectus longe magis indicat oppositum Christo appetitum; Vnde hoc tandem sequitur quod proponebat Ratio, Neminem Christianum iudicio Christi condemnandum nisi qui prius veritates Euangelicas neglexerit; vel non iis credendo, vel non se illis conformando, *Despexistis, inquit, omne consilium meum, & incre-* Pron. 7.
pationes meas neglexistis. Ego quoque in interitu vestro ridebo & subsannabo. O formidandum risum.

II. PUNCTVM.

SED negligere veritates Euangelicas, hoc est Christum iudicare & condemnare. Cum enim illæ veritates sint à Christo Domino, qui vnumquemque Christianum his imbutum & conformem in vita & moribus esse voluit, profecto non possunt à quoquam negligi, quin simul iudicentur vel inutiles, vel indecoræ, vel incommodæ, vel nimis difficiles, aut nisi denique aliquam prætendat causam cur illas negligat; nullam vero talem causam potest prætereundere quin ipsum Christum iudicet. Nam vel causam illam putabit legitimam, vel nullam & simulatam: si legitimam putat habere causam cur negligat quod commendat Christus, certe hoc ipso iudicat Christum sine causa illud commendasse. Nam si causa est & ratio cur illud commendet Christus, non est causa cur negligatur; aut si quid est quod rationabiliter negligatur, non est quod legitime commendetur; *Non est Ratio apud Inferos,* Eccl. 9.
inquit sapiens, quasi diceret, non est ratio qua se damnati possint contra Deum defendere; alioquin sine ratione & immerito fuissent condemnati, quod est blasphemum cogitare. Vnde & idem sapiens, *Non est sapientia, non est prudentia, non est consilium contra* Pron. 21.
Dominum.

Quod si nullam quidem esse causam affirmet, cur Euangelicam Christi Doctrinam respuat, sed merè gratis & libere, qua libertate se inordinato affectui mancipat, nonne & Christum iudicat minus dignum cuius dictis se conformet, quàm mundum aut appetitum oppositum, cui mauult adherere? Nonne & Christum condemnat quasi aduersarium suæ libidini, & tali condemnat iudicio, quali suam probat libidinem? Licet enim iudi-

cio, quod vocant speculatiuo, nihil tale de Christo cogitet, Iudicium tamen est practicum, id est, in praxi & re ipsa se ita gerit ac si iudicaret & damneret Christum. Sic factis & vitâ suâ loquuntur qui vitam degunt à Christo alienam; *Contrarius est, inquiunt, operibus nostris, & impropere nobis peccata legis: factus est nobis in translationem cogitationum nostrarum: gravis est nobis etiam ad videndum, quoniam dissimilis est aliis vita illius.* Vnde & ipse Dominus; *Me mundus odit, quia ego testimonium perhibeo de illo quod opera eius mala sunt.* Quem verò quis odit vt aduersarium, nonne hunc iudicat & condemnat? O verè damnanda mundi opera, quæ veritatem condemnant!

III. PUNCTVM.

NEMO igitur Christianus Christi iudicio condemnabitur, nisi qui prius suo Christum iudicio condemnauerit. Quia nemo condemnabitur nisi qui contra Euangelicas veritates peccauerit, in quibus obseruatis sicut Christus probatur & colitur, ita his neglectis iudicatur & condemnatur, tanquam oppositus & aduersarius concupiscentiæ quam illæ impugnant & reprimunt Veritates. *Esto, inquiebat ipse Christus, esto consentiens aduersario tuo citò dum es in via cum eo: ne forte tradat te aduersarius iudici.* Quis est iste aduersarius nisi sermo Domini, vt expressè habet glossa, & sanctus Augustinus, *Qui nobiscum est in via vt ad cœlestem nos ducat patriam?* Sed est aduersarius iis qui secundum proprias concupiscentias ambulant, ac propterea sicut illum repudiarunt & iudicarunt tamquam sibi aduersarium, sic ab eo iudicandi tradentur summo Iudici. Quod & alibi expressius Ipse Dominus Iudex: *Qui spernit me, & non accipit verba mea, habet qui iudicet eum: sermo quem locutus sum, ille iudicabit eum in nouissimo die.* Cur porro iudicabit nisi quia neglectus ante est & ab illo iudicatus?

Atque hinc iterum vide, qualis iniuria Christi est sic ab homine iudicari & condemnari! qualis eius bonitas & patientia, tot à tantis & tanto tempore tolerare iniurias! quale demùm expectari potest iudicium, post talem in sæculo peractam vitam quæ nonnisi calumniam & probum Christo intulit! *Verumtamen, inquit, Inimicos meos illos, qui noluerunt me regnare super se, adducite huc, & interficite ante me.* Potesne cogitare quale sit illud interfici

ante Christum & non timere? Aut si maius amore duci, potesne cogitare te ex inimicis illis vnum esse, de quibus loquitur, & non confundi! te Christianum, te Religiosum, te Sacerdotem, inimicum esse Christi! Et ne dubites ita esse, ne putes tibi verba dari, audi quibusnam loquitur: *qui noluerunt*, inquit, *me regnare super se*: Auderesne id affirmare quod Christus super te regnet! Circumspice teipsum intus & foris, à capite ad calcem, à mane ad vespeream; nulla deberet esse facultas animæ, nulla pars corporis, nulla vitæ actio super quam Christus non regnaret, vt dici posset regnare super te. Nam si vel vna deesset, tu ex illa parte ab eius regno substractus esses, nec proinde super te totum regnaret. Estne verò vel vna pars ita illi subiecta vt in ea vel solâ regnet? Regnatne in oculis, in lingua, in incessu, in desideriis, in gaudiis, & in negotiis! Nonne ibi potius concupiscentia præualet vt magis naturæ impetum quàm Gratia motum sequaris! Cur ita porro nisi quia non vis ita premi, quantum necesse est vt regnet in te Christus? *Confregisti iugum meum, rupisti vincula mea: dixisti, non seruiam.* Itane semper? Resipisce hodie. Tibi tuisque precare & procura deinceps omni modo vt quod commendat Apostolus: *Doctrinam Saluatoris nostri Dei ornent in omnibus.* *Apparuit enim gratia Dei Saluatoris nostri omnibus hominibus, erudiens nos, vt abnegantes impietatem & secularia desideria, sobriè, & iustè, & piè viuamus in hoc sæculo.* 1er. 2.
Titi. 2.

E O D E M D I E,

AD HÆC CHRISTI VERBA:

Nunc Iudicium est mundi. Ioan. 12.

V E R I T A S P R A C T I C A.

Primus Christi aduentus, Mundano tam timendus quàm secundus.

Tam formidandum Mundo præsepe Christi nascentis, quàm Tribunal Iudicantis.

RATIO EST, Quia idcirco secundus Christi aduentus est timendus mundano, & formidandum mundo est tribunal Iudicantis, quia tunc sententia est ferenda contra mundanos.

Sed in primo aduentu iam illa fertur sententia, iam in praecepto mundus iudicatur: nec minus timenda est lata sententia quam ferenda.

Ergo primus Christi aduentus mundano tam timendus est quam secundus.

Ergo non minus iam formidandum est mundo praesepe Christi nascentis, quam Tribunal Iudicantis. Quod tamen pauci cogitant.

I. P V N C T V M.

Eccle. 8.

RECTE omnino Sapiens: Quia non profertur cito contra malos sententia, absque timore vlllo filij hominum perpetrant mala. Sed in illo sapientis dicto potest esse aliquid clarum, & aliquid dubium siue obscurum. Clarum nempe est quod filij hominum id est mundani homines sine vlllo timore peccent,

Pf. 13.

Non est timor Dei ante oculos eorum: & clarum item est, quod idcirco tam liberè peccent, quod non statim ac peccant, puniantur; nam pro certo saltem timerent poenam, & hoc timore coercerentur:

Pf. 54.

Veniat mors super illos, & descendant in infernum viuentes, quasi diceret, si sic ageretur cum peccatoribus vt statim morerentur & perirent, non tanti essent peccatores. Obscurum vero esse posset quod dicit non cito proferri sententiam contra malos; Nonne iam in scripturis prolata est contra illos sententia? Nonne iam iudicati sunt qui non credunt? Nonne iam condemnati omnes peccatores nisi resipiscant? Nonne iam Christus dixit, Nunc Iudicium est mundi; princeps huius mundi iam iudicatus est. Responsio est duplex; prima facilis & plana, quod cum dixit sapiens non proferri cito sententiam contra malos, id est, non eam illis declarari, aut denuntiari, quasi iam iam sit executioni mandanda, sicut in iudicio proferetur. Alia vero responsio est, quod licet sit lata sententia in scripturis, non illam tamen mundani intelligunt, illam audiuisse dissimulant; vel quod eius differatur executio, tam parum illa mouentur quam si nulla esset. In quo certe vehementer errant, & ab illo sunt ho-

Ioan. 12.

Ibid. 16.

die reuocandi errore, vt discant non minus verum esse quod iam prolata est contra illos sententia, quàm quod proferetur: neque minus esse timendam latam sententiam quam ferendam: Ac proinde primum Christi aduentum, cuius hodie memoria renouatur, non minus iam esse tremendum quam sit secundus, cum simul renouetur sententia qua mundani iudicantur & condemnantur. *Nihil enim minus Præsepe Nascentis habet quod formidetur, quam Tribunal Iudicantis.*

Quæ proposita Veritas vt declaretur euidentius, primò præmittitur tanquam certum & indubitatum, quod si quid sit in secundo Iudicantis Christi aduentu formidandum, sententia præfertim est quæ contra peccatores proferetur. *O mi frater, aiebat sanctus Augustinus, numquid ferrea sunt carnes nostræ, vt non contremiscant, vel etiam sensus noster adamantinus, vt non mollescat, aut etiam minimè enigilet ad illa Dei verba: Ite maledicti in ignem æternum?*

Exhort. ad
sal. c. 55.

Quid faciam, dicebat Iob, cum surrexerit ad iudicandum Deus, Iob. 31. & cum quaesierit quid respondebo illi! Cum vix paruam stillam sermonis eius audierimus, quis poterit tonitruum magnitudinis eius intueri? Ibid. 26. Accipiet armaturam Zelus illius, & quæ plura prosequitur Sapiens Sap. 5. ac vniuersa scriptura quorum summam complectens Apostolus; horrendum est, inquit, incidere in manus Dei viuentis. Hebr. 10.

II. P V N C T V M.

SED in primo aduentu iam illa fertur sententia. Iam in præsepi mundus iudicatur; Nec minus timenda est lata sententia quam ferenda.

Tria hîc distinctè declaranda essent, nisi vel essent satis perspicua, vel alibi reseruarentur fufius explananda. Primum est, quid mundus? quid mundani? qui potissimum intelligantur? Nempe ij qui ex concupiscentiis inordinate viuunt, iuxta illud sancti Ioannis crebro à nobis vsurpandum: *Omne quod est in mundo concupiscentia carnis est, & concupiscentia oculorum, & superbia vite. I. Ioan. 2.* Sic Diuus Augustinus exponens illa Christi Domini verba, *Non pro mundo rogo, id est, eis qui viuunt secundum concupiscentiam mundi.* O quam multi!

Deinde vero quod secundum esset demonstrandum quomodo

in scriptura, in Euangelio, in præsepi, in primo denique Christi aduentu sit contra mundum prolata sententia?

Nempe *exemplo*, & *dicto*, & *facto*. Sunt enim qui distinguant factum ab exemplo, quod factum sit aliquid latius & generalius quo exempla & dicta confirmantur, vel quo potentiora sint ad permouendos animos nostros. Nam præter exempla paupertatis, patientiæ, humilitatis, & contemptus mundi quæ nobis Christus edidit: modus præterea quo illa edidit est valde considerandus, videlicet in stabulo, in præsepi, in infantia, in virili ætate, in cruce & in aliis circumstantiis, ubi mire elucet Diuina eius Sapientia & Bonitas quibus vt dixi dicta eius & exempla roborantur; Quod enim sapientior est qui loquitur, maiorem meretur fidem; Et quo est melior seu beneficentior, ac dignior qui nobis præest exemplo, eo nos efficacius ad se trahit. Atque horum trium respectu dixit Dominus, quod esset *Via, & veritas & vita*: via in exemplo; veritas in dicto: & vita in facto, seu merito quo & à Patre meruit gratias quibus operari possemus: & de nobis ita bene meritis est vt ad se corda nostra rapuerit, ad id omne volendum & agendum quod possumus.

Nunc autem quod tribus hisce modis contra mundum siue mundanos sententiam tulerit, habes fusius expositum in opusculo, cuius est titulus; *Mundus oppositus Iesu Christo*; breuius verò infrà in die Natalis Domini: Sed & videnti nascentem Christum & audienti prædicantem, quid clarius, quid apertius quàm quod ait sanctus Bernardus: *In illis omnibus Iudicium mundi arguitur, subuertitur, confutatur?* Poteratne sententia ferri expressior contra Diuites quàm cum dixit: *Facilius est camelum intrare per foramen acus, quàm Diuitem intrare in regnum celorum*. Quid contra superbos & ambientes manifestius quàm hoc Eius pronuntiatum: *Quod hominibus altum est, abominatio est ante Deum*. Expende dictum, *abominatio*, quàm sit efficax ad exprimendam mundi condemnationem. Et contra deditos voluptati & curis huius vitæ, quid significantius quàm quod affirmat imparatos illos morituros, venturum ad exigendam vitæ rationem Dominum & Iudicem qua die non cogitent, & qua hora non putent, & partem illorum fore cum Infidelibus & cum hypocritis.

Quid est capitalem ferri sententiam in Reum aliquem, nisi cum legitimus Iudex probè cognita causa pronuntiat talem mortis

mortis sententiam à quâ nullus appellandi sit locus? At nonne Christus est legitimus mundi Iudex? nonne de rebus probè iudicat? nonne sic iudicauit moriturum in peccato mundanum sicut sacri referunt Codices? nonne mori in peccato est condemnatum esse? nonne hæc est aperte lata sententia, semel, iterum atque amplius in eodem scripturæ loco prolata: *In peccato vestro moriemini*. Atque vt pateat quale sit hoc peccatum, quibusue sententiam mortis denuntiet: *Vos*, inquit, *de deorsum estis, ego de supernis sum. Vos de mundo hoc estis: ego non sum de hoc mundo. Dixi ergo vobis quia moriemini in peccatis vestris*. Et licet ibidem dicat se non iudicare quemquam nec venisse in mundum vt iudicet mundum, sed potius vt ipsum saluet; sic intelligendus est dicere quemadmodum iam supra declarauimus, se non ita iudicare mundum quasi latam mortis sententiam poena statim sequatur, sicut quando extremum mundi fiet iudicium: suspenditur sententia, differtur exequutio; mori vult ante Iudex ne Reus moriatur; morte sua mortem peccatoris vult redimere, si peccator esse de mundo desinat. Sed si pergat mundanus esse, ne quid sibi de morte Christi præsumat & arroget; *Non pro mundo*, inquit, *rogo*; Non applico ei mortem & merita mea, nisi vt resipiscat; cum alioquin nisi conuertatur, tam directè simus oppositi, quàm quæ superna sunt his opponuntur quæ de deorsum sunt.

Ioan. 8.

Ioan. 17.

Hæc est itaque Christi sententia tam aperte lata contra mundum & mundanos, quàm aperte patet ex eius dictis & factis mundum esse damnatum; Quod disertè confirmat Apostolus dicens, *nos à Domino corripi, vt non cum hoc mundo damnemur*.

1. Cor. 11.

Restat tertium exponendum, quod non minus timenda sit lata sententia quàm ferenda: sicque expeditur facillimè si quod vere timendum est in sententia tum lata, tum ferenda discutimus. Quid est quod timemus à Iudice? Poenam inquires inferendam. Itane hoc tantum? Nihilne times Christum nisi poenam inferret! Tene vnus seruilis tenet timor? non times culpam quæ tanto est grauius malum quanto Deus qui culpa offenditur, maior est homine qui poena punitur? Sed esto, times poenam, nonne ex lata sententia iam te agnoscis puniendum? nonne suum æquè prima sententia fortietur effectum ac secunda, cum hæc secunda sit primæ tantum exequutio, & vtraque sententia vel lata vel ferenda sit eiusdem culpæ poena? Nonne constat homi-

nem nō aliter esse reum poenæ quàm culpæ? Nonne vnus & Idem in nobis est vtriusque reatus? Nonne propterea si reus poenæ poenam timet, poena illi timenda est statim atque reus est culpæ, aut cū denuntiatus est reus poenæ? Quid quod recte sentienti de rebus, non tam graue est, aut probrosum iudicari, vel puniri, quàm fieri poena dignum: & hoc vnum in poenis vel maxime discernatur, quænam sit causa poenæ: vnde aptè sanctus Augustinus in illud Psalmi: *Intende iudicio meo, Deus meus, & Dominus meus in causam meam. Non in poenam meam*, inquit, *sed in causam meam.*

At dices, non moueri potentiam nisi præsentī obiecto; & longe disparem esse rationem poenæ iam iam infligendæ, & illius quæ futura est aliquando vel forte numquam futura, mutato nempè rerum statu, seu mundano conuerso. Responderi tria debent huic dicto: Primum est, futurum illud de quo est quæstio, esse ex vna parte tam certum, tam graue & momentosum, quale est *in æternum damnari*: ex alia vero tam incertum, tam fragile & quauis hora futurum, vt non sit Sapientis nec Christiani non timere in tam certo periculo rei tam incertæ; cū præcipue Christus expressis edixerit verbis, velle se vnumquemque nostrum ita paratum esse quouis tempore, vt nisi sit semper paratus, numquam paratus sit, quia vt dictum est, diceturque alibi fufius, tunc ipse veniet quando minus erit paratus. *Si non vigilaueris veniam ad te, tanquam fur, & nescies qua hora veniam ad te.*

Secundum est, quod Fides si vera sit, habet hoc proprium, vt res absentes & futuras tanquam præsentēs sistat, & earum perinde producat affectum in parte rationali superiore, ac si oculis cernerentur. Idcirco definitur ab Apostolo *fides sperandarum* (seu futurarum) *substantia rerum, argumentum non apparentium*. Græce est hypostasis, id est, subsistentia & existentia rerum futurarum quasi eas faciat subsistere, & tam præsentēs exhibeat, quantum ad suum effectum, sicut si reuera existerent, vnde ibidem de Mose dicitur quod *fide inuisibilem tanquam videns sustinuit*: sicque apparet veram in eo non esse fidem qui se ait futuris non moueri ac præsentibus, cū præcipue quod quæritur, non sit motus sensibilis appetitus, non sit timor vt est humana passio; sed sit affectus rationalis, sit virtus animi, sit illa virtutum prima quæ est Timor

Domini quæ est expultrix peccati.

Tertium denique est, quod dum mundanus ait non futuras forte poenas, mutato rerum statu, seque in melius quod bene sperat conuerso, concluditque propterea non esse quod sibi timeat, falsissima est consequentia ex incertissimo antecedenti; Nam dato etiam quod mutandus esset, itane propterea non esset timendus Deus quem mundanus semper videret à se offensum, quandiu mundanus esset? Putasne in damnatis esse aliquid grauius quàm quòd videant Deum à se offensum & sibi valde infensum? Sentiant illi quidem hanc poenam quæ nullo hic sensu percipitur, sed cum ex fide certum sit æquè à Mundano Deum esse offensum, & à Deo Mundanum condemnatum sicut si iam ipsis esset poenis addictus, potestne Mundanus id credere & non pauere, & non fateri saltem sibi esse timendum? Quid est non timere in illo statu nisi præsumere, nisi latam Iudicis irridere sententiam, aut ipsum Iudicem spernere: vel quia non possit quod minatur exequi, vel quia nolit, quia bonus est, quia patiens & misericors & longanimis. Quæ cum sint tam horrenda, quis non videt eo ipso magis esse timendum peccatori quò minus timet? Sic enim abutendo thesauris diuinæ bonitatis, *the- Rom. 2.* *saurizat sibi iram in die iræ;* & tantum abest vt quod ait non sint futuræ poenæ, quin longe futuræ sint grauiiores: tantum abest vt mutetur rerum status, seque conuertat, quin semper in peius ruat, & tanto difficilius resipiscat, quanto se posse facilius finxit. *Va qui prædaris, nonne & ipse prædaberis? & qui spernis, nonne & ipse sperneris? cum consummaueris depredationem, depredaberis: cum fatigatus desieris contemnere, contemneris.* Vere enim deprædatur Mundanus qui audita mortis suæ sententia nihil timet propter tempus sibi datum, & concessas gratias quibus auertat illam mortem: nam sibi tempus illud illasque gratias inuito male usurpat Domino; sicque propterea vere etiam deprædabitur quando auferentur illa dona quibus abutitur, tandemque fiet quod dixit Dominus: *Omni habenti dabitur & abundabit: ab eo autem qui non habet, & quod habet, auferetur.* *Luc. 19.*

III. PUNCTVM.

P R I M V S ergo Christi aduentus Mundano tam timendus quàm secundus.

*Nec minus formidandum est Mundo præsepe Christi nascentis, quàm Tribunal iudicantis. Ne dilatione mortis aut poenæ consequentis timorem Mundanus differat, iam enim lata est sententia; & quod timeret in illa quam futuram & ferendam credit, hoc ipsum in lata timeat; nam idem ipse est Iudex & Dominus qui mundum iudicauit & iudicabit: Idem est crimen, esse de mundo & fuisse. Eadem denique poena est decreta Reo, sed non idem poenæ sensus; hoc solum interest fateor, at non propterea minuendus est timor; nam si ex hac parte motiuum timendi deficit, augetur ex alia. Dum enim consideratur Christus tam multa facere & docere contra mundum, profecto magis inde agnoscitur quàm graue sit, esse de Mundo, quàm dum poenam Mundanus sentiet. Plus est Christum iacere in præsepi, ne sis mundanus, quàm te in Inferno volutari, quod fueris. Ex Christo passo propter crimen meum, magis agnosco grauitatem mei criminis, quam si ipse propterea paterer quasuis poenas. Sic diserte sanctus Bernardus in tertio de Natali Domini. *Ex consideratione remedij, periculi mei æstimo quantitatem. Nesciebam, sanus mihi videbar, & ecce mittitur Virginis Filius, Filius Dei altissimi, & iubetur occidi, vt vulneribus meis pretioso sanguinis illius balsamo medeatur. Agnosce ô homo quàm graua sint vulnèra, pro quibus necesse est, Dominum Christum vulnerari!* Sed quid prodest agnoscere, nisi vt tantò magis timeas culpam & poenam, quantò magis agnoscis esse timendam? Quàm clara & aperta voce modò infantiles panni clamant contra mundum, & de culpa mundanos arguunt; tam diserte & grauiter contrà clamabunt in Iudicio, & poenas postulabunt dirissimas: *Ego sum Iudex & testis, dicit Dominus.* Sicut Mutitta quidam Diaconus apud Victorem Vticensem contra Elpidephorum virum mundanum quem susceperat in baptismo, dicebat de linteis quæ tum erant adhibita: *Hæc sunt linteæ Elpidephore quæ te accusabunt dum Majestas venerit Iudicantis, custodiente diligentia mea, ad testimonium tuæ perditionis.* Sic plane de Christi pannis, de Christi verbis & factis: *Hæc sunt verba & facta, Mundane, quæ te accusabunt, te iudicabunt, te condemnabunt, quia hæc sunt quæ te modò accusant, iudicant & condemnant.* Non erit aliud de mundo Christi iudicium quàm quod fuit. Ex primo iam facto iudicio, timendum est secundum quod fiet, quia primi est effectus consequens. Ex secundo quod fiet, timendum est pri-*

Ier. 29.

L. 3. persec.
Vandal.

mum, quia eius est causa præcedens. Sic autem vtrumque timebitur, si quod est in nobis mundanum & sensuale, tollatur. Non est verus timor otiosus, sicut nec amor; magna operantur vbi sunt, *non coactè sed spontaneè secundum Deum, sed voluntariè.* Aut *1. Pet. 5.* si operari renuunt, nec timor nec amor est. *Sic loquimini & sic facite,* ait sanctus Iacobus, *sicut per legem libertatis, incipientes iudicari;* Quasi si iam iudicaremini, quia iam reuera iudicium incipit ex hac vita, quod in alia perficitur. *1. Cor. 2.*

EODEM DIE,

ALIA VERITAS PRACTICA.

Nihil in futuro iudicio magis metuendum Peccatori, quàm quod minus metuit.

RATIO EST, Quia in futuro iudicio nihil minus metui Peccator quàm benignitatem Christi.

Sed nihil est magis metuendum Peccatori quàm illa Christi benignitas.

Ergo in futuro iudicio nihil est illi magis metuendum, quàm quod minus metuit.

DEclaratur hæc ratio fusissimè in 3. parte, Sabbato post Dominicam secundam Pentecostes, vbi demonstratur quàm sit Agni formidanda ira, iuxta illud Apoc. 6. *Abcondite nos à facie sedentis super thronum, & ab ira Agni.*

Vide his conformes alias veritates, notatas in Indice, verbo Iudicium, Timor &c.

EODEM DIE,

DE DVPLICI ADVENTV

CHRISTI DOMINI.

*Erunt signa in Sole & Luna, & stellis, & in terris
pressura Gentium. Luc. 21.*

VERITAS PRACTICA.

Sicut ad secundum Christi D. Aduentum renouabitur mundus, ita modò animus-noster æque est renouandus.

RATIO EST, Quia tantum debemus Bonitati Dei quæ apparuit in primo eius aduentu, quantum eius Potestati quæ exercetur in secundo.

Sed Bonitas eius exigit à nobis vt modò sic renouemur.

Ergo sic modò est renouandus animus, atque cum mundus diuina potestate renouabitur.

I. PUNCTVM.

Rom. 13.

MO R A est iam nos de somno surgere, nunc enim propior est nostra salus quàm cùm credidimus: Sic olim Apostolus nascentem Ecclesiam, sic modo vt renascamur & renouemur, Ecclesia nos excitat, primo hoc sui renouati anni die; quasi si è somno surgeremus. Nox præcessit, dies autem appropinquauit, abijciamus ergo opera tenebrarum, & induamur arma lucis. Quænam sunt illa opera? quænam arma? exquire.

Apoc. 21.

In hunc etiam finem, opportune Euangelium de secundo Christi aduentu, cùm mundus vniuersus renouabitur; At quo renouabitur modo? expende, vt sic discas hodiernam renouationem instituere. Sicut enim manente rerum substantia, res omnes immutabuntur, ijdem cœli, eademque terra, sed aliter affecta omnia, atque in meliorem statum ita erunt immutata vt dicantur noui cœli, noua terra, & noua facta omnia: *Mutatione non abolitione sui*, ait S. Hieronymus: Sic plane nos non alij quam nos ipsi, & tamen alij per renouationem efficimur, non alij scilicet erimus in substantia rerum agendarum, sed in modo agendi; Eadem quippe nobis semper seu deuotionis seu ministerij nostri

sunt explenda officia, sed non eodem modo, non somnolentè vt alias, non negligenter & perfunctoriè, sed religiosè & perfectè. Sicut in resurrectione corpus idem nostrum erit, sed non quale modò est, non corruptibile & mortale, *surget enim spirituale*, in- 1. Cor. 15. quit Apostolus: ita ex S. Gregorio, *vetusta vita protinus vsus mu-* 1. 27. Mor. *tatur si anima superno spiritu afflata, & in summis appetat quod con-* c 13. *temperat, & contemnat in infimis quæ appetebat.*

Hoc est renouari mente, hoc est resurgere animo, hoc est quod ex veritate proposita, iam eniti debemus cum Gratia quæ hoc ipso se offerre dicenda est in hunc finem, quò nos amanter inuitat, vt tam voluntariè & libenter omnino resurgamus, quàm necessario resurgendum erit corpore, ad postremum Iudicij diem. Neque enim minus debemus Bonitati diuinæ, quam Potestati. Cogita quanta sit illa Bonitas quæ apparuit in primo Christi Domini aduentu, in Incarnatione, in Natiuitate, in Infantia, in Pueritia, in Conuersatione, in exemplis, in miraculis, in passione & in morte. Nonne hîc tibi bonus Dominus? nonne hæc Bonitas tantum de te meretur, quantum Iustitia, quantum Potentia, aut quælibet alia Virtus diuina? *Magnus Dominus & laudabilis* S. Bern. *nimis, parvus Dominus & amabilis nimis.*

II. PUNCTVM.

AT QVI hoc Bonitas à nobis exigit vt sic modò renouemur. Id quidem sapius exigit prout ipsa necessitas postulat, sed cum hodie renouetur memoria primi illius aduentus, quo factus Homo Deus, *In terris visus est, & cum hominibus conuersatus;* Bar. 3. quid aptius à nobis exigere seu postulare concipiendus est, quàm quod primo illo suo aduentu, à Mundo magis postulauit? Quid est autem quod à mundo suis in vitijs inueterato & senescenti magis postulauit, nisi vt reformaretur & renouaretur? Est Ephes. 4. enim nouus ille homo cunctis hominibus induendus, deposito Coloss. 3. veteri cum actibus suis, vt toties monet Apostolus. Itemque apte S. Gregorius, *Quia Dominus ac Redemptor noster nouus homo venit* Hom. 32. *in mundum, noua præcepta dedit mundo, vitæ enim veteri nostræ in* in Euang. *vitijs enutrita contrarietatem opposuit nouitatis suæ.*

Sicque euidenter apparet illud ipsum esse quod à nobis modò postulat, nisi forte putes nihil in te iam residere quod renouetur. An illud putas?

III. PUNCTVM.

SICVT igitur ad secundum Domini aduentum renouabitur mundus, ita modo animus noster aque est renouandus; Quia videlicet tantum debemus Bonitati Christi quæ hanc modo animi renouationem à nobis exigit, quantum eius Potestati debetur quæ resurrectionem corporum & totius mundi immutationem imperabit. Esto enim non cogat necessario Bonitas, sicut coget Potestas; minusne propterea illi debetur? Nihilne vltro & sponte cōcedes roganti Domino? Nonne indignum generoso pectore sic expectare donec cogaris? Nonne illud pudendum, quia libertati tuæ relinquet dare quod rogat, idcirco deneges? Nihilne Benignitati, nihil Bonitati dabis? An minus modo meretur Christus quàm tūc merebitur, quia modo bonitate magis, quam potestate tecum agit? An ignoras te eò magis cogi quò minus cogaris, cum strictiora bonæ voluntati sint vincula Charitatis quam necessitatis? Nonne idcirco sic Christus Dominus primò venit mansuetus & humilis vt te amore deuinciret, sic te attraheret in funiculis Adam, in vinculis Charitatis? ô dignum Christo finem! ô dignum fine tam nobili Christum! sed ô me indignū & Christo & tali fine, si non commoueor! Ecce cælum, inquit Sapiens, & cæli cælorum, abyssus & vniuersa terra in conspectu illius commouebuntur, montes simul & colles & fundamenta terra cum conspexerit illa Deus, tremore concutientur; Et in omnibus his insensatum est cor! Appareat anima mea, appareat hodie gratia illa Saluatoris, Quæ apparuit omnibus hominibus erudiens nos, vt abnegantes impietatem & secularia desideria, sobriè & iustè & piè viuamus in hoc seculo. Et sicut erunt signa in Sole & Luna & stellis, sic in mente tua, sic in corpore, & in minimis quibuscumque gestis seu vitæ negotiis, signa sint animi renouati.

Thren. 5. Conuertere nos Domine & conuertemur, innoua dies nostros sicut à principio: Adiuua me Domine Deus in bono proposito, & da mihi nunc hodie perfecte incipere, quia nihil est quod hactenus feci.

Hac



HAC HEBDOMADE, in considerationem venient
eæ Personæ quæ propius spectant & attingunt Myste-
rium Incarnationis Christi Domini.

FERIA SECUNDA.
DE ÆTERNO PATRE FILIUM
NOBIS DANTE.

*Sic Deus dilexit mundum ut Filium suum unige-
nitum daret. Ioa. 3.*

VERITAS PRACTICA.

Sic Deus dilexit mundum, ut sic mundus diligeret
Deum sicut dilectus est.

*Sensus huius particulæ sicut, atque adeo totius Veritatis
hic est, quod quemadmodum Deus mundo suum
indicavit amorem, donando ei Filium, quem
vnice diligebat, sic mundus Deo suum indicet,
donando ei quod carius & pretiosius habuerit;
Ad hoc enim tenetur ex illa dilectione Dei qua
præuentus est per donum Filij.*

*RATIO EST, Quia Deo nobis indicanti suum amorem, tene-
mur ei nostrum indicare quo fieri potest conuenientiori modo.
Sed non est modus conuenientior, quàm donando ei quod carius &
pretiosius possidemus.*

*Ergo illi donandum est, sicque diligendus Deus sicut nos diligit.
Quod certe est rarum & pretiosum.*

I. PUNCTVM.

QUOD primum in tota Incarnati Verbi œconomia considerandum venit, æterni Patris est Charitas nobis donantis Filium suum. *Sic Deus dilexit mundum.* Nihil aliud Eum mouit, quàm dilectio, & certe magna dilectio, quam ipse admiratur Filius. Admirare cum illo.

Serm. 83.
in Cant.

Tantæ vero Charitati quid debetur, nisi par Charitas, quanta quidem in nobis esse potest? Nam ut ait S. Bernardus: *Cum amat Deus, non aliud vult quàm amari, quippe non ad aliud amat, nisi ut ametur.* Quanam vero par esse potest & conuenientior Charitas nisi donando ei quod habemus carius sicut Ille Charitatem suam nobis ostendit donando Filium suum?

1. Ioan. 2.

Ibid. 3.

Phil. 1.

Ad hoc certe tenemur ex illa Charitate, atque ad hoc persoluendum debitum excitamur ex proposita Veritate, cuius hoc est fundamentum primo statuendum, Deo nobis iudicanti suum amorem, tenemur ei nostrum indicare quo fieri potest conuenientiori modo, id est, tam simili & æquali, quantum Deo & nobis conuenire potest. Quid iustius? quid rationabilius? Nam si amor non nisi amore reciproco compensatur, ut infra videbitur, quomodo potest intelligi illa amoris reciprocatio nisi paribus aut consimilibus amicitia signis? Vnde dilectus Discipulus cum de perfecta Dei Charitate sermonem intulisset sic pergit; *Qui dicit se in ipso manere, debet sicut ille ambulauit, & ipse ambulare*: quasi diceret, debet se gerere erga illum, sicut ille se gessit erga ipsum; Quod & apertius Idem: *Non diligamus, inquit, verbo, neque lingua, sed opere & veritate*; In quem sensum Apostolus, *Et hoc oro ut Charitas vestra magis ac magis abundet in omni scientia & in omni sensu, ut probetis potiora.* Vellesne huic orationi obistere, contringendo Charitatem tuam?

II. PUNCTVM.

SED non est modus conuenientior quo possis Deo indicare tuum amorem, quàm Ei dando quod carius habes.

Ipse est enim modus quo Deus suum manifestauit, donando nobis Filium, nam licet multa iam dedisset hominibus, nihil

æque tamen ad amorem indicandum fuit, ac donum Filij. Ratio est manifesta, quia quò donum est magis proportionatum donanti, quò est illi carius, & quò vtilius cui donatur, eò certe est clarius amoris indicium. At nullum tale donum est à Deo datum hominibus, in quo hæ conditiones reperiantur quàm donum Filij.

Primò enim, quam habent proportionem creata omnia cum Creatore? Unigenitus vero Patris, ipse est æqualis Genitori. Deinde quis dicat terrena hæc & caduca omnia, multum esse cara Deo qui plura ex illis dat inimicis quam amicis? Filius vero Dei, *Hic est Filius dilectus, in quo sibi bene Pater complacuit.* Matth. 3. & 17. Denique quis temporalium vsus? quænam eorum utilitas præ utilitate & necessitate Domini Iesu? Esto enim desint temporalia, esto desit ipsa vita temporalis, quid damni si succedit æterna? At si æterna pereat, quale par damnum? periret autem nisi datus esset Iesus. Vnde patet euidenter solum hoc esse donum quo ex certissimis notis diuinus amor in homines indicari possit. Quod videbatur innuere Apostolus cum diceret, *Quo-* Rom. 8. *modo non etiam cum illo omnia nobis donauit?* Ac proinde hinc etiam liquet, non esse modum conuenientiorum quo suum homines amorem in Deum, possint indicare, quàm si quid Deo donent quod habuerint pretiosius & carius, ipsique Deo gratius; quia hoc est commune omni amorì, vt sic se indicet & non aliter. *Nunc cognoui,* inquit Deus Abrahamo, *quod times* Genes. 22. *Deum, id est, colis & diligis, & non pepercisti unigenito Filio tuo propter me.* Videsne certum amoris indicium in dono rei charissimæ?

III. PUNCTVM.

HOC est igitur quod Deo dare debemus, hoc est quamobrem sic Deus dilexit mundum donando ei Filium suum unigenitum, vt sic mundus diligeret Deum, donando Ei quod carius & pretiosius habet. Nam si, vt primo probatum est, Deo nobis indicanti suum amorem tenemur & nostrum indicare, quo fieri potest conuenientiori modo; quis conuenientior modus esse potest, quàm quo ipse Deus est vsus, vt nos exemplo sui prouocaret? Sic diuinæ dilectionis discipulus: *In hoc apparuit Charitas Dei* 1. Ioan. 4.

in nobis, quoniam Filium suum unigenitum misit Deus in mundum, ut viuamus per eum. In hoc est Charitas: quasi diceret, hæc est forma, hoc exemplar charitatis exhibendæ: Vnde & concludit, Nos ergo diligamus Deum, quoniam Deus prior dilexit nos. Id est, quia nos præueniens amore suo, sic affectum nostrum excitat ad eum redamandum ut simul intellectum instruat quomodo eum redamare possimus; & simus inexcusabiles si tanto desimus debito.

Exprome itaque anima quod habes carius, quod pretiosius, siue sit pecunia, siue fama, seu parentes, aut sanitas, seu ipsa vita humana. Vide si quod eorum sit quod Deus à te velit, an sis parata dare? nullus alioquin est in Deum amor. O pudor! O probum! Deus proprio non parcat Filio, ut mihi suum amorem indicet, & parcam famæ! Exardesce contra. Nulla maior est ad amorem inuitatio, quàm præuenire amantem, inquit sanctus Augustinus, & nimis durus est animus qui si dilectionem nesciebat impendere, nolit rependere.

*De Catech.
rud.*



FERIA TERTIA. DE FILIO DEI SE IPSVM OFFERENTE.

Tunc dixi, ecce venio. Ps. 39. Hebr. 10.

Oblatus est, quia ipse voluit. Il. 53.

VERITAS PRACTICA.

Quam in se attrahit gratiam qui se Deo libens offert, eandem sibi detrahit qui quod offert non reddit.

RATIO EST, Quia qui se Deo libens offert, idcirco multam in se Gratiam attrahit, quod bonam indicet voluntatem quam præcipue respicit Deus in oblatione nostri, & quam qui subtrahit, talem sibi detrahit gratiam.

Sed qui non reddit quod offert, subtrahit illam bonam voluntatem. Ergo & quam in se attrahit gratiam qui se Deo libens offert, eandem sibi detrahit qui quod offert non reddit. Quod ne damnum eueniat, probè est intelligendum, quòd sicut oblatio nostri debet esse affectiua, ita & effectiua, exemplo Christi Domini qui hoc ipsum perfectè fecit ad quod se obtulit.

I. P V N C T V M.

HÆC illa est Diuina Persona quæ dicitur Verbum quod Caro factum est de quo infra toti. Nunc vero quàm se libenter obtulerit, contemplare. Primò quidem quando cum aliis sanctissimæ Trinitatis Personis consensit in reparationem generis humani per diuinam Incarnationem. Deinde quo primo momento est Incarnatus, vt ait Apostolus ex Psalmista, *Ingrediens mundum dicit, hostiam & oblationem noluisti, corpus autem aptasti mihi.* Hebr. 10.

Denique dum inter homines ageret, sic sæpius aut singulis pene momentis sese offerebat pro eorum salute. Itane Domine memor mei fuisti? Fili, ne dubites. Admirare & gratias age.

Et verò sic nos ipsos offerre decet; Sed quod caput est, id omnino efficiendum est ad quod nos obtulerimus: cum alioquin nulla futura sit oblatio, nullus inde fructus, & nulla Gratia. Sic Ioan. 17. Christus Dominus opus suum perfectè consummauit; Nos vero quam faciles sumus ad acceptandum, tam faciles ad deponendum; Quamobrem valde considerata Veritas qua de effectu monemur, perinde necessario ad oblationem & gratiam, sicut affectu.

Cur enim affectus est necessariùs? Cur affectiua debet esse oblatio nostri? Nonne vt sic pronam & propensam voluntatem nostram in obsequium Dei declaremus? hoc est enim maxime quod respicit in omnibus, ac præcipue in iis quæ sibi offeruntur. *Omnis, inquit, voluntarius & prono animo offerat primitias Domino;* Exodi 35. Tum postea; *Obtulerunt mente promptissima atque deuota primitias Domino,* Ibid. Rursusque ibidem. *Omnes viri & mulieres mente deuota obtulerunt donaria.* Denique notum illud S. Gregorij, *Nihil offertur Deo ditius voluntate bona:* quia scilicet tantam in se attrahit Hom. 5. 14. Enang.

Gratiam, vt quàm bona est Deo præueniente voluntas, tam diues est & abundans coelestibus donis, Deo subsequente. Da mihi Domine quod tibi offeram. Fili, iam multa satis à me habes quæ tu iniquè tibi vsurpas.

II. PUNCTVM.

SED qui Deo non reddit quod offert, bonam illam voluntatem subtrahit, neque potest dici bona & propensa voluntas nisi sit effectiua simul atque affectiua. Id est, nisi sic efficiat aut ita conetur efficere cum Dei gratia quidquid efficiendum suscipit, vt si non fiat, sit potius defectus potestatis quam voluntatis.

Hoc est enim propriè velle quando si quod possis & debeas; id omnino efficias; cum è contra si quod potes & debes non efficias, non potes vere dici illud velle. Cur enim non efficias nisi quia non vis, cum vt supponitur illud possis & debeas; Sic in prouerbis dicitur, *vult & non vult piger*: vult ex quadam rei complacentia, sed quia non operatur nō vult absolute & propriè. Magis potest dici *velleitas*, quā absoluta voluntas, inquit sanctus Doctor.

Quod præcipuè verum, est coram Deo & in ijs quæ Deus vult vt agamus. Si enim defectu voluntatis illa non agimus, quomodo talis deficiens voluntas poterit esse bona, quæ non erit conformis diuinæ? Quid est enim esse bonum, nisi quod est conforme ad propriam regulam & mensuram? Quænam est autem regula & mensura nostræ voluntatis nisi diuina? Sic Idem sanctus Doctor concludit nullam proinde esse humanæ voluntatis bonitatem, nisi *ex conformitate ad Diuinam*; ac proinde etiam nisi sit effectiua voluntas, non sit omnino bona, quia non sit conformis suæ regulæ. O quam pauci homines bonæ voluntatis, qui putantur multi!

III. PUNCTVM.

QUAM ergo in se attrahit gratiam qui se Deo libens offert, eandem sibi detrahit, qui quod offert non reddit; Quia subtrahit bonam voluntatem cuius defectu sapius denegantur Gratia quæ in eius considerationem collatæ vel conferendæ essent. Dixistis, ecce de labore, & exsufflastis illud, dicit Do-

minus exercituum. Exsufflatur nempe quod offertur quando cum reddi debet, non redditur: sicque nulla est oblatio, nisi sit ex æquo effectiua, atque affectiua. Nam si debet esse affectiua vt oblationi jungatur bona voluntas sine qua non esset accepta oblatio: certe idcirco etiam debet esse effectiua, cum sine effectu non esset bona voluntas. Ad quid enim & quorsum te offers, nisi ad aliquid agendum aut patiendum? Sed quid prodest te offerre nisi reuera id velis ad quod te offers? Aut quando indicabis te velle, nisi cum se dederit occasio, sic agas & patiaris, sicut promissisti? *Filij Ephrem intendentes & mittentes arcum, conuersi sunt* Ps. 77. *in die belli.* Nonne tu ex illis qui multa proponunt & pauca faciunt, qui dum nihil patiuntur, fortes sunt & ad omnia validi, cum autem vel minimum quid aduersi occurrerit, statim deficiunt. *Ecce docuisti multos & manus lassas roborasti, nunc autem venit super te plaga & defecisti, tetigit te, & conturbatus es. Vbi est timor tuus, fortitudo tua, patientia tua & perfectio viarum tuarum?* *Iob. 4.* Responde & confundere. Satiusest non affici ad efficiendum aliquid, quam id non efficere ad quod affectus es. *Eo* Math. 21. *Domine,* inquiebat Patri Filius, *& non iuit,* alter vero idem *Is. 53.* *iussus, nolo,* inquit, *& iuit.* Quis ex duobus voluit? *quis ex duobus fecit voluntatem Patris?* Christus est Dominus qui interrogat, Vide quid respondeas, & Caue ne ex ore tuo te iudicet.

Videri possunt quæ habentur infra Feria 2. post Dominicam 4. Aduentus: & vigesimo nono die Decembris.



FERIA QVARTA.

DE SPIRITV SANCTO, QVANTVM AD OPERATIONEM MYSTERII INCARNATIONIS.

Spiritus Sanctus superueniet in te. Luc. 2.

Vos semper Spiritui Sancto resistitis. Act. 7.

VERITAS PRACTICA.

Quàm rarò cogitas Christum, tàm crebrò resistis Spiritui Sancto.

VEL SIC.

Nulla in re frequentius Spiritui Sancto resistitur, quàm quod infrequentius de Christo cogitur.

RATIO EST, quia in ea re frequentius Spiritui Sancto resistitur, ad quam impellit frequentius.

Sed nulla res est ad quam impellat frequentius, quam ut de Christo cogitur.

Ergo nulla in re frequentius Spiritui Sancto resistitur, quàm quod de Christo non frequentius cogitur. Quod certe est praecauendum.

I. PUNCTVM.

ICET tota Trinitas sit operata Mysterium Incarnationis, dicitur tamen hoc Opus speciale Spiritus Sancti, quia opus est singulare Bonitatis quæ specialiter attribuitur Spiritui Sancto, sicut Patri potentia, & Filio sapientia. O vere opus singulare bonitatis! Ille ipse est autem Spiritus Sanctus, illa ipsa est bonitas quæ fidem, deuotionem, & alios pietatis affectus circa hoc Incarnati Verbi mysterium in mentibus nostris operatur; O quæ & quanta suggerit, si audiretur! Verum, cum in multis alijs, tum in hoc præcipue parum attenditur. Vnde & ipse per Prophetam, *Quis credidit auditui nostro, & brachium Domini cui reuelatum est?*

1f. 53.

Hinc nata Veritas valde expendenda, *Quàm raro & infrequenter Christum cogitamus, tàm frequenter resistimus Spiritui Sancto.*

Et Ratio quidē aperta est, cum liquidò pateat tam crebrò nos vniuersim diuinis Illius monitis resistere, quam illa frequentiora sunt: tùm verò particulatim vnumquemque frequentius in re singulari sese illi opponere, in qua frequentius ab eo commouetur. *Indurauerunt ceruicem suam ne audirent me, & acciperent disci-*

Jer. 17.

disci-

disciplinam. Quare aggrauatis corda ueſtra ſicut aggrauauit Aegy-^{1. Reg. 6.}
ptus & Pharaon cor ſuum! Dura exprobratio.

II. PUNCTVM.

SED nulla res eſt ad quam nos vniuerſum Spiritus Sanctus impellit
frequentius, quàm ad cogitationem de Chriſto Domino, varioſque
inde conſequentes affectus, Ad hoc enim præcipue eſt miſſus, vt
ipſe Chriſtus Dominus ait, Cum venerit Paracletus quem Ego mit-^{Ioann. 15.}
tam vobis à Patre, ſpiritum veritatis, ille teſtimonium perhibebit de
me. Ille me clarificabit quia de meo accipiet, & annuntiabit vobis. Vn-^{& 16.}
de & Apoſtolus vocat eum Spiritum Filij, dicens; Miſit Deus ſpi-^{Galat. 4.}
ritum Filij ſui in corda ueſtra. Cur porro Filij potius quàm Patris?
quia ſcilicet totus eſt in Filio Patris clarificando & celebrando.

Atque hinc fit vt cùm Apoſtoli pleni eſſent Spiritu ſancto ei-
que fideliter obedirent, nihil niſi Ieſum prædicarent, nihil ſape-
rent dulcius, nihil loquerentur aut commendarent frequentius
quàm Dominum Ieſum. Quod ita verum eſt vt licet forma ba-
ptiſmi ſit in nomine Patris, & Filij, & Spiritus Sancti, illi tamen
in ſolo nomine Ieſu baptizaffe dicuntur, quod vt ait S. Thomas^{Aet. 3.}
ſic nomen Chriſti magis honorabile reddebatur. Hinc Apollo^{3. p. 9 66.}
vir ille Apoſtolicus, cum primò conuerſus eſſet, & feruens ſpi-^{Aet. 18.}
ritu loqueretur, docebat diligenter ea qua ſunt Ieſu, inquit ſcriptura.
Sic conſequenter ſpirituales viri, quo magis ſpirituales, & à ſolo
Spiritu ducti, eò magis toti in ſolo Ieſu.

Sit inſtar omnium teſtis S. Bernardus qui, ſi ſcribas, inquit,^{in Cant.}
non ſapit mihi, niſi legero ibi Ieſum. Si diſputes, inquit, aut conſeras,^{ſer. 15. 20.}
non ſapit mihi niſi ſonuerit ibi Ieſus. Ieſus mel in ore, in aure melos, in
corde Iubilus, ſed eſt & medicina. Tum verò fuſius de ſuauitate ſi-
mul coniuncta cum vtilitate huius Nominis pergit dicere, vnde
hæc deduci ratio facile poteſt, cur Spiritus Sanctus frequentio-
rem de Chriſto cogitationem inducat, quia videlicet nulla eſt
potentior cogitatio, vt quæ ſuauiſ ſimul & vtilis eſſe, ſeu ad ma-
lum euitandum, ſeu ad bonum faciendum ſentiatur. Expende
ampliùs quam vera ſit & potens iſta ratio, & agnoſce quàm cre-
bros ſenſeris de Ieſu motus. O ſi in Tyro & Sidone excitati fuiſ-
ſent!

III. PUNCTVM.

NULLA ergo in re frequentius Spiritui sancto resistitur, quàm quòd infrequentius de Christo cogitetur: Cum in his præcipue rebus Ei resistatur ad quas impellit præcipue. Neque sit aliud ad quod impellat frequentius quàm vt de Domino Iesu cogitetur: Vnde est illud Apocalypsis frequentissimum: *Spiritus & Sponsa dicunt, Veni. Et qui audit, dicat, Veni. Et post pauca, Etiam venio cito. Amen: Veni Domine Iesu.* Atque hinc tantopere in Galatas mouebatur Apostolus quod de Christo sibi prædicato nonnihil remisissent: *O Insensati, quis vos fascinavit non obedire veritati, ante quorum oculos Iesus præscriptus est, in vobis crucifixus?* Oportet certe esse infascinatam, sic resistere tam crebris & validis Spiritus sancti motibus in re tam nobili, tam necessaria, tam facili, & delectabili. Si tibi sublimia quædam & difficilia intellectu proponeret, si dura & aspera voluntati, certe obedire deberes, cum ille non deesset auxilio. At quænam tibi proponit? Iesum Infantem in Virginis utero, Nascentem in stabulo, vagientem in cunis, fugientem in Ægyptum, laborantem in Nazareth, docentem Ierosolymis, conuersantem cum hominibus, patientem ab Inimicis, morientem in Cruce, regnantem in Cœlo, venturum ad Iudicium. Hæc vt cogites, vt loquaris, & in mores tuos inducas, exhortatur. Quid hic adeò difficile & arduum vt te excuses! tamen vnâ hanc cogitandi de Christo difficultatem accusas! O probum! ô pudor! *Quomodo dicis quod amas me, cum animus tuus non sit mecum!* Responde conquerenti Christo; & eius Spiritui ingemiscienti.



FERIA QUINTA.

DE DESIDERIO SANCTORVM

PATRVM CIRCA ADVENTVM DOMINI.

Rorate cæli desuper, & nubes pluant iustum. Il. 45.

Desiderium suum Iustis dabitur. Prou. 10.

VERITAS PRACTICA.

Vix ullus est, qui non se verè putet desiderare Christum, & vix ullus est, qui Eum verè desideret.

RATIO huius postremae partis, quia sola potest habere difficultatem, hac est, quod verè desideranti, nunquam Christus possidendus denegetur.

Sed ex istis qui se verè putant desiderare Christum, vix ullus est, qui Eum nunquam possideat.

Ergo & vix ullus est, qui Eum verè desideret. Quod quàm sit lugendum, patet.

I. PUNCTVM.

QUEM scripsit Moyses in lege, & Prophetæ, hunc vehementer desiderabant antiqui illi Patres, quorum hæ sunt voces & desideria. *Rorate cæli desuper, & nubes pluant in-* Is. 45.
sum: aperiatur terra, & germinet Salvatorem. Utinam dirumperes Ibid. 64.
cælos & descenderes, à facie tua montes defluerent. Neque fuit inane eorum desiderium, sic enim desiderando & petendo, meriti sunt de congruo quod petebant, ut ait S. Thomas. Atque hinc oritur I. p. 9. 2.
 Veritas valde consideranda, *Quod vix ullus sit à Christianis, qui* a. 11.
non se verè putet desiderare Christum, magis ac magis possidendum, cum vix tamen ullus sit, qui verè eum desideret.

Prima pars Veritatis nullam prorsus habet difficultatem. Quis enim est hominum, qui non appetat scire, aut qui sibi bene non velit? Quid est autem dignius? quid utilius? & quid beatius siue ad intelligentiam, siue ad voluntatem explendam, quàm quæ de Christo Domino sciri & amari possunt? Longè enim veriùs, quàm de Elia, de Illo dici potest. *Beati sunt qui te viderunt, & in* Ecclesi. 48.
amicitia tua decorati sunt. Tu de te ipso quid sentis? Nonne etiam plura & plura de Illo sentire appeteres? Restat itaque declaranda postrema pars, quâ dicitur, *vix ullum esse tamen, qui Eum verè desideret.*

Neque verò maiorem habet difficultatem, quàm præcedens, si

Sap. 6. attentè consideretur quod primò præmittitur expendendum, Verè desideranti Christum nunquam negari; sic apertè Sapiens sub nomine Sapientiae. Facile videtur ab his qui diligunt eam, & inuenitur ab his qui quarunt illam. Præoccupat qui se concupiscunt, ut illis se prior ostendat. Qui de luce vigilauerit ad illam, non laborabit, assistentem enim illam foribus suis inueniet. Dignos se ipsa circuit quærens, & in viis ostendit se hilariter, & in omni providentia occurrit illis. Quid clarius? Sic Danieli præ aliis sunt indicatæ quædam particulares circumstantiæ mysterij Incarnationis, quia vir desideriorum es, inquit illi Angelus. Sic Simeoni seni se infans Iesus amplexandum dedit, quia senex infantem videre ante mortem vehementer desiderarat. Sic Moyse & Eliæ apparuit in Transfiguratione, quia faciem eius ardentius alijs experuerant. Sic Zachæo quærenti videre Iesum quis esset; Hodie, inquit, in domo tua oportet me manere. Sic Magdalene ante omnes, atque alijs mulieribus ante Apostolos, dum resurgit se videndum præbet, quia illæ singularem præ se tulerant in Eum curam & studium. Ac præclare quidem de S. Magdalena Diuus Gregorius. Quæsiuit prius, & minime inuenit: perseuerauit ut quæreret, unde & contigit ut inueniret; actumque est ut desideria dilata crescerent, & crescentia caperent quod inuenissent. Sed & Thoma, inquit S. Bernardus, iuxta desiderium cordis eius palpandum se præbuit, & voluntate labiorum eius non fraudauit eum. Atque vniuersim de omnibus verè desiderantibus idem Sanctus concludens, Igitur, inquit, istiusmodi magnis spiritibus magnus occurret Sponsus, & magnificabit facere cum eis, emittens lucem suam & veritatem suam. Vide sermonem integrum & præcedentem, qui toti sunt de hoc argumento; cum, ut ipse ait, Per se ipsum dignatur inuisere animam quærentē se, quæ tamen ad quærendum toto se desiderio & amore deuouit. Et hoc signum istiusmodi aduentus eius, sicut ab eo qui expertus est edocemur, ignis ante ipsum præcedet. Oportet namque ut sancti desiderij ardor præueniat faciem eius ad omnem animam, ad quàm est ipse venturus, &c. Concaleat hoc ardore cor meum intra me, & in meditatione mea exardescat ille ignis.

Hom. 25. in Euang.
Serm. 32. in Cant.
Serm. 31.
Psal. 96.

II. PUNCTVM.

SED ex Istis qui se verè putant desiderare Christum, vix vllus est qui Eum vnquam possideat.

Si de perfecta possessione, quæ in hac etiam vita haberi potest, ageretur, non esset mirum, quod vix à quoquam possideretur vt possideri potest: cum & ipse Apostolus non se satis arbitretur comprehendisse, sed ultra pergens, *Sequor*, inquit, *si quo modo* phil. 3. *comprehendam*, in quo & comprehensus sum à Christo Iesu. Verum de hac perfecta possessione non hic agitur, neque tam fortè ex his sumus, quibus dolendum est deesse aliquid perfectionis, quàm ex iis quibus ipsa vix lucent Euangelij principia, nec quàm longè absint à Christo, norunt; ad quos aptè Apostolus: *Etenim* Hebr. 5. *cum deberetis esse Magistri, propter tempus, rursum indigetis vt vos doceamini quæ sint elementa exordij sermonum Dei.* Quodnam est illud exordium sermonum Dei? quænam sunt elementa huius exordij? Nonne hæc sunt quæ toties audiisti, & quæ nondum didicisti? *Beati pauperes spiritu. Beati mites. Beati misericordes. Beati* Mat. 5. *qui lugent, & qui patiuntur propter iustitiam. Va vobis diuitibus. Va* Luc. 6. *vobis qui ridetis nunc. Va cum benedixerint vobis homines. Beati cum maledixerint vobis, & persecuti vos fuerint & dixerint omne malum aduersum vos, mentientes propter me. Benedicite maledicentibus vobis.*

Hæc sunt videlicet elementa & principia Christianæ quam profitemur religionis; hæc est possessio Domini, & hoc testamentum Christi Iesu quem colimus; hæc est doctrina Magistri nostri; hæc est salutis via quam aperuit, hæc veritas quam docuit; hæc humana vita quam egit. Tanto quis nostrum magis aut minùs illū possidet, quanto magis aut minùs intellectu practico capit, voluntate efficaci amplectitur, & memoriâ vigilianti recordatur illas primas Veritates, vt sese his totum intus & foris accommodet & conformet. *Verba*, inquit, *quæ Ego locutus* Ioan. 6. *sum vobis, spiritus & vita sunt. Hic sermo viuus & efficax, & pene* Hebr. 4. *trabilior omni gladio ancipiti, & pertingens vsque ad diuisionem animæ ac spiritus, compagum quoque ac medullarum.* Id est, sic ipse Christus in nobis manens in nobis operatur, prout à nobis possidetur, sic diuidit appetitum à ratione, & rationem à gratia, vt cum eius verbis credimus, cum fidem factis ostendimus, cum denique vitam verè Christianam & Euangelicam viuimus, appetitus cedit rationi, & ratio Gratix. Hoc est possideri à Christo; hoc est Christum possidere. *Elegit sibi Dominus Israel in possessionem sibi.* Psal. 134.

Iam verò quis eorum, qui se verè putant Christum desiderare,

sic Christum possidet? Capisne tu, qui præ te fers tale desiderium, quale illud, quàm horrendum *Vae diuitibus, aut à mundo benedici*? An te beatum & fortunatum putas, cùm malediceris, cùm impugnaris? An omni petenti tribuis? An saltem parato viuus animo, sic te in omnibus gerere, qualem decet Christi discipulum? An putares studiosum alicuius artis bene possidere Authorem quem sequitur in illa arte discendi, si non magis eum possideret in vsu & praxi, quàm tu Christum possideas in praxi Veritatum quas docuit? Vide vias tuas, vide sensus tuos internos & externos, & vide quantum dissentiant ab Authore tuo. Vide in quantis tibi Apostolus diceret: *Vos autem non ita didicistis Christum, si tamen illum audistis, & in ipso edocti estis, sicut est veritas in Iesu, deponere vos secundum pristinam conuersationem, veterem hominem, qui corrumpitur secundum desideria erroris.*

III. PUNCTVM.

HINC ergo aperte liquet, quòd vix vllus sit qui verè Christum desideret, tametsi vix vllus sit qui non se verè putet Eum desiderare. Cùm enim verè desideranti nunquam denegetur Christus, & tamen Illum tam pauci possideant, vt vix vllus Eum in ipsis elementis Exordij sermonum eius percipiat, quantum ad praxim; certè non aliunde prouenit, quàm quòd non verè desideret, quem se desiderare putat. Nam si de omni Iustorum desiderio vniuersim & absolute dicitur, *Desiderium suum Iustis dabitur. Animam esurientem satiauit bonis; & Beati qui esuriunt & sitiunt iustitiam, quoniam ipsi saturabuntur*: quanto magis id verum esse oportet de desiderio rei desideratissimæ, qualis est ille qui dicitur *desideratus cunctis gentibus; qui est totus desiderabilis*, seu, vt habent septuaginta, *totus desiderium*. Quantumcumque enim anima ipsum desideret, Ipse animam magis desiderat: Atque in hoc mutuo vtriusque desiderio, quid est quod vnionem & possessionem impedire possit?

De hoc mutuo Sponsi & sponsæ desiderio, præclare admodum S. Bernardus in Cantica, inducens custodem Angelum lamenta sponsæ nunciantem, & aduentum sponsi renunciantem. *Discurrit medius*, inquit, *inter dilectum & dilectam, vota offerens, referens dona: excitat istam, placat illum*. Et quæ plura habet, ex quibus

Prov. 10.
Psalm. 106.
Math. 5.
Agg. 2.

Cant. 5.

Serm. 31.
in Cant.

evidenter pater, quàm verum ſit, verè deſideratum Dominum poſſideri, aut ſi non poſſidetur, non verè deſiderari.

Sed, inquires, ſe tamen illum deſiderare ſentiunt. At verò quis neget nos ſæpe falli in noſtris ſenſibus? Vtri magis adhibenda fides? an veritati ſeſe ultro poſſidendam offerenti: an mendaci animæ dicenti ſe verè quærere nec inuenire? Errant verò vehementer, & in hoc errant, quòd eorum deſideria non ſint ſatis ardentia, non ſint ſatis pura, excluſis aliis, non ſint ſatis digna Chriſto. Tale eſt bonum Dominus Ieſus, vt ei capiendò dilatandus ſit animi ſinus, quod ſit ardentibus & puris deſideriis. *De in Pſal. 34. ſiderium, ſinus cordis eſt,* inquit S. Auguſtinus, *capiemus, ſi quantum poſſumus, extendamus.* Itane extendis ſinum? Itane, quantum potes, deſideras? Itane, quantum ſanitatem, quantum ſcientiam & honorem, ſic tu Ieſum deſideras? O cordis humani probrum! quid deſideras anima, niſi bonum? & quid melius Domino Ieſu? Quid eſt humanum & terreſtre, ad quod ſi ſolo deſiderio perueniri poſſet, non libenter deſiderares? Et ad Domini Ieſu poſſeſſionem, vnum ſufficit deſiderium, nec tamen adhibes! Confundere & erudire.

Vide in 2. parte Feriam quintam Hebdomadæ ſanctæ. Et in Indice, *V. deſiderium.*



FERIA SEXTA.

DE SANCTISSIMA VIRGINE
MARIA MATRE DOMINI
NOSTRI IESU CHRISTI.

Quæ eſt iſta quæ progreditur quaſi aurora conſurgens: pulchra vt luna: electa vt ſol: terribilis vt caſtrorum acies ordinata? Cant. 6.

VERITAS PRACTICA.

Sicut omnis à Maria reſpectus, impoſſibile eſt vt pe-

reat : Ita omnis ab Ea despectus , necesse est , ut intereat.

RATIO EST, Quia idcirco omnis respectus ab Ea non perit, quia per Eam obtinet Gratiam Finalis perseverantiae cum qua nemo perit.

Sed omnis etiam despectus ab Ea, priuatur illa Gratia, qua quisquis priuatur, perit.

Ergo sicut omnis respectus ab Ea, impossibile est ut pereat, ita omnis despectus ab Ea necesse est ut intereat.

S. Bonatus
in phar. l.
1. c. 5.

Quae sententia est plurimorum sanctorum Patrum, & valde considerata ad augendum cultum Beatissimae Virginis Matris.

I. PUNCTVM.

PERPENDERE primò quod sanctissima Virgo tale est opus, ut sublimiores quæque mentes illud considerantes nonnisi mirentur & dicant, *Quæ est ista?* Hinc sancti Ioannis Chrysostomi celebre dictum, *quod qui Beatam Virginem non stupet, Deum nescit.* Admirare, obtupear.

Aduerte secundo quod quatuor sunt veluti capita quò referuntur cætera eius præconia, quæque in supradictis Canticorum verbis continentur. Primum est Virginalis Maternitas quæ *Auroræ* exprimitur. Secundum est, Gratiæ amplitudo quæ per *Lunam* adumbratur; Tertium est Gloriæ singularis sublimitas quæ in *Sole* repræsentatur. Quartum denique, amplissima potestas velut *Castrorum acies ordinata.* O vere admiranda in omnibus.

Tertio denique discas, qualis Illi propterea cultus debeat, nempe singularis qui dicitur hyperdulæ supra omnes sanctos, infra solum Deum, unde sanctus Bernardus, *Nihil tibi, ô Domina, æquale, Nihil comparabile. Omne quod est, aut supra te, aut infra est; Supra te solus Deus infra te, quod Deus non est.*

Ad hunc porro reddendum cultum, non parum conferet propositæ Veritatis consideratio, cuius hæc est prima pars omni acceptione dignissima; *Quod omnis respectus ab ea, impossibile est*

ut pereat, quia scilicet per eam, obtinet gratiam finalis perseverantiae, cum qua nemo perit. Sic illa non obscure, *Qui me inuenerit, inueniet vitam, & hauriet salutem à Domino. In me gratia omnis via & veritatis: in me omnis spes vite & virtutis.* Quod sic illustrat S. Anselmus; *Velocior est nonnunquam salus memorato nomine eius quam inuocato nomine D. Iesu: non quod ipsa maior & potentior sit, nec enim ipse magnus & potens est per eam, sed illa per ipsum: quare ergo? Dicam quod sentio. Filius eius Dominus est & Iudex omnium, discernens merita singulorum. Dum igitur ipse, à quouis suo nomine inuocatus non statim exaudit, profecto id iuste facit: Inuocato autem nomine Matris, etsi merita inuocantis non mereantur, ut exaudiatur, merita tamen Matris intercedunt ut exaudiatur.* Breuius Idiota. *Quos saepe Iustitia Filij damnare potest, Matris misericordia liberat.* Fulissime vero sanctus Bernardus sermone de aquae ductu, ubi postquam de Mediatrix interponenda ad Mediatorem egit, sic pergit: *Inuenisti, inquit Angelus, gratiam apud Deum; feliciter; semper hac inuenit gratiam, & sola est gratia quam egemus, sola est gratia qua saluamur. Queramus gratiam, & per Mariam queramus: quia quod querit inuenit, & frustrari non potest.* Idemque alibi. *In hoc conuenienter vocatur Regina misericordiae, quod diuina pietatis abyssum cui vult, & quando vult, quomodo vult, creditur aperire, ut quouis enormis peccator non pereat, cui sancta sanctorum suffragia sui patrocinij praestat.* Salue Regina, Mater misericordiae, vita, dulcedo & spes nostra salue.

Prou. 8.

Eccles. 24.

De excel.

Virg. c. 6.

Sermo. I.

in sal.

Reg.

I L P V N C T V M.

SED similiter omnis ab ea despectus necesse est ut intreat, quia priuatur illa gratia perseverantiae, quam quisque priuatur, perit.

Hoc enim vnum & idem est despici ab ea, & priuari gratia quam communicat alijs, sicut ab ea respici nihil aliud est quam respectos sic adiuuari ut obtineant gratiam qua saluentur; sic prorsus ab ea despici nihil est aliud quam despectos à Filio & à Matre non ita adiuuari ut defectu similis gratiae, pereant in peccato.

Et quidem horum perditionis causa est peccatum proprium sic diuina in eos exigente Iustitia. Sed cum Illi pro quibus in-

S. Bern.
ser. I. de
Nauis.

Sic est voluntas eius qui totum nos habere voluit per Mariam. O Mariæ dignitatem, o Mariæ potentiam!

III. PUNCTVM.

SICVT ergo omnis à Maria respectus impossibile est & pereat; ita
Somnis ab ea despectus necesse est ut intreat.

S. Aug. l.
de pers. c. I.

22. q. 137.
a. 4.

Serm. de
S. Deip.

Apud
Metaph.

Serm. 18.
de sanctis.

Serm. de
aque du-
Eli.
Opusc. de
salut. An-
gel.

S. Io. Dam.
orat. de
Nat. B. V.

S. Bonau.
in phar-
isa.

Merè gratuita est illa perseverantiæ gratia, mere gratuitum donum quod nemo hominum mereri potest, ut certo obtineat: multi autem ac pene omnes suis merentur peccatis ut eo priuentur, sicque merito unicuique timendum est, quod nisi adiuuetur ab Ea cui nihil recusatur, omnino pereat. Sic omnino sanctiores quique sentiunt. Sanctus Ephrem antiquus & valde probatus author, *Intemerata*, inquit, *prorsusque pura, virgo Deipara, spes desperantium, tu portus procellis vexatorum, solatium mundi, & omnium salus, sub alis tuis custodi me, & protege, non mihi alia fiducia, Virgo sincera.* S. Ioannes Chrysostomus: *Per hanc peccatorum veniam consequimur. Ave igitur mater, cælum &c. assidue pro nobis precare Iesum filium tuum, ut per te misericordiam inuenire possimus.* S. Augustinus: *Tu es spes unica peccatorum, per te speramus veniam delictorum, & in te Beatissima, nostrorum est expectatio premiorum.* S. Bernardus: *Filioli, hæc peccatorum schala, hæc mea maxima fiducia est.* S. Thomas: *Sicut nautigantes per stellam diriguntur ad portum, ita Christiani per Mariam ad Salutis gloriam.* Alij, quia longiores sunt, reticentur.

Hic tu quid agas miser peccator? non illam coles à qua te ita pendere intelligis, ut vix aliter sis speranda salus? sed in quo eius cultus? Quid eum promouet? Quid retardat? Hæc inue-
stiga diligentius, & te illi totum offer.



S A B B A T O.

DE SANCTO IOSEPHO SPONSO
VIRGINIS MATRIS.

Ite ad Ioseph, & quicquid ipse vobis dixerit, facite. Genes. 41.

VERITAS PRACTICA.

Melius itur ad S. Ioseph imitatione Virtutis eius, quam laude.

RATIO EST, Quia quò melius à nobis colitur S. Ioseph, eò melius ad eum itur.

Sed melius imitatione Virtutum colitur, quam vlla laude.

Ergo sic melius ad Eum itur. Ac proinde quantum necesse est Eum adire, tantum est imitari.

I. P V N C T V M.

NOTA est historia Patriarchæ Iosephi, filij Iacob quem fratres vendiderunt, quique in Ægypto tam gloriosus fuit, vt ad eum cuncti Ægyptij inopia laborantes à Rege mitterentur: *Ite ad Ioseph.* Nunc vero idem nobis à Deo dictum putemus de S. Ioseph quem sic honorare decreuit, vt cum magis laboramus tum ad eum præsertim subleuandi mittamur. Cum sint autem eius adeundi tres præcipuæ viæ seu modi Laude, prece, & imitatione virtutum. Hic posterior est aliis præferendus, & vere melius itur ad eum imitatione eius virtutum, quàm laude vel vlla prece.

Nam quid est illum adire nisi colere, nisi sibi eum demereri.

Escher. 6. & propitium reddere? hoc est enim quod intendit Deus, *Sic honorabitur quemcumque voluerit Rex honorare.* Vnde id sequitur quòd quàm perfecte Eum coles, tam perfecte adibis. Salue patriarcharum decus & Ecclesiæ sanctæ Dei Oeconomus, cui panem vitæ & frumentum electorum conseruasti.

II. PUNCTVM.

SED melius imitatione virtutum colitur S. Ioseph, quàm vlla laude vel prece.

Nam cum omnis honor & cultus proueniat ab æstimatione quam facimus de eo quem honoramus: quantò apertius erit signum meæ de Sancto æstimationis, tanto erit maior illius cultus: Longe autem apertius erit signum cùm eius virtutes imitabor, quàm cum laudauero; nam facta præstant verbis. Qui tantum laudat nec imitatur, dubiam facit laudationem, cur enim non opere exprimit, quod sermone? At vero qui imitatur, etiam si non laudat verbis, opere ipso magnificat. Hinc sanctus Ioannes Chrysostomus sermonem egregium scripsit de Martyribus quod vel laudandi non sint, vel imitandi, *Quoniam*, inquit, *quem delectet sancti alicuius meritum, delectare debet per circa cultum Dei obsequium: quare aut imitari debet si laudat, aut laudare non debet si imitari detrectat.*

Adde quod ipsi sancti in obsequiis nostris magis spectent gloriâ Dei & nostram salutem, quam sui venerationem; Est autem Deo gloriosius & nobis vtilius eos imitari quam laudare. Non quod à nobis laudandi non sint, sed quod magis etiam imitandi. Sic apte S. Bernardus; *Ad quid sanctis laus nostra? Ad quid glorificatio nostra? quò eis præconia nostra? pleni sunt, bonorum nostrorum non egent, nec quicquam eis nostra deuotione præstatnr. Plane quod eorum memoriam veneramur, nostra interest, non ipsorum. Quali diceret, magis coluntur, magisque sibi gratificatum putant, si ipsorum præclare gesta factis consecremur quam verbis, Quorum* *intuentes exitum conuersationis, imitami fidem*, inquit Apollolus. O vera Charitas quæ non quærit quæ sua sunt.

*Serm. 5. de
fest. om.
Sanct.*

Hebr. 13.

III. PUNCTVM.

MELIVS ergo itur ad sanctum Ioseph, imitatione virtutum, Cum sic melius colatur & honoretur : sic melius obtineatur quod quæritur. Ite ad Ioseph & quodcumque dixerit vobis, facite. Quid est autem quod dicit nobis faciendum, nisi quod ipse fecit ? Quid porro est quod ipse fecit ? quænam eius virtutes quas imitemur ? discas ex hoc quadruplici capite.

Primum, quod fuerit sponsus sanctissimæ Virginis, ac proinde illi quam-simillimus ; Nam in coniugio perfecte instituto, coniuges sic sibi similes esse debent, vt nulla morum dissimilitudine dissentiant. Fuit autem hoc Mariæ & Ioseph coniugium diuinitus factum, ac proinde perfectum quantum ad hanc animorum & vitæ conformitatem. O qualem igitur oportuit fuisse Sanctum Ioseph ? Qualis scilicet erat Maria.

Secundum, quia Pater fuit D. N. Iesu Christi à quo educaretur, regeretur, & cui se Dominus regendum daret, velut ipsi Deo Patri, vnde sequitur S. Iosepho omnes Dei voluntates notas fuisse ex quibus regeret Filium sibi commissum, & ex quibus Pater ipse Nutritius dirigeretur vt facilius infantem regeret. O vere virum secundum cor Dei, qui faciat omnes voluntates eius.

Tertium, quia Contubernalis Iesu & Mariæ per triginta fuit annos, ex quorum quotidiana familiaritate quas non hausit virtutes ? Nam de Vnoquoque Eorum verè dici potest quod Sapiens dicebat de Sapientia : *Sciens quoniam mecum communicabit de bonis : Et præclaritas in communicatione sermonum Ipsius.*

Sap. 8.

Quartum denique caput peti potest ex ijs quæ de eo referunt Euangelistæ, in quibus insignis elucet *Iustitia*, cum dilectam sponsam in tam ancipiti dubio de eius graviditate tam suauiter habuit. *Obedientia*, cum tam prompte ipsâ horâ qua monitus ab Angelo fuit, secessit in Ægyptum. *Patientia* in tantis rerum angustiis. *Humilitas* in religiosissimo silentio. *Renunciatio* siue Abnegatio perfecta omnium, cum non modo patria, parentes, domus, supellex & omnia deferenda fuerunt, dum infans esset Iesus ; sed quando factus est vir, quando ad tricesimum vitæ annum prædicare Christus coepit : o quæ tum desideria Iosephum Patrem mouere poterant vt Filium prædicantem audiret ! sed

morendum fuit, & libenter desiit viuere cum iam vitā ipsius non egeret Filius, propter quem solum viuebat Pater.

Hæ sunt Virtutes imitandæ; & tūc earum aliquis exercendus actus cum adire desideras sanctum Ioseph. Aduerte quid iam possis eius exemplo, in quibus pati, humiliari, & abnegari.

Vide infra in Vigilia Natiuitatis Domini, & die decima Ianuarij, ac vndecima.





DOMINICA SECUNDA ADVENTVS.

DE SANCTO IOANNE BAPTISTA
LAUDATO A CHRISTO DOMINO.

Hic est de quo scriptum est, Ecce ego mitto Angelum meum ante faciem tuam, qui preparabit viam tuam ante te. Matth. II.

VERITAS PRACTICA.

Hoc est vere laudabile, laudari ab officio.

RATIO EST, Quia laudari à voluntate Dei completa, hoc est vere laudabile.

Sed laudari ab officio, est laudari à voluntate Dei completa.

Ergo hoc est vere laudabile, laudari ab officio. Quam tamen laudem pauci merentur.

I. PUNCTVM.



VM audisset Ioannes in vinculis opera Christi, mittens duos de discipulis suis, ait illi. Tu es qui venturus es an alium expectamus? Vide quæ sequuntur ex Euangelio hodierno; Et in multis illud præcipue contemplare, quàm sapienter Christus Dominus laudet suum Præcursores

Mal. 3.

ab hoc eius officio digne gesto. Quanta erant in Ioanne prædicanda? Conceptio mirabilis, Sanctitas singularis, Solitudo stupenda, Continentia inusitata; nihil tamen horum prædicat Dominus; sed hoc vnum quod sit Propheta & plusquam propheta, seu quod idem est, quod sit ille Angelus prædictus à Malachia, qui aliter præcursor dicitur, ad hoc missus à Deo ut præpareret viam ante Christum, Id est, ut disponat homines ad eum recipiendum. Quo nomine illum præcipue Dominus laudat quia hoc erat eius præcipuum officium ut esset præcursor Domini, quo quidem officio cum præclare fungeretur, hæc erat eius etiam præcipua laudatio, *Nam hoc est vere laudabile, laudari ab officio*, bene scilicet administrato.

Is. 44.

Apoc. 1.

Ps. 148.

Ratio est euidentis, quia laudari à Voluntate Dei completa seu plane effecta, hoc est vere laudabile. Hic est enim Finis omnis creaturæ ut sit ad Deum, sicut hoc est eius principium ut sit à Deo, qui propterea dicitur *primus & nouissimus*, & *principium & finis*. Esse autem creaturas ad Deum, quid est aliud quam idcirco esse ut faciant verbum seu voluntatem eius? Est igitur earum finis Voluntas Dei. Iam vero cum res aliqua finem suum perfecte attingit, nonne perfecta est? si porrò est perfecta nonne tum laudabilis quantum est laude digna? Sic ergo euidenter apparet, quod laudari à Voluntate Dei, hoc sit vere laudabile.

Psalm. 102.

Isaiah. 4.

Sic Angeli nobiliores creaturæ maxime commendantur cum de his dicitur: Benedicite Domino omnes Angeli eius, potentes virtute, facientes verbum illius, ad audiendam vocem sermonum eius. Sic ipse Angelorum & hominum Dominus hoc vno se commendabat, *Ut faciam*, inquit, *voluntatem eius qui misit me, ut perficiam opus eius*. Posset ne à te cogitari aliquid altius & sublimius quod faceres, quam quod Deus vult? sed posset ne etiam aliquid aliud cogitari quod te impediret, ne faceres quod ille vult?

II. PUNCTVM.

SED laudari ab officio rite administratio, est laudari à voluntate Dei completa, seu quam plene fieri potest, adimpleta.

Nam cum semel ex ordinatione diuina susceptum est officium quoties bene illud administratur, toties Dei Voluntas efficitur, neque

neque aliter certius & manifestius diuina nobis voluntas inno-
 rescit, quam per nostrum officium. Quis enim dubitet quin Deus
 ab vnoquoque velit vt id præstet quod ab ipso præstandum ac-
 cepit? Quis sibi non dictum putet ab Apostolo, quod is dicit Ar-
 chippo, *Vide ministerium quod accepisti in Domino, vt illud implcas?* Coloss. 4.
 At de quouis alio bono opere quis ita certus esse potest? Imo
 quantumcumque bonum sit opus, si repugnet officio ritè obeun-
 do, tunc desinet opus esse bonum, quia impedit aliud quod est
 certius bonum. Sed vnde est certius bonum, nisi quod est certius
 à diuina voluntate? Atque illud est quod monebat Apostolus;
Non plus sapere quàm oportet sapere, sed sapere ad sobrietatem, & Rom. 12.
unicuique sicut Deus diuisit mensuram fidei. Sicut enim in vno corpo-
re multa membra habemus; Et quæ plura pergit.

Adde hîc verò, quod cum officij cuiuslibet plures sint partes
 seu plures bene gerendi occasiones, quisquis sic omnibus inten-
 tus est, vt nullam omittat, vere is dicitur totus esse in Dei vo-
 luntate adimplenda; quod non potest dici de alio quolibet bono
 opere, in quo tam frequens esse non poterit sicut in officio & mu-
 nere persoluendo.

Denique non vna tantum Voluntas Dei in eo fit, sed triplex
 illa de qua Apostolus: *Vt probetis qua sit voluntas Dei bona, & be-* Rom. 12.
neplacens & perfecta: Nempe cum id fit in substantia quod vult
 Deus; cum in modo sicut vult; & in fine quia sic vult. O quam
 præclare tum administratur officium cum sic voluntas Dei adim-
 pletur! & quàm vere tum voluntas diuina completur cum sic
 præclare administratur officium!

III. P V N C T V M.

HOC est ergo verè laudabile, laudari ab officio; Cum sit vere
 laudabile, laudari à voluntate Dei, quæ tantò perfectius
 adimpletur, quàm perfectius completur ab vnoquoque suum vi-
 tæ degendæ munus & officium. *Vita in voluntate eius:* seu na- ps. 29.
 turalis, seu ciuilis, seu spiritalis vita: tota est in voluntate eius.

Non est quidem humana laus in officio bene gerendo appe-
 tenda, sicut enim desineret bene geri si propter humanam Lau-
 dem gereretur: Sed idcirco dicitur vere laudabile, laudari ab of-
 ficio, vt intelligas nulla re alia, te ab eo distrahendum, quan-

Ecclef. 4. tumcumque sit illa res laudabilis & appetenda. *Ne accipias faciem aduersus faciem tuam.*

Esto sit aliud munus & officium tuo dignius & excellentius, si tamen tuum non est, & illud exercere velis, tuo prætermisso; non modo non laudabile, sed probrosum tibi erit. *Non est tui officij, Ozia, vt adoleas incensum Domino, sed Sacerdotum; Egredere de sanctuario, ne contempseris, quia non reputabitur tibi in gloriam à Domino Deo.* Non qui officium maius & laudabilius gesserit, ille est maior & laudabilior, sed qui suum dignius administrarit, quantulum illud cumque fuerit. Quid ad te de aliis. *Tu me sequere*, dicebat Dominus Petro; quali diceret vt interpretatur S. Chrysostomus: *opus suscepisti, id considera, perface & labora. Quid ad te de Ioanne, tu officium tuum cura & exequere.*

Itane tibi est curæ tuum? Vide in quo deficias & quantum Dei voluntatem amas, quantum à Deo probari vis: tantum fidelis esto in hac parte. *Da mihi Domine sedium tuarum assidricem sapientiam vt mecum sit & mecum laboret.*

Vide infra Férias proxime sequentes Dominicam quintam post Epiphaniam. Et in secunda parte in festo S. Matthiæ. Feria 4. post Quinquagesimam. Feria 3. infra Octauas Ascensionis. Tres primas qua habentur inter Communes. Et Verbo, Vocatio, Officium &c.

IN EADEM DOMINICA SECUNDA ADVENTVS.

AD HÆC EVANGELII VERBA:

Cum audisset Ioannes in vinculis opera Christi.
Math. II.

ALIA VERITAS PRACTICA.

Liberior & beatior est Ioannes in vinculis, quàm Herodes in epulis.

RATIO EST, Quia ille liberior verâ & beatâ libertate est, qui

nulla re detinetur, quo minus agat quod agendum in Domino viderit.

Sed nulla re Ioannes in vinculis: Herodes vero cupiditate & metu detinetur, quo minus agat quod agendum videret.

Ergo liberior & beatior est Ioannes in vinculis, quàm Herodes in epulis.

VIDE illud ad praxim ducitur, quod nihil æque seruire est & minus liberum quam passio: nulla libertas maior & carior nobis esse debet quam illa libertas interior, qua soluitur animus omnibus terrenorum affectuum vinculis.

Prima propositio præsupponit multiplex genus libertatis de quo fusius alibi. Satis sit modo triplex illud obseruare ad quod cetera omnia reuocantur. Primum est malæ cuiusdam libertatis de qua Apostolus: *Vos in libertatem vocati estis, tantum ne libertatem detis in occasionem carnis.* Et sanctus Petrus, *Non velamen habentes malitiæ, libertatem.* Gal. 5. 1. Pet. 2.

Secundum genus est indifferentis, qualis est naturalis & humana libertas de qua dicitur: *Deus ab initio constituit hominem* Eccl. 15. *& reliquit illum in manu consilij sui. Apposuit tibi aquam & ignem, ad quod volueris porrige manum tuam.*

Tertium denique est veræ & beatæ libertatis quæ à Spiritu sancto est iuxta illud Apostoli, *Vbi spiritus Domini, ibi libertas;* 2. Cor. 3. libertas scilicet spiritualis de qua sic aptè sanctus Leo: *Tunc est* Sermon. 1. *vera pax & vera libertas hominis, quando & caro animo indi-* de quadr. *ce regitur, & animus Deo præside gubernatur.* Et alibi, *Cum caro* Sermon. 4. de *concupiscens aduersus spiritum spirituali cupiditate superatur, tunc* ieiun. Pet. *libera obtinetur sanitas, & sana libertas, ut & caro mentis iudicio, & mens Dei regatur auxilio.* Sic etiam sanctus Augustinus, *libertas nulla vita est nisi beatorum, & legi æterna adherentium.* Et L. 1. de lib. *rursum; quem delectat libertas, ab amore mutabilium rerum, liber* arb. c. 15. *esse appetat, & quem regnare delectat, is omnium Regnatori subditus* L. de Rel. *hæreat.* Ex quibus satis manet probata propositio. c. 48.

Secunda vero patet & Euangelio; nam præterquam quod sanctam hanc libertatem sanctus Ioannes iam aperte professus

Matth. 6.

erat, cū Herodem arguit suæ libidinis: nunc etiam in vinculis ab eodem rege positus, quæ sunt opportuna discipulis suis diligenter curat, dum ipsos mittit ad Christum Dominum, à quo discant oculati testes Illum Eum esse qui promissus in lege est, & prædictus à prophetis; cui vni deinceps toti adhæreant. Hoc est scilicet esse liberum, hoc est nulla re detineri, non cupiditate honoris quem defert Christo, non metu mortis quam sibi videt impendentem, & à qua non petit liberari. Contrà vero Herodes licet non ignoraret Ioannem esse iustum & sanctum, licet illum audiret, & audito crederet in quibusdam bonis patrandis: tanta tamen libidine detinetur vt contra fas omne, audeat vxore fratris abuti, nec sibi videatur posse dissoluere tam arcta quibus constringitur prauis amoris vincula. Itane vero is poterit dici liber vera & beata libertate qua sanctus Ioannes?

Adde, quod cū iurasset saltatrici filiæ Herodiadis, se daturum illi quidquid petiisset, petiisset autem caput Ioannis Baptistæ: fatis vidit rex Iudeus se nulla religione iurisiurandi obligatum, nec nisi summo cum scelere consensurum in necem Viri omnium optimi. Tamen ita timet nescio quid à Galilæis tūm simul discumbentibus, vt illo timore constrictus non ausit denegare quod postulat. Et hunc diceret fuisse liberum eā libertate quam vnā sancti verā & sanā dicunt? Caue dicas, & Conclude, quod

LIBERIOR igitur sine vlla comparatione & beatior est Ioannes in vinculis, quam Herodes in epulis. Et quisquis sua se cupiditate sic deuinctum esse finit vt quod alioquin bene ageret, tunc non se posse putat, non est ille liber sed seruus, & mancipium suæ illius cupiditatis. *Serui sunt Corruptionis*, inquit sanctus Petrus, à quo enim quis superatus est, huius & seruus est. Cui subscribens Coapostolus Paulus, *Nescitis*, inquit, *quoniam cui exhibetis vos seruos ad obediendum, serui estis eius cui obeditis, siue peccati ad mortem, siue obeditionis ad iustitiam?*

Hanc Illi scilicet doctrinam & disciplinam à magistro & Domino suo hauserant qui Iudæis affirmarat, *Quod omnis qui facit peccatum seruus est peccati: & solos illos esse vere liberos quos Filius liberauerit.*

Quamobrem hanc excute seruitutem, & asserere te cum gratia in libertatem filiorum Dei. Vide, ne vllō prauo affectu detinea-

2. Pet. 2.

Rom. 6.

Ioan. 8.

tis, neque rerum prosperarum complacentia, neque aduersarum displicentia sinas te moueri. Subde hæc animo tuo quasi indigna Christianæ celsitudini. In hoc vno veram libertatem à vera seruitute dignosce: *Quasi enim, inquit sanctus Gregorius, quodam iugo seruitutis premunt prospera dum appetuntur: premunt aduersa dum formidantur. At si quis semel à dominatione desideriorum temporalium colla mentis excusserit, quadam iam in hac vita libertate perfruitur, dum nullo desiderio felicitatis afficitur, nullo aduersitatis terrore coarctatur.*

IN EADEM EVANGELII VERBA.

ALIA VERITAS PRACTICA.

Multi cum Herode Ioannem in vinculis tenent.

RATIO EST, Quia Ioannem in vinculis tenent qui quod ait Rom. I.

Apostolus, Veritatem Dei in iniustitia detinent.

Sed multi Veritatem Dei in iniustitia detinent.

Ergo multi cum Herode Ioannem in vinculis tenent. Quod patet quam sit horrendum & timendum ne ex illis sis.

PRIMA propositio pendet omnino ex interpretatione verborum Apostoli: *Qui veritatem Dei in iniustitia detinent*, & perinde est ac si diceret qui cognitam de Deo ac diuinis rebus veritatem iniuste ac malignè supprimunt, ac se dissimulant cognoscere, ne teneantur facere quod illa veritate cognoscunt faciendum, & quod sua voluntatis prauitate nolunt facere. Quando enim quibusdam aperte apparet Veritas vt omnino eam negare non possint, sentiunt se stimulari ad volendum & faciendum quod docet: vel si repugnent & nolint id facere; tùm stimulo conscientiae punguntur & cruciantur, quo vt se cruciatu liberent, abscondunt & incarcerant quodammodo veritatem, tenent eam velut captiuam ne appareat, ne loquatur, & ne stimulum excitet. Hoc est autem quodammodo cum Herode Ioannem in vinculis tenere, quia hæc vna erat ratio cur Ioannem

Marci 6.

Herodes vinciret & custodiret in carcere. Nempe Ioannes Herodi hanc veritatem proponebat: *Non licet tibi habere uxorem fratris tui*: Quâ veritate cum Herodes se primo sentiret commoueri ad coercendam libidinem, libido restitit, & in illa resistentia factus est Herodi stimulus & angor mentis quem vt depelleret, captiuauit Ioannem, & in Ioanne veritatem: ne scilicet importuni essent monitores qui libidinem interturbarent. *Odiu peperit veritas*, ait sanctus Augustinus. *Non potuit aquo animo tolerari quod homo sanctus monebat, qui ubique salutem eorum quarebat quos sic monebat.*

Serm. 10. in
pionis serm.

Sic igitur Ioannes in vinculis positus propter Veritatem cum sit velut imago quædam & representatio ipsius Veritatis captiuatâ ab his qui eam nolunt audire, nonne hi quodammodo dici possunt cum Herode Ioannem in vinculis retinere?

Rom. 2.

Sap. 1.

Ps. 35.

AT vero, quæ est secunda propositio, multi sic Veritatem Dei in iniustitia seu in captiuitate detinent. Primo id declarat Apostolus de omnibus illis Gentilibus qui cum Deum ipso naturæ lumine cognouissent, non sicut Deum glorificauerunt & coluerunt, sed euanuerunt in suis cogitationibus. Deinde id ostendit etiam in Iudæis, qui cum facile possent nosse Christum Deum, non tamen cognouerunt quia cognoscere noluerunt, *eccacauit enim illos malitia eorum*. Sic denique hæretici, schismatici & alij à fide orthodoxa disuncti, qui de Christo audiuerunt: quin & ipsi Christiani omnes qui vitam & mores Euangelio conformare nolunt, nonne sciunt aut nonne scire possunt veritatem oppositam suo viuendi modo? Et tamen nesciunt, inquire ab eis vtrum se errare & peccare putent? negabunt, & audebunt affirmare quod si veritatem scirent, eam sectarentur. Sed vt sæpe dicendum erit, ignorantia est affectata, dissimulatur veritas, incarceratur, captiuatur. *Verba oris eius qui sic loquitur*, ait Psalter, *iniquitas & dolus. Noluit intelligere vt bene ageret*. Nonne vero hi multi sunt? Nonne pene sic omnes? Nonne tu qui hæc audis audiuisti beatos esse pauperes, & miseros diuites, beatos esse mites & qui persecutionem patientur: infœlices eos contra, quos mundus fœlices vocat. Tu tamen itane sentis? Itane te beatum putas in paupertate, & in indigentia? Itane te infœlicem in tua fœlicitate credis? At vbi Veritas illa euangelica quæ id enuntiat & prædicat?

Detinetur videlicet in iniustitia, perperam explicatur, iniuste ab unoquoque applicatur aliis & non sibi. *Iudicium Domino cum habitatoribus terra*, ait Propheta, *non est enim Veritas*; Quali diceret, inde iudicabuntur omnes homines quod perinde viuant ac si non esset veritas. *Quare detraxistis sermonibus veritatis.* osae 41

Patet ergo quàm *Multi sint qui cum Herode Ioannem in vinculis teneant*, cum multi sint qui Veritatem Dei in iniustitia detinent, cuius veritatis defensionem qui suscipiunt sicut representantur in sancto Ioanne, sic illam qui captiuant, vt dictum est, Herodem habent prototypum quem vita exprimunt, licet ore detestentur. *Veritatem requireret Dominus, & retribuet abundanter facientibus superbiam.* Iob. 6.

Ps. 30.

AD HÆC EVANGELII VERBA.

Beatus qui non fuerit scandalizatus in me. Matth. II.

ALIA VERITAS PRACTICA.

Sicut scandalizans, ita peccat scandalizatus.

Id est. Sicut qui scandalizat, & auertit alium à bono, vel inducit in malum, male facit: Sic qui scandalizatur & se finit peruertere, tam male agit, & tam grauiter peccat.

RATIO EST, Quia idcirco scandalizans peccat quòd sit causa peccati alterius.

Sed qui scandalizatur est etiam causa sui peccati.

Ergo sicut scandalizans ita & scandalizatus. Quod quidem fufius pertractatur in libris de ordine, in tertia operis parte, tomo quarto, discursu 34. Unde hæc pauca deriuamus.

PRI MA propositio præsupponit scandalum esse actiuū id est quo verè peruertitur alius, vel verbo, vel facto, siue id ioco, siue id serio fiat, *Ambulans recto itinere*, inquit Sapiēs, *Pro. 14* & timens Deum, despicitur ab eo qui infami graditur via. Ille despe-

ctus, ista irrisio, isti sales & ioci qui in recte ambulantes contorquentur, scandala sunt quibus à recto suo itinere reuocantur, quia nemo vult despici; confusio difficile toleratur, malunt non facere bonum quàm faciendo erubescere. Tunc itaque dicitur scandalizans valde peccare, quia vt ait S. Bernardus: *Et defraudauit Dominum serui obsequio, & seruum Domini gratia.* Hoc est agere dæmonem & Antichristum, quorum hoc est opus & institutum, bonos peruertere; Vnde illud est sancti Ioannis in epistolis;

2. Ioan. 2. *Et nunc Antichristi multi facti sunt. Cur subuertitis mentes filiorum*

Num. 32. *Israël, aiebat Moyses, nulli dubium est quin peccetis in Deum, & scitote quia peccatum vestrum apprehendet vos.* Quale vero sit peccatum sic alibi declaratur, *Peccatum grande nimis coram Domino quia retraherant homines à sacrificio. Mandebant herbas & arborum cortices,* inquit Iob, Id est, vt fusè interpretatur sanctus Gregorius, suis irrisiõibus obstruebant, & velut maligno radebant dente

Ecclesi. 36. *quidquid boni in aliis apparebat. Hinc Sapiens: Qui pessimant*

Matth. 18. *plebem meam, inuenient perditionem.* Et Dominus, *Va illi per quem*

1. Cor. 8. *scandalum venit:* Vnde & Apostolus; *Sic peccantes in fratres, & percutientes conscientiam eorum infirmam in Christum peccatis,* Et alibi. *Portabit iudicium quicumque est ille.* Ex quibus satis liquet quàm male agant qui à bono bonos auocant, aut in malum inducunt.

NUNC vero, quod est alterũ hĩc expendendum, quàm male hi etiam aut peius agant qui se sinunt auocari ab aliis, eadem prorsus Ratio est, eademque scripturæ testimonia probant. Sunt enim perinde causa sui peccati atque alij, quibus deberent resistere, & quibus si cedunt, suã culpã cedunt, & propterea non minus quam illi aut forte grauius punientur. Nonne est Mundus, nonne est ille hostis qui cum carne & dæmone salutem nostram oppugnat, & cui proinde non minus est resistendum quam aliis? Quando Pater aut Mater ad malũ aliquod vellent impellere, non essent audiendi, quacumque proposita poenã; & tu nugaces nescio quos timebis offendere? An te putares excusatum si te à carne aut dæmone impulsus ad peccandum excusares? *In quo iudicas alium,* inquit Apostolus, *te ipsum condemnas, eadem enim agis quæ iudicas.* Nempe cognoscis malum esse quod alij faciunt, & quod nolles facere, nisi te ad illud impellerent: vnde & grauius peccas quia

quia contra lumen & conscientiam tuam finis te agi & perueri,
 ficque manifestè creaturam præfers Creatori, & confusionem
 quæ ab hominibus nascitur magis times quam confusionem quæ
 à Deo est, & quam expressa continent Christi verba, *Qui me eru-* Luc. 9.
buerit & meos sermones, hunc filius hominis erubescet cum venerit in
majestate sua, & Patris, & sanctorum Angelorum. Propterea Chri-
 stus Dominus vocatur *lapis offensionis & petra scandali*, quia est 1. Per. 2.
 causa obiectiua propter quam scandala fiunt & debent tolerari,
 nempe propter eius cultum propter Euangelicas Veritates quas
 docuit contra mundi mores & iudicia; Vnde & dicebat ipse Do-
 minus, *Qui ceciderit super lapidem istum, confringetur: super quem* Math. 21.
vero ceciderit, conteret eum. Id est qui suscipit & non repellit
 scandalum, grauius peccat & grauius punietur: *Quoniam Deus* Ps. 52.
dissipauit ossa eorum qui hominibus placent, confusi sunt quoniam Deus
spreuit eos. Tu times sperni ab hominibus, & non times à Deo
 sperni! Deus ille gloriæ & maiestatis pro te tot probris & contu-
 meliis affectus est, tu vero ne verbulum vllum pro illo possis
 pati! Certe hoc pauendum, nempe illa terra petrosa est vbi ia-
 ctum semen perit, sic ipso Domino declarante; *Qui super petrosa* Math. 13.
seminatus est, hic est qui verbum audit, & continuo cum gaudio acci-
pit illud. Non habet autem in se radicem, sed est temporalis; facta au-
tem tribulatione & persecutione propter verbum, continuo scandali-
zatur. Et quod est valde notandum, non tantum inde sui est cau-
 sa peccati sicut alius à quo inducitur, sed & alium scandalizat,
 alium confirmat in malo, quem forte conuertisset si firmus per-
 sistisset in bono, deprauat magis & roborat in sua prauitate;
 Vnde illud est etiam Domini, *scandalizabuntur & inuicem tra-* Math. 24.
dent, id est, sese mutuo ita peruertent, vt non modo boni per-
 uertantur à peruersis, sed & ipsi peruersi à bonis deficientibus
 magis in sua peruerfate confirmentur. Quò spectat illud Pro-
 phetæ, *Confortastis manus impij, vt non reuerteretur à via sua mala,*
vt viueret. Reuersus nempe fuisset tuâ constantiâ & firmitate; Ezech. 13.
 nunc vero vix vnquam reuertetur quia videt probiores facile re-
 filire, nec se putabit magis quam illos perseverare posse.

SIC ergo sicut scandalizans, ita & scandalizatus; ita vterque
 grauius peccat, sed quia scandalizatus minus forte agnoscer
 peccatum suum quàm alius, idcirco ipsi est incumbendum dili-

gentius vt quæ dicta sunt ponderet & sibi applicet, tantoque magis timeat, quantò sibi minus videt timendum. Nam si qui sint ex hac vita puniti, scandalizatus & in errorem inductus sæpe magis plectetur quam alius. Testis ille Propheta qui seductus ab alio, seductioni cessit, mox à leone deuoratus est in pœnam suæ defectionis; nec de seducentē narratur sumpta pœna. Vide notatum locum; & illud Apostoli transfer ad omnes occasiones dandi vel accipiendi scandali: *Itaque quæ pacis sunt sectemur, & quæ edificationis sunt in inuicem custodiamus. Noli propter escam destruere opus Dei: omnia quidem sunt munda, sed malum est homini qui per offendiculum manducat*, Id est, cum offendiculo & destructione proximi vel suæ ipsius conscientiæ; *Omne quod non est ex fide peccatum est.* Omne quod quis agit non persuasus id sibi licere, sed vel illicitum putans, vel dubitans vtrum liceat, peccatum est. Aduerte diligenter: & Vide infrà die 16. Ianuarij. Feria 3. post Dominicam sextam. Et in 2. parte Feria 3. post Dom. Septuagesima. Feria 6. post Dom. primam Quadragesimæ. Feria 3. post Dom. quartam Quadrag. Feria 3. intra Hebd. tertiam post Pascha. Et in Indice Verbo *Scandalum. Humilitas. Respectus humanis.*



HAC HEBDOMADE, consideratur Annunciatio Angelica, vbi sex gradus humilitatis annotantur.

FERIA SECVNDA.

De primo gradu humilitatis qui ex his verbis ducitur: Missus est Gabriel Angelus à Deo. Luc. I.

VERITAS PRACTICA.

Nullâ re homo quantumuis gloriosâ, gloriari potest.

RATIO EST, *Quia nulla res est hominis quam non ipse acceperit.*

Sed nulla re accepta gloriari potest homo.

Missus est Angelus, & primus Humilitatis gradus. §. I

Ergo neque re vlla quantumuis gloriosa. Et tamen quàm multi
vane gloriantur.

I. PUNCTVM.

VBI venit plenitudo temporis qua misit Deus Filium suum factum ex muliere, factum sub lege, primò missus est Angelus Gabriel à Deo in ciuitatem Galileæ cui nomen Nazareth, ad Virginem desponsatam viro, cui nomen erat Ioseph, de domo David, & nomen Virginis, Maria.

Expendi singula possent, sed illud imprimis quod dicitur, Missum esse à Deo Angelum, vt denotetur origo & principium beneficij Redemptionis humanæ esse à Deo. Agnosce beneficium.

Sic porrò est de singulis quibusque bonis; sic à Deo proueniunt tanquam riui à fonte. *De cælo ista possideo*: Dicebat vnus 2. Mach 7. è septem Machabæis. Atque hinc primus humilitatis gradus eruitur, cuius frequentior praxis in proposita veritate consistit, *Quod nullà re homo quantumuis gloriosa gloriari potest.*

Ratio est ita facilis & aperta vt ex ipsis verbis pateat, sed quia in praxi longe est alius sensus, idcirco nō est segniter expendēda.

Primo itaque illud etiam atque etiam vide quàm verum sit nullam rem esse hominis quam non ipse acceperit. *Quid enim habes quod non accepisti*, quærit Apostolus. Omnia bona vel sunt temporalia, vel corporalia, vel spiritalia. Estne aliquid horum quod non acceperis? Ac de spiritalibus quidem nonne illud agnoscis tanquam ex fide: *Omne datum optimum, & omne donum perfectum desursum est, descendens à Patre luminum*? De corporalibus vero, nonne cum Iobo dicis Deo, *Manus tuæ Domine fecerunt me & plasmaverunt me totum in circuitu*? De temporalibus denique: Nonne ipse Deus, *meum est*, inquit, *argentum, & meum est aurum*? Quàm præclare Dauid, & tu si sapis cum illo, *Tua est Domine magnificentia & potentia, cuncta enim quæ in cælo sunt & in terra, tua sunt: tua diuitiæ & tua est gloria; tua sunt omnia, omnis copia de manu tua est, & tua sunt omnia.*

II. PUNCTVM.

SED nullà re acceptà gloriari potest homo.

Sic enim consequenter Apostolus, *si autem accepisti, quid*

L. 3. ad
Quir. 4.

gloriaris, quasi non acceperis? Sic & S. Cyprianus: *In nullo gloriantur quando nostrum nihil est*; Si quid enim mutuo accepisses vel tanquam depositum; an illo gloriari velles, aut posses tanquam tuo? Sic cogita de re quacunque tua, sic esse tuam tanquam non sit tua. Nam primò non aliter accepisti, quàm vt eam reddas, quoties repetet Ille à quo accepisti. Deinde quicquid sit quod acceperis magis est in potestate & dominio Dei, siue vt conseruetur in esse suo, siue vt destruat & pereat, quàm in tua potestate, vnde magis illud est Dei quam tuum. Denique quomodocumque tuum sit, sic est tibi datum à Deo vt prouenientem inde gloriam sibi reseruarit, atque ita illud quantum ad gloriam sic considerare debes tanquam non tuum, quia reuera non est tuum, vt inde glorieris. Neque tu ipse ita tuus es vt de te ipso gloriam sumas, cum te tuaque omnia ad Deum velut ad finem referre debeas, vt ipse toties & tam manifeste tibi significatum voluit: *Propter me propter me faciam vt non blasphemem, & gloriam meam alteri non dabo. At ego, inquit superbus, mihi eam, licet non dederis, usurpabo.* O detestandam superbiam.

Isa. 48.

S. Bern.
serm. 4. in
Nat. Dom.

III. PUNCTVM.

1. Cor. 3.

NULLA re igitur homo, quantumcumque gloriosa, gloriari potest: Quia nulla res est quam non acceperit, & nulla re accepta gloriari potest, quia semper manet in dominio illius à quo eam accepit, & cui debet reddere, quoties repetet: nec denique alio fine eam accepisse potuit quam vt omnem inde prouenientem gloriam illi referret. Sic præclare Apostolus, *Quid igitur est Apollo? quid vero Paulus? Ministri eius cui credidistis, & unicuique sicut Dominus dedit. Ego plantavi, Apollo rigauit, sed Deus incrementum dedit; Itaque neque qui plantat est aliquid, neque qui rigat, sed qui incrementum dat Deus.*

Ecccl. 10.

2. Cor. 3.

Ah quoties contra peccasti! quàm graue illud peccatum! quid inde damni! quid periculi! quid remedij! Hæc reuolue attentius: audi sapientem, *Noli extollere te in faciendo opere tuo.* Et quid quid egeris semper illud Apostoli cogita, *Non sumus sufficientes cogitare aliquid à nobis quasi ex nobis: sed sufficientia nostra ex Deo est.*



FERIA TERTIA.
DE SECUNDO HUMILITATIS
GRADU AD HAEC ANGELI VERBA.

Aue gratia plena, Dominus tecum. Luc. i.

VERITAS PRACTICA.

Nulla res est in humanis verè gloriosa.

RATIO EST, Quia nulla res est vere gloriosa quam non commendat Dominus.

Sed nulla res est in humanis quam commendat Dominus.

Ergo nulla res est in humanis vere gloriosa. Et tamen in his majorem suam homines constituunt gloriam!

I. PUNCTVM.

SIC intueri animo aduolantem Virgini Angelum, ut magis Eum loquentem audias; sic vero loquentem audi ut magis mireris quid non loquatur quam quid loquatur. Cur enim laudaturus Virginem tot laudis argumenta flet? Cur nihil de eius pulchritudine? nihil de eius nobilitate? nihil de scientia? nihil de potestate? nihil denique de cæteris humanis donis quibus Illa plene abundat! Esto, sit gratia plena, esto sit hoc gloriosum & magnificum. At nonne etiam naturalibus & humanis erat plena donis? nonne hæc etiam gloriosa & commendanda? O Iudicia Dei & hominum quam longe diuersa sunt! *Non enim cogitationes meæ, cogitationes vestræ: neque via vestra, via mea, dicit Dominus: quia sicut exaltantur cæli à terra, sic exaltata sunt via mea à viis vestris, & cogitationes meæ à cogitationibus vestris.*

Sunt quidem apud homines humana hæc gloriosa, sed non sic apud Deum, unde non sunt vere gloriosa, non sunt appetenda sed potius contemnenda. Atque in hoc rerum humanarum contemptu situs est secundus humilitatis gradus qui proxime ad præcedentem accedit, hoc sensu, quod licet daremus homini multa inesse bona humana, seu naturalia, seu acquisita, non deberet tamen in iis gloriari, quia *Nihil ex illis humanis vere est gloriosum*. Cum vero sint humana illa unde homo frequentius solet haurire gloriam, idcirco attentius hæc est Veritas expendenda ad solidæ humilitatis studium.

Primum itaque illud considera quàm sit verum quod prima propositione dicitur, nullam rem esse vere gloriosam quam non commendat Dominus. Cum enim res non aliter dicatur gloriosa quam quod communicat homini gloriam, nulla res erit vere gloriosa, nisi veram communicet gloriam. At vero quomodo veram gloriam posset communicare res humana, quam non probaret & commendaret Dominus, cum vera gloria nihil sit aliud quam ipsa Dei probatio & commendatio? Nam præterquam quod vniuersim nulla est veritas in rebus, seu nulla res vera est nisi per respectum & relationem ad intellectum diuinum, ut ait S. Thomas, prout videlicet, sic vere esse cognoscitur ab intellectu diuino perfectè omnia cognoscente; hoc speciatim tamen dici potest de gloria, quod nulla sit vera nisi Deo approbante; quia omnis gloria non aliter oritur quam per approbationem alicuius iudicij; & quale erit iudicium, talis erit gloria; si falsum iudicium, falsa gloria: si verum iudicium, vera gloria. Quodnam est autem verum iudicium nisi Diuinum? ac proinde quænam erit vera gloria, nisi quæ ex illo vero iudicio formabitur & procedet? Unde manifeste patet nullam rem esse vere gloriosam quam non commendat Dominus; & in hunc sensum dixisse Apostolum, *Mihi autem pro minimo est ut à vobis iudicer, aut ab humano die: qui iudicat me, Dominus est. Et tunc laus & gloria erit unicuique à Deo cum iudicium de vnoquoque proferet Deus*. Vide locum Apostoli & eundem affectum indue.

II. PUNCTVM.

SED nulla res est in humanis quam commendat Dominus.
Si spectarentur res creatæ & humanæ ut sunt creatæ &

permissa à Deo, sanè dicendus esset Deus illas probare & commendare: *Diligit enim omnia quæ sunt, & nihil odit eorum quæ* Sap. II. *fecit, vt ait sapiens; Sed si considerentur vt spectantur ab hominibus vt sunt merè humanæ & transitoria, nulla prorsus habita ratione finis ad quem referri debent: tunc vere dici potest nullam esse in humanis quam sic commendet Dominus, sicut eam commendant homines; cum aperte de omnibus pronunciet; Vanitas vanitatum & omnia vanitas. Quid habet amplius homo de vniuerso labore suo quo laborat sub sole?* Eccl. I.

Et Christus Dominus, quare omnia bona mundi contempsit & contemnenda docuit, nisi vt hoc ipsum manifestissime declararet! O formidandam Domini sententiam in res omnes humanas; *Quia quod hominibus altum est, abominatio est ante Deum!* Luc. 16. O quàm præclare hoc intellexit qui dixit: *Quæ mihi fuerunt lucra, hæc arbitratus sum propter Christum detrimenta. Verumtamen existimo omnia detrimentum esse propter eminentem scientiam Iesu Christi Domini mei, propter quem omnia detrimentum feci, & arbitror vt stercora, vt Christum lucrificam.* Phil. 3.

III. PUNCTVM.

RES igitur nulla est in humanis vere gloriosa; Quia nulla est gloriosa quam non commendat Dominus, & nulla est in humanis quam commendat, sicut spectatur ab hominibus, humano tantum & naturali finè: Imo eas valde improbat seu potius eos qui in illis acquiescunt. *Stulte! hac nocte animam tuam* Luc. 12. *repetunt à te, quæ autem parasti, cuius erunt? Sic est qui sibi thesaurizat, & non est in Deum diues.*

Contra eos autem qui inde gloriantur; *Hæc dicit Dominus, Non* Ier. 9. *glorietur sapiens in sapientia sua, & non glorietur fortis in fortitudine sua, & non glorietur diues in diuitiis suis. Sed in hoc glorietur qui gloriatur; scire & nosse me, quia Ego sum Dominus, qui facio misericordiam & iudicium & iustitiam in terra. Hæc enim placent mihi, ait Dominus. Quasi diceret, alia non ita placent ac probantur, in quibus magis solent gloriari homines. Non est bona gloriatio vestra, inquit Apostolus. Tu tamen hoc vnum pene bonum ducis! Exardeſce contra; & ora cum Sapiente; Duo rogam te, ne deneges mihi antequam moriar; vanitatem & verba mendacia longe fac à me,* Prov. 30.



FERIA QVARTA.
DE TERTIO HVMILITATIS GRADV
QVI APPARET IN TVRBATA VIRGINE,
AD LAVDES SVAS.

Quæ cum audisset, turbata est in sermone eius, & cogitabat qualis esset ista salutatio. Luc. I.

VERITAS PRACTICA.

Ad laudes nostras tremere potius conuenit, quàm exultare.

RATIO EST, *Quia in tentatione & periculo peccati tremendum est potius quàm exultandum.*

Sed laudes nostræ, nostræ sunt tentationes; nostræ sunt peccandi pericula.

Ergo in his tremendum potius quàm exultandum. Quod tamen rarum est.

I. PVNCTVM.

PRIMO illud est supponendum quod ait S. Bernardus de Beatissima Virgine, *turbata est, sed non perturbata.* Deinde audiendi sunt sancti Patres atque Interpretes, qui hanc turbationem ad humilitatem eius præcipue referunt. *De apparitione Angeli non fuit turbata, inquit Lyranus, sed de salutatione insolita, quia nihil mirabilius est vere humili, quàm sua exaltatio. Erat cogitans cum verecundia quia pauebat, ait S. Ambrosius. Sed quid pauebat? Laudes scilicet suas. Licet enim ab his, neque ab villo obiecto induceretur in peccatum: sic se tamen vbique*

vbique gerebat & continebat, sicut si peccatis esset obnoxia, vt nos scilicet peccatores sic disceremus nobis cauere, sic disceremus humilitatem conseruare, tremendo potius sicut Illa tremuit, ad Laudes nostras, quàm exultando, sicut cæteri hominum solent exultare, atque vt ita exultent se mutuis celebrant laudibus: *Tenant tympanum & cytharam, & gaudent ad sonitum organi!* Iob. 21.

Tu contrà contemplare attentius Veritatem propositam, cuius Ratio est euident, quia in tentatione & periculo peccati, tremendum nobis est potius quàm exultandum. Nam si credimus peccatum esse malum vt fides docet: & si ad apprehensionem mali tremimus, vt natura experitur, quid sequitur nisi timor & tremor in tali periculo, *quasi à facie colubri, vel Leonis*, & sicut *Ecclesi. 21.* aiebat Dauid, *Timor & tremor venerunt super me.* Licet vero non *Psalm. 54.* sentiat ille tremor quia peccatum non est malum sensibile, perinde tamen in effectu sentiri suo modo debet, sicut in affectu. *Si Dominus ego sum, ubi est timor meus?* Responde, & nisi sit timor in periculo peccati, responde nullum in te esse timorem Dei, quia vt Ipse ait in scripturis: *Timor Domini expellit peccatum.* Ecclesi. 1.

II. PUNCTVM.

SED laudes nostræ, nostræ sunt tentationes, nostræ sunt peccandi pericula. Sic aperte Sapiens; *Quomodo probatur in conflatorio argentum, & in fornace aurum, sic probatur homo, ore laudantis.* Et Prov. 27. 10. Conf. 37 S. Augustinus, *tentamur*, inquit, *his tentationibus quotidie Domine, siue cessatione tentamur, quotidiana fornax nostra est humana lingua.* Et rursum: *Facta quæ innotescunt hominibus, habent tentationem periculosissimam ab amore laudis.* Ibid. 38. Quid est enim tentari nisi sollicitari & impelli in peccatum? At quis nesciat ex auditis Laudibus facilem esse lapsum in superbiam, in vanitatem & præsumptionem animi, quæ cum manifestissime peccata sint, consequens est vt Laudes quæ nos in illa inducunt, tentationes sint & peccandi pericula.

Quamobrem quod dixit Sapiens, *Ante mortem ne laudes hominem quemquam,* sic S. Maximus apte interpretatur, *Ne laudantem adulatio moueat, nec laudatum tentet elatio.* Vnde & Propheta grauius: *Popule meus qui te beatum dicunt, ipsi te decipiunt, & viam* Eccl. 11. Hom. 59. Is. 3.

gressuum tuorum dissipant. Ah cœci & miseri! sic volumus decipi & dissipari!

III. PUNCTVM.

AD laudes ergo nostras tremere potius conuenit quàm exultare. Nemo enim sanus exultet in damni eminentis periculo: Nemo tum sapiens, non sibi caueat, cum vel in hoc sapientis & stulti ponatur discrimen. *Sapiens*, inquit scriptura, *timet & declinat à malo, stultus transilit & confidit.* Sic sapienter S. Augustinus: *Contristor laudibus meis, cum vel ea laudantur in me, in quibus ipse mihi displiceo; vel etiam minora bona & leuiora pluris aestimantur, quàm aestimanda sint.* Itemque alibi ad rem nostram aptissime: *Laudes istæ vestra grauant nos potius, & in periculum mittunt, toleramus illas, & tremimus inter illas.*

Sic S. Gregorius: *neceffe est, inquit, vt cum audientium utilitati non proficit, mentem nostram fama laudabilis non eleuet sed fatiget.* Quo de argumento Idem fusissime in illud Iobi, *si vidi solem cum fulgeret, & Lunam incedentem clare, & latatum est in abscondito cor meum, & osculatus sum manum meam ore meo, quæ est iniquitas maxima, & negatio contra Deum altissimum: quæ omnia applicantur vanitati & superbix.*

Itane vero sentis tam graue esse peccatum? Hic duplex error est quem committis; vel enim non putas te ita superbum & vanum; vel tuam superbiam & vanitatem tam graue esse peccatum. Contra vero audi S. Iacobum, *Nunc autem exultatis in superbis vestris, omnis exultatio talis maligna est.* Expende singula. Sicut enim tuum est quod dicit, *exultatis*, sic plane quod adiungit, *omnis exultatio talis maligna est.*



FERIA QVINTA.

DE QVARTO HV MILITATIS GRADV

CONSIDERANDO IN HIS MARIÆ

AD ANGELVM VERBIS.

Quomodo fiet istud, quoniam virum non cognosco?

LUC. I.

VERITAS PRACTICA.

Humilitas ita pugnat cum honoribus, ut non repugnet Obedientiæ.


RATIO EST, Quia humilitas ita pugnat cum honoribus, ut non repugnet Diuinæ Voluntati.

Sed si repugnaret Obedientiæ, repugnaret Diuinæ Voluntati.

Ergo ita pugnat cum honoribus, ut non repugnet Obedientiæ.

Quod humilitatis Cultoribus imprimis considerandum est.

I. PUNCTVM.

 VOD erat Annuntiationis Angelicæ præcipuū caput de concipiendo & pariendo Altissimi Filio, postquā audiuit humillima virgo: *Quomodo, inquit, fiet istud, quoniam virum non cognosco?* quasi diceret si hoc ita est ordinatum à Deo ut concipiam filium non repugno diuinæ ordinationi, & parebo statim atque cognouero quomodo Virgo possit concipere sine viro. *Faciendum credit, inquit S. Ambrosius, quæ quomodo fiet, querit. Legerat, Ecce Virgo concipiet, ideo futurum credidit: sed quomodo fieret, non legerat.*

Hinc autem eruitur Veritas valde practica, plurimumque consideranda, *Quod ita humilitas pugnat cum honoribus, ut non sit pertinax nec repugnet obedientiæ.* Quia videlicet non repugnat Diuinæ Voluntati. Quid clarius? Quomodo enim humilitas virtus esset, & acceptissima Deo, si Deo repugnaret? Aut quomodo fieri posset ut Deo repugnaret, cum non pugnet tam acriter cum honoribus, nisi quia persuasum habet honores pugnare cum Deo? Sive ut clarius dicamus, non repugnet honoribus, nisi ut ne repugnet Deo, acceptando honores quos ipse in scripturis tam sæpe improbat. *Noli querere à Domino ducatum: ne-* Eccles. 7.
que à rege cathedram honoris. Nolite in sublime tolli. Luc. 12. Hinc sanctus Augustinus, *Imperat nobis & in hoc genere continentiam, Da quod*

^{10. Conf. 37} *iubes, & iube quod vis. Tu nosti de hac re ad te gemitum cordis mei, & flumina oculorum meorum. Ne scilicet plus vel minus honoris quam vellet Deus, sibi assumeret. Itane tu gemis propterea?*

II. PUNCTVM.

SED si Humilitas repugnaret Obedientia, repugnaret Diuina Voluntati.

^{Rom. 13.} Non est enim alia certior via cognoscendæ diuinæ Voluntatis, quam per Obedientiam quæ legitimis redditur Superioribus, per quos nos ita certo Deus regit, *Vt qui potestati resistat, inquit Apostolus, Dei ordinationi resistat; qui autem resistunt, ipsi sibi damnationem acquirunt.* Quæ quidem ab Apostolo dicta sunt de iis principibus quorum vita tota erat impietas, vt ait S. Basilius ^{Cap. 26. Const. mon.} qui inde manifeste colligendum docet, quam potiori iure dicendum sit, illum ordinationi & voluntati diuinæ obedire vel resistere, qui Præpositis, quos vocat spirituales, obediuerit vel resistiterit.

^{1. Reg. 15.} Neque alia de causa dictum putat sanctus Gregorius à Scriptura, *Meliorē esse Obedientiam quam victimas, & auscultare magis quam offerre adipem arietum, quoniam quasi peccatum ariolandi est, repugnare, & quasi scelus Idololatriæ, nolle acquiescere.* Sic enim scribit in hæc verba: *Qui repugnant Prælatorum imperiis, ideo utique repugnant, quia diuinam voluntatem se scire melius aestimant: Quasi ergo peccatum ariolandi est repugnare, quia velut contempto diuino altari ad aras Daemonum responsa percipiunt, dum cordis sui præstigijs ac superbis adinventionibus credunt, & salubribus Prælatorum consilijs contraria sentiēdo, refragantur.* Ex quibus quidem verbis non modo patet quam verum sit quod qui repugnet Obedientiæ, repugnet Diuinæ Voluntati; sed quam graue sit & perniciosum, sic repugnare. Expende hanc grauitatem. Reformida periculum. Et propterea vide, si vacat quæ de hoc ipso scripturæ loco fusius habentur in 2. parte, sabbato infra Hebdomadam quartam Paschæ.

III. PUNCTVM.

HUMILITAS igitur sic pugnat cum honoribus, vt non repugnet Obedientia, Ne repugnet diuinæ voluntati, quæ per

obedientiam declaratur. Quæ quidem cum Deo repugnantia tam aliena est à vera humilitate, vt quod scribit S. Bernardus, *Totius humilitatis summa in eo videatur consistere, si voluntas nostra Diuina Voluntati subiecta sit; sicut ait Propheta, nonne Deo subiecta erit anima mea?* Serm. quod voluntas nostra diu. vol. subd.

In quam sententiam sic apte S. Gregorius: *Sunt nonnulli qui ex sola humilitate refugiunt, ne eis quibus impares se aestimant, præse-* r. p. pastor. c. 6.
rantur; quorum profecto humilitas si ceteris quoque virtutibus cingi-
tur, tunc ante Dei oculos vera est, cum ad respuendum hoc quod uti-
liter subire precipitur, pertinax non est. Neque enim vere humilis est
qui superni nutus arbitrio vt debeat præesse intelligit, & tamen præesse
contemnit: sed diuinis dispositionibus subditus, atque à vitio obstina-
tionis alienus, cum sibi regiminis culmen imperatur, si iam donis præ-
uentus est, quibus & aliis præsist, & ex corde debet fugere, & inuitus
obedire. Quod sequenti capite confirmat exemplo Moylis, qui, c. 7.
præesse, inquit, tanta multitudini & noluit & obedivit. Superbus
enim fortasse esset, si ducatum plebis innumera sine trepidatione sus-
ciperet, & rursus superbus existeret, si Authoris imperio obedire re-
cusaret. Vtrobique ergo humilis, utrobique subiectus, & præesse po-
pulis semetipsum metiendo noluit; & tamen de imperantis viribus
præsumendo consensit. Id ipsumque repetit in epistolis, Nec ad appe-
tendum locum procax insistere, nec ad repellendum contumax debet Ep. 3^a.
inueniri. Vnde indignus ego ad suscipienda Episcopatus onera, ius-
sioni Omnipotentis Dei, vestraque me voluntati subdidi.

Sic denique ipse Christus Dominus, accipiens, vt ait S. Pe- 2. Per. 1.
trus, à Deo Patre honorem & gloriam, docuit nos sic esse humiles
in honoribus fugiendis & acceptandis, vt in utroque vnicam
speciemus Dei voluntatem. Per gloriam & ignobilitatem, per in- 2. Cor. 6.
famiam & bonam famam, prout ipse Dominus ordinavit.

Itane te comparas ad vtrumque indifferenter ex hoc motiuo?
Vide ne superbus sis in ipsis honoribus aliquando fugiendis: &
quanto magis in acceptandis? *Est qui nequiter humiliat se, & in-* Ecclesi. 19.
teriora eius plena sunt dolo. Caue.



FERIA SEXTA.

DE QUINTO HUMILITATIS GRADU,

QUI EST MAXIME PROPRIUS
BEATISSIMAE VIRGINI.

*Ecce Ancilla Domini: fiat mihi secundum verbum
tuum. Luc. I.*

VERITAS PRACTICA.

Quò quis est maior, eò & humilior.

RATIO EST, Quia quò quis se magis obstrictum Deo sentit,
eò est humilior.

Sed quò quis est major, eò se magis obstrictum Deo sentit, si vere
sentit.

Ergo & est humilior. Aut certe humilior esse debet, vel major esse
desinit.

I. PUNCTVM.

VIDE humilitatem; Ancillam se dicit qua Mater eligitur;
decebat humilitatem proferre, qua Humilem erat paritura.
Sic paucis S. Ambrosius. Fufius vero S. Bernardus, ad-
mirans quod in Actis Apostolorum non nisi post alias mulieres
nominatur, Itane, inquit, & mulierum sese ultimam exhibebat ut
nouissima omnium poneretur? Et post pauca, Cum Maria, quantò
maior erat, humiliaret se, non modò de omnibus, sed & pra omnibus;
merito facta est nouissima prima, qua prima cum esset omnium, sese no-
uissimam faciebat. Merito facta est omnium Domina, qua se omnium
faciebat ancillam. Merito denique super Angelos exaltata est, qua &
infra viduas & paenitentes, infra eam de qua septem ciecta fuerant da-

Act. I.

ser. de verb.
Apoc. si-
gnum ma-
gnum.

monia ineffabili sese mansuetudine inclinabat. Illud videlicet legerat *Ecclesi. 3.*
quod ait Sapiens, quanto magnus es, humilia te in omnibus, & coram
Deo inuenies gratiam.

Atque hinc nata Veritas modo expendenda, *Vt quò quis est ma-*
jor, eò sit humilior : Quia videlicet quò quis se magis obstrictum
Deo sentit, eò esse humiliorem decet. Nam cum humilitati hoc
sit maxime proprium & essentiale vt hominem subijciat Deo,
quid potentius ad hanc subiectionem magis promouendam
quam si quis se agnoscat magis illi obstrictum? Tum enim si ge-
nerosus est animus, gratitudo eum mouet ad agnoscendum Be-
nefactorem suum : aut si degener & ignauus est, saltem timet
ne eò grauius peccet & puniatur quò maiorem habebat obliga-
tionem non peccandi. *Quem maxime diligebam, auersatus est me!* *Iob. 19.*
Hoc nimis inhumanum.

Adde quod cum procliuius sit & periculosius ex multis &
magnis acceptis donis superbire & efferri, periculum illud cau-
torem merito quemquam reddit & sibi attentorem, ne labat-
ur; vnde illi qui vacat proximo recuperando, maxime com-
mendatur, *Attende tibi ne incidas.* *Ecclesi. 29.*

Denique cum Dei opera sint perfecta, quoties augetur Cari-
tas, toties augeatur necesse est humilitas, velut radix in arbore,
aut velut pedes in humano corpore; cum alioquin cætera super-
posita ruerent, & fieret illius hominis ruina magna. Hinc apte
sapiens; *Qui altam facit domum suam, querit ruinam :* Nisi scili-
cet par fundamentum iaciat. Itane tibi prouides! *Prou. 17.*

II. P V N C T V M.

SED quò quis est maior, eo se magis obstrictum Deo sentit, si vere
sentit & iudicat. Nam vnde est illa magnitudo, nisi à Deo?
Non potest homo accipere quicquam, inquit S. Ioannes, *nisi fuerit* *Ioan. 3.*
ei datum de cælo. Et quomodo quis esset magnus nisi hoc agnos-
ceret, quod paruos ne quidem latet? Quomodo autem id agnos-
ceret, nisi se propterea magis obstrictum sentiret, cum mera
sit Dei Bonitas & Misericordia, quod sit illis donis præuentus?
Quis enim prior dedit illi, & retribuetur ei? Quoniam ex Ipso & per *Rom. 12.*
Ipsum & in Ipso sunt omnia, Ipsi gloria in sæcula, Amen. Nonne id
agnoscis cum Apostolo? Vis illud etiam sancti Augustini di-

In Ps. 30. Etum : Quia merita tua non præcesserunt : sed beneficia Dei te præueniunt.

III. PUNCTVM.

Quò quis est igitur maior, eò & humilior : Quia magis est obligatus Deo, siue ob accepta bona, siue ob eorum rationem reddendam. Cum enim augentur dona, inquit S. Gregorius, rationes etiam crescunt donorum. Tanto ergo esse humilior atque ad seruiendum promptior quisque debet ex munere, quanto se obligatiorem conspiciat in reddenda ratione. Et licet illa reddendæ rationis abesset obligatio, sola Dei maior cognitio & Caritas hanc maiorem humilitatem secum adueheret, quia quò certe Deus magis cognoscitur & amatur, eò minus coli & amari quàm par est, agnoscitur, ac proinde magis se humiliat, qui magis amat; Vnde est illud Cantici Canticorum; si dederit homo omnem substantiam domus suæ pro dilectione, quasi nihil despiciet illam. Sic qui ardentiores sunt in Caritate, ac propterea Seraphim dicti sunt, sunt humiliores & præ humilitate, caput pedesque velant, ut quod deest affectui, inquit S. Ioannes Chrysostomus, hoc velo obtegant.

O quam longe sumus ab hoc statu, ait idem Sanctus, si quid forte sanctius fiat, totum hoc exhaurit superbia! Sunt nimirum quamplurimi similes illi Statuæ, cuius caput erat ex auro optimo, pectus & brachia ex argento, venter & femora ex ære: sed pars quædam pedum ficilis, ubi percussa statua statim corruit, & còminuta est. Obuiuntur scilicet Dei donis, qui non inde magis humiliantur, ut illa sustineant & ipsi sustententur. Deiecisti eos dum alienarentur. Quomodo facti sunt in desolationem! subito defecerunt: perierunt propter iniquitatem suam. Quomodo cecidisti de cælo Lucifer, qui manè oriebaris? Quomodo obscuratum est aurum, mutatus est color optimus!

SABBATO



S A B B A T O.

DE SEXTO HUMILITATIS GRADU IN VERBO INCARNATO.

Et Verbum Caro factum est, & habitavit in nobis.

Io. 1.

VERITAS PRACTICA.

Se anteponit Christo, qui se omnibus non postponit.

RATIO EST, Quia qui se illi præfert quem Christus sibi præponit, se anteponit Christo.

Sed qui se omnibus non postponit, se illi præfert quem Christus sibi præponit.

Ergo & se anteponit Christo; Quod cum sit intolerandum, plane necesse est nos infra omnes abijcere.

I. PUNCTVM.

STATIM atque sanctissima Virgo verbis Angeli, seu Deo sic ordinanti, vt esset Mater Filij, consensum præbuit, tum *VERBUM CARO FACTVM EST, ET HABITAVIT IN NOBIS.* O admirabile commercium. Contemplare omnia pensulatim. Corpus humanum ex purissima Carne & Sanguine Immaculatæ Virginis formatur à Spiritu sancto, seu à tota Trinitate per suam maximam Bonitatem. Anima ex nihilo creatur, sicut & ceteræ, quæ illi Corpori infunditur; Verbum Dei qui est Filius Patris, secunda Persona sanctissimæ Trinitatis, se illi Humanitati tam perfecte vnit vt ex duabus naturis, diuinâ & humanâ, exurgat vna Persona quæ di-

Coloss. 1. citur IESVS CHRISTVS; verus Deus, verus homo, sua non deferens, dum assumit nostra. *O Mysterium quod fuit à sæculis & generationibus absconditum, nunc autem manifestatum sanctis eius!*

Phil. 2. Admirare, adora, & illud Apostoli penitus tibi infige, *Nihil per contentionem neque per vanam gloriam, sed in humilitate superiores sibi inuicem arbitantes, non quæ sua sunt singuli considerantes, sed quæ aliorum. Hoc enim sentite in vobis, quod & in Christo Iesu, qui cum in forma Dei esset non rapinam arbitratus est esse se aequalem Deo; sed SEMETIPSUM EX INANIVIT formam serui accipiens;*

Eman. sa. Id est, se ita dimisit & humiliavit infra omnes homines, sicut servus infra Dominum suum, occultans quod erat & assumens formam, quæ præ diuina nihil erat. Sic te ipsum humilia; Sic plane ita necesse est, vt nisi te postponas omnibus, te anteponas Christo. Quod quia nolles, si crederes ita verè esse; vide accuratè quàm sic verum ex proposita Veritate.

Ac primo illud quod dicitur qui se illi præfert quem Christus præponit, se Christo anteponit; non aliter est probandum quam ex ipsis probatis terminis. Quid enim euidentius? reuolue propositionem: Quid dubij? nonne si ambulando præcederes quem proxime sequitur Christus, Christum præcederes? sic plane si animo, si cogitatione tua te illi præfers quem sibi Christus facit præcedere, præcedis ipsum Christum. O rem omnino miram, & tamen veram!

II. PUNCTVM.

SED qui se omnibus non postponit, se illi præfert quem Christus sibi præponit.

If. 53. Duo hic essent probanda. Primum quod Christus se postposuit omnibus. Sed vel ex Scripturis id apertissimum est, quibus dicitur nouissimus virorum, vermis, & non homo: opprobrium hominum & abiectio plebis: Vel reseruatur fusius exponendum in 2. parte vbi de eius comparatione cum Barabba: vnde quod restat alterum sic declaratur.

Pf. 21.

Nam qui se omnibus non postponit, se præponit vel adæquat aliquibus, siue plures illi sint, siue vnus, nihil refert, Esto sit vel vnus cui te præferas; tam vere te illi præfers quem sibi Christus præponit, quàm verum est se Christum postponere omnibus.

nam ille vnus inter omnes recensetur quibus se Christus post-
ponit, aut non se postponit omnibus. Sicut si vnus esset pro quo
non esset Christus mortuus, non esset mortuus pro omnibus, ita
plane si vnus esset quem sibi non præferret, non se postponeret
omnibus, vnde tam necesse est fateri Christum se illi postponere
cui te præfers, quàm non diffiteris illum se infra omnes abiecisse.
Atque ex consequenti tam certa est propositio, Quod qui se
omnibus non postponit, se illi præfert quem Christus sibi præ-
ponit, vt de ea minus dubitare possis quam quod Christus sese
exinanierit formam serui accipiens. Dubitasne de hac eius hu-
militate? Dubitasne Christum se fecisse humillimum & postre-
mum omnium? Non audiuiti quod in humilitate iudicium Act. 8.
eius sublatum est? id est præ vilitate & contemptu, ius ei non
est redditum, cum accusaretur: quod tamen nulli negatur ho-
minum.

III. PUNCTVM.

SE igitur Christo anteposit, qui se omnibus non postponit, Cum
se illi anteponat quem sibi Christus tam vere præponit,
quam se vere postponit omnibus. Quod de se fatebatur inge-
nuè sanctus Bernardus: *Quoties, inquit, hominibus præesse desi-* Hom. 1.
super mis-
sus est.
dero, toties Deum meum præire contendo. O quanta inde neces-
sitas fui humiliandi! O quam sapienter ille alius dicit qui de Lib. 1. de
Imit. Ch.
Imitatione Christi & de contemptu mundi scripsit: *Non nocet si*
omnibus te supponas, nocet autem plurimum si vel uni te præponas. c. 7.
Hoc ante pridem sic S. Ioannes Chrysostomus; *Quod si recte sa-* Hom. 33 in
Genes.
pimus, nullos etiam nobis esse minores arbitrabitur, sed nos excelli ab
omnibus hominibus dicemus; Et hoc dico non de nobis qui innumeris
sumus immersi peccatis, sed etiam si quis sibi plurimorum bene gesto-
rum conscius sit, nisi apud se sentiat, quod omnium sit postremus, nulla
ei futura utilitas est ex omnibus suis bonis operibus.

Sanctus quoque Bernardus præclare admodum: *Si in quonam* Serm. 37.
in Cant.
statu, inquit, vnumquemque nostrum habeat Deus, liquido cognosce-
remus, nec supra sane, nec infra sedere deberemus, veritati omnino
acquiescentes. Nunc autem quia consilium hoc posuit tenebras lati-
bulum suum, & sermo absconditus est à nobis, ita vt nemo sciat si di-
gnus sit amore vel odio: iustius tutiusque profecto iuxta ipsius veri-

tatis consilium, nouissimum nobis locum eligimus. Non est ergo periculum quantumcumque te humilies; est autem grande malum horrendumque periculum si vel modice plus vero te extollas, si vel uni videlicet in tua cogitatione te praeferas. Noli te comparare maioribus, noli minoribus, noli aliquibus, noli uni. Et propterea non mediocrem, non vel penultimum, non ipsum saltem inter nouissimos eligere locum nos voluit, sed recumbe inquit, in nouissimo loco, ut solus videlicet omnium nouissimus sedeas, teque nemini non dico praeponas, sed nec comparare praesumas.

Luc. 14.

Hæc ex multis pauca; vnde satis videas quid deplores pro præterito, & quid in futurum statuas. *Excelsi statura succidentur, & sublimēs humiliabuntur.* Vide in Indicibus, Verbo *Humilitas*.

Is. 10.





DOMINICA TERTIA ADVENTVS.

*TESTIMONIUM S. IOANNIS
BAPTISTAE DE CHRISTO DOMINO.*

*Ille est qui post me venturus est, qui ante me factus
est, cuius Ego non sum dignus, ut soluam eius
corrugiam calceamenti. Ioan. 2.*

VERITAS PRACTICA.

Quàm benè de Christo Humilis, tàm malè meretur
Arrogans.

*RATIO hæc est inter alias, quod quàm benè Is de Christo mereri
dicitur qui fidelis est Christi testis, tam male de Eodem me-
reri dicendus est qui contra ipsum testis est mendax.*

*Sed Humilis est fidelis Christi testis; Arrogans vero testis
mendax.*

Ergo quàm benè de Christo humilis, tàm malè meretur arrogans.

*Unde quæ ad humilitatis Commendationem, superiori dicta
sunt hebdomada, valide confirmantur.*

I. PUNCTVM.



MISERVNT Iudai ab Ierosolymis Sacerdotes & Leuitas ad Ioannem vt interrogarent eum, Tu quis es? Et confessus est, & non negauit, & confessus est, quia non sum Ego Christus. Lege quæ plura sunt hodierni Evangelij, & cum ex singulis fructum possis colligere, tum ex toto illo colloquio vide quam esset humilis sanctus Ioannes, *Qui cum tanta virtutis esset vt Christus credi potuisset, elegit solide in se subsistere, ne humana opinione raperetur inaniter super se.* Sic sanctus de eo Gregorius.

*Hom. 7.
in Euang.*

Ad hanc porrò humilitatis imitationem opportuna est Veritas proposita, si bene expendatur; Sic autem expendenda videtur, vt primo intelligas bene vel male mereri de Christo idem prope esse ac si dicatur, sic se erga Illum gerere vt quod gesseris, bene vel male, sibi factum reputet & rependat. Cum videlicet sanctus Ioannes præclare vt vidimus, ac fideliter de Eo testatus est, tum profecto de Illo est bene meritus, quia hoc testimonio bene illi fecit, & benefactum Christus agnouit. E contra verò cum Iudæi de Christo detrahebant, hi male de illo merebantur, quia maledictis & malefactis suis sese illi opponebant, & alios à credendo auocabant.

Atque hinc euidenter patet, quàm vera sit prima propositio de fideli vel mendaci Teste, nempe vt quantum ille bene meretur de Christo, tam hic male mereri dicendus sit. Licet enim Christus pro suo bonitate magis propensus sit ad obsequia sibi præstita compensanda, quàm ad vindicandas iniurias: qui tamen injuriam ei infert, non desinit tam male de eo mereri, quàm bene is meretur qui obsequium præstat; imo & longe peius ille demereri videtur, quam alter mereatur, cum longe grauius sit in suo genere Regem, Patrem, aut alium cui multum debeas, offendere quàm illi benefacere. *Hæcine reddis Domino? Numquid non ipse est Pater tuus?*

Deut. 32.

O si scires quantum debes Christo, tum intelligeres quid sit de illo bene vel male mereri.

II. PUNCTVM.

SED Humilis est fidelis Christi testis: Arrogans vero & superbus, testis est mendax.

Nam quoties incidit quæstio vel cogitatio de rebus bene gestis, de acceptis donis coelestibus, vel de eorum acceptanda gloria, tunc Humilis recusando gloriam fideliter testatur de Christo quod sit bonorum omnium author, illique vni gloriam esse referendam. *Non nobis Domine non nobis, sed nomini tuo da gloriam.* Ps. 113. *Omnia enim opera nostra operatus es nobis. Gratia Dei sum id quod sum.* 1. Cor. 15.

At vero Arrogans hoc ipso quò est arrogans & superbus, sibi attribuit quod Christi est, & negat Christo quod suum esse iactat: licet enim ore confiteatur, factis tamen negat, cum rei bene gestæ laudem sibi sic debitam putat, vt nisi reddatur, excandescat: neque de Christi Domini gloria vllò modo sollicitus, sibi vni intendat extollendo. *Insanisti in me, & superbia tua ascendit in aures meas.* 4. Reg. 19. Sic Dominus arroganti, cui & apte Apostolus, *Frustra, inquit, inflatus sensu carnis tua & non tenens Caput ex quo totum corpus crescit. Vos testes mei, dicit Dominus;* At quàm longe diuerli testes, humilis & superbus!

III. PUNCTVM.

QUAM benè igitur de Christo Humilis, tam male meretur Arrogans: Cum se erga Christum vterque tam opposito gerat modo, quàm verax & falsus testis opponuntur; atque ita vtriusque stipendia tam diuersa esse conuenit, *Quanta patet esse diuersitas*, inter delatum obsequium, & illatam injuriam.

O humilitatis præmium supra quàm dici potest gloriosum cum ex Christi ore humilis audiet, *En testis meus fidelis.* O arrogantiae probrum, supra omnem poenam & infamiam, cum ab Eodem dicetur arroganti; *Insurrexisti in me, testis inique.* Recorde quanta aduersum me dixeris testimonia. Et certe si arrogantia per se sola sic est inuisa Domino, vt ipse dicat, *Arrogantiam & superbiam detestor;* quanto magis est detestanda, cum sit tam injuriola Christo? Si vero de quolibet falso teste sic affirmatur, *Testis falsus non erit impunitus, & qui mendacia loquitur non effu-*

giet; Quid de falso teste contra Christum?

Et quidem non dubitabis hæc in arrogantes merito esse congerenda, sed an ex illis sis, forte non ita perspicies; Aduerte diligenter. Tu quis es? quid dicis de te ipso? An laudem omnem à te in Christum reijcis? An gaudes humiliatione tua, vt Christus inde exaltetur? *Apparuerunt humiles mei.* Ne tibi palpes in re tam seria. Numquam Christum exaltabis nisi te deprimas: & quoties te exaltas, toties Christum deprimis. Sic vtrumque opponitur à Propheta: *Et incuruabitur homo, & humiliabitur, & oculi sublimium deprimentur; & exaltabitur Dominus. Illum oportet crescere, me autem minui.* Iam vero vide, vtrum è duobus magis expediat, an depressione tua Christum exaltari, aut exaltatione tua Christum deprimi? Numquid non satis iam depressus est Christus vt te exaltaret? Sic perge ad omnem prorsus elidendam superbiam.

IN EADEM DOMINICA TERTIA ADVENTVS.

AD HÆC EVANGELII VERBA:

Tu quis es? Ioan. I.

ALIA VERITAS PRACTICA.

Tres hominum status ad perfectionem tendentium, his tribus verbis, *Tu quis es?* eò valdè promouentur.

RATIO EST, Quia tres hominum status, qui dicuntur Incipientium, proficientium, & perfectorum, tunc valde promouentur ad perfectionem, quando à via purgatiua facilis & solidus fit progressus per illuminatiuam, ad eam quæ dicitur unitiua.

Sed talis progressus fit facilis & solidus per illa tria verba.

Ergo illis tribus verbis, Tu quis es? tres hominum status valde promouentur: ac proinde crebro sunt usurpanda.

PRIMA

PRIMA propositio nullam difficultatem habet: Si quis plura tamen de illa desideret, *Videatur*, sanctus Thomas ^{22. q. 24. a. 2.} loco, *hic annotato*, & quæ infra ex eo referuntur.

SECUNDA sic breuiter demonstratur: primo quidem in via purgatiua qua se Incipientes præteritis purgant peccatis, nihil aptius ad illam peccatorum purgationem ex vera contritione cum gratia faciendam, quam si quis sibi serio & attente dicat, Tu quis es, qui Deum offendisti? Tu creatura Creatorum! Tu seruus Dominum! Tu filius Patrem! Tu humuncio vilissimus summum Deum! Tu innumeris præuentus beneficiis Benefactorem eximium! Tu quis es? Tu Christianus, tu Religiosus, Tu Sacerdos Christum cruci affixisti! *Quoniam si inimicus meus maledixisset mihi, sustinuissem utique!* ^{Ps. 54} *Tu vero homo vnanimis, dux meus, notus meus qui simul mecum dulces capiebas cibos.* Hæc bene expensa mirum quantum efficiant in animis tantillum præparatis. Varij sunt autem scripturæ loci vnde tales affectus eruantur. *Quid est quod debui ultra facere vineam meam, & non feci ei? an quod expectaui ut faceret vinas, & fecit labruscas?* ^{Is. 5. Jer. 2.} *Ego te plantaui, vineam electam: Omne semen verum, quomodo ergo conuersa es mihi in prauum, vinea aliena.* ^{Thren.}

Quomodo obscuratum est aurum, mutatus color optimus! filij Sion inclyti, & amicti auro primo, quomodo reputati sunt in vasa testea! Candidiores nazarai eius niue, nitidiores lacte, rubicundiores ebore antiquo, sapphiro pulchriores, denigrata est super carbones facies eorum! Popule meus quid feci tibi, aut quid molestus fui? responde mihi. ^{Mich. 6.}

DEINDE vero in Via illuminatiua qua proficientes crescunt de virtute in virtutem, miræ profluiunt in eorum animum illustrationes ex his verbis *Tu quis es*, ad omnes actus suos virtute temperandos. Tu quis es? non bellua, vt viuas cæco naturæ impetu, sed homo ratione præditus, *vt intelligas vniuersa qua agis* ^{2. R. 3.} *& quocumque te verteris*, sicut Salomonem Filium, Dauid moriens admonebat. Tu quis es? non paganus, vt ciuili tantum & politica ratione viuendi viuas; sed Christianus, vt supernaturali lumine & motiuo mouearis. Tu quis es? non agrestis non rusticus, non rerum diuinarum ignarus, sed in scholis eruditus & ad omnem pietatis formam educatus. Tu quis es? non sæcularis,

non laicus, non vili additus mancipio, non necessariis vitæ subsidii comparandis, non importunis negotiantium curis pressus; sed segregatus ab omnibus, ut quod vnum est necessarium cogites & perficias; Nonne hinc lucidæ & ardentes ad omnes Virtutis actus in illuminante via succenduntur faces?

Luc. 22.

Reges gentium, aiebat Dominus, *dominantur eorum, & qui potestatem habent super eos benefici vocantur. Vos autem non sic.* Quasi diceret, spectandus cuique est status suus, consideranda vocatio & persona, dicendumque sibi, Tu quis es? & dicenti virtus respondeat.

SIC denique in Via vnitiua, procedendo semper ad perfectiora, ex consideratione sui, siue quoad personam, siue quoad statum, siue quoad locum, vel ad tempus, vel ad acceptas gratias, vnde accendaris ad plures aut sublimiores Charitatis, Resignationis, Deuotionis, & Diuinæ Vnionis actus. *Quis ego sum, aut quæ est vita mea, aut cognatio Patris mei, ut fiam gener regis? Quid est homo quia innotuisti ei, aut Filius hominis quia reputas eum? O homo tu quis es qui respondeas Deo! Numquid dicit figmentum ei qui se finxit, quid me fecisti sic?* Quæ verba multum valent ad perfectam iudicij & voluntatis humanæ cum diuina subiectionem: nec parum promouent huius perfectæ subiectionis frequentem praxim, tria verba sæpe repetita, *Tu quis es?* Tu quis es, qui diuina scruteris arcana? Tu quis es, qui te putes intelligere quæ soli Deo nota sunt? Tu quis es, qui Deo sic volenti, sicque ordinanti, vel tantisper contradicas? Tu quis es, qui respondeas tot acceptis beneficiis & gratiis? Tu quis es, *postquam omnia feceris, nisi seruus inutilis?*

Luc. 17.

EX quibus sic consideratis patet aperte Veritas de tribus illis verbis, pro triplici hominum statu seu perfectionis, in qua tantum proficies quantum à te deficies: tantumque à te deficies, quantum attentè consideraueris, quod admonebat sanctus Bernardus Papam Eugenium, *Quid, quis & qualis sis? Quid in natura; Quis in persona: Qualis in moribus. Quid, verbi gratia, homo: Quis? Papa vel summus Pontifex; Qualis? benignus, mansuetus, vel quidquid tale; Quo de argumento ibi fusè & in Cantica, vnde nos infra in tertia parte aptius. Satisque modo sit quod sanctus Augustinus scribit: Scito vnde venisti, aut quo vadis: quomodo viuisti: quantum proficis, vel deficis: quàm longe es à Deo vel prope, non in-*

2. de cons. 4. & sequentib.

ternallis locorum, sed similitudine vel dissimilitudine morum. Scito Serm. 36.
l. de spir.
& anima.
c. 52.
quomodo homo es, cuius conceptio culpa, nasci miseria, vivere poena,
mori necesse.

Vide de hac nostri cognitione in 3. parte Feriam tertiam Dominicæ undecimæ post Pentecosten.

IN EADEM DOMINICA.

AD HÆC EVANGELII VERBA.

Ego vox clamantis in deserto, dirigite viam Domini.
Ioan. 1.

ALIA VERITAS PRACTICA.

Vox clamantis in deserto post Peccatum, Peccati conscientia Peccatori audienda.

SENSVS EST, Quod sicut post peccatum fit anima peccatoris quoddam desertum, quia deseritur ab omnibus suis bonis, & nullius capax est meriti: sic in illo deserto fit quadam vox clamantis ad peccatorem, quæ est ipsa peccati perpetrati conscientia, quam peccator non minus debet audire ad dirigendam & parandam viam Domini, quam Iudæis erat audiendus sanctus Ioannes.

RATIO EST, Quia idcirco à Iudæis erat audiendus sanctus Ioannes, quod ita ordinatum esset, ut prius à Ioanne baptizarentur baptismo Pœnitentiæ, ac deinde Christum reciperent. Sed non minus est ordinatum ut peccator audiat conscientiam de peccato pœnitendo & deponendo admonentem, ut sic Christum recipiat.

Ergo non minus eam debet audire quam à Iudæis esset audiendus sanctus Ioannes.

Quod non debet tantum intelligi quoties sacra communio est frequentanda, sed quoties per peccatum Christus expulsus est, ut requiratur, ut reuocetur, ut recipiatur: Vox illa, vox conscientie clamantis poenitentiam, est quantocius audienda.

AD primam propositionem non est hærendum diutius, cum apertè Christus Dominus Iudæis exprobrauerit, quod cum Ioannem non audiuiſſent, nec ab eo baptizari
 Math. 11. essent, sic diuinæ ordinationi non steterint: Baptismus Ioannis, inquebat illis, unde erat? è cælo? an ex hominibus? responderunt se nescire sed mentiebantur, aut erat eorum ignorantia inexcusabilis, cum omnes haberent Ioannem ut prophetam, & satis pateret eum esse quem prædixerat Isaias; sed noluerunt fateri, ne seipſos condemnarent, quod ei non credissent, & quod ei non credentes, cœlesti & diuinæ ordinationi non se conformassent. Quod ipse Dominus sic alibi declarans expressius: omnis, inquit,
 Luc. 7. populus audiens & publicani iustificauerunt Deum, baptizati baptismo Ioannis. Pharisei autem & Iurisperiti consilium Dei spreuerunt in semetipsos, non baptisati ab eo. Quid clarius? & quid apertius ad indicandum quanti sit momenti ordinatis ad salutem stare mediis, quæ dicuntur Dei consilia?

S E D, quæ est alia propositio declaranda, non minus est ordinatum ut peccator audiat conscientiam de peccato poenitendo & deponendo admonentem, ut Christum recipiat. Duo hic essent distinctè exponenda, primum quomodo Conscientia sit vox clamans in deserto cordis post peccatum. Deinde quomodo sit ordinatum illam audiri à peccatore ut Christum recipiat. De primo varij sunt loquendi modi quibus Scriptura & patres vtuntur. Modo enim dicunt conscientiam esse velut tribunal iustitiæ iuxta illud Apostoli de gentilibus: qui ostendunt opus legis scriptum in Cordibus suis, testimoniū illis reddente conscientia eorum: & inter se inuicem cogitationibus accusantibus, aut defendentibus.
 Rom. 2. Sic S. Ambrosius, Innocentius, inquit, & flagitiosorum merita dis-

cernit, vera atque incorrupta poenarum premiorumque arbitra. Idem vero alibi sanctus Doctor declarat, quomodo vermi in scriptura comparetur, eo quod irrationabilia anima peccata mentem rei sensumque compungant: & quadam excedant viscera conscientia, quæ tanquam vermes ex unoquoque nascuntur. Similitudo gladij & stimuli sat frequenter etiam usurpatur: quasi gladio pungi-
tur Conscientia, ait sapiens. Christus vero Dominus ad Saulum: *Durum est tibi contra stimulum calcitrare*. Sunt qui stupor-
 dentium qui sentitur ex esu acerborum fructuum, conscientiam dicant esse similem, propter hos scripturæ locos, *qui comederit*
uvam acerbam, obstupefcent dentes eius. Flagellum alij nuncupant
 quo intus anima peccatoris cædatur, & arma militaria quibus as-
 fiduè strepenibus contremiscat, ut est apud Prophetam, *Vox fla-*
gelli & vox impetus rotæ, & equi frementis, & quadrigæ feruentis,
& equitis ascendentis, & micantis gladij, & fulgurantis hastæ, &
multitudinis interfectæ, & gravis ruina. Quibus apte quadrat il-
 lud poëtæ non ignobilis: *Quos dira conscia culpa, mens habet at-*
tonitos, & surdo verberare cædit; Occultum quatiente animo tortore
flagellum. Alij denique, vocem esse vel Correctoris, vel Pæda-
 gogi, vel Concionantis, vel quocumque modo clamantis, *Quid*
fecisti, respice: vel tanquam ille Iobi servus & nuncius qui per-
 ditis omnibus bonis, *Enasi ego*, inquit, *solus ut nunciarem tibi*; sic
 plane pereuntibus peccatori bonis cœlestibus, sola restat con-
 scientia, quæ acceptæ per peccatum cladis & ruinæ nuncium fe-
 rat; unde ut dictum est, cum anima velut desertum fiat, recte *Vox*
in deserto clamans seu clamantis, dici potest seu potius, *Vox Domini*
concutientis desertum. L. 7. in luc. c. 14. Prou. 12. Aft. 9. Ier. 31. Ez. 18. Nahum 3. S. Hier. in Ezech. Iob. 1. Ps. 28.

At vero quod est alterum huius secundæ propositionis caput, quomodo sit ordinatum, illam audiri vocem a peccatore ut Christum recipiat, tribus modis explicari potest, quibus recipitur Christus. Primo enim re ipsa recipitur in sanctissimo Sacramen-
 to, post expiatam ritè conscientiam, & in hoc sensu facile est in-
 telligere quomodo sit illa audienda peccatori, nempe expiando
 confessione peccata.

Secundo recipitur Christus, recipiendo doctrinam eius quæ in
 proximis festis renouatur, ut dicitur sequenti Dominica, cui do-
 ctrinæ recipiendæ parandus est cum gratia noster animus, paran-
 doque clamat Conscientia, quàm fuerint vitæ præteritæ dissimi-

les actus, quàm sint Christi & mundi contraria dogmata, quantaque sollicitudine Puer paruulus qui nobis in Doctorem est datus sit audiendus, ex præsepi Bethleemitico, tanquam ex cathedra clamans, *Vanitas vanitatum & omnia vanitas.*

Tertio denique sicut per peccatum expellitur Christus, ita per veram poenitentiam reuocatur & recipitur, *Ecce, inquit, sto ad ostium & pulso: si quis audierit vocem meam, & aperuerit mihi ianuam, intrabo ad illum, & cenabo cum illo, & ille mecum.* Vox autem illa Christi pulsantis, vel est ipsa vox conscientiae per diuinam gratiam excitata, vel ipsa est Gratia excitans & commouens internam vocem qua peccator prouocatur ad resipiscentiam, quæ tam necessaria est ad recipiendum Christum per gratiam sanctificantem, quàm necesse omnino est antè expelli peccatum quàm illa gratia recipiatur. *Conuertimini ad me, & conuertar ad vos, dicit Dominus. Conuertimini de viis vestris malis, & de cogitationibus vestris pessimis.*

Hoc est dirigere & parare viam Domino, sic conuerti cum præueniente nos gratia. Hoc est quod clamat illa vox & gratiae simul & conscientiae, non modo quando aliquoties confitendum est & communicandum, aut quando iam parandi sumus ad proxima Domini natalitia: sed statim atque peccatum est, statim vox illa clamat, *Reuertere, Reuertere. Numquid qui cadit non resurget? Vade & clama sermones istos contra aquilonem & dices: Reuertere auersatrix Israël, ait Dominus, & auertam faciem meam à vobis, quia sanctus ego sum, dicit Dominus, & non irascar in aeternum. Veruntamen scito iniquitatem tuam, quia in Dominum Deum tuum prauaricata es.* Sic Gratia in Scripturis, sic per Concionatores & alios innumeros modos excitare solet peccatorem: sed vix vlllo modo aptiori quam per Conscientiam, quia hæc intus clamat, semper & vbique clamat, libere clamat, nulli adulatur, nullum timet nisi Deum.

O quis ergo non audiat illam vocem? quis saltem non videat sic audiendam esse peccatori, si Christum à se expulsus velit recipere, vt nisi audiat illam vocem, nisi resipiscat, nisi conuertatur, nunquam Christus reuertatur. *Non ero ultra vobiscum donec CONTERATIS eum qui reus est.* Expende singula, & vrge acius quale sit motuum non differendæ poenitentiae, quod Christus adsit intus vel absit, prout peccatorem vere poenitet sui peccati.

Apo. 3.

Zach. 1.

Eant. 6.
Jer. 8.
ibid. 3.

Iosue 7.

Parumne cuiquam debet esse tanti hospitis præsentia vel absentia ? quid mundus sine sole ? quid sine duce acies ? sine pastore grex ouium ? sine magistro schola ? sine anima corpus ? aut sine mente anima ? Sic de te cogita si sine Christo sis. *Scito & vide* ^{1er. 2.} *quia malum & amarum est, reliquisse te Dominum Deum tuum, & non esse timorem mei apud te, dicit Dominus Deus exercituum.*



HAC HEBDOMADE, consideratur Verbum Incarnatum residens in utero Virginis Matris. Varij eius status sub numero septenario, sigillatim in dies recensentur, unde Veritates practicæ ad Amoris Diuini gradus & effectus pernoscentes eruuntur.

FERIA SECUNDA.
SEPTEM PRÆCIPVI TITVLI
QVIBVS CHRISTVS DOMINVS
DIGNOSCI POTEST.

Qualis est dilectus tuus ex dilecto, ô pulcherrima mulierum? qualis est dilectus ex dilecto? Cant. 5.

VERITAS PRACTICA.

Affectu potius quam studio Christus cognoscitur.

RATIO EST, *Quia cognitio Christi, qualis hîc ad perfectionem desideratur, Dei potius donum est quod recte dispositis infunditur, quàm quod humana conquiratur industria.*

Sed ad donum hoc recipiendum, affectu magis quam studio disponimur.

Ergo & affectu potius quam studio Christus cognoscitur.

I. P V N C T V M.



PXPENDI primò debet, quòd cùm homines naturâ scire desiderent, nihil scitu desiderabilius, nihil excellentius, nihil vtilius aut magis necessarium, quàm Christus
Iaan. 17. Dominus. *Hæc est, inquit, vita æterna, vt cognoscant te solum verum Deum, & quem misisti Iesum Christum.* Tum sanctus Petrus:
2. Petr. 3. Crescite vero in gratia & in cognitione Domini nostri, & Saluatoris Iesu Christi.

Deinde verò aduerte, quod cùm multa de Christo Domino inuestigari & sciri possint, tùm verò quæ sunt præcipua ex septē eius Titulis esse petenda; sicque legendo vel meditando consideranda, vt quàm perfecte virtutes omnes ijs respondentes habuerit, quantoque propterea sit nobis cultu colendus, expendatur.

Hi autem Tituli sic breuiter recensentur; Primus vnde alij deducuntur, **MEDIATOR** seu **REDEMPTOR**, & **SALVATOR HOMINVM**. *1. Tim. 2.* *Vnus enim Deus, vnus & mediator Dei & hominum homo Christus Iesus, qui dedit Redemptionem semetipsum pro omnibus.* 2. **SACERDOS & PONTIFEX**. *Psal. 109.* *Sacerdos in æternum secundum ordinem Melchisedech: Fidelis Pontifex ad Deum, vt repropitiaret delicta populi.* 3. **REX & DOMINVS**. *Hebr. 2.* *Dominus Index noster, Legifer noster, Dominus Rex noster, ipse saluabit nos.* 4. Totius mystici corporis **CAPVT**. *Ephes. 4.* *Crescamus in illo per omnia qui est caput Christus ex quo totum corpus compactum.* 5. **PASTOR** seu **DOCTOR**. *Isaie 2.* *Docebit nos vias suas & ambulabimus in semitis eius.* 6. **SPONSVS**, *Ioan. 3.* *Qui habet sponsam, sponsus est.* 7. **FRATER**, *Hebr. 2.* *Non confunditur fratres eos vocare dicens: Nunciabo nomen tuum Fratribus meis.*

Qui de his igitur Titulis melius senserit, is melius Christum cognorit, atque vt sic melius agnoscat, *Affectu potius quam studio vel humanâ operâ est perquirendus.* Ratio est expedita, sicque paucis exprimitur quæ fulius meditando dilateretur. Nempe hæc Christi cognitio, donum est Dei potius quòd recte dispositis infunditur, quàm quod humana conquiratur industria. Res est tam sublimis, tam diuina & supra omnem humanam euecta intelligentiam, vt non nisi à Deo, & non nisi recte dispositis communicetur: *Sap. 1.* *Quoniam in maleuolam animam non introibit Sapientia, nec habitabit in corpore subdito peccatis.* O miserandam illam maleuolam

Ieuolam animam, quid nisi insipiens & insipida in quam non intrat sapientia!

II. PUNCTVM.

AT QVI ad hoc donum recipiendum, affectu magis quàm studio vel consideratione disponimur.

Non improbatur studium nec consideratio, imo est diligenter adhibenda; sed in ipsa consideratione debet anima plus vacare affectibus concitandis, quàm discursibus extendendis. Dum enim Admiratione, Gratitude, Cõfusione, Contritione, Compassione, desiderio & alijs affectibus commouetur, purgat se cum Diuina gratia à peccatis, maleuolentiam suam excutit, diuinæ Iustitiæ satisfacit, & misericordiam prouocat. *Audini orã 1s 38. tionem tuam, & vidi lachrymas tuas.*

Deinde vero, quando voluntas se suis prauis exuit affectibus, vt puriores induat, Ipse Intellectus fit capacior ad intelligendum, quod minus ante vidisset: quippe qui ante velut nube & fumo, sic prauis obscurabatur affectibus; *Psallam & intelligam Psal. 100. in via immaculata, quando venies ad me.*

Denique cùm per communicationem voluntatum, & reciprocã affectuum retributionem, magis sentitur præsens Christus, magis etiam disponitur animus ad eum cognoscendum; sic enim melius percipitur quàm sit bonus & suauis, quàm fidelis & verax, quàm vere Pastor, Frater & Sponsus; *Quam bonus Is- Psal. 72. raël Deus, his quæ recto sunt corde! Gustate & videte quoniam suavis est Dominus. Psal. 33. Itane gustas? aut quamobrem non ita?*

III. PUNCTVM.

SIC igitur affectu potius quàm studio Christus cognoscitur: Cum sic ad eius cognoscendã gratiam sine qua non potest bene cognosci, disponimur & aptamur. *Hac enim si vobiscum adsint & superent, inquit S. Petrus de pijs affectibus, non vacuos, nec sine 2. Petr. 1. fructu vos constituent in Domini nostri Iesu Christi cognitione. Cui enim non præsto sunt hæc, cæcus est & manu tentans. Atque hinc præcursor S. Ioannes qui ad Eum manifestandum totus erat, Erat, vt ait Dominus, Lucerna ardens & lucens; prius ardens, tum Ioan. 5.*

L. 3. c. 43. lucens. *Nam quidam amando me intime, vt est in libro aureo de Imitatione Christi, didicit diuina, & loquebatur mirabilia: plus profecit in relinquendo omnia, quam in studendo difficilia. Tu magis luci attendis quam ardori. Tu magis pascere visu, quam gustu: magis scire appetis quam facere.*

Hoc deplorandum, & contra vt deinceps magis afficiaris in orationibus, statuendum: Iamiamque ex vnoquoque Titulo quem considerasti, affectum cum gratia elice congruentem. Saluatori gratitudinem exhibe; Pontifici cultum, Regi honorem, Capiti demissionem, Doctori docilitatem, Sponso & Fratri amorem impende, repende, effunde coram illo Cor tuum, & velut sancta Seraphim alis tuis te concita, vel potius sine te concitari & affici. *Quoniam quis Deus prater Dominum? Aut quis Deus prater Deum nostrum?*

Is. 6.
Ps. 17.



FERIA TERTIA.
SEPTEM SINGVLARES PERFE-
CTIONES VERBI INCARNATI RESIDENTIS
IN VTERO VIRGINIS MATRIS QUAE
SINGVLAREM A NOBIS DILE-
CTIONEM EXIGVNT.

Speciosus forma prae filiis hominum. Ps. 44.

Dilectus meus candidus & rubicundus, electus ex millibus. Caput eius aurum purissimum, guttur illius suauissimum, & totus desiderabilis. Talis est Dilectus meus, & ipse est amicus meus. Cant. 5.

VERITAS PRACTICA.

Aurum ignitum est amor Christi, in quo non tam ardor, quam puritas quaeritur.

RATIO EST, Quia ad amorem sui, Christus totum cor nostrum querit.

Sed non tam ardore quam puritate, totum Christo cor nostrum traditur.

Ergo in Christi amore non tam ardor quam puritas queritur.

I. PUNCTVM.

QUAM sit omni modo perfectus Dominus, quâque singulariter propterea sit à nobis amandus, & per se patet, & cogitari potest attentius. Sed quas præ cæteris infantibus singulares habeat in ipso Matris utero perfectiones, non ita forte liquet, & ad singularem eius in nobis excitandum amorem vel maxime opportunum est inuestigare. Hæ sunt autem septem in quibus considerandis plus minusue moræ dabis, præ affectu quem senties. Prima est SANCTITAS, nam cæteri infantes ordinarie in peccato concipiuntur, at *Ille sanctus, innocens, impollutus, segregatus à peccatoribus & excelsior cælis factus.* Hebr. 7. Secunda, VSUS RATIONIS, seu virilis infantia, *Creauit Dominus nouum super terram: Fœmina circumdabit virum.* Ier. 31. Tertia, Diuinæ sapientiæ & scientiæ thesauri ibi absconditi, de quibus Apostolus atque imprimis GRATIA CAPITIS, *De cuius plenitudine nos omnes accepimus.* Coloss. 2. Ioan. 1. Quarta, COMMVNICATIO gratiarum cum sanctissima sua matre; Nullus infantum matrem suam eligit, nullus ex utero eam nouit, nullus illi benefacit; Hic autem infans præterquam quod suam matrem elegit, sic illi sua communicat, vt quod habet mater Virgo, ad nutriendum filium, hoc à Filio accipiat. *Ego dilecto meo, & Dilectus meus mihi, qui pascitur inter Lilia.* Cant. 6. Quinta, SVBLEVATIO Matris vterum gestantis; cum reliqui infantes sint oneri & fastidio matribus suis, Hic potius Matrem subleuat quam oneret; *Laua eius sub capite meo, & dextera illius amplexabitur me.* Ibid. 2. Sexta, MERITVM continuum; Iam enim à primo Conceptionis ortu se suaque Patri offert pro nobis, nec vnquam cessat à virtutibus exercendis, vt infra videbitur; *Ideo ingrediens mundum dicit; hostiam & oblationem noluisti, corpus autem aptasti mihi. Tunc dixi Ecce venio.* Hebr. 10. Septima est BEATITUDO animæ videntis Deum;

Cant. 3.

hoc est diadema quo coronauit Illum Mater sua, in die desponsationis eius, & in die letitie cordis eius.

Apoc. 3.

O verè speciosum formâ præ filijs hominum, vere totum desiderabilem, & electum ex millibus! Numquid qui tam singularis est in suis perfectionibus, sic singulariter & vnice à nobis est diligendus? Hoc est videlicet aurum ignitum, quod ipse nobis suadet emendum. Hic est amor quo vult amari, qui non sistsat in ardore sed puritate. Excellentia quidem amoris esset, si simul iungi possent ardor & puritas, sed comparatione facta vnus cum altero, dicitur Ardori præferenda Puritas, sicut in auro ignito non tam spectatur vt aurum ardeat, quàm vt purum sit & defœcatum ab omni alio prorsus metallo. Ita plane amor Christi siue ardeat, siue non: non tam ardor quæritur quàm eius puritas ab omni alia creatura. Cur ita porro? Quia videlicet Christus totum cor nostrum quærit. Expende hanc rationem valde ponderosam.

Marc. 12.

Luc. 10.

Deut. 6.

Diliges, inquit, Dominum Deum tuum ex toto corde tuo, & ex tota anima tua, & ex tota mente tua, & ex tota virtute tua, & ex omnibus viribus tuis, & ex tota fortitudine tua. Vbi sexies vox tota, vel æquiualens repetitur, ad indicandum haud dubie, quantopere id exoptet. Et certe, nonne illi debetur? putasne illi deberi amorem nostrum? At quo iure? quo titulo? quo nomine? expendere singula: & videbis eadem prorsus ratione deberi amorem ex toto corde, qua debetur amor. Confiteor tibi hoc Domine in toto corde meo.

Ps. 9.

II. PUNCTVM.

SED non tam ardore quam puritate totum Christo cor nostrum traditur.

¶ Psalm.

Quid est enim totum Christo cor nostrum tradi? Nempe sic à nobis vnice & simpliciter Christum diligere, vt nulla prorsus alia creatura, cum ipso diligatur, nisi ordinate propter ipsum. Sic sanctus Basilus & alij passim: Quod dicit in toto, nullam in res alias diuisionem admittit; quantum enim dilectionis in hac inferiora insumpseris, tantum necesse est vt demas de toto.

At vero ardor non facit illam dilectionis simplicitatem, sicut puritas: potest quis ardere in aliquo diuini amoris actu, qui simul inordinate feratur in alias creaturas; non potest autem sic

pure Deus diligi: Nam puritas excludit omne aliud quod non est Deus, vel propter Deum. Sicut enim inordinato creaturæ amore cor inficitur, sic non purgatur nisi illo amore excluso.

Animas vestras castificantes in obedientia Charitatis, inquit San-^{I. Petr. 1.}ctus Petrus; nempe sicut ad castitatem spectat exclusio sensua-
lis amoris, ita ad Charitatem Dei, omnis iste amor Creaturæ ex-
cludatur necesse est qui non pure ex obedientia, id est, sicut Deus
præcipit, exercetur. Quomodo autem præcipiat, audi; *Hoc est*
præceptum meum ut diligatis inuicem, sicut dilexi vos, expende il-^{Ioan. 15.}
lud *sicut*, quàm pure, quàm sanctè, quàm ordinate. Itane diligis
quicquid diligis? Et tamen præceptum est Domini.

III. PUNCTVM.

AV RVM igitur ignitum est amor Christi, in quo non tam ar-
dor quam puritas queritur: Cùm totum quærat cor, quod
non tam ardore quàm puritate totum traditur. Sic dicitur, *fi-*^{2. Tim. 1.}
nis præcepti Charitas, de corde puro.

Ardeniter quidem quantum possis dilige, sed præcipue singu-
lariter, purè, & vnice; Minus semper Christum amabis, si quid
cum illo ames, quod non pure pro illo ames, etiam si tibi illius
amore ardere videaris. Potest Dæmon, potest natura tua illum
ardorem sensibilem concitare & te decipere; sed in puritate cor-
dis nulla deceptio. Si quando etiam ardorem verum & sanctum
non sentias, potes excusari, quia non in nostra situs est potestate,
neque ad illum excitandum semper confertur gratia, cùm sic
sensibiliter Christus non ita velit diligi sicut purè & vnice: hoc
enim semper & absolute vult. Hæc est eius natura immutabilis,
vt non ex parte sed ex toto diligatur. *Dilectus tuus*, ait Kem-^{L. 2. de}
pensis, *talis est natura, vt alienum non velit admittere, sed so-*^{Imit. Ch.}
lum vult cor tuum habere & tanquam Rex in proprio throno sede-^{c. 7. & 8.}
re. Sic & Propheta, *Coangustatum est stratum, ita vt alter decadat,*
& pallium breue, vtrumque operire non potest.^{vide.}

Quamobrem cum alterutri dilectorum sit deferendus locus,
vtrum optas è duobus? Responde. *Quem vultis de duobus vobis*
dimitti? Meministi huius opprobrij quondā illati Christo? Hoc
idem modo à te quæritur, cum de diligendo vnice Christo agi-^{Math. 27.}
tur, aut solus est diligendus, aut non diligendus; aut excluden-
dus à corde Christus, aut ille alius qui partem cordis occupat. O

pudor humani cordis! Cor quidem tuum nimis angustum est tam amabili Christo diligendo; sed si Solum diligeres, non dedignaretur Christus illas angustias. Quod vnum dedignatur, est socius cordis quem adhibes, etiam si latius & capacius vniuerso cor haberes! Dùm regnet solus in corde Christus, potest ipse satis regnum suum dilatare, sed si socium ei addideris, regnum eius aut regni sedem sic angustas & constringis, vt nec ibi regnare possit, nec velit viuere.



FERIA QVARTA.

SEPTEM DONORVM SPIRITVS

SANCTI PLENITVDO IN VERBO INCARNATO.

Egredietur virga de radice Iesse, & flos de radice eius ascendet: & requiescet super eum Spiritus Domini, Spiritus Sapientiae & Intellectus, Spiritus Consilij & Fortitudinis, Spiritus Scientiae & Pietatis, & replebit eum Spiritus timoris Domini. II. II.

VERITAS PRACTICA.

Si Spiritu viuimus, Spiritu & ambulemus. Gal. 5.

SENSVS verborum Apostoli est, vt quantum patet nos posse ambulare spiritu, id est, omnia nostra secundum Spiritus sancti motum peragere, tantum excitemur ad id peragendum, tam certo credamus nos ita debere ambulare. Quod autem pateat nos id posse, inde euident facit, quia, inquit, spiritu viuimus, spiritu animati & vegetati sumus, sicut probè scitis,

vnde nec dubitare potestis quin possimus : ac proinde etiam si possumus, quin debeamus. Ergo ita omnia in spiritu sicut possumus & debemus, operemur, & ita spiritu ambulemus sicut spiritu viuimus.

SIC autem breuius inde formatur Ratio. Si manifestè patet, nos posse ambulare spiritu, spiritu ambulemus, seu quod idem est, ad id excitemur, id nos debere credamus.

Sed si spiritu viuimus, manifestè patet nos posse sic ambulare. Ergo sic spiritu ambulemus, sic prouocemur, sic persuadeamur ut ambulemus.

I. PUNCTVM.



VID de vnoquoque Spiritus Sancti Dono sit sentiendū, & quomodo in Christo Domino fuerit, sic paucius ex D. Thoma collige, quæ fusiùs meditando perpendes. **SAPIENTIA** est cognitio & Contemplatio causæ altissimæ ^{2. 2. q. 45.} quæ est Deus : Est & iudicium rectum de rebus omnibus, secundum diuinas regulas. Sic Christus Dominus dicebat, *sicut audio, iudico, & iudicium meum iustum est.* **INTELLECTVS** est ^{2. 2. q. 8.} intima quædam cognitio seu supernaturale lumen quo res obscuras & reconditas ita penetramus, ut intus legere quodammodo videamur. Sic Christus Dominus perfecte intelligebat, *& in interpretabatur scripturas quæ de ipso erant.* **CONSILIUM** ^{2. 2. q. 52.} est de singulis agendis supra naturalem & humanam prudentiam ^{a. 1. & 2.} quæ sic adiuuatur & perficitur : sic Christus D. *ductus est in desertum à spiritu ; Et quæ Deo placita erant faciebat semper.* ^{Math. 4. Ioan. 8.}

FORTITVDO est qua peruenitur ad finem operis inchoati, ad quem ex ipsa virtute fortitudinis peruenire non potuisses, propter occurrentes difficultates : *Et hoc præcipue operatur Spiritus sanctus in homine, inquit S. Doctor, cum perducit eum ad vitam æternam, quæ est finis omnium bonorum operum, & euasio omnium periculorum.* Sic Christus Dominus toto vitæ suæ decursu, exultauit ut Gigas ad currendam viam suam in fortitudine spiritus sui. **SCIEN TIA** est circa res humanas, sicut sapientia circa ^{1. 2. q. 193.} ^{a. 1.} ^{1. 2. q. 18.} ^{1. 2.}

2. 2. q. 9. diuinas; iudicium scilicet rectum de rebus humanis & creatis secundum altissimam causam, prout sunt à Deo conditæ, sic de iis iudicare & ordinare. Sic Christus D. *Videte & caute ab omni auaritia, Nolite thesaurizare vobis thesauros in terra. Quid prodest homini si mundum vniuersum lucretur?* PIETAS est filialis affectio erga Deum vt patrem, cui propterea cultum & officium exhibemus. Sic Christus D. *Ita Pater, quoniam sic fuit placitum ante te.* TIMOR est quo Deum voluntarie reueremur, & nos ipsi subducere refugimus. Sic Christus Dominus dicitur, *Exauditus in omnibus, pro sua Reuerentia*, & hoc affectu reuerentiæ sic ordinarie mouebatur in Deum, vt hunc affectum habuerit præ cæteris plenior, inquit S. Thomas, vnde & dicitur de hoc dono: *Et replebit eum spiritus timoris Domini. Quis non timebit te, Domine, quem sic timet & reueretur Filius tuus?*

Sic vero unicuique nostrum sicut Christo D. septem illa dona conferuntur, cum gratia sanctificante, vt ad actus supernaturales & vere spirituales, excitemur, *Nescitis quia templum Dei estis, & spiritus Dei habitat in vobis?* Sed quàm longe sumus ab ea obedientia quam Christus illi exhibebat! Christus numquam, nos fere semper resistimus! *Quod vt diligentius caueamus*, opportunum est illud Apostoli; *Si spiritu viuimus, spiritu & ambulemus.*

Ratio hæc affertur inter alias, Quia quàm manifeste patet nos facile posse ambulare spiritu, id est, agi & agere ex Spiritus sancti motu, tam aperte & potenter excitamur vt ita ambulemus. Nam cum ille agendi status sit tam excellens & utilis, vt satis ex se liquet, nihil videtur restare quò efficaciter excitemur ad illum statum consecrandum, quàm vt probe sciamus nobis id esse facilius & iucundius eò peruenire quàm putetur. Quando enim illa tria simul concurrunt: Excellentia rei, Utilitas, & Facilitas, funiculus est ille triplex cui nihil resistit. Hoc est igitur quod declarat illa prima propositio, perinde quasi diceretur, si facilitas ambulandi spiritu, æque adsit ac præstantia & utilitas, nonne tum ambulabis? quid respondes? Tu qui hætenus nihil aliud respondisti quò minus spiritu ambulares, quàm quia id difficilius: si tibi manifeste ostenditur, id esse facile, quid respondebis?

II. P V N C T V M.

SE D si spiritu viuimus, manifeste patet nos posse facile spiritu ambulare.

Primo enim in hunc præcipue finem nos Spiritus ille viuificat, vt vitam spiritualem viuamus, quod est spiritu ambulare; An vero potuit Spiritus sanctus hunc finem in nobis prætere-
re, & non poterit nos ad eum perducere? Numquid legisti de
rotis illis mysticis, *Quocumque ibat spiritus, illuc eunte spiritu, &* Ezech. 11.
rotae pariter eleuabantur sequentes eum, spiritus enim vita erat in
rotis? Iam vero Idem spiritus in te non poterit quod in illis rotis?

Deinde vero, quare abs te, vnde habet corpus tuum vt mouea-
tur quò velis? nonne à spiritu quo corpus viuit? Cur non ergo à
Spiritu sancto quo viuís, sic moueri & ambulare poteris, cum
non sit minus potens ad te mouendum, quàm spiritus tuus natu-
ralis ad mouendum corpus? *Spiritus est qui adiuuat infirmitatem* Rom. 8.
nostram.

Quod si dicis in te impediri Spiritum sanctum, quo te minus
facile moueat, quid est quod illum impedit? Circumspice om-
nia, & videbis nullum esse alium præter te ipsum. An vero sa-
nus esses, si sic corpus impedires? Et quidem corpus tuum po-
test impediri ne ambulet, etiam nolente te: At vero ne ambules
spiritu, non potest impediri Spiritus sanctus per quem ambulas,
nisi te volente. O te miserum qui cum beatissimus esse possis, te
miserum facis! *Miserere animæ tuæ.* Eccles. 30.

III. P V N C T V M.

SI ergo spiritu viuimus, spiritu & ambulemus; Cum scilicet ex
vita spiritali quam nobis confert Spiritus sanctus, aperte
pateat nos facile posse ambulare spiritu: & quandoquidem ita
est facile, vt dictum est, iam nihil restet quod excusamus ne ita
ambulemus. *Propter quod, inquit Apostolus, remissas manus &* Hebr. 12.
soluta genua erigite, & gressus rectos facite pedibus vestris, vt non
claudicans quis erret, magis autem sanetur.

Neque vero excuses mundum aut carnem; *Non enim accepi-*
mus spiritum huius mundi, vt secundum hunc mundum viuamus, sed 1 Cor. 12.

Gal. 5.

accepimus spiritum qui ex Deo est, ut sciamus quæ à Deo donata sunt nobis; & secundum illa viuamus. Neque ut sic ambulemus, expectandum est, donec nulli sint contrarij carnis motus, sed potius sic spiritu ambulandum est, ut illi carnales motus comprimantur. Sic enim habes, *Spiritu ambulate, & desideria carnis non perficietis. Caro enim concupiscit aduersus spiritum, spiritus autem aduersus carnem. Hæc enim sibi aduersantur. Qui autem sunt Christi, carnem suam crucifixerunt cum vitiis & concupiscentiis.* Nonne vis eius esse? At ubi crux? ubi malleus? ubi clauis? An incepisti serio carnem cruci affigere? Solo spiritu Christus ambulauit; *Et qui dicit se in Ipso manere, debet sicut Ille ambulare, & ipse ambulare.*

1. Ioan. 2.

Vide in 2. parte, in die Pentecostes, & in Indicibus Verbo Spiritus.



FERIA QUINTA.
SEPTEM ORDINARIÆ INFIRMITATES INFANTIVM, QVAS IN VTERO PATI VOLVIT VERBUM INCARNATVM.

Verè languores nostros ipse tulit, & dolores nostros ipse portauit. Is. 53.

Non habemus Pontificem qui non possit compati infirmitatibus nostris, tentatum per omnia, pro similitudine, absque peccato. Heb. 4.

VERITAS PRACTICA.

L. 3. de
Imit. Ch.
c. 5.

Non viuitur in amore Christi, sine dolore.

RATIO EST, Quia non viuitur in amore Christi, sine graui zelo.

Sed talis zelus affert dolorem.

Ergo non uiuitur in amore Christi sine dolore; Qui tamen omni gaudio est preferendus.

I. PUNCTVM.

POTERAT quidem Dominus esse homo sine matre, assumendo humanam carnem de quacumque materia ^{3. p. 7. 31.} voluisset. ut ait S. Thomas. Aut certe si matrem habere ^{4. 4.} voluit, poterat nasci statim atque conceptus est. Aut si denique more aliorum Infantium in materno utero nouem residere menses voluit, poterat non subiaceere illorum miseriis & infirmitatibus. Verum cum verè nos amaret, vere dolores & languores nostros cum ipsa vita subire voluit, ut nobis amorem suum apertius indicaret, & nostrum prouocaret.

Hæ porro sunt septem ordinariæ infirmitates infantium, quamdiu subsistunt in utero; NON NISI vitâ matris viuere, & morte eius mori. NON NISI sanguine viuere. NON NISI arcto & contracto corpusculo. NON alio situ & statu quàm qui horrorem iniiceret intuenti. NON aliter quàm captiuum detineri. NVLLO libertatis vsu gaudere. NVLLO denique uti sensu, quàm tactu, nec pene aliter viuere quàm si non viueret.

Has omnes infirmitates sic sustinuit Dominus, ut præ cunctis infantibus longe grauius & acerbius eas sustinuerit, cum ipse compos rationis & omni plenus scientia probe sciret & aduertiret se in hoc miserando esse statu; Quod certe est tam horrendum & mirandum, ut hoc vnum præcipue admiretur Ecclesia: *Non horruisti Virginis uterum.* Sic nos amabat, sic se à nobis amari volebat, ut quemadmodum ille nostris, ita nos eius doleremus malis.

Hic est sensus Veritatis propositæ, *Non uiuitur in amore Christi sine dolore*, Quia scilicet non est amor sine zelo, nec zelus sine dolore. Hæc sunt modo expendenda. Ac primum illud quod non sit amor Christi sine zelo, id est sine vehementi desiderio amplificandæ eius gloriæ, notificandi eius nominis, & diuini eius amoris communicandi. Nam cum IESVS tale sit bonum,

tam præstans, tam iucundum, tam omni ex parte amabile, ut quanto magis Cor amantis in eius amore dilatatur, tanto sibi magis videatur constringi & arctari: Quid ei restat quam ut corda omnium hominum desideret, quibus Christum suum magis amet, vel potius ut in cordibus omnium ipse Dominus viuat & ametur ab omnibus? *Veni dilecte mi, egrediamur in agrum, commoremur in villis.* Hoc desiderium tam vehementer aliquos incendit, ut quemadmodum ait sanctus Bernardus, *Otium Con-*

Cant. 7.

Serm. 57.
in Cant.4. Confess.
12.

templationis pro studio Predicationis libentissime intermittant, & S. Augustinus, Rape ad Eum, inquit, Quas potes animas & dic eis, hunc amemus, hunc amemus.

II. PUNCTVM.

SED talis zelus dolorem infert.

Nam cum Zelator diuini amoris videat se parum posse erga homines; cum animaduertat longe plus valere vanitatem in mundo quam Veritatem; longe plus offendi Christum quam diligere: quantis dolorum aculeis pungitur! quantis tabescit desideriiis! *Tabescere me fecit Zelus meus.* Veritatem dico in Christo, non mentior, inquit Apostolus, *testimonium mihi perhibente conscientia mea in Spiritu sancto, quoniam tristitia mihi magna est, & continuus dolor cordi meo.* Neque enim tantum non amatur Christus, quod solum si esset, iatis esset quod gemeretur; sed præterea offenditur, & tot offensis, tam grauib, tam sæpe repetitis, & vix vnquam intermissis! O quis Christum amet & non gemat!

Psal. 118.

Rom. 9.

Serm. 181.

Zach. 13.

Mat. 13.

An tu spirantem Eum, & viuum in Cruce pendentem sine lachrymis intueri potuisses? At nonne magis Eum cruciari vel vno peccato lethali credis quam sua cruce? *Cur me, inquit Ille apud S. Augustinum, grauiori tuorum criminum cruci affixisti? Grauior apud me peccatorum crux in qua inuitus pendeo, quam illa in quam tui misertus ascendi.* Si vel vni peccatori sic Christum loquentem & conquerentem audires, an illum diligeres & non doleres? Quid quod cum multis ita conqueritur? Quid quod tu ipse es cui loquitur, tu ipse qui Eum cruci affigis! *Quid sunt plagæ istæ in medio manuum tuarum? Et dicet, His plagatus sum in domo eorum qui diligebant me.* O plagas peccatorum, plagis cla-

uorum longe grauiores! *Si affiget homo Deum, quia vos configitis me?* Deicida quid fecisti, cum peccasti? *Deduc quasi torrentem lachrymas, per diem & noctem non des requiem tibi, neque taceat pupilla oculi tui.* Thren. 2.

III. PUNCTVM.

NON ergo uiuitur in amore Christi, sine dolore. Aut enim non est amor, vel est zelus; aut non est zelus vel est dolor; & quidem dolor continuus, quia malum Amati quod est peccatum numquam cessat in mundo. Quamdiu autem is qui vere amat, in amato malum videt, tamdiu necesse est ut doleat, aut non vere amat. *Fuerunt mihi lachrymæ meæ panes die ac nocte dum dicitur mihi quotidie, ubi est Deus tuus?* Ah ubi est Deus tuus? *Ps. 42.* Deus ille qui est in utero virginis pro me! Deus ille qui in cælo me expectat! Deus ille qui uiuebat in anima: ubi est per peccatum? Quod si in cruce est per peccatum, totque sint cruces quot peccata, ubi est Deus tuus! quot quantisque in crucibus & cruciatibus!

Hoc est quod à zelo quotidie dicitur amanti Deum, *Ubi est Deus tuus?* Hoc est quod illi lachrymas tam continuas facit, ut ne quidem eas contineat dum panem sumit. Hoc est denique quod amaram quandam iucunditatem facit, & iucundam amaritudinem, ut lachrymæ fiant panes, & panis fiat, *Panis doloris.* Quantum enim ex vna parte sentitur doloris propter malum Amati, tantum ex alia, iucunditatis quidam sensus percipitur, quod ille dolor sit amoris dolor.

Itane tecum agitur? hoc intende, hoc ora: *Ciba me Domine pane hoc lachrymarum, & potum da mihi in lachrymis, in mensura.* *Ps. 79.* *Hæc est ira contra peccatum, quæ est melior risu. Cor sapientium ubi hæc tristitia est, & cor stultorum ubi letitia non sic temperata.* *Eccl. 7.*

Vide infra, die nono Ianuarij. Et in 2. parte feriam secundam post Dominicam Sexagesimæ & Quadragesimæ.



FERIA SEXTA.

SEPTEM VIRTUTES QUAS, INTER
ALIAS, CHRISTVS DOMINVS IN VTERO
VIRGINIS MATRIS EXERCVIT.

Ego autem in terra Captiuitatis mea confitebor illi.
Tobix 13.

VERITAS PRACTICA.

Nunquam est Dei amor otiosus.

Hom. 30.
in Euang.

RATIO affertur à S. Gregorio, cuius est hæc ipsa Veritas pro-
posita: Operatur etenim magna si est, si vero operari renuit,
amor non est. Sic porro formatur Ratiocinatio.

QUI vult & qui potest semper operari, nunquam est otiosus.
Sed Amor Dei vult & potest semper operari.
Ergo nunquam est otiosus, aut non est Amor Dei.

I. PUNCTVM.

Tob. 13.

Ibid. 13.

QUÆ de Tobia memorantur, Quod cum captus esset, in
captiuitate tamen positus, viam veritatis non deseruit; &
quæ de se ipse dicit, *Ego autem in terra captiuitatis mea
confitebor illi*, scilicet Deo, quem constantissime coluit: apte re-
ferri possunt ad Christum Dominum, in virginali vtero velut in
terra captiuitatis residentem. Ibi enim ne momentum qui-
dem vnum elabi passus est, quo Deum nõ coleret, quo nobis non
benefaceret, & quo virtutis alicuius actum non exerceret. *Oculi
mei semper ad Dominum.*

Pf. 24.

Hæ vero septem inter alias cogitari possunt Virtutes, quas

repetitis aut continuatis actibus exerceret frequentius. GRATITVDO: HUMILITAS: RELIGIO: OBLATIO SVI: RESIGNATIO: COMPASSIO seu MISERICORDIA erga homines: CONTRITIO & Satisfactio pro ipsorum peccatis: Quia vt de se aiebat Iob, sic vere Christus; *Ab infantia mea creuit mecum misratio, & ex utero matris mea egressa est mecum.* Quæ vero Regina est omnium Charitas non recentetur inter illas septem, quia sic omnibus coniuncta erat vt ab ijs nunquam abesset, nunquam non earum actus imperaret, informaret & regeret, cum nunquam ab amando vacaret sicut ipse dicebat; *Quia Ego quæ placita sunt Ei, facio semper.*

Iob. 31.

Ioan. 8.

Sic nos erudiebat, sic nos exemplo suo docebat: *Numquam Dei amorem esse otiosum*; sic nos permouebat ad id considerandum & exequendum.

Ratio quæ id persuadet est facilis, quia videlicet, Qui vult & qui potest semper operari nunquam est otiosus. Quid est enim esse otiosum, nisi cessantem ab opere, seu non operantem, quando quis debet operari? Quid est autem quod quis non operetur, nisi quod non vult vel quod non potest operari? Sic de pigro & otioso aperte Sapiens, *Noluerunt quicquam manus eius operari.* Et illi operarij à patrefamilias inquititi, *Cur starent tota die otiosi, responderunt, quia Nemo nos conduxit;* Quasi dicerent, in nostra non est positum potestate. Vnde cum hæc solum duæ afferantur rationes, cur quis non operatur, quia non vult, vel non potest, sequitur manifeste, vt qui vult & qui potest semper operari, nunquam sit otiosus.

Prou. 21.

Math. 20.

Vtrum horum tibi deest? An voluntas, an potestas? *Vade ad fornicam, ô piger, & considera vias eius, & disce sapientiam. Usquequo piger dormies? quando consurges è somno tuo?*

II. PUNCTVM.

SED Amor Dei vult & potest semper operari.

Primò quidem vult tam vere quam verus amor est, cum amor nihil sit aliud quam voluntas amantis tam propensa in amatum vt illi semper bene velit & benefaciat quantum potest. *Pondus meum, amor meus,* inquit S. Augustinus, *eo feror quocunque feror,* Id est, in id maxime propendeo quod amo. Hæc est

l. 13. Conf.
c. 10.

amoris natiua proprietas, vt amantis voluntatem inclinet in rem amatam. Quod expressius S. Dionysius: *Exstasim faciens*, inquit, *diuinus amor*, amatores sui Iuris esse non sinit, sed in ea quæ amant penitus transfert, vt scilicet agant, & agendo indicent quantum ament;

Prov. 30. Hinc amor comparatur igni, *Qui nunquam dicit sufficit, & lampades eius, lampades ignis atque flammarum. Aqua multa non potuerunt extinguere Charitatem, nec flumina obruent illam*: Vnde S. Augustinus, *Intellige vinum Charitatis*, Ipsa est virtus quam nemo vincit, huius ignem nulli fluctus sæculi, nulla flumina temptationis *in Ps. 47.* extinguunt. Author vero libri de imitatione Iesu sic aptissime: *l. 23. c. 5.* Amor Iesu nobilis ad magna operanda impellit, & ad desideranda semper perfectiora excitat. Amans volat, currit, & letatur: liber est & non tenetur, dat omnia pro omnibus, & habet omnia in omnibus, quia in vno Summo super omnia quiescit, ex quo omne bonum fluit. Amor onus non sentit, laborem non reputat, plus affectat quam valet, de impossibilitate non causatur, quia cuncta sibi posse & licere arbitratur. Valet igitur ad omnia, & multa implet, & effectui mancipat, Vbi non amans deficit & jacet.

DEINDE vero, quod possit semper vere operari, vel ex eo patet, quod quicquid Amans operetur, id referre possit ad Deum & ex eius amore facere; *Sine manducatis*, inquit Apostolus, *sue bibitis, sue aliud quid facitis*, omnia in gloriam Dei facite. Et alibi: *Omne quodcumque facitis in verbo, aut in opere; omnia in nomine Domini nostri IESU Christi, gratias agentes Deo & Patri per ipsum.* Cum enim in his omnibus quæ a nobis ex officio vel necessitate, vel vtilitate proximi agenda sunt, spectari possit eius Voluntas, quæ sic vitæ nostræ cursum ordinauit; Cumque in ea diuina voluntate adimplenda vel maxime Deo placeamus, quid est quod non semper operari, & bene operari possis?

O Bonitatem diuinam, quæ his contenta est nostris quotidianis operibus! O humanam malitiam quæ tam parua Deo negat, quæ magna fierent si libenter Deo darentur.

III. PUNCTVM.

NUNQUAM est igitur Dei amor otiosus; Cum nunquam non operetur si velit; velit autem quantum possit; Sic
omni

omni tempore diligit qui amicus est, vt ait sapiens, *Sic Charitas* Prou. 7.
nunquam excidit, vt ait Apostolus, sic Dominus, *in Charitate* 1 Cor. 13.
perpetua nos diligit, vt ipse ait per Prophetam. Sic denique ad- Ier. 31.
moneris, *Non defraudari à die bono, & particula boni doni non te* Eccles. 14.
pratercat. Itanè tu sic constanter! Nunquid multæ tibi horæ de-
pereunt? An vis cessare ab amando? At quando otiaris, ces-
sas amare, quia Dei amor non est otiosus. Etiam si aliquando
operari non posses, etiam si ad remittendum animum te inter-
dum otuari contingeret, ipsam etiam operandi impotentiam, ip-
sam etiam otuandi necessitatem potes in amorem Dei conuerte-
re; si quod ex ratione & necessitate non potes facere; hoc ipsum
non facias quia Deus non vult hoc à te fieri. *Nolite deficere bene-* 2. Thess. 3.
facientes. Quodcumque facitis ex animo operamini, sicut Domino, & Coloss. 3.
non hominibus. Mane semina semen tuum, & vesperene casset ma- Eccles. II.
nus tua.



S A B B A T O.

SEPTEM VIRTUTES PRÆCIPVÆ

IN CVLTVM ET AMOREM VERBI INCAR-
NATI EXHIBENDÆ.

*Venite exultemus Domino, iubilemus Deo salutari
nostro:*

Venite adoremus & procidamus ante Deum. Ps. 94.

VERITAS PRACTICA.

Amor non nisi amore compensatur.

RATIO EST, Quia Amor Dei erga nos de quo hîc agimus, non
compensatur nisi per aliquid æquale redditum.

Sed non nisi dato amore tuo, par & æquale reddideris.

N

Ergo ille amor non nisi amore nostro compensatur; ac proinde omnia in cultum & amorem eius conuertenda.

I. PUNCTVM.

QVAM multis nominibus Christo Domino nostra debeamus officia, quantum id à nobis Pater desideret, quantum ipse Filius mereatur, quantum Spiritus sanctus in id nos excitet, quantum denique Angeli suo nos prouocent exemplo, qui statim atque introductus est Primogenitus in orbem terrarum illud audiuerunt & executi sunt, quod refert Apostolus, *Et adorent Eum omnes Angeli eius; tu ipse tecum reuolue.*

Hebr. 1.

Et si vero nullum est pietatis officium, nulla virtus, aut vilius virtutis actus quem non plene & integre in Eius cultum & honorem exercere debeas, tum hæc potissimum septem virtutes sunt exercendæ quæ sunt præcipuæ, vtpote Theologicæ & Cardinales, ad quas cæteræ referuntur.

Ioan. 11.

FIDES, credendo firmissime quicquid docet; *Utique Domine, ego credidi quia tu es Filius Dei qui in hunc mundum venisti.*

2. Tim. 1.

SPES, plane Ei fidendo in omnibus; *Scio cui credidi, & certus sum quia potens est depositum meum seruare in illum diem.*

Ioan. 21.

CHARITAS, *Etiam Domine, Tu scis quia amo te.*

1. Cor. 2.

PRVDENTIA, *Non Iudicavi me scire aliquid nisi Iesum Christum, & hunc crucifixum.*

Phil. 3.

Veruntamen existimo omnia detrimentum esse propter eminentem scientiam Iesu Christi Domini mei.

Apo. 4.

IUSTITIA, Quæcumque sunt Religionis, Pietatis & Gratitude: *Dignus es Domine Deus*

Ibid. 5.

noster accipere gloriam & honorem & virtutem; Dignus est Agnus qui occisus est accipere virtutem & diuinitatem, &c.

Matth. 8.

FORTE, *Sequitur te quocumque ieris. Domine tecum paratus sum, &*

Ioan. 15.

in carcerem & in mortem ire: animam meam pro te ponam.

Ps. 72.

TEMPERANTIA, *Quid mihi est in cælo, & à te quid volui super*

Philip. 4.

terram? Scio & humiliari, scio & abundare, & satiari & esurire, omnia possum in eo qui me confortat.

Quæ quidem virtutes possunt exerceri sine Charitate, sed non meritoriè, non plene, nec perfectè. Neque vero tantum id curandum est, vt in Charitate habituali fiant, sed vt à Charitate

1. Cor. 13.

actuali imperentur & informantur. Sic enim *Charitas omnia cre-*

dit, omnia sperat, omnia sustinet, & aliarum virtutum omnes exercet actus; aut ut exerceantur, sic imperat, quasi ipsa eos faceret & exerceret. *Omnia vestra in Charitate fiant.* Sic Christus Dominus omnia ex amore, *Et Amor nonnisi amore compensatur; seu Amori nihil sufficit nisi amor.* *Ibid. 6.*

Expende diutius rationem propositam. Vide quàm nulla fiat compensatio nisi per aliquid æquale, aut quam prope accedens quantum fieri poterit. Sic enim Iurisconsulti compensare, interpretantur liberare se ab are alieno per retributionem alicuius equalis. *Compensatio namque est simul pondero & retribuio.* Quo spectat illud Sapientis: *Statera dolosa abominatio apud Dominum, & pondus æquum voluntas eius.* *Prov. 11.*

Cogita quàm iuste amor Dei seu diuina Bonitas velit à nobis amorem suum coli & compensari, quantum in nobis erit. *Videte qualem Charitatem dedit nobis Pater, ut Filij Dei nominemur & simus.* Quàm indignum & probrosum, ut si quid melius habeas Deo reddendum, quod ille petat: tu illi neges! *Maledictus dolosus qui habet in grege suo masculum, & votum faciens immolat debile Domino, quia Rex magnus Ego, dicit Dominus exercituum. Va illis quia in via Cain abierunt.* *1. Ioan. 3.*
Mal. 1.
Iudas
Genes. 4.

II. PUNCTVM.

SED nonnisi dato amore tuo, par & æquale reddideris. Mirum quidem si licetiam æquale dederis! quid est enim amor noster ad diuinum? Sed quandoquidem eo contentus est Deus, & sibi eo satisfactum putat, laudetur tanta Bonitas, & eò magis ametur, quò minus à nobis amari potest, & quo minus amori tanto tam modicus noster amor adæquari potest! *Diligam Te Domine fortitudo mea.* *Pf. 17.*

Aliud itaque magis est reuoluendum, Quod nihil æquale est amori quàm amor: Quod quidem verum est inter homines, at multo magis apud Deum, qui non nostra sed nos quærit, nos inquam totos possidendos: Neque nos aliter vere possidet quam dato corde & amore nostro: Nec Illi aliud quidquam æquale reddideris nisi te totum sic plenè possideat, ut nihil cordis & affectus supersit quin ad Eum amandum, plane profuderis. Quia quod æqualitatem facit, si qua est æqualitas, non est rei data: lub-

Serm. 83.
in Cant.

stantia, non eius qualitas, aut quantitas; sed tota & integra nostri donatio; unde sicut æqualitas dicitur perfici quando totum donatur, sic nisi detur, quicquid dederis, nihil æquale datur; Totum est dandum, in quo vno toto tota est æqualitas, & sine quo nulla. Sic aptè sanctus Bernardus de re tota, *Ipse*, inquit, *meritum*, ipse sibi præmiū est amor: præter se non requirit causam, non fructum, fructus eius, usus eius. Amo, quia amo; amo ut amem. Magna res amor si tamen ad suum recurrat principium, si suæ origini redditus, si refusus suo fonti, semper ex eo sumat unde iugiter fluat. Solus est amor ex omnibus animæ motibus, sensibus, atque affectibus, in quo potest creatura, & si non ex æquo, respondere auctori; vel de simili mutuum rependere vicem.

L. 4. de
Imit. Ch.
c. 8.

Quidquid præter te ipsum das, inquit ille ipse Amator tuus, *nihil curo*, quia non quero datum tuum, sed te; sicut non sufficeret tibi omnibus habitis præter me, ita nec mihi placere poterit, quidquid dederis, te non oblato. Ad hæc quid respondes? vide ne saltem nihil par amoris esse, quàm amorem?

III. PUNCTVM.

Añ. 2.
3. Reg. 18.
Luc. 14.

AMOR igitur quo nos Deus amat non nisi amore nostro compensatur, si qua re compensari potest. Quia ut vides, nihil æquale est amori quàm amor, qui nos totos Amori diuino reddit, cui totum quod sumus debemus; quod quando est persolutum, satis quidem sibi esse factum diuina bonitas reputat; sed nunquam aliter, nunquam si quid desit. *Anania*, nonne manens tibi manebat? *Vsq̃ue quo claudicatis in duas partes?* Sic ergo omnis ex vobis qui non renunciat omnibus quæ possidet, non potest meus esse discipulus. O certe diuinam æquitatem, quæ nihil à me petit nisi quod debeam & quod possum reddere! Sed ô diuinam Iustitiam, quæ id iure repetit & iure punit nisi reddidero!

Serm. de
quadr. de
bino.

Nec me putes, inquit sanctus Bernardus, post multa de hoc argumento, rem exaggerare sermonibus: quia hic descit omnis lingua, nec sufficit oculus vel ad intuendum tanta maiestatis arcanum. Cum ergo ei donauero quicquid sum, quicquid possum, nonne istud sic est, sicut stella ad solem, gutta ad fluuium, lapis ad montem, granum ad acervum? Non habeo nisi minuta duo, imo minutissima, corpus & animam, vel potius vnum minutum, voluntatem meam, & non dabo il-

lam ad voluntatem illius qui tantus tantillum tantis beneficiis praeuenit, qui toto se totum me comparauit? Alioquin si illam retinuero, qua fronte, quibus oculis, qua mente, qua conscientia vado ad viscera misericordiae Dei nostri? Et quae plura ibi habet.

Ah mi amor, Christe Iesu, nisi haec sufficiant vt me toto, te totum amem, indignus plane sum quem Tu ames, & dignus vere sum illa maledictione quam intentat Apostolus tuus, Si quis non 1. Cor. 16. amat Dominum nostrum Iesum Christum, sit anathema.

Vide in Indicibus Verbo, Amor, Caritas.





DOMINICA QUARTA ADVENTVS.

DE PRÆPARATIONE AD GRATIAS
NASCENTIS CHRISTI DOMINI RECIPIENDAS.

*Vox clamantis in deserto, parate viam Domini, re-
ctas facite semitas eius. Luc. 3.*

IST A præparatio non videtur fieri posse commodius, quàm per Virtutes septem, totidemque Veritates oppositas septem vitijs capitalibus, quæ maxime se opponunt illis Gratiis recipiendis. Illæ autem Virtutes & Veritates facile obseruari possunt in Euangelio, seu in Mysteriis quæ ab Annunciato & Incarnato Verbo supersunt consideranda, vsque ad ipsam Natiuitatem. Quo tamen die Vigilia Natiuitatis Domini contigerit, tunc Meditatio propria quæ infra habetur die Sabbati, omissis aliis assumi poterit.

HODIE de Temperantia, quæ opponitur vitio gulæ seu vitæ laxiori, ab exemplo S. Ioannis Baptistæ commorantis in deserto, & in clamantis vt paremus viam Domini, prout legitur in Euangelio hodierno.

VERITAS PRACTICA.

Sibi, non Domino viuit, qui temperatè non viuit.

*RATIO EST, Quia qui seipsum in victu & vestitu non Do-
minum querit, sibi non Domino viuit.*

Sed qui temperatè non viuit, seipsum querit in victu, non Dominum.

Ergo is sibi non Domino viuit. Vnde & illud infertur quod quantum necesse est non sibi sed Domino viuere, tantum necesse est viuere temperatè.

I. P V N C T V M.

IT A illa austerior quam agebat sanctus Præcursor Domini in deserto, satis indicat quàm esset temperans, & quantopere nobis Temperantiam commendaret, ad præparandam viam Domini. Quàm vero huic præparationi sit opportuna Temperantia, perpende ex opposito vitio, quod non minus pugnat cum Gratia nascituri Domini, quàm caro repugnet spiritui. Hoc est videlicet primum quod Apostolus illi attribuit Gratiæ, *Qua apparuit omnibus hominibus vt sobriè, seu temperanter, Tit. 2.* tum iustè & piè viuamus in hoc seculo.

Quanti autem vniuersim referat sobriè & temperate viuere vel ex eo agnosce, quod quàm necesse est non sibi sed Domino viuere, tam sit necesse viuere temperate. *Sibi enim non Domino viuit, qui temperate non viuit.* Quæ quam sit certa Veritas, lic demonstrat allata Ratio.

Qui seipsum in victu potius quàm Dominum querit, sibi non Domino viuit. Quid clarius? Quid est enim sibi vel Domino viuere, quam se vel Dominum in vita querere? Quomodo autem quis dicetur querere in vita Dominum, qui in victu quem assumit pro vita tuenda, non Dominum sed se ipsum querit? Nonne ipse victus ipsa est vita? Nonne pro eodem vtrumque sumit Apostolus, quando sic discurret, *Qui manducat, Domino Rom. 14.* manducat; *Nemo enim nostrum sibi viuit & nemo sibi moritur.* Quænam esset hæc Apostoli ratiocinatio nili tam clarum esset, manducare & viuere, vnum & idem esse, vt ex vno concessio, aliud inferatur? O quanta est cautio adhibenda in victu, in quo exploratur nùm quis sibi viuatur, an Domino? Et quam recte Sapiens: *Omnis labor hominis in ore eius!*

II. PUNCTVM.

SED qui temperatè non viuit, seipsum querit in in victu, non Dominum.

Quid hac etiam propositione euidentius? Quis non videt temperate non viuere, nihil aliud esse quam peccare contra temperantiam, vel excedendo in victu & potu; vel in cibo qui sumitur, delectationem suam quærendo: vel quocunque tandem alio peccetur modo? At verò sic peccare nonne est seipsum quærere? nonne vel idcirco peccat qui sic peccat, quia seipsum quærere? *Huiusmodi enim Christo Domino non seruiunt, sed suo ventri,* inquit Apostolus.

Et licet asserant non aliter se commodius viuere velle, quam vt facilius Christo seruiant; Itane Christus vitio colitur? Nonne ipse toties contra? *Va vobis qui saturati estis, quia esurietis. Ideo dico vobis ne sitis solliciti animæ vestra, quid manducetis.* Nonne anima plus est quam esca? *Stulte hac nocte animam tuam repetunt à te; quæ autem parasti cuius erunt? Quis vero ille stultus nisi qui secum dicebat, Requiesce, comede, bibe, epulare?* Denique quàm tremenda illa, *Attendite autem vobis ne forte grauentur corda vestra in crapula & ebrietate, & curis huius vitæ, & superueniat in vos dies illa repentina: tanquam laqueus enim superueniet.* Itane verò post hæc, Intemperans dicet se Christum in victu quærere? *Quæritis me, quia manducaſtis ex panibus, & saturati estis. Operamini non cibum qui perit, sed qui permanet in vitam æternam.*

III. PUNCTVM.

SIBI ergo non Domino viuit, qui temperatè non viuit; Quia seipsum in victu quærere, non Dominum: quod plane vnum ac idem est quod sibi non Domino viuere. *Hi sunt in epulis suis macule,* inquit sanctus Iudas, *conuiuantes sine timore, semetipsos pascentes:* Id est, se propter se nutriendos & viuendos. Hinc illud flebile & luctuosum Apostoli: *Multi ambulant, quos sæpe dicebam vobis, nunc autem & flens dico, inimicos Crucis Christi, quorum Finis interitus, quorum Deus venter est.* Perpende hæc postrema verba, nempe qui finis est noster, noster est Deus, ac proinde cùm intemperans

temperans sibi & ventri viuat, se suumque ventrem pro fine habet, & consequenter pro Deo. O perniciosissimam intemperantiam, cuius pernicies tam latè patet quam latè patens est vita, & quàm perniciosum est aliter viuere, quam Deo viuere!

Sic in hoc vitium generatim exardescet vt particulatim aduertas, quale sit tuum, in quo excedas aut deficias. Neque hic necessitatem excuses, cum non sit tam necessarium viuere, quam temperatè viuere; Neque enim tam necesse est vt viuas vita naturali, quam ac viuendo viuas tibi, sed Domino. In hoc enim natus est Dominus, & in hoc mortuus, *Vt qui viuunt iam non sibi 2. cor. 5. vinant, sed ei qui pro ipsis est natus, est mortuus & resurrexit.* Denique S. Augustinus sic apte concludet; *Habet vir temperans, in rebus huius vita, regulam utroque testamento firmatam, vt eorum ni-* L. de morib. Eccl. c. 21. *hil diligat, nihil per se appetendum putet, sed ad vita huius atque officiorum necessitatem, quantum satis est usurpet: Vientis modestia, non amantis affectu.*

Vide in Indicibus Verbo *Abstinentia. Sobrietas. Temperantia. Gula.*

IN EADEM DOMINICA QUARTA ADVENTVS.

AD HÆC EVANGELII VERBA DE S. IOANNE:

Venit in omnem regionem Iordanis, prædicans Baptismum Pœnitentia, in remissionem Peccatorum.
Luc. 3.

ALIA VERITAS PRACTICA.

Licet omni peccatori sit necessariò pœnitendum:
vix tamen vllus est qui necessariam agat pœnitentiam.

RATIO EST, Quia necessariam non agit pœnitentiam, qui non retrahit animum à rebus quæ sunt causa peccati.

Sed vix ullus est qui sic animum à rebus retrahat.

Ergo & vix ullus est qui necessariam agat pœnitentiam. Quod quàm sit expauescendum, iam facile est conijcere.

I. PUNCTVM.

Ier. 8.

NOTA veritas, eiusdemque declaratio sic expressa refertur à Propheta Ieremia : *Hæc dicit Dominus, Numquid qui cadit non resurget? & qui auersus est non reuertetur? quare ergo auersus est populus iste in Ierusalem auersione contentiosa? apprehenderunt mendacium & noluerunt reuerti. Attendi, & auscultavi, nemo quod bonum est loquitur. NVLLVS EST QVI AGAT POENITENTIAM SVPER PECCATO SVO DICENS, QVID FECI? Omnes conuersi sunt ad cursum suum, quasi equus impetu vadens ad prælium. Quali diceret : omnes in eodem animi statu & affectu permanent, nullus retrahit animum à peccato, seu à rebus quarum affectu peccatur, quamdiu autem peccator non retrahet animum ab illis obiectis quæ sunt causa peccati, nõ aget necessariam pœnitentiam.*

HOC itaque primum est in quò fundatur Veritas, & primo declarandum, quod congruam & necessariam non agit pœnitentiam qui non retrahit animum siue affectum inordinatum ab illis rebus quæ inordinatè & cum peccato diliguntur. Sic autem declaratur. Nam necessarium imprimis ad pœnitentiam illud ducitur sine quo nulla est pœnitentia, & quo posito, potest esse, licet alia delint omnia. Talis est autem illa quam dicimus animi retractio seu reuocatio ab obiectis peccati : ipsa est enim, vt vocamus, essentialis pœnitentia, ipse est dolor de peccato, siue ex Contritione fiat, siue ex Attritione cum sacramento, nihil hîc ad rem nostram refert, vter ex duobus dolor existat, dum modo sit verus dolor qui tam necessarius est & tam intrinsecus pœnitentiæ, remittendisque peccatis, vt si verus non esset dolor, non esset vera pœnitentia. Sic enim absolute Tridentinum pronuntiat, *Quouis tempore, hunc dolorem ad impetrandam veniam peccatorum fuisse necessarium.* Necessaria etiam est Confessio & Satisfactio, sed non ita semper & absolute, quin si per aliquam deesset impotentiam, quæ in variis casibus potest contingere, possent ipsa contritione suppleri, sicque peccator solum Contritus & non confessus ex impotentia confitendi, veniam

peccatorum obtineret. Non ita verò dici potest de defectu doloris, nam quantumcumque confessus sis, quamtaſcumque eleemoſynas & ieiunia in ſatisfactionem feceris, nulla erit peccati venia niſi ſit de peccatis dolor, qui tam neceſſarius eſt ad illam obtinendam veniam, vt re nulla prorsus aliâ ſuppleri poſſit. *Ad quem reſpiciam niſi ad pauperculum & contritum ſpiritu, & iſ. 66. tremement ſermones meos?*

QUOD verò verus non ſit dolor niſi retrahatur animus à re inordinate amata, vel ex eo manifeſtè patet quod nō ſit verus dolor niſi ſit animus verè conuerſus, nec vlla vnquam vera peccatoris intelligitur eſſe poenitentia, niſi ſit talis cōuerſio à peccato qualis eſſet Pagani ab infidelitate, aut Hæretici ab hæreſi ſua. Quid eſt porro conuerſi Paganum aut Hæreticum? nonne eſt animum ita retrahere ab idolis & quibuſlibet infidelitatis aut hæretica prauitatis indiſiis & notis, vt nulla prorsus eorum æſtimatio & affectio reſideat in animo, ſed potius deteſtatio & execratio? Sic plane de peccatis & de rebus inordinate dilectis quæ velut idola coluntur, & velut idola projicienda ſunt: aut certe ſi res retinentur, temperandus earum affectus: aut nulla plane conuerſio, nulluſve peccati dolor circa res tales admiſſus. *Abjice Deos alienos qui in medio veſtri ſunt, & mūdāmini. EPHRAIM Oſe 14. quid mihi ultra idola?* Quamdiu enim eſt inordinata cordis affectio, tamdiu eſt peccatum: quamdiu autem eſt peccatum in corde, non eſt contritio cordis, non eſt dolor, non eſt conuerſio peccatoris. *Securis ad radicem ponenda, facienda eſt arbor bona, & Math. 12. bonus eius fructus.* **P**OENITENTIAM certam, inquit ſanctus Auguſtinus, non facit niſi odium peccati, & amor Dei, quando ſic *Serm. 7. de temp. pœnites vt tibi amarum ſapiat quod antè dulce fuit. Hoc eſt, auferre Ier. 4. offendicula ſua à facie Domini. Hoc eſt, circumcidi Domino, & auferre præputia cordis ſui. Hoc eſt, nouare ſibi nouale; Vt quemadmodum aratro gleba terræ ab ipsis fibris ſtirpitis euellitur, ſic animus à peccati radice quæ in re amata ſiſtit, ſe conuertat. Hoc eſt quod Græci *μετενοειν* dicunt, id eſt tranſmentationem ſeu mentis inuerſionem, cum ſcilicet mens per peccatum rei cuiſpam adhærebat, & ab ea per dolorem & conuerſionem in contrarium retrahitur, Numquam fuiſſet ipſa pecunia pro qua miſiſti eum: Dicebat Tobia Coniugi de filio dolens mater. Sic dicendum de re omni eſſet, pro qua Chriſtum à nobis dimiſimus.*

II. PUNCTVM.

Jer. 8. **S**ED vix vllus est qui sic animum à rebus retrahat.
OMNES conuersi sunt ad cursum suum, quasi equus impetum
 vadens ad praelium; Quod duobus modis intelligi potest, primò
 vt conuersi quidem fuerint dum de peccato doluerunt, sed reuerfi
Is. 56. sunt postea, perinde ac si non doluissent. Quod sic Isaias expri-
 mebat: Omnes in viam suam declinauerunt, unusquisque ad auari-
 tiam suam, à summo vsque ad nouissimum. Venite, sumamus vinum
 & impleamur ebrietate. Et erit sicut hodie, sic & cras, & multò
 amplius.

Jer. 3. Secundò, vt ne quidem pœnitentes & confitentes verè dolue-
 rint, nec sese conuerterint: licque nulla prorsus fuerit eorum pœ-
 nitentia, Non in veritate, non in toto corde, sed in mendacio, vt ait
 Scriptura, id est fictè & simulatè; non quod vellent expresse fin-
 gere & simulare se reuerti, sed quod vel ignorent, ignorantia ta-
 men inexcusabili, quid sit verè conuerti; vel quod id sibi putent
 impossibile, vel quod verius est, nolint omnino sic animum, à pe-
 cunia, ab honore, & aliis delectabilibus auocare. Quocumque
 tandem modo id fiat, satis superque patet, quàm pauci, & quàm
 vix vlli sint qui minus afficiantur rebus suis, postquam confessi
 sunt, quàm si omnino non fuissent confessi: vnde nec confitendo
 forsan cogitabant de animo sic retrahendo; sed dum confite-
 rentur, & dicerent se dolere, satis id sibi esse persuadebant. Qua
 de re infra fufius, hebdomada tertia post Epiphaniam.

L. 27. h. pr. c. 1. Aptè vero de his dicas quod sanctus Gregorius ait de multis,
Act. 8. Qui Prophetia spiritum accipiunt, sed tamen ad sanctitatis meritum
 non attingunt: sicut irrationale animal, nempe asina Balaam, ra-
 tionis verba edidit, nec tamen ad permutationem naturæ rationalis ac-
 cessit: ita plane hi, dum peccata confitentur, conuersionis & pœ-
 nitentiæ verba edunt, sed dum verba tantum edunt, & animum
 non conuertunt, remanent peccatores & impœnitentes. In felle
 enim amaritudinis, & obligatione iniquitatis video te esse.

III. PUNCTVM.

LICET ergo sit omni peccatori necessario pœnitendum, vix ta-
 men vllus est qui necessariam agat pœnitentiam. Quia vix vllus

est qui verè retrahat animum à peccato, seu à re peccati, à re cui est annexum peccatum, non ex rei malitia, sed ex inordinatione affectus circa illam: quæ inordinatio quamdiu perdurat in animo, non potest esse verus dolor de peccato, nec proinde potest esse vera pœnitentia. *Non egerunt pœnitentiam, vt darent gloriam Deo;* Apoc. 16. Non id spectauerunt, & quando spectassent, non erat gloria quam Deus quærebat, vt enarrarent tantū sua peccata, sed vt relinquerent; vnde quidquid dixerint aut fecerint, nisi peccata sua deposuerint, non agent pœnitentiam Deo gloriosam & sibi vtilem ac necessariam.

Quod quidem ita frequens est, ita commune omnibus & vniuersale malum, vt sanctus Ambrosius affirmet, *se facilius inuenisse qui innocentiam seruauerint, quàm qui congruè egerint pœnitentiam.* L. 2. de pœnit. c. 10. POENITEMINI igitur, ait sanctus Petrus, & conuertimini vt deleantur peccata vestra, Vide & doce vt interponit medium conuertimini inter pœnitentiam & deletionem peccatorum, quia conuerti hoc est pœnitere quomodo necessarium est pœnitere, vt deleantur peccata; quod & finiendo sermonem suum sic confirmat; *Conuertat se vnusquisque à nequitia sua.* Act. 3. Ibid.

IN EADEM DOMINICA.

AD HÆC EVANGELII VERBA:

Erunt praua in directā, & aspera in vias planas.

Luc. 3.

MVLTÆ veritates aliunde huc deriuari possunt quæ contra excusationes difficultatum proponuntur, vt videre est in Indice verbo *difficultas*. Hic autem nonnullæ aliæ indicantur, quas vnicuique erit facile fusius declarare.

ALIA VERITAS PRACTICA.

Sic facta sunt aspera in vias planas, vt tam iucunde per aspera, quam per plana viuamus.

RATIO EST, Quia tam iucundè per aspera quàm per plana

viuimus si rerum asperitas sublata est, aut si facta est amabilis & voluntaria.

SIC enim sublata spectari debet asperitas, quando amatur, quando voluntariè & libenter accipitur: Nam hoc unum in rebus est asperum, quòd eis repugnet animus: unde voluntariæ poenæ non eam habent asperitatem, quæ sentitur in inuoluntariis.

SED Christus nobis reddidit asperitates amabiles, Sua videlicet abundanti gratia, sua nobis intusa charitate, suo exemplo, suis beneficiis, suis promissis, suis promeritis, & sexcentis aliis motiuis, quibus in omni pressura latamur, Et gloriamur propter eum qui diligit nos. Et sicut abundant passionibus Christi in nobis: Ita & per Christum abundat consolatio nostra.


SIC itaque facta sunt aspera in vias planas, non ut omnino sublata sint, sed ut per illa tam libenter & iucundè viuamus, quam per plana. Sic iugum semper remanet tollendum super nos, sed cum esset graue, sic factum est per Christum, suaue & onus leue, ut nemo sit latior & securior quam sub illo iugo. Quod sanctus Augustinus in se admirans, Vbi erat, inquit, tam annoso tempore, & de quo imo, altoque secreto euocatum est in momento liberum arbitrium meum, quò subderem ceruicem leui iugo tuo, & humeros leui sarcina tua? Christe Iesu, adiutor meus, & redemptor meus, quàm suaue mihi subito factum est carere suauitatibus nugarum, & quas amittere metus fuerat, iam dimittere, gaudium erat. Eijciebas enim eas à me, vera tu & summa suauitas; eijciebas & intrabas pro eis, omni voluptate dulcior, sed non carni & sanguini: omni luce clarius, sed omni secreto interior: omni honore sublimior, sed non sublimibus in se. Iam liber erat animus meus à curis mordacibus ambiendi & acquirendi, & volutandi atque scalpendi scabiem libidinum. Et ibidem, libro sequenti: Mansuefecisti iugo tuo ceruicem meam, & nunc porto illud, & leue est mihi, quoniam sic promisisti & fecisti. Et verè sic erat & nesciebam, quando id subire metuebam.

De his passim in sequentibus & præcipuè in quarta parte, Hebdomada vigesima secunda post Pentecosten. Vide etiam in libris de ordine, prima parte, discursu 22. sectione 5.

ALIA CONSEQVENS VERITAS.

Maius est Christi beneficium, amaritudines reliquisse nobis amabiles, quam nullas nobis reliquisse.

RATIO EST, Quia talem dare materiam siue occasionem promerendi in qua sine magno labore multum acquiras meriti, multum diuinæ gratiæ, tibi facillime comparare possis & gloriæ, maius est beneficium, quàm si omnino tolleres illam promerendi occasionem.

VIS enim non videat quod quando adiungitur minimo labori maximum præmium, in summis id beneficiis sit reponendum? Nam licet perfectius & gloriosius videatur esse, si grauiora pro Christo pertuleris, quàm si leuiora sis passus: quia tamen in grauioribus vel sæpe deficimus, vel propter impatientiam, de merito multum detrahimus; certe id beneficium & gratiosum censi debet, si sic temperentur poenæ, vt & facillime tolerantur, & nihil tamen propter temperamentum decedat de merito, imo & augeatur amplius & vberius. Nonne propterea Sapiens gratulabundus clamabat; *Videte oculis Ecclesiæ. 51. vestris, quia modicum laboravi, & inueni mihi multam requiem.*

S E D quando Christus reliquit nobis amabiles amaritudines, reliquit nobis materiam siue occasionem promerendi, in qua sine magno labore multum nobis meriti proueniret, imo & quò minor esset labor, eò maius esset promeritum.

Nam cum diminutio illa laboris non procedat ab obiecto leuiori, sed ex affectu vehementiori Charitatis, atque ex voluntate magis libera & propensa, quam facit nobis amor Christi: tam foelix & beata est illa laboris diminutio, vt meritum ex æquo crescat & augeatur, quo decrescit & minuitur labor. Ex vna nempe ac eadem radice Charitatis proueniunt, & diminutio laboris & augmentum meriti; quò enim est maior charitas, eò minus laboratur, & maior est laboris fructus. Hi sunt nouissimi pri- *Matth. 20.*

qui portauerunt pondus diei & æstus. O vere bonus Dominus qui sic nobiscum agit! O vere nos maligni & ingrati si difficultates querimur aut excusamus! Nimis enim aperte patet *Maius esse Christi beneficium, amaritudines reliquisse nobis amabiles, quam nullas reliquisse.* *Hæc est gratia si propter Dei conscientiam sustinetis, hæc est gratia apud Deum.*

1. Pet. 2.

Vide Verbo Difficultas. Amor. Christus.

ALIA VERITAS PRACTICA.

Aut non amatur Christus, aut amatur asperitas.

RATIO EST, Quia non amatur Christus si quod est certius amoris signum illi denegetur.



ST enim probandus Illi noster amor, licet probe norit quid sit intus in corde nostro, ne tamen ipsi nos decipiamus, amorem fictitium pro vero & germano capientes, vult à nobis certa dari signa, quibus ipse permotus dicat, *Nunc cognoui quod timeas & diligas Deum.*

Gen. 22.

S E D certius amoris signum est asperitatis amor. Vel quando coniuncta est muneri obeundo, vel cuius necessitati subeunda, fornax est in qua probetur amor velut aurum & argentum in confatorio.

Ecclesi. 2.

Aut Ergo non amatur Christus, quod est Christiano nimis pudendum, aut amatur asperitas, quæ est amoris certior nota.

Videnda in secunda parte, Dominica infra Octauas Ascensionis.

SIC ALITER ETIAM PRÆCEDENS, AVT ALIA CONFORMIS VERITAS FORMARI POSSET.

Cui nimis adhuc durum videtur pati pro Christo, nimis etiam durum videtur amare Christum.

RATIO

RATIO EST, *Quia si amare Christum nihil est aliud quàm pro Christo pati; Cui nimis durum videtur pro eo pati, nimis etiam durum videri necesse est Eum amare.*

Sed amare Christum nihil est aliud quàm pro eo effectiue pati, vel affectiue, ut vocant, & dispositiue.

Ergo cui nimis adhuc durum videtur pati pro Christo, nimis etiam durum videtur amare Christum.

IN quo discursu solum est probandum, quod amare Christum & pro ipso pati, sunt vnum & idem; Quod facile est hoc sensu demonstrare, quod non aperte, non certè; non perfectè, nec debite Christus ametur à quoquam, nisi qui paratus sit pro ipso pati; Qualis enim Christi amator ille esset qui diceret: Amo quidem ita Iesum, vt bene de illo sentiam, & dicam apud omnes, bene etiam illi ab omnibus velim, neque debitos vnquam honores Ei denegem, aut quidquam aliud: nisi cum fortè me velit pati; hoc enim ego nolo. Itane quisquam posset loqui, & sibi de amore Christi blandiri? Perinde autem est, siue id loquatur, siue id actu & re ipsa nolit pati, quando præsertim tam necesse est pati, vt nisi patiat, peccet.

Tunc enim tria concurrunt quæ cum actuali Charitate quæ 1. Cor. 13. patiens est, quæ omnia suffert & sustinet, valde repugnant. Primum est quod se suæque negat Christo petenti. Quid Charitati magis oppositum? Quid amorì diuino infensus? Secundum est quod se tamen eius amicum profitetur, dignumque credit Christum qui laudetur quidem & honoretur ab omnibus, sed non ita dignum & bene meritum. vt sit. propterea pro ipso patiendum; Quod certe iudicium non potest non illi esse iniuriosum. Tertium denique est, quod actu & re ipsa Christum offendit per impatientiam, per murmura, per impropria, per quidquid animus contradicens & repugnans diuinæ Voluntati potest cogitare, loqui & agere.

Et tu sic amari Christum diceres? Itane nos dilexit Christus? Itane suam nobis dilectionem protulit? Itane nostram excitat, & suis meritis promouet? Ideone frater noster effectus, & sponsus animarum, vt sic à nobis diligeretur? Nihil ne vltra tot la-

bores exhausti, tot sanguinis effusæ guttæ, tot gratiarum profusa dona, tot plagarum tolerata supplicia: nihil ne aliud promerentur, quam ne quid omnino vicillim patiaris? quorsum tot scripturæ oppositæ? quorsum tot comminationes & promissæ? quorsum in eam rem tot sanctorum exempla, tot doctorum dicta, tot rationum momenta? *Nondum incepit esse Christianus*, ait S. Hieronymus, *Qui nescit aut qui nolit pro Christo pati. Et ubi illud Apostoli, quoniam per multas tribulationes oportet nos intrare in regnum Dei? Et omnes qui pie volunt vivere in Christo Iesu persecutionem patientur.*

Sed quod nolenti durum videtur, hoc volenti suaue est, hoc amanti facile: Nec amare putandum est esse aliud quam sic libenter velle pro amato pati.

Vide Diuum Bernardum sermone 43. in Cantica, & alibi passim.

E O D E M D I E,

AD HÆC VERBA:

In propria venit, & sui eum non receperunt. Ioan. I.

VERITAS PRACTICA.

Non minus modò, quàm olim, Christus in propria venit, nec sui magis Eum recipiunt.

RATIO præsupponit tamquam certum ex fide, primam Veritatis partem, cum Ille ipse qui nasci voluit de Virgine, pannis inuolui, & in præsepio collocari, ex certa fide credatur esse in sanctissimo Sacramento, sub speciebus panis, & per Communionem venire in Christianos, qui propterea adhuc magis propriè & præcipuè videntur esse Christi Domini. Sed quomodo sui Eum non recipiant, cum per istos maxime intelligamus Communicantes, magis obscurum videtur. Sic porro declaratur.

NON recipiunt Christum, quo sensu dicitur à suis non receptus, qui

In propria venit, & sui eum non receperunt.


115

non ita recipiunt doctrinam, quam in praesepi docet, ut se illi conforment per Gratiā, quae his propterea confertur diebus.

Sed qui magis propriè Christi sunt, nempe Communicantes, non ita recipiunt doctrinam Christi, ut se illi conforment.

Ergo qui Christi magis propriè sunt, Christum non recipiunt. Ergo non minus modò quàm olim Christus in propria venit, nec sui magis eum recipiunt. Quod cum sit valde damnosum, idcirco ante ipsa Christi Iesu Natalitia, perutile foret praeavere.

I. P V N C T V M.

 **V**OCVMQVE loci venisset Christus, venisset certè in propria, cum esset Dominus cœli & terræ. Quando tamen venit in Iudæam, quando in ciuitate Nazareth est conceptus, atque in oppido Bethleem natus, tunc singulari modo dicitur venisse in propria, quia pars illa terræ singulari præ cæteris modo, pars erat propria Christi, propria populi quem sibi ex omnibus prælegit, & eorum propria, vnde carnem sumere voluit. Ideoque Pilatus illi dixit, Gens tua & pontifices tradiderunt te mihi.

Quando vero dicitur, *Et sui eum non receperunt*, non agitur de receptione corporali, non agitur de repulsa quam passus est in Bethleem, cum ibi non esset locus in diuersorio, non de fuga in Ægyptum, non de eiectione à Nazareth, post primam illic habitam concionem, non de negato introitu Samariæ, non postremò de quauis conspiratione Ierosolymis, contra ipsum inita: sed de infidelitate eorum qui quod docebat, non receperunt, non crediderunt, non approbarunt, at contra potius obstiterunt. Vnde in consequenti textu cum dicitur, *Quotquot receperunt Eum, dedit eis potestatem Filios Dei fieri*; Id est, quotquot ei crediderunt fide perfecta, seque eius obsequio dediderunt. Quo in sensu dicebat sanctus Ioannes in epistolis: *Omnis qui recedit & non permanet in doctrina Christi, Deum non habet*, Quasi diceret, licet quis Christum reciperet hospitio, nili tamen Christo crederet, & profiteretur quod docuit, non illum recipere dicendus esset, quo propriè modo à nobis vult recipi.

2. Ioan. I.

L. de san-
cta Virgi-
nis. c. 2.

Ioan. 12.

Sic sanctus Augustinus dicebat de Beatissima Virgine, *Quod beatior fuisset, percipiendo fidem Christi, quam concipiendo carnem Christi; Nec materna propinquitas illi profuisset, nisi felicius Christum corde quam carne gestasset.* Idemque explicans verba Christi; *Si quis mihi ministraverit, honorificabit eum Pater meus. Si hoc putauerimus, inquit, esse Christo ministrare, ea quæ sunt corpori necessaria præparare, fecerunt hoc illi qui potuerunt cum in corpore habere præsentem, sicut Martha & Maria; sed eo modo, Christo etiam Judas perditus ministravit.* Et post pauca, *Vt quid ergo alibi quarimus quid sit ministrare Christo, & non potius in istis ipsis verbis agnoscimus? cum enim dixit si quis mihi ministrat, me sequatur, hoc intelligi voluit, ac si diceret: si quis me non sequitur, non mihi ministrat.*

Serm. 3. de
Aduentu.

Serm. 5 de
Aduentu.

Ex quibus sic declaratis, patet euidenter quod habet prima propositio, iam illos non recipere Christum nascentem, qui non ita recipiunt doctrinam illam quam in præsepi nascens professus est, ut se illi totos conforment; Non quod non recipiant per sacram Communionem verum Christi corpus, quod & peccatores quoque communicantes recipiunt, sed quod ipsum recipiendo, non recipiant Gratiā hanc singularem, quæ his particulatim diebus conceditur, ad profitendam illam Christi doctrinam: vel si receperint talem gratiam, non magis illi collaborent, nec inde sanctius viuant, quam si non recepissent. Sic aptè sanctus Bernardus triplicem distinguit Aduentum Domini, nempe ad homines, in homines, & contra homines, ac primus quidem & tertius sat, inquit, noti sunt, & manifesti. *De secundo qui spiritualis & occultus est, verba sunt sancti Bernardi, audi ipsum dicentem, si quis diligit me, sermonem meum seruabit, & pater meus diliget eum, & ad eum veniemus & mansionem apud eum faciemus.* Et alibi de hoc rursus triplici Aduentu agens, Idem sanctus Abbas: *In priore, inquit, in terris visus est, & cum hominibus conuersatus, quando sicut ipse testatur, & viderunt & oderunt: In posteriore, videbit omnis caro salutare Dei nostri, & videbunt in quem transfixerunt. Medius occultus est, in quo soli eum in se ipsis vident electi, & salua sunt animæ eorum. In primo venit in carne, & infirmitate; In hoc medio, in spiritu & virtute; In ultimo, in gloria & maiestate. Aduentus iste medius via quædam est per quam a primo veniatur ad ultimum. Et nonnullis interiectis: Hoc facit hic Aduentus ut sicut portamus imaginem terreni, sic portemus & imaginem cælestis. Sicut fuit vetus Adam effusus per*

totum hominem, & totum occupauit; ita modo totum obtineat Christus qui totum creauit, totum redemit, totum & glorificabit. Quasi diceret, totum id efficiat in animis nostris quod ipse in præsepi docuit, sic nos intus & extrà totos sibi conformet, vt quemadmodum orat Ecclesia; In illius inueniamur forma, in quo est nostra substantia. Et hoc modo resplendeat in opere, quod per fidem fulget in mente. Per eum denique quem similem nobis foris agnouimus, intus reformari mereamur.

Hoc est quod tam magnificè prædicabat Apostolus, sicut iam *rit. 2.* ante dictum est; *Apparuit gratia Dei Saluatoris nostri omnibus hominibus, erudiens nos, vt abnegantes impietatem & secularia desideria sobriè & iustè, & pie viuamus in hoc saculo.* Apparuit nêpe nobis in primo Aduentu gratia nos extrà erudiens: in secundo vero nobis offertur ista gratia nos intus formans & conformans doctrinæ nascentis Iesu, quam doctrinam propterea qui non recipit, non recipit Iesum, non recipit venientem hoc secundo Aduentu, quo se modo nobis offert. *Ego veni in nomine Patris mei, & non accipitis me: si alius venerit in nomine suo, illum accipietis.* *Ioan. 5.* O humani cordis inhumanam vecordiam!

II. P V N C T V M.

S*ED qui magis propriè Christi sunt, nempe Communicantes, non ita recipiunt doctrinam Christi, vt se illi conforment.*

Sunt ex illis certe Nonnulli qui proficiant, renascentes cum Infante *Ies V,* & de nouo induentes nouum illum hominem, qui se- *Eph. 4.* cundum Deum creatus est in iustitia, & sanctitate veritatis.

At vero quàm sunt illi pauci sic renascentes & renouati! Quàm multi contrà suo semper in veteri remanentes homine, non minus terrena sapiunt & sensibilia quam si de Christi præsepio nihil audiuiſſent? Quis facularium magis amans paupertatis, ex prædicata nobis à Christo paupertate? Quis magis contemptor gloriæ vel voluptatis, ex commendata nobis in stabulo Continentia, humilitate, patientia, cæterisque virtutibus? Quis non videat quàm sit æque modo deſcendum quod suo deplorabat tempore sanctus Bernardus: *Sine deuotione & affectione dies istos arida* *Serm. 3. in* *Aduentu.* *quadam consuetudine obseruari! Et quod damnabilius est, inquit, ipsa quoque inestimabilis huius dignationis memoria datur in occasionem*

carnis, ut videas eos (scilicet seculares) tanta sollicitudine diebus istis, vestium gloriam, ciborum parare delicias, ac si hac huiusmodi quarat in Natiuitate sua Christus, & ibi suscipiatur dignius, ut hac accuratius exhibeantur. Sed ipsum audi dicentem, superbo oculo & insatiabili corde cum hoc non edebam. Quid tanta ambitione vestes parat in natale meum? detestor ego superbiam, non amplector. Quid tanta sollicitudine ciborum copias reponis in tempus illud? damno ego carnis delicias, non accepto. Celebrans ergo Aduentum meum, labiis me honoras: sed cor tuum longe est à me, non me colis, sed Deus tuus venter est, & gloria in confusione tibi.

Quæ sancti Patris verba quantis eorum conueniunt qui se esse Christi profitentur: tanti profecto sunt qui Doctrinam eius non recipiunt, cum hæc liberior viuendi licentia tam longè sit à doctrina Christi nascentis, quàm coelum à terra, quàm lux à tenebris, & quàm Virtus à vitio.

III. PUNCTVM.

ERGÓ qui Christi magis propriè sunt, Christum non recipiunt. Ergo non minùs modo quàm olim Christus in propria venit, nec sui eum magis recipiunt. Venit enim modo per nouam Gratiam quam ipse in Sacramento, vel extrà suis offert, ut affectu simul & effectù, pro sua quique vocatione, se conforment doctrinæ quam è præsepi docet, circa concupiscentias diuitiarum, honorum, & voluptatum: tam pauci vero sunt ex iis etiam qui Sacramenta frequentant & Christianam colere pietatem videntur, tam paucirarique sunt, inquam, qui hanc eius gratiam & practicam doctrinam recipiant, ut vix vlli de illa suscipienda & in mores suos inducenda cogitent; Quid sequitur nisi quod sui eum non recipiunt: cum à popularibus suis non dicatur aliter non receptus, quàm quod docenti non crediderint, nec se illius præceptis vel consiliis conformarint? *Loquor vobis, & non creditis: opera quæ ego facio in nomine Patris mei, hæc testimonium perhibent de me.*

Ioan. 10.

Matth. 10.

Luce. 10.

Et certe cum sæpe suis Christus quos mittebat prædicatum diceret, quod iis à quibus non reciperentur, durius foret quàm Sodomis: an putas diceret de receptione personæ, vel doctrinæ? Sicut enim Legatus tunc verè recipi dicitur aut remitti, quando quod proponit, approbatur vel improbatur, sic plane Christus

& qui pro Christo legatione funguntur, tunc recipiuntur aut repelluntur, quando quod proponunt ad salutem sic admittitur, vt vel effectū suo donetur vel priuetur. Vnde ipse Dominus: *Qui* ^{Ioan. 12.} *spernit me, & non accipit verba mea, habet qui iudicet eum: sermo quem loquutus sum, ille iudicabit eum.* Quali diceret, hoc est me spernere, non accipere verba mea: sicut autem in sermone meo fui contemptus, sic in eodem honorificabor, quando ille ipse sermo qui fuit spernetus, spernentem iudicabit. O quā vere dictum de Domino, *Quod percutiet terram, id est terrestres animas, is. ii. virgā oris sui.* O deplorandas animas quæ cum possent sui virga Pastoris tutē regi & conseruari, malunt sui virgā Iudicis percuti & condemnari!



FERIA SECVNDA.

DE DILIGENTIA, SEV DEVOTIONE

QVAE EST OPPOSITA VITIO ACEDIAE.

Exurgens Maria in diebus illis, abiit in montana, cum festinatione, in ciuitatem Iuda. Luc. i.

VERITAS PRACTICA.

Quidquid offerendum Deo sciet vera Deuotio, differre nesciet.

SENSVS EST, Quod, vt ait sanctus Ambrosius: Nescit tarda molimina Spiritus sancti Gratia; Ita neque vera Deuotio.

RATIO EST, Quia idcirco Spiritus sancti Gratia nescit tarditatem, quòd nos impellat ad exequendam diuinam Voluntatem quæ est promptè exequenda.

Sed Vera Deuotio ad illam ipsam diuinam Voluntatem adimplen-

dam, cum eadem Spiritus sancti Gratia, nos impellit.
Ergo sicut nescit tarda molimina Spiritus sancti Gratia, ita neque
Vera Deuotio; aut certe non est vera, quod est valde cauendum.

I. PUNCTVM.

CONTEMPLARE sanctissimam Virginem, sic affixam contemplationi mysterij Verbi Incarnati, vt tamen non obliuiscatur verborum Angeli, quæ de cognata Elizabeth dixerat: simulque sentiens se ad eam visitandam à Spiritu sancto commoueri, non est cunctata in diem alteram, nec in horam: sed ipso pene momento quo discessit ab ea Angelus, exurgens abiit, non segniter, non lento gradu; sed *cum festinatione*, quò eam impellebat Gratia & diuinæ voluntatis adimplendæ desiderium.

L. 2. in
Ips.

2. P. n. 19.

Dent 23.

Eccles. 9.

Eccles. 31.

Matth. 5.

Pf. 80.

Hinc autem S. Ambrosius celeberrimum illud Effatum pronunciauit, *Nescit tarda molimina Spiritus sancti gratia*, quod de vera Deuotione perinde dicitur, quæ est opposita vitio Acediæ, & quæ plurimum potest ad præparandam viam Domini. Ratio est plana & facilis, Quia vna & eadem est plane ratio, cur Gratia & Deuotio tarditatem nesciant. Cur enim Gratia, nisi quod ad diuinam Voluntatem nos impellat quæ non tarde & cunctanter, sed prompte, velociter & statim vt cognoscitur, est adimplenda? Sic Rex ille piissimus Iosaphat commendans suis diuina quædam opera, *Sit timor Domini vobiscum*, inquit, & *cum diligentia, cuncta facite, non est enim apud Dominum nostrum iniquitas*, Quasi diceret, quod à Domino præcipitur, tam sanctum & iustum est, vt sicut non est dubitandum, quò minus fiat, ita nec differendum quin statim fiat; Cur enim differas exequi, quod vult Deus, cum hoc ipsum velit ne differas? Audi vt loquitur; *Si moratus fueris, reputabitur tibi in peccatum. Quodcumque facere potest manus tua, instanter operare. In omnibus operibus tuis esto velox. Esto consentiens aduersario tuo citò dum es in via cum eo.* Iste aduersarius non solum est sermo, sed Ductus diuinus seu diuina voluntas quæ te ad salutem & perfectionem contra naturalem inclinationem ducit: & cui est cito consentiendum, ne te tibi deserat & male pereas; *Ibunt*, inquit, *in adinventionibus suis qui Deum sequi noluerunt*? At quònam ibunt, sine Deo?

II. PVN-

II. PUNCTVM.

SED vera Deuotio ad illam ipsam Diuinam Voluntatem, cum eadem Spiritus sancti Gratia, nos impellit.

Sic enim expresse à S. Thoma definitur, *specialis quidam actus voluntatis prompta & parata ad facienda quacumque ad Dei seruitium & famulatum spectant.* ^{2.2. q. 82. a. 1.} Sic ab Eodem dicitur Meditatio Deuotionis causa, *In quantum scilicet homo per meditationem concipit quod se tradat diuino obsequio, ad quod quidem inducit duplex consideratio: Vna quidem quæ est ex parte diuina bonitatis & beneficiorum ipsius secundum illud Psalmi: Mihi adherere Deo bonum est; & hac consideratio excitat Dilectionem quæ est proxima Deuotionis causa.* ^{Ps. 72.} Alia vero est ex parte hominis considerantis suos defectus ex quibus indiget ut Deo innitatur, &c. Et hæc consideratio excludit presumptionem per quam aliquis impeditur ne se Deo subijciat. Et articulo sequenti docet lætitiā & tristitiā esse deuotionis effectus, *In quantum se homo sentit subiectum, vel non subiectum Deo.* ^{Ibid. a. 4.}

Sic S. Ambrosius de Abrahamo scribens, *Consideremus, inquit, cuiusmodi fuerit in eo Viri Deuotio. Ea enim virtus ordine prima est, quæ est fundamentum cæterarum, meritoque hanc ab eo primam exegit Deus dicens, Exi de terra tua, & de cognatione tua, & de domo Patris tui.* ^{L. I. de Abrah. Genes. 12.}

Sed quid ista spectant ad virtutem Deuotionis, nisi quod Deuotio sic spectat diuinam Voluntatem, ut qui impedimenta abijciunt Diuinæ Voluntatis adimplendæ, illi præ cæteris Deuoti habeantur? Vnde ille sanctus Doctor pro affectu hîc concitando aptè concludit; *Ergo exire de conuersatione terrena, & à secularibus & superioris vitæ moribus atque actibus debemus, ut non solum loca sed etiam nosmetipsos mutemus. Si cupimus adherere Christo, deseramus corruptibilia. Sunt autem corruptibilia in nobis, Caro, delectatio, &c. O quanam illa sunt, quæ sunt opposita Christo, vel diuinæ voluntati, ut nos retardent!*

III. PUNCTVM.

SICVT ergo nescit tardam olimina Spiritus sancti Gratia, sic neque vera Deuotio; Cum non minus Deuotio quam Gratia respi-

Q

ciat obsequium Dei seu Voluntatem Diuinam, propter quam perfectius adimplendam excutienda est omnis tarditas, & maturatur quæuis diligentia est adhibenda. *Mente promptissima atque deuota.* Sic vtrumque simul coniungit Scriptura. Et S. Thomas docens Deuotionem esse actum Religionis, non aliter probat quam quod *ad eandem*, inquit, *virtutem pertinet velle facere aliquid, & promptam Voluntatem habere ad illud faciendum, quia vtriusque actus est idem obiectum.* Manifestum est autem quod operari ea quæ pertinent ad diuinum cultum seu famulatum pertinet proprie ad Religionem, unde etiam ad eam pertinet **HABERE VOLUNTATEM PROMPTAM** ad huiusmodi exequenda, quod est esse deuotum.

Quid clarius? quid expressius ad inseparabilem Deuotionis & promptitudinis coniunctionem indicandam? Et certe si vna ex conditionibus obedientiæ quæ homini propter Deum redditur, est promptitudo: cur non eadem promptitudo requiratur, quando ipsi Deo est seruiendum & obediendum? Sic aptè S. Bernardus, *Velociter currit sermo Dei, & velocem desiderat habere sequentem; vides cum quanta velocitate currit ille qui dicit viam mandatorum tuorum cucurri. Fidelis obediens nescit moras, fugit crastinum, ignorat tarditatem, præripit præcipientem, parat oculos visui, aures auditui, linguam voci, manus operi, itineri pedes, totum se colligit ut Imperantis colligat Voluntatem. Vide Dominum velociter præcipientem, & hominem festinanter obedientem, Zachæe, inquit, festinans descende, quia hodie in domo tua oportet me manere; & festinanter descendit, & excepit eum gaudens. Nonne legisti quod filius Israël præcipitur ut agnum comedant festinanter? quia verba illa quæ per legem dedit, quæ per semetipsum præscens exhibuit, quæ per Ecclesiæ præpositos tradenda reliquit, veloci sunt obedientia consummanda.*

Ex quibus Sancti Patris verbis facilius intelligetur Sapiens dum à nobis quærit, *Quid adhuc retardatis? & quid dicitis in his?* Spiritus ille est Sanctus qui nescit tarda molimina. Ille Ipse est qui per Sapientem quærit à te cur ita retardes & langueas in tuis spiritualibus exercitiis, cum ad maiorem diligentiam toties & tam vehementer exciteris? Responde si quid habes, & audi num approbet quod respondes. Audi quod Idem monet: *De negligentia tua purga te cum paucis.* Id est, paucorum est se de hoc purgare vitio, adeo sunt multi negligentes & omnes inexcusabiles. Vel

sic: Sic te purga, vt te accusas potius quàm excuses. Vel denique, si non potes omnia, si non potes multa præstare diligentius, offer saltem pauca quæ possis: vt de te possit dici: *Quod habuit hic, Marci 14. fecit.* Nihil æquè purgat de negligentia.

Vide in Indicibus verbo *Deuotio*, & præsertim in 4. parte.



FERIA TERTIA. DE CHARITATE QUÆ EST OPPO- SITA VITIO INVIDIAE.

*Et intrauit domum Zacharia, & salutauit Eliza-
beth. Luc. 1.*

VERITAS PRACTICA.


Charitas alienis bonis gaudet, vt propriis.

*RATIO EST, Quia Charitas sic vno Dei bono gaudet, vt vbi-
cunque Dei bonum reperiatur, eo Charitas gaudeat.*

*Sed in alienis bonis, æquè ac in nostris propriis reperiri potest bo-
nam Dei.*

*Ergo & illis Charitas æquè gaudet. Quod tamen cum sit ra-
rum, sic rara est Charitas.*

I. PUNCTVM.

 **Q**UOD vno verbo dicitur Maria Virgo salutasse Elizabeth, sic glossa interlinearis interpretatur, *Quasi congratulans de dono quod eam accepisse didicerat.* Congaudebat videlicet Virgo Mater sterili Matri, quod sicut in grauidata Virgine, sic in sterili fœcundata, Deus magnificaret potentiam & misericordiam suam.

O quæ tùm Virginis verba! quæ vox salutationis! qui affe-

Etus! quæ Charitas! Expende & agnosce illam esse Charitatem,
 1. Cor. 13. *Quæ alienis bonis gaudet vt propriis: illam esse Charitatem, quæ,
 vt scribit Apostolus, Benigna est, non emulatur, non agit perpe-
 ram, non inflatur, non est ambitiosa, non querit quæ sua sunt, non gau-
 det super iniquitate, congaudet autem veritati.* Illam denique esse
 Ibid. 12. Charitatem, quæ ad preparandam Domino viam, tantum valet
 vt dicatur Excellentior via; *Adhuc, inquit, Excellentiorem viam
 vobis demonstro.*

Sicut autem quæ excellentiora sunt, sunt etiam rariora, sic
 prorsus ista Charitas. Pauci omnino sunt, & valde rari, qui sic
 alienis proximorum bonis gaudeant, vt propriis. Quamobrem
 eo diligentius expendenda est Veritas, quæ de hac Charitate
 proponitur, vt videas quam longe ab ea sis.

Ac primo illud quod præmittitur, Charitatem sic vno Dei
 bono gaudere, vt vbiunque tale Dei bonum reperiatur, eo Cha-
 ritas gaudeat, facile est demonstrare. Nam cum gaudium sit
 amoris certa proprietas, qualis est amor, tale necesse est vt sit
 Rom. 5. gaudium ex illo proueniens: Amor autem Dei qui est *Charitas
 diffusa in cordibus nostris*, & de qua hic loquimur, sic vnum Dei
 bonum amat in omnibus, vt vbiunque sit illud bonum, illud
 amet. Quemadmodum enim nullum amat creatum bonum, nisi
 propter Deum, quem in illo bono videt; sic omne bonum amat
 2. Cor. 12. in quo Deum videt. *Quid enim mihi est in cælo? & à te quid volui
 super terrâ? Quasi diceret; Nihil est in cælo neque in terra quod
 amem nisi propter Deum; Et nihil est amabile in cælo & in ter-
 ra, quod non amem propter ipsum. Ille est vnus quem amo in
 omnibus, & omnia in eo amo. Deus cordis mei & pars mea Deus in
 eternum.* Nullum præter Deum, ait S. Augustinus. *Hoc amat, hoc
 diligit: si aliud dilexerit, non erit castus amor.* Sic ergo consequen-
 ter de gaudio est sentiendum, quod ex hac Charitate procedit,
 cum sit eiusdem prorsus naturæ & conditionis; De nullo bono
 excitatur nisi propter Deum qui in eo bono reperitur: & de om-
 ni bono vbi Deus reperitur, omnino excitatur. *Ego autem in Do-
 mino gaudebo, & exultabo in Deo Iesum eo.*

II. PUNCTVM.

SED in alienis proximorum bonis, a que reperiri potest illud bonum
 Dei, atque in nostris propriis.

Cur enim si bona sunt, non sint æque à Deo, & ad Deum, atque nostra? Estne aliquod bonum quod non sit à Deo, aut quod non sit propter ipsum? Nonne vniuersim de omni bono singulis dato scribitur: *Omne datum optimum, & omne donum perfectum, desursum est; descendens à Patre luminum? Et omnem, inquit, qui in-* Iac. 1.
uocat nomen meum, in gloriam meam creauit eum, formauit eum, & feci- Is. 43.
eum; Quali diceret, ne fortè dubites, sic repetò & inculco. Fatea-
mur itaque, quod prudentissima Iudith, Tu enim fecisti priora, & Iudith 9.
illa post illa cogitasti, & hoc factum est quod Ipse voluisti. Et cum
beatis Cœlitibus in Apocalypsi; Dignus es Domine Deus noster Apoc. 4.
accipere gloriam, & honorem, & virtutem: quia tu creasti omnia, &
propter voluntatem tuam erant, & creata sunt.

III. PUNCTVM.

SIC ergo Charitas alienis bonis gaudet vt propriis. Cum enim nec propriis gaudeat nisi propter Deum, quem in illis videt; cur non gauderet alienis, vbi æque Deum videre potest: aut quid est quamobrem Deum, ibi non æque videat? Nihil plane est nisi Inuidia quæ est opposita illi Charitati, & quam inde agnosces pessimum esse vitium, vt quod opponatur directe bono, & bono Dei, ac maximæ omnium Virtuti quæ est Charitas. Hinc apte Sapiens, *Nequius oculo quid creatum est?* Et Christus Dominus, Eccl. 31.
An oculus tuus nequam est, quia Ego bonus sum? Mat. 20. Responde inuide, aut desine inuidere. Si vetamur comedere cum homine Inuido, Prou. 23.
quid expectas commercij, & communicationis cum Christo?

Neque vero Inuidus tam nocet aliis quam sibi, qui si alieno gauderet bono, suum posset facere; Et illo se miser fructu priuat, atque inuidiæ pœnas accersit grauissimas. Sic qui sibi inuidet, vt ait Sapiens, *Nihil est illo nequius, & hac redditio est malitia* Ecclesi. 14.
illius. Hic in teipsum inquire diligenter, & ad emendationem, illud etiam atque etiam S. Augustini reuolue: *Tolle inuidiam, &* In Ioan.
tuum est quod habeo; Linor separat, Charitas jungit, ipsam habeto
& cuncta habebis.



FERIA QVARTA.
DE HVMILITATE QVÆ EST
OPPOSITA SVPERBIAE.

*Et ait Maria : Magnificat anima mea Dominum.
Et exultauit Spiritus meus in Deo salutari meo.
Luc. i.*

VERITAS PRACTICA.

Quantò se Humilis minorem facit, tanto magis magnificat Deum.

RATIO EST, Quia tanto magis magnificatur Dominus, quanto eius diuinæ perfectiones manifestantur.

Sed quantò se Humilis minorem facit, tantò magis diuinæ perfectiones manifestantur.

Ergo & tantò magis sic magnificat Dominum. Quod certe est motuum potentissimum ad frequens humilitatis exercitium.

I. PVNCTVM.

Et factum est ut audiuit Salutationem Mariæ Elizabeth, exultauit infans in utero eius, & repleta est Spiritu sancto Elizabeth, & exclamauit voce magna, & dixit, Benedicta tu inter mulieres, & benedictus fructus ventris tui. Et vnde hoc mihi, ut veniat Mater Domini mei ad me? Ecce enim ut facta est vox salutationis tuæ in auribus meis, exultauit in gaudio infans in utero meo, & beata quæ credidisti, quoniam perficientur ea quæ dicta sunt tibi à Domino. Et ait Maria: Magnificat anima mea Dominum, &c.

Perpendi singula, vel quædam ex eis pro affectu possent; Tum

verò illud præcipue quod cum Beatissima Virgo sic se audiret laudari, tanto magis se deprimit; & quanto etiam se minorem facit, tanto magis magnificat Dominum. O verum humilitatis exemplar! Æmulare; & ad Veritatis propositæ declarationem, hoc primum agnosce. Quod tantò magis magnificatur Dominus, quanto eius diuinæ perfectiones manifestantur. Nam sicut aliter non potest à nobis magnificari, quam manifestando eius perfectiones, quid enim Ei conferre possimus quod non habet? sic cum illæ innotescunt quæ ante latebant, dicitur glorificari & magnificari; quia inde scilicet Eius Gloria & Magnitudo cognoscitur, propter quam ab hominibus laudatur & benedicitur.

Sic Moyses transito mari rubro, *Cantemus, inquit, Domino, gloriose enim magnificatus est, equum & ascensorem deiecit in mare. Iste Deus meus & glorificabo eum. Dexterâ tuâ Domine magnificata est in fortitudine.* Id est, Fortitudo & Potentia tua nunc maxime manifestata sunt. Sic Dauid exardebat ad has diuinas perfectiones manifestandas, cum omnes inuitaret, *Magnificate Dominum mecum, & exaltemus nomen eius in idipsum.* Sic Apostolus, prædicando Christum; *In nullo, inquit, confundar, sed in omni fiducia, sicut semper, & nunc, Magnificabitur Christus in corpore meo, siue per vitam, siue per mortem.* Sic denique sanctissima Virgo parens magnificat Dominum, in suo illo Cantico, cum eius Potentiam, Misericordiam, Fidelitatem, & alias decantat perfectiones, quas tu ipse vsque ad versum quintum, reuoluendo venerare, & adora.

II. PUNCTVM.

SED quanto se Humilis minorem facit, tanto magis diuinæ perfectiones manifestantur.

Nam vt omittam dicere quod est commune in hac materia, humilem corde, quidquid habet, & quidquid est, in vnum Deum referre, vnde tandem Diuina Magnitudo & Bonitas agnoscantur, vt sentiebat Apostolus dicens, *Non ego, sed Gratia Dei mecum:* Tres alij præterea occurrunt modi, quibus propositio directe declaratur. Primus est, quod cum Magnitudinis & Bonitatis diuinæ sit, magnum & sanctum facere hominem, qui nihil ex se est nisi peccator: profecto quo magis homo se nihili facit, & quo magis se peccatorem atque ex se longe à sanctitate remotum co-

gnosceret, eo magis illam Dei Bonitatem extolleret. Sic prorsus eò maior Dei potentia dignoscitur, quando minus potentem assumit ad aliquod ingens opus efficiendum. Vnde Idem Apostolus, *1. Tim. 1.* postquam dixit, *Qui prius blasphemus fui, & persecutor, & contumeliosus, addit, sed ideo misericordiam consecutus sum, ut in me primo ostenderet Iesus Christus omnem patientiam.*

Secundo, cum ita naturale sit homini seipsum amare, & amore sui excellentiam & humanas laudes appetere, quando humilis contra hanc naturalem inclinationem se deprimat, & se infra omnes potius abijcit, quàm vel vni se præferat; certe vim gratiæ & virtutem Christi plurimum manifestat, à quo habet ut sic se humiliet, & sic se ipso maior fiat, cum se minorem facit. *Et hoc Phil. 2.* non ex vobis, inquit Apostolus, *Dei enim donum est, non ex operibus, ut ne quis gloriatur.*

Denique, cum ob Dei cultum & venerationem, homo se humiliet & deprimat, non potest sic non magnopere manifestari quantus sit Deus, ad quem colendum homo alioquin superbus, & arrogans sese demittat, & se potius patiatur contemni quàm laudari, si ex sui contemptu videat maiorem Dei gloriam. Sic Rex humilis Dauid: *2. Reg. 6.* Ante Dominum qui elegit me, & ludam, & vilior fiam, plusquam factus sum, & ero humilis in oculis meis. Sic forte dicet. *Ioan. 13.* Sed faciendo dicendum est sicut ille dicendo faciebat. *Si hæc scitis, beati eritis, si feceritis ea.*

III. PUNCTVM.

Eccl. 3. **H**INC ergo patet non modo Veritas, Quod quando humilis se minorem fecerit, tanto magis magnificabit Dominum, vnde aptissime Sapiens, Quoniam magna potentia Dei solius, & ab humilibus honoratur: Sed & veritatis in praxim aduocandæ, motiuum efficax inde elicitur. Quid enim magnificentius, quàm posse magnificare Deum? Quid indignius quàm id nolle cum possis, & idcirco nolle, ut te ipsum potius magnifices quàm Deum? Tu quis es? quem te ipsum facis? aude sine tibi aliquid arrogare ad commendationem & magnificentiam tuam? Quando tuum esset aliquid, nonne libenter Deo consecratum velles ad eius gloriam? quanto magis quod Dei est, Deo debes relinquere? *2. Par. 16.* Tua est Domine magnificencia, & potestas, & gloria, dicunt Scripturæ. Tu vero

vero vis ex illis esse qui dixerunt, *Linguam nostram magnificabimus, Labia nostra à nobis sunt, Quis noſter Dominus est? Iudicare* Ps. 11. *Domine, Iudicare pupillo & humili, ut non apponat ultra magnificare se homo super terram.* Id est, profer Domine Iudicium quod facis contra superbos in fauorem humilium, quo audito superbi se forte continebunt. Nonne times hoc Iudicium? ocyus serius proferetur. *Ecce ego ad te superbe, dicit Dominus, quia venit dies* Ier. 50. *tuus, tempus visitationis tuæ. Et cadet superbus, & corruet, & non erit qui suscitet eum.* Satiùs est præoccupare faciem eius.



FERIA QVINTA.
DE VIRTUTE QVÆ EST OPPO-
SITA VITIO AVARITIÆ.

*Deposuit potentes de sede: & exaltauit humiles.
Esurientes impleuit bonis, & Diuites dimisit
inanes.* Luc. I.

VERITAS PRACTICA.

Omnis copia quæ Deus non est, egestas censenda est.

RATIO EST, *Quia nonnisi egestas cenſeri debet illa copia quæ
nihil prodest viro copioso, in summa eius necessitate.*

Sed talis est copia quæ Deus non est.

Ergo egestas censenda est; Ac proinde nihil diuitiæ sine Deo.

I. PUNCTVM.

PERGIT magnificare Dominum Beatissima Virgo, & in eius magnificentia commendationem adducit quod potētiores quosque humiliet, eosque præcipue qui suis præfidentes diuitijs, se minus voluntariè Deo subiiciunt, quali mi-

Iacobi 1.
Is. 40.
Bar. 3.

nus ab illo dependeant: sed miseri tandem eo inopia & calamitatis rediguntur, ut cum abundatores se putabunt, egentiores se sentiant. Quod & passim Scriptura commemorat, *Quoniam diues sicut flos fœni transibit, exortus est enim sol cum ardore, & arefecit fœnum, & flos eius decidit & decor vultus eius deperit, ita & diues in itineribus suis marcescet.*

Hinc illa est celeberrima Veritas, ex S. Augustino deprompta, *Quod omnis copia quæ Deus non est, egestas est.* Id est, omnia terrena, temporalia, & humana, si tantum in se considerentur, nec ad Deum, & ad salutem æternam referantur, non sunt veræ diuitiæ, sed mera inopia, miseria & egestas; Vnde ad Veritatis proximam, sequitur, sic auertendum esse animum ab illis bonis terrenis, ut in solis spiritualibus & æternis acquiescamus. Sic autem Veritas declaratur.

Quæcunque tandem sit rerum humanarum copia & abundantia, si possessori suo nihil prodest in summa ipsius necessitate, profecto non nisi egestas & inopia censenda est; ut si quis abundet rebus quæ nullum prorsus habent usum in ea mundi parte ubi vitam agit; Nonne hæc rerum abundantia tunc erit illi inutilis, & mera inopia? Sic alius abundet prædijs, nec vllum inde prouentum, nullam pecuniam, nec vllum denique reditum recipiat, quo se sustentare possit; nonne illa prædiorum copia, egestas est? Abundet alius pecuniis, nec panem aut vllum alimentum sibi comparare possit, ut accidit in obsessa ciuitate; nonne illam pecuniarum copiam, tunc meram inopiam & egestatem dixeris? Abundet denique panibus & alimentis, morbo autem vel captiuitate ita detineatur, ut cibo uti nullo queat, sicque fame intereat; nonne tunc inopiam reputabis quamlibet copiam? Quid mihi diuitiæ, inquit poeta, si non conceditur usus? sic noster Sapiens, *Quid prodest stulto habere diuitias, cum sapientiam emere non possit?* Quia scilicet ad hunc effectum nihil profunt diuitiæ, vel potius quasi diceret, nihil profunt stulto diuitiæ, cum iis uti non possit stultus, nec iis se stultitia liberare.

Prov. 17.

2. Cor. 15.

Patet itaque quàm vera sit vniuersim prima propositio; Atque in istis sensibilibus, satis ex se notis, utile est aliquando immorari, ut inde ad interna & æterna quæ sunt minus ex se cognita, facilius deueniamus. Sic nos sæpe Deus instruit, *Ut non prius quod spiritale est; sed quod animale, deinde quod spiritale, ut ait Apo-*

stolus. Vnde & Dominus: *Adhuc & vos sine intellectu estis?* quando scilicet ex illis cognitis, ad incognita non pertranfitur. Nunquid hoc tibi posset obijcere? Matth. 15.

II. PUNCTVM.

SED talis est copia qua Deus non est; Id est, quicquid sit quod habeas, nisi habeas illam diuinam Gratiam, per quam Deus nobiscum habitat, & nos cum illo; per quam *Filij Dei sumus*, & *Rom. 8.* *heredes eius, coheredes autem Christi*; Nisi habeas virtutes & opera quæ sunt necessaria ad Gratiam illam conseruandam, illamque hæreditatem aliquando consequendam: Nihil habes quod tibi prosit in tua summa necessitate. Nam hæc est tua summa necessitas, *Saluum & beatum esse*, cui necessitati nihil profunt diuitiæ, nisi fuerint fructuose propter Deum impensæ; nihil profunt dignitates, nihil doctrina, nihil artes, nihil authoritas, nihil denique aliud quam quod spiritale est & diuinum. *Quid nobis*, inquit, *profuit superbia?* aut *diuitiarum iactantia* quid contulit nobis? transierunt illa tanquam umbra, & tanquam nuncius percurrentis, & tanquam navis quæ pertransit fluctuantem aquam, aut tanquam avis quæ transuolat in aëre, aut tanquam sagitta emissa in locum destinatum, diuisus aer in se continuo reclusus est, ut ignoretur transitus illius: sic & nos nati continuo desuimus esse, & virtutis quidem nullum signum valuimus ostendere: in malignitate autem nostra consumpti sumus. Talia dixerunt in inferno hi qui peccauerunt, quoniam spes impij tanquam lanugo est quæ à vento tollitur, & tanquam spuma gracilis quæ à procella dispergitur, & tanquam fumus qui à vento diffusus est, & tanquam memoria hospitis vnus diei pratercuntis. Iusti autem in perpetuum viuunt, & apud Dominum est merces eorum.

Vtinam ex his sapires & intelligeres, ac nouissima prouideres.

Deut. 32.

III. PUNCTVM.

OMNIS igitur copia qua Deus non est, egestas censenda est; Quandoquidem copioso illi viro nihil prodest in summa sua necessitate; vnde & Iob aptissime; *Diues cum dormierit, nihil* Iob. 27. *secum auferet; aperiet oculos suos & nihil inueniet; apprehendet eum quasi aqua inopia; nocte opprimet eum tempestas.* Et Sapiens de eo-

Eccl. 4. dem diuite seu de quouis affixo rebus humanis; *Laborare non cessat, nec satiantur oculi eius diuitijs, nec recogitat dicens, Cui laboro, & fraudo animam meam bonis?* Certe quando hoc vnum esset, quod idem Sapiens toties ingeminat, nihil ex humanis rebus esse, quo animus hominis satiari & refici possit, satis esset ad indicandum, quàm sint egena omnia; & omnis copia, quæ Deus non est, quam sit mera egestas, cum solus Deus animum possit explere: sed quia paucis hæc sapiunt, multis vero terrena & caduca, vt desiebat Apostolus; Animaduertant hi saltem, quò tandem abitura sint omnia! quis eorum finis & exitus! quid in morte, quid in iudicio, quid ad felicem æternitatem magis iuuat humilitas an gloria? paupertas an diuitiæ? voluptas an deliciæ?

Phil. 3. *Vir insipiens non cognoscet, & stultus non intelliget hæc.* Nimirum hic est stultus, qui se beatum & felicem prædicat & cui à Deo dicitur. *Stulte, hac nocte animam tuam repetunt à te, quæ autem parasti cuius erunt? sic est qui sibi thesaurizat, & non est in Deum diues.* O sæpe inculcanda verba! ô sæpe iteranda sententia!

Pf. 91.

Luc. 12.

Vide Verbo, Diuitie, Auaritia.



FERIA SEXTA.

DE CASTITATIS CVSTODIA, EXEMPLO BEATISSIMÆ VIRGINIS.

Mansit autem Maria cum illa, quasi mensibus tribus, & reuersa est in domum suam. Elizabeth autem impletum est tempus pariendi, & peperit Filium. Luc. 1.

VERITAS PRACTICA.

Securior est Castitatis victoria fugiendo, quàm pugnando.

RATIO EST, Quia quò magis debilitantur hostes Castitatis, eò

Maria reuerſa eſt in domum ſuam. Et de Caſtit. victoria. 133.

ſecurior eſt eius victoria.

Sed magis debilitantur fugiendo quàm pugnando.

Ergo & ſecurior inde victoria. Ac proinde fugiendum.

I. PUNCTVM.

HIC obſeruant Interpretes non fruſtra dictum ab Euan-
gelista, *Quaſi tribus menſibus*, vt innueret non tribus in-
tegris menſibus manſiſſe B. Virginem apud Cognatam *Theophil.*
Elizabeth, ac proinde non interuiſſe eius partui. Quod con- *Niceph.*
firmant ex eo quod ſtatim poſt diſceſſum Virginis, dicitur eſſe *l. i. c. 8.*
impletum tempus Elizabeth pariendi, & peperiſſe filium. Nec *Rupertus*
mirum ſi ante partum diſceſſerit Virgo puriſſima, cùm, vt re- *Cant. 2.*
fert Nicephorus, id in more poſitum eſſet apud Iudæos, vt tum *Ianſenius*
Virgines ſecederent cum tempus parientis immineret, additque *ſa. & al*
Theophylactus indecens eſſe Virgini in talibus conuerſari.

Sic ergo eſt, ſic Virginalis pudor exigebat, ſic conſuetudo
inualuerat, & ſic prorsus decebat ſanctiſſimam Virginum Vir-
ginem, abeſſe à conſpectu & confortio parituræ mulieris,
ne quid vel oculos, vel aures, vel animum ſubiret, quod eius
ſumma puritas auerſaretur. Tametsi enim Beatiſſima Virgo
erat *Hortus concluſus & fons ſignatus*, quò nulla vel levis ma- *Cant. 4.*
cula introiret, tamen illa ſic ſe ſolicite custodiebat, quaſi vna
ex nobis eſſet, ſeu ad exemplum noſtrum, ſeu quia ſic à Deo ſi-
bi ordinatum videbat. Atque hoc ipſum eſt quod ſanctæ Brigit-
tæ alias reuelauit in hæc verba, quæ habentur libro primo Reue-
lationum, capite decimo. *Timens*, inquit, *vehementiſſime*, ne os
loqueretur, ne auriſ, ne oculi viderent delectabilia; timida quoque
fui in ſilentio, & multum anxia.

Quamobrem quod ſcribit S. Ambroſius, valde eſt opportu- *L. 2. de*
num, *Sit vobis tanquam in imagine deſcripta Virginitas, vitæque Ma- Virgin.*
ria de qua velut in ſpeculo reſulget ſpecies caſtitalis, & forma virtutis.
Ac proinde ad Eius exemplum diſcamus timere, diſcamus fu-
gere; *Longè enim ſecurior eſt Caſtitalis Victoria, ſic fugiendo quam*
pugnando.

Ratio eſt aperta & facilis quoad illam primam partem qua
dicitur, tum ſecuriorem eſſe victoriam quo magis hoſtes expu-

45. gnandi debilitantur. Quid enim clarius? & quid expressius ad victoriam indicandam, cum Ipse Deus sic eam designet: *Ego ante te ibo, & gloriosos terræ humiliabo*, quasi diceret, tūc postea facile vinces.

Ephes. 6. O quale subsidium in tanto periculo, si quanti sunt nobis aduersarij, debilitari ac frangi possint, *Quoniam non est nobis, colluctatio tantum aduersus carnem & sanguinem, sed aduersus principes & potestates, aduersus mundi rectores tenebrarum harum, contra spiritalia nequitia, in cœlestibus*. Parene te putas tot tantisque hostibus expugnandis? aut si speras Deum adiutorem, qualem te oportet esse pugilem, cum Deo simul pugnantem?

II. PUNCTVM.

SED hi hostes Castitatis magis debilitantur fugiendo, quam pugnando.

Totum enim eorum robur est in præsentia obiecti, per quod mouent concupiscentiam, & nos illiciunt ad peccandum: Quapropter si remoueat talis obiectum, si euitetur talis peccandi occasio, plane ita debilitantur, vt cum diuina gratia eneruetur eorum robur. *Cum defecerint ligna*, inquit sapiens, *extinguetur ignis*. Quod quidem vniuersim dictum est de omni inordinato motu, sed particulatim de libidine, hoc pene vnum commendatur vt fugiatur occasio, in qua vna pugnant & prævalent hostes. *Virginem*, inquit Ecclesiasticus, *ne conspicias, ne forte scandalizeris in decore illius. Noli circumspicere in vicis ciuitatis, nec obseraueris in plateis illius. Auerte faciem tuam à muliere compta, & ne circumspicias speciem alienam; propter speciem mulieris multi perierunt, & ex hoc Concupiscentia quasi ignis exardescit. Speciem mulieris aliena multi admirati, reprobi facti sunt, colloquium enim illius quasi ignis exardescit*. Et quæ plura ibi habentur, vnde patet quod quanta est potentia hostium in præsentia obiecti, tam nulla sit, eo remoto: sicut cum exarmanentur hostes, aut de statione sua deiciuntur.

Ecc. 7. Quod & alius Sapiens sic breuius exprimit, *Inueni amariorem morte mulierem quæ laqueus venatorum est, & sagera cor eius; vincula sunt manus illius, qui placet Deo effugiet illam, qui autem peccator est, capietur ab illa*; Quasi diceret, totum consistit ad bene vel

male faciendum, vt mulier effugiatur. Nam quod est valde notandum in hac materia tentationum, cum ad eas expugnandas sit maxime necessaria gratia, primus gratiæ motus est ad fugam occasionum, Cui gratiæ si consentias, tum te illa fideliter comitatur & subsequitur, donec conterat omnes inimicos tuos; si vero contra motum gratiæ persistis in occasione peccati, tum in poenam diminuitur gratia, & hostes roborantur. *Ambulasti in voluntatibus eorum, vt darem te in perditionem.* O quoties sic ambulasti, quoties sic peccasti! Mich. 6.

III. PUNCTVM.

SECVRIOR est igitur Castitatis victoria fugiendo, quàm pugnando: cum sic magis debilitentur hostes eius, quibus debilitatis, *In perpetuum coronata triumphat, incoinquinatorum certaminum* Sap. 4. *premiū vincens*, vt ait Sapientia.

Ad hoc vnum commendandum conspiciant omnes sancti Patres, quorum nonnulla dicta, tum ad Veritatis practicæ confirmationem, tum ad praxim sedulo exercendam tecum reuolue, & ex iis affectus excita.

Sanctus Cyprianus; *In hac parte expedit plus bene timere quam malè fidere, vtilius est infirmum se quis cognoscat quam fortis si videri velit, infirmus emergat.* S. Ambrosius: *Gloriosa hac fuga est, fugere à facie peccati.* S. Hieronymus: *Quis iuxta viperam securus somnos capiat? Nunquam securus cum thesauro latro, nec cum lupo tutus est agnus. Alligabit quis in sinu suo ignem, & vestimenta eius non comburentur? Ambulabit super carbones, & pedes illius non ardebunt?* Itemque aptissime ad rem nostram. *Frater imbecillitatem meam, nolo spe pugnare victoria, ne perdam aliquando victoriam.* Tu qui pugnas, superari potes & vincere: Ego cum fugero, non vincam in eo quod fugio, & ideo fugio, ne vincam. Nulla securitas est vicino serpente dormire; potest fieri vt me non mordeat, tamen potest fieri vt me aliquando mordeat. S. Augustinus: *Contra libidinis impetum apprehende fugam, si vis inuenire victoriam. Nec tibi verum recundum sit fugere, si Castitatis palmam desideras obtinere.* Et post pauca. *Infelix & nimium periculosa ista presumptio, multi dum se putabant vincere, victi sunt. Hoc est viuere sub ruina.* S. denique Ilidorus. *Ante ignem consistens etiam si ferreus sis, aliquando* L. de Sing. Cleric.
Prov. 6.
Libro contra Vigil.
Serm. 250.

dissolueris : proximus periculo diu tutus non erit : sæpe quod voluntas non potuit, familiaritatis assiduitas superauit. Tunc tot sanctis Patribus doctior, vt melius scias quam illi, bonum? Tunc his sanctior, vt melius quam illi, fugias malum.

Vide in 3. parte ferias post Dominicam 5. Pentecostes, & in Indicibus Verbo *Castitas, Mortificatio, &c.*



S A B B A T O

SEV IN VIGILIA NATIVITATIS.

*DE MANSVETVDINE QVÆ EST
IRÆ OPPOSITA : ET QVÆ IN SANCTO
IOSEPHO CLARE ELVCET.*

*Ioseph, Fili David, noli timere accipere Mariam
Coniugem tuam. Math. I.*

VERITAS PRACTICA.

Manfuctudo parat hospitium Christo venturo.

RATIO EST, Quia Mansuetudo pacem internam & exter-
nam conciliat.

Sed in tali pace libenter hospitatur, & habitat Christus.

Ergo Illi Mansuetudo parat hospitium, proindeque diligenter
procuranda, vt Christus in nobis maneat, nec à nobis recedat.

I. PUNCTVM.



INTEREA cum intumesceret vterus Beatissimæ Virginis, sanctus Ioseph sponfus eius castissimus, ignarus mysterij, animaduertit quod vix potest credere; Videt indubitate

Indubitate quod dubitat tamen esse. Rem videt, nescit modum; Imo scit virginem tam puram, tam innocentem, & tam alienam ab eo quod videt, vt vix credat oculis suis: & credat potius se non videre quod videt, quàm credat Virginem non esse Virginem. Sed tamen illa fert vterum! Quomodo grauida potest esse virgo? Quomodo possem accusare innocentem? quomodo possem excusare pragnantem? Hæc inter se pugnancia mirum quantum angerent & diuexarent Iosephi animum! Et certe nisi Iustus fuisset & mansuetissimus, tum irasci, tum excandescere & præcipiti furoris impetu grauius aliquid moliri poterat: sed Mansuetudo hos sedat motus, Rationem seruat, æquitatem tuetur, Deo confidit & locum relinquit Iustitiæ, vt dum occulte dimittet Coniugem, nec innocentem proder, nec rei incognitæ consentiendo, se reum faciet coram Deo. Sic Glossa, probatque Interpretes.

H AEC autem eo cogitante, ait Euangelista, Ecce Angelus Domini apparuit in somnis ei, dicens, Ioseph Fili David, noli timere accipere Mariam coniugem tuam. Quod enim in ea natum est, de Spiritu sancto est. Et quæ plura in textu sequuntur, Vide & contemplare pro affectu. Ad praxim vero nihil aptius Veritate proposita, quæ ab exemplo sancti Ioseph defumitur. Quid enim hodie conformius nascituro Christo cogitare possis, quam vt internum pares Ei hospitium? *Parat autem Mansuetudo, quod certe mirum, & cogitatu fructuosissimum.*

Ratio hæc est, quia pacem internam & externam conciliat. Id enim efficit vt sedatis passionibus, nobiscum & cū aliis omnibus cedendo potius quam resistendo, quantum in nobis est, pacem habeamus. Sic psalter Regius. *Mansueti autem hereditabunt terram, & delectabuntur in multitudine pacis.* Sic S. Ioannes Chrysostom. *Nihil, inquit, aequè solet pacem facere, ac Dei cognitio & virtutis possessio, quæ animi perturbationem, internum bellum domo procul eiecit, nec permittit vt homo cum seipso seditiones agitet.* Item *que alibi fusius, postquam comparauit Iratum foro, vbi est multitudo euntium & redeuntium clamor, Mansuetum solitudini ac montis vertici similem esse dixit, vbi aura suauis, purus radius, pura fontium fluentia, multæ florum amœnitates, prata vernantia.* Et quæ plura in hunc modum prosequitur, *Vt appareat, inquit, quanta sit Viri mansueti & longanimis voluptas, qui Zephiri le-*

Rom. 12.
Ps. 36.

In Ps. 4.

Hom. 29.
ad pop.
ant.

nitatem & quietem imitatur. Itane vero in te apparet? perscrutare. Non qualis modo sis, considerando: sed qualis esse soles, ad iram prouocatus.

II. PUNCTVM.

SED in tali pace libenter hospitatur & habitat Christus Dominus. *In pace enim factus est locus eius*, ait David. Et ipsa de se Sapientia Incarnata; *In omnibus requiem quasiui*. Hoc primum eo nato denunciatum: *Pax Hominibus bonæ voluntatis*. Hoc primum quod Discipulis se præcedentibus in omnem locum, quod erat ipse venturus commendabat: *Primum dicite, Pax huic domui*. Sic princeps pacis dicitur, & cuius pacis non erit finis; Sic in Salomone pacifico præcipue adumbratur. Sic eius denique regnum dicitur, Iustitia, & Pax & gaudium in Spiritu sancto, vt ait Apostolus. Et ratio est aperta, nam quomodo aliter regnaret in nobis nisi nos regeret prout vellet? At quomodo nos pro sua voluntate regeret, nisi pacari essent nostri affectus, qui alioquin illi resisterent? vnde apte in libro Iob, *Et bestia terra erunt tibi pacifica*. In quibus verbis tria quædam aduertit S. Gregorius. Primum, quod per terræ bestias, motus carnis intelliguntur qui dum mentem nostram, irrationabilia suadendo, laceffunt, contra nos bestialiter insurgunt. Deinde vero, inquit, dicuntur pacificæ, non quasi non fremant aliquando & rugiant, sed quod intra cordis caueam frementes licet, teneantur. *Redacta namque intra claustra Continentiæ, etsi adhuc tentando rugiunt, vsque ad morsum tamen actionis illicitæ non excedunt*. Denique cur pacificæ potius quàm pacatæ? quia scilicet ex ipso primo motu & fremitu pacem faciunt, quatenus inde Mens religiosa sibi magis cauet, magis recurrit ad Deum, magis suspirat ad internam & æternam pacem. Quæ quidem fusius, sanctus ille Doctor prosequitur. Nobis modo sufficiat quod nobis optat Apostolus: *Pacem habete: Et Deus Pacis & Dilectionis erit vobiscum*. O quis nolit pacem habere? Qui non vult pati. Aduerte.

III. PUNCTVM.

SIC ergo Mansuetudo parat hospitium Christo Domino, Cùm pacem illi parat, in qua tam libenter habitat vt sit eius Locus,

eius domus, eius regnum, eius imperium & sacerdotium, *Hic Hebr. 7. enim Melchisedech Rex salem*, inquit Apostolus, *primum quidem qui interpretatur Rex Iustitiæ, deinde autem & Rex salem quod est Rex pacis.* O quanta inde Mansuetudinis commendatio! quid desiderabilius quàm Christum nascentem in eo maxime loco recipere, ubi libentius habitat & requiescit? *Magna ars est, dicebat L. 2. de ille pius & satis notus Author, Scire conuersari cum Iesu, & scire Imit. Ch. Iesum tenere, magna prudentia. Esto humilis & pacificus, & erit tecum Iesus: sis deuotus & quietus, & permanebit tecum Iesus.* c. 8.

In his sanctis cogitationibus adiunge te comitem itineris quod hodie suscipiunt Maria & Ioseph in Bethleem, nec ab eis discendas donec *in mansuetudine suscipias insitum Verbum, quod potest saluare animam tuam*, ut ait S. Iacobus, Verbum scilicet Incarnatum, & sic nobis quodammodo Insitum, & nos in illo, velut ramus arbori, ut inde floreamus & fructificemus. Non sine fructu floreas, *Nam flores eius, fructus honoris & honestatis.* Ecclesi. 24.

Sed quoniam ille est honor? quoniam eius honestas? Ingredere stabulum, circumspecte omnia. Vide si quid mundani, si quid vani; si quid aliud quàm præsepe, quàm paupertas, quàm humilitas, quàm puritas, & patientia. Ecce hic est honor, hæc honestas, cuius fructus in ipsis sunt floribus, cum in ipso primo Christi nascentis ortu, tam perfectæ Virtutes apparent, quæ à nobis colligantur.





IN NOCTE NATALIS DOMINI.

Et reclinavit Eum in praesepio, quia non erat eis locus in diuersorio. Luc. 2.

VERITAS PRACTICA.

Aut Christus fallitur, aut Mundus errat.

RATIO EST, Quia ex duobus contradictoriè seu contrariè oppositis, necesse est alterum falli & errare.

Sed Christus & Mundus, sic sunt inter se oppositi.

Ergo aut Christus fallitur, aut Mundus errat.

SED quia diuinam falli impossibile est Sapienciam, hinc necessario sequitur Mundum errare, ac proinde ab eo tam cauendum, quàm Christo conformari volumus.

I. PUNCTVM.

PERVENIUNT tandem sub vesperam, Maria & Ioseph, in Bethleemiticum oppidum, quò eos obedientia Cæsari Augusto reddita, vocauerat. Diuersorium aliquod, vt mos est viatorum, in Ciuitate quærunt, sed vndique repelluntur, tum ob multitudinem aduentantium, tum ob paupertatem quam præseferabant. Egressi igitur ciuitate, sese recipiunt in vicinum quoddam antrum omnibus peruium, quod stabuli formam & vsum

referebat. Hæc est scilicet illa domus hoc palatium quod Filio suo nascituro parauerat Deus! Illic sanctissima Parens diuini sui partus præsentens foelicissimam horam, Præsepe ad lectuli modum, qua potest industria & pietate, componit; stramen, foenum, paleas, & quicquid vile est huiusmodi colligit, tum pannos lineos inopes quidem, sed bene mundos, inuoluendo Filij corpusculo parat.

ECCE autem cum quietum silentium contineret omnia, & nox in Sap. 18.
suo cursu medium iter haberet, Omnipotens sermo Dei, Verbum il-
lud diuinum, iam nouem mensibus incarnatum, à Regalibus Se-
dibus venit; INTACTA MATRE NASCITVR, ap-
paret nudus in terra, pannis inuoluitur, in præsepio reclinatur,
quia non erat locus in diuersorio!

O verè Verbum breuiatum quod fecit Dominus super terram! Is. 10.
Quàm multa paucis comprehensa mysteria! Deus homo! Deus Rom. 9.
infans! Deus in præsepio! Quid hic primum aut vltimum mi-
rer! Iunge te anima, iunge te cordibus Mariæ & Iosephi, nam
altiora sunt & sacratiora mysteria, quàm vt ipsa tu sola possis
complecti; adora cum ipsis natum Deum; admirare cum illis
paruulum; congaude, condole, & omnes illorum affectus indue
quibus tam debito pietatis officio, erga Deum tuum te exoluas,
& ad fructum quem prætendit referendum, cum ipsius gratia, te
disponas.

HIC est autem eius finis, & fructus inter alios, vt agnoscas
quàm longe Mundus erret in suis dictis & factis, ne cum illo
erres. Agnosces vero hic tam certò & euidenter, quàm certum
est & euidentex Christiana fide, Christum non posse falli. Nam
posita Veritate, quæ ex Diuo Bernardo est, Aut Christus fallitur, Serm. 7.
aut Mundus errat; quantum est euident & infallibile, Christum de Nativ.
non posse falli, tam erit omnino euident & manifestum quod
Mundus erret.

Ratio quæ id conuincit, ipsa est qua proposita Veritas decla-
ratur; Nempe ex duobus contradictorie vel contrarie oppositis,
necesse est alterutrum falli seu falsum esse. Hoc est principium
indubitatum, & ipso naturæ Lumine notum, vnde hæc Effata
communia, & ab omnibus vbique semper recepta emanarunt;
De quocunque affirmatur alterum oppositorum, negatur alterum. De Ex 1. E-
natura contrariorum est, se mutuo expellere. Conseruationum vnius lem. 4.
L. 10. Ma-

cap. 6.
5. Phys.
textu 25.

contrarij est destructivum alterius. Contradictorium nullum est medium. Contradictio est pugna affirmationis & negationis. Denique impossibile est duo contradictoria esse simul vera, aut simul falsa. Quod quidem tam certum est, ut ne per ipsam Dei omnipotentiam aliter fieri possit. Neque est aliud quicquam quod negetur à Deo fieri posse, nisi quod contradictionem implicat, nisi quod contradictorium est; hoc vnum respondetur, si quid diuinitus negetur impossibile. Atque hoc tam clarum est non posse fieri, ut alio probationis lumine quo illustretur, non sit opus.

Deut. 18. Hæresne dubius in hac veritate? Palpares in meridie, quæ est damnosa cæcitas.

II. PUNCTVM.

SED Christus & Mundus sunt contradictorie seu contrarie oppositi.

Licet contradictoria & contraria, dux sint diuersæ oppositiones, vnam tamen eandemque in Christo sic nato statuimus, quia qua ratione est contrarie oppositus mundo, eadem est contradictorie oppositus. Contrarius nempe est mundo Christus, quia contrariam mundo vitam instituit. *Omne quod est in mundo*, inquit dilectus Discipulus, *concupiscentia carnis est, & concupiscentia oculorum, & superbia vita.* At omne quod est in stabulo Bethleemitico seu in Christo ibi nato, & in præsepio reclinato, oppositum est & plane contrariū illi triplici concupiscentiæ. Perpende diligenter.

Sic verò est etiam contradictorie mundo oppositus, id est, illud affirmat quod mundus negat; aut illud negat quod affirmat mundus; Nam etsi Christus infans nihil loquitur, nihil ore affirmat aut negat; non desinit tamen loqui & loquendo destruere quod mundus adstruit. Ipsius opus loquela est, ut ait S. Augustinus, *Quia ipse Christus verbum Dei est, etiam factum verbi, verbum nobis est.* Hoc præclare S. Bernardus, *In stabulo*, inquit, *nascitur Christus, & in præsepio reclinatur.* Et nonne Ipse est qui dicit, *meus est orbis terra & plenitudo eius?* Quid ergo stabulum elegit? Planè ut reprobet gloriam mundi, damnet sæculi vanitatem; Nec dum loquitur lingua, & quacunque sunt de eo clamant, prædicant, Evangelizant; ipsa quoque infantilia membra non silent. *In omnibus mundi iudicium arguitur, subvertitur, confutatur.* Et alibi. *Infans*

Tract. 14.
In Ioan.

Serm. 3. in
Natiuitate.

Serm. 5. in
Natiuitate.

quidem est, sed Verbum. Infans cuius ne ipsa quidem infantia tacet. Clamat hoc stabulum clamat praesepe, clamant lachryma, clamant panni. Nempe illud ipsum quod postea praedicabit, Beati pauperes spiritu: Vae vobis diuitibus. Et quæ toto continentur Evangelio.

*Math. 5.**Luc. 6.*

Ah Christe Iesu, iam capio quod dixisti, Mundus me odit quia testimonium perhibeo de illo, quod opera eius mala sunt, & rursus, Confidite, Ego vici mundum.

*Ioan. 7.**Ibid. 16.*

III. PUNCTVM.

AUT Christus ergo fallitur, aut Mundus errat; seu potius, Cum ergo Christus non fallatur, certissime Mundus errat. Nam ab iisdem principiis vtraque plane manat conclusio. Nempe ex duobus oppositis, alterutrum falli necesse est: Christus autem & Mundus sunt inter se oppositi; Aut ille igitur, aut iste fallitur; Est enim veritas indiuisibilis, aut tota se tenet ex parte vnius, aut tota ex parte alterius. At cum Christus sit ipsa Veritas, & ipsa Dei Sapientia, quæ nec falli potest nec fallere, quid sequitur nisi Mundum falli? quid sequitur eligente Christo quod carni molestius est, nisi quod ait S. Bernardus, *Id ergo melius, id utilius, id potius eligendum: & quisquis aliud doceat vel suadeat, ab eo tamquam à seductore cauendum.* Tum Idem pergens, iam vero, inquit, etiam nocte nasci voluis; Vbi sunt qui tantopere gestiunt ostentare semetipsos? Christus elegit quod salubrius indicat, vos eligitis quod reprobatur ille. Quis prudentior è duobus? Cuius Iudicium iustius? Cuius sententia sanior?

*Serm. 3. de
Natiuitate.*

Vt fructuosius vero hæc tibi & aliis applices, agnoscendum vniuersim & particulatim quàm latè pateat, & quàm facile sese diffundat & communicet iste Mundus qui est oppositus Christo: quam in te partem habeat, quid in te, quid in sensu, in affectu, in verbis, & tota vita simile mundo sit & Christo dissimile. Ne quis autem sibi palpet quasi qui de Christo melius sentiat quàm de mundo, audiat sanctum Ioannem Chrysostomum longe aliter de se ac suis, qui te forte non erant, deteriores, affirmantem: *Etenim si quis extrinsecus undecumque adisset & præceptorum Christi ac nostræ conuersationis confusionem ac perturbationem videret, nescio an alios magis ullos quàm nos, inimicos esse & contrarios præceptorum*

*L. 1. de
Comp. g. 1.*

Christi indicaret. Quasi enim qui studium quoddam habuerimus contraria in omnibus gerere quàm ille mandauit, ita viam hanc vite peragimus. Et post exhibita Christi exempla & monita, sic pergit; *Ad hac quid dicemus? pro singulis enim hic lachryma tantummodo proferenda sunt, & confusio habenda est; APERTE ENIM CONTRA HÆC OMNIA MILITAMVS. Væ mundo à scandalis! Et væ tibi à mundo, quisquis ab eo tibi non caues, quisquis Christo totus non adhæres. Hac loquere, & exhortare.*



IN DIE NATALIS DOMINI.

*Magnificatus est Rex pacificus, super omnes Reges
vniuersa terra. 3. Reg. 10.*

VERITAS PRACTICA.

Christus in præsepi, & Christianus in humilitate, magis magnificatus est quàm Salomon in Throno suo.

RATIO EST, Quia tota Salomonis magnificentia in his quatuor consistebat, SAPIENTIA, POTENTIA, DIVITIIS, & DELICIIS.

Sed Christus, & Christianus in his quatuor magis abundant. Ergo vterque magis magnificatus est quàm Salomon in Throno suo. Quod certe mirum, & valde considerandum.

I. PUNCTVM.



E vile aliquid putares, inquit S. Augustinus, quale ^{tract. 1.} *consueuisti cogitare, cum verba humana soleres audire,* ^{in Ioan.} *audi quid cogites, Deus erat Verbum.* Sic plane modo, ne vile aliquid putes, cum cogitas puerum in præsepi positum, audi quid cogites, *Magnificatus est Rex pacificus*; Non modo magnus est iste puer, quia Deus est; sed vt simul homo atque Infans in præsepi positus, Magnificatus est supra omnes Reges, & supra quàm ipse Rex Salomô in Throno suo. Quod enim dicebatur de Salomone super omnes alios Reges vniuersæ terræ, hoc modo Ecclesia vsurpat de Christo Domino: Atque ab his verbis officium quod de Eius Natali instituit, exorditur, vt intelligamus non sic cogitandum esse paruum & humiliatum Dominum, quin simul Magnum & maxime Magnificatum consideremus.

Neque id tantum de Christo intelligas, sed & de Christiano, Christi sui sectatore, in Paupertatis, Continentiæ, Humilitatis Contemptus mundi, cæterarumque Virtutum praxi. Non sic deprimitur illis virtutibus, quin simul exaltetur. Non sic inuitat suos Christus ad contemptum gloriæ, diuitiarum, & voluptatis, vt nullam eis gloriam, nullas diuitias, nullas voluptates concedat. Non hæc sustulit bona Christus, sed mutauit. Sustulit gloriam vanam, & proposuit veram: fallaces commutauit diuitias in solidas, & nunquam perituras; voluptatem carnis transtulit in gaudium spiritus, & in illam pacem, *Quæ exsuperat omnem sensum.* ^{Phil. 4.}

Atque in hunc finem proponitur considerata Veritas, ne præcedenti scilicet cōsideratione deterreamur à fugiendo mundo & sequendo Christo, quasi iam omnia nobis bona peritura essent; Non pereunt bona quæ melioribus transmutantur. Quod itaque de Christo Domino dicitur, hoc proportionem quadam de Christiano asseritur, qui vitam in humilitate degit, id est, in eo statu quem præcedens exigit Consideratio, contra mundanum sensum, & triplicem illam concupiscentiam, ex qua conflatur mundus. Sic est de vtroque, vt habet Veritas, *Sic Christus in præsepi, & Christianus in contemptu mundi, magis magnificatus est.*

quàm ipse Salomon in Throno suo, quem Deus ita magnificauit, vt ipsi diceret, ita vt nullus in regibus, nec ante te nec post te, fuerit similis tui.

Quidquid autem de hac magnificentia cogitari potest, ad hæc præfertim quatuor referri debet: SAPIENTIAM, POTENTIAM, DIVITIAS, DELICIAS. In quibus quantus fuerit Salomon, satis patet ex scriptura, & iis præcipue quæ de se ipse refert. *Ecce, inquit, magnus effectus sum, & præcessi omnes sapientia.* Tum de sua potentia: *Magnificauit omnia opera mea, adificauit mihi domos, possedi seruos & ancillas, multamque familiam habui, ultra omnes qui fuerunt ante me.* Et consequenter de diuitiis, *Coaccruauit mihi aurum & argentum, & substantias regum, ac prouinciarum, & supergressus sum opibus, omnes qui ante me fuerunt.* Ac denique de deliciis, *Et omnia quæ desiderauerunt oculi mei, non denegauit eis, nec prohibui cor meum quin omni voluptate fruereetur, & oblectaret se in his quæ præparaueram.* At quònam illa tandem abierunt? expende paululum.

II. PUNCTVM.

SED Christus in præsepi, & Christianus in humili suo statu, his quatuor magis abundant, & longe felicius.

Primò quidem de Christo quoad sapientiam. *Ecce, inquit, plusquam Salomon hic; Hic est enim in quo sunt omnes thesauri sapientiæ & scientiæ Dei absconditi. Difficile æstimamus quæ intra sunt, inquebat Salomon, & quæ in prospectu sunt inuenimus cum labore; quæ autem in cælis sunt, quis inuestigabit? At Vigenitus Filius qui est in sinu Patris, Ipse enarrauit.*

Salomonis sapientia in componenda litè duarum Mulierum, & in ordinanda domo sua elucebat; At sapientia Iesu Infantis, iam ex præsepi componit illas quatuor, quæ inter se dissidebant, vt dixerat Plaltes regius, MISERICORDIA & VERITAS, IVSTITIA & PAX. Componit & ordinat totum genus humanum, unicuique suam distribuens sortem, unicuique suum gratiæ & gloriæ gradum. O sapientia quæ ex ore altissimi prodisti, tu sola es quæ perfecte attingis à fine vsque ad finem fortiter, & disponis omnia suauiter.

Deinde quoad potentiam, quanta quanta est diuina omni-

potentia, tota est in Infante, tota est in præsepi; Nam vt luculente S. Leo: *Exinanitio illa quam reparationi impendit humana, dispensatio fuit miserationis, non priuatio potestatis.* Hic est Infans qui è coelo euocat Angelos; qui in aere nouam condit stellam, mira luce fulgentem: qui ab Oriente Reges sese adoraturos excitat; qui Hærodem turbat atque vniuersam cum eo ciuitatem. Hic est qui Virgini fœcunditatem donat, & qui Matri seruat integritatem. Hic ex qui duas naturas infinite distantes in vno sic vnit Supposito, vt immortalis sit mortalis, æternus temporalis, Immensus comprehensibilis, Deus infans, & fortis infirmus. Vis videre quàm sit ille fortis? *Omnia per Ipsum facta sunt, & sine ipso factum est nihil, & sine labore facta sunt,* ait S. Augustinus. Tract. 15.
in Ioan.

Denique quoad diuitias & delicias, hæc est singularis Apostoli gratia, *Euangelizare inuestigabiles diuitias Christi,* ex quo vno verbo licet colligere quantis partibus Salomone Christus sit ditior. Nam si vel vnus gratiæ sanctificantis gradus, ipso Salomone attestante, præponderat omnibus mundi bonis, quid thesaurus ille gratiarum? quid illa Gratia Capitis, à qua omnes habent vt sancti sint? Delicias vero paradyfi Dei, sicut Scriptura vocat, delicias visionis beatificæ, delicias illas immortales, quibus perfruuntur qui Comprehensores dicuntur, qualis est Infans noster, in præsepi; quis non superiores fateatur illis delicijs quas ipse Salomon non aliud esse profitetur, quam vanitatem & afflictionem animi? En igitur, vt illa quatuor quibus se ita magnificauit Salomon, in Christo magis abundant. Ephes. 3.
Sap. 7.
Ezech. 28.
Eccl. 2.

Sic plane in Christiano, Christi virtutum sectatore. Nam hic ipsâ Christi sapientiâ sapiens est, ipsâ Christi potentiâ & fortitudine fortis, ipsis eius diuitijs diues, & delicijs quidem nondum re ipsa beatus, sed spe beatitudinis ita gaudens, & contentus, vt in ipsa tribulatione superabundet gaudio. Quis quæso, beatior è duobus? An Salomon qui non nisi in delicijs tribulatur & affligitur, An ille Christi sectator qui non nisi in tribulatione deliciatur & triumphat? *Ex ipso, vos estis in Christo Iesu, qui factus est nobis sapientia & iustitia,* inquit Apostolus. Et de diuitijs ibidem: *In omnibus diuites facti estis in illo.* De potentia vero: *Confortamini in Domino, & in potentia virtutis eius;* Vnde & sanctus Gregorius: *Fortis super omnia apparuit infirmus inter omnia, vt dum nobis ex assumpta infirmitate congrueret, ad permanentem nos suam fortitu-*

in 22. Luc. *in* *dinem eleuaret. Sic & sanctus Ambrosius de deliciis: Suscepit tristitiam meam, ut mihi suam letitiam largiretur: & vestigiis nostris descendit vsque ad mortis arumnam, ut nos suis vestigiis reuocaret ad vitam. Quo simili sensu passim aiunt omnes sancti Patres, Christum nostra suscepisse, ut sua nobis conferret, si vellemus ea recipere. O quis nolle? O quam pauci tamen ea volunt!*

III. PUNCTVM.

CH R I S T V S igitur in præsepi, & Christianus in humili & afflictio vitæ suæ statu, magis magnificatus est, quàm Salomon in Throno suo: Quia scilicet maior eorum Sapientia, maior potentia, maiores diuitiæ & deliciæ, ex quibus quatuor veluti dotibus *Math. 6.* conflatur Magnificentia. *Prov. 30.* Nec Salomon in omni gloria sua magnificatus est, sicut vnus ex istis. Stultissimus sum virorum, inquit, & sapientia hominum non est mecum. Sic certe infirmissimus, qui suis se cupiditatibus subiecerit: sic egentissimus & afflictissimus, qui conuersus ad labores in quibus frustra sudauerat, nihil reperit nisi vanitatem. *Sap. 3.* Bonorum autem laborum gloriosus est fructus, iam ex hac vita, quando sola esset similitudo quam fidelis Christianus habet cum Christo, nonne vel Illa sufficeret ad omnem gloriam & iucunditatem? Quid gloriosius seruo, quàm Dominum confectari? Quid iucundius filio, quam Patrem æmulari? Hic infans Pater est futuri sæculi; Qualis modò erit vitæ similitudo, talis futura est ad omnem æternitatem. Hic nos generat & enutrit *Isa. 9.* Verbo Veritatis; & hæc est veritas quæ in præsepi apparet contra *Iac. 1.* mundi vanitatem. *1. Petr. 1.* Renati non ex semine corruptibili, inquit sanctus Petrus, sed incorruptibili per Verbum Dei vini & permanentis in æternum, quia omnis caro ut fœnum, & omnis gloria eius tamquam flos fœni; exaruit fœnum & flos eius decidit. Verbum autem Domini manet in æternum; Hoc est autem verbum quod euangelizatum est vobis. Vnde quæ paritas inter fœnum & Verbum Dei, tanta est disparitas inter vitam dissimilem & similem Christo, inter vitam mundanam & Christianam. Et hinc natabis vtram eligas! *Luc. 9.* Statue hoc nouum propositum: Sequar te, Domine, quocunque ieris. Vide supra, Dominica prima Aduentus, & duab. sequentib. Feriis. Sabbato infra Dom. tertiam. Et in Indicibus, Verbo Christus, Amor, Charitas, Mundus. Et die 13. Ianuarij.



IN FESTO S. STEPHANI PROTOMARTYRIS.

Stephanus plenus Gratia & Fortitudine, faciebat prodigia, & signa magna in populo. Act. 6.

VERITAS PRACTICA.

Injuriam infert Gratia maximam, qui pro ferenda injuria non certat fortiter.

RATIO EST, Quia idcirco quis in ferenda injuria seu in aliis quibuscumque aduersis, non certat fortiter, vel quod non putet se posse vincere etiam cum gratia, vel quod nolit hunc certandi laborem suscipere.

Sed utrumque est valde injuriosum Gratia.

Ergo illi injuriam facit maximam, qui non sic fortiter in aduersis certat; sicut sanctus Stephanus Protomartyr.

I. PUNCTVM.

VIDENTA sunt quæ de sancto Stephano habentur in Actis Apostolorum, capite sexto & septimo. Tum notandus triplex Gratia & Fortitudinis actus, quem exercet. Primus est, loquendo magnificè de Domino Iesu, coram Iudæis qui grauibz intentatis minis vetuerant ne vllus sermo palam de hoc nomine haberetur, quique non aliter ac blasphemias accipiebant, quidquid de Iesu diceretur. *Homo iste, inquebant, Act. 6. non cessat loqui verba, aduersus locum sanctum, & Legem.*

Secundus est, quòd cum videret perfidos illos eò vehementius sibi obistere, quò apertius illis veritatem demonstrabat, tum

Act. 7.

acriter in eos inuehitur : *Dura ceruice & incircumcisis cordibus & auribus, vos semper Spiritui sancto resistitis, sicut Patres vestri, ita & vos.*

Ibid.

Tertius denique, cùm intendens in cœlum vidisset gloriam Dei, & dixisset : *Ecce video cœlos apertos, & Filium hominis stantem à dextris Dei* : Tunc Iudæi exclamantes, impetum fecerunt vnanimiter in eum, & eijcientes extra ciuitatem Lapidabant. At vero ille libentissimè & generosissimè primus pro Christo mortem subiit, cùmque saxorum crepitantium turbine quateretur, *Domine Iesu, inquebat, suscipe spiritum meum. Domine, ne statuas illis hoc peccatum.*

Hoc est esse fidelem; hoc est plenum esse gratia & fortitudine; hoc est maxime honorare Gratiam, quando sic fortitudo quam confert, non separatur à Gratia, sed simul fideliter exercetur. E contra vero : *Injuriam facit Gratia maximam, qui sic fortiter in aduersis non pugnat.*

Num. 13.

Hæc est Veritas modo expendenda, prout declaratur; Nempe idcirco quis in aduersis non pugnat, vel quod non putet se satis fortem ad illa peruincenda, vel quod nolit laborem suscipere qui necessarius esset ad certandum & vincendum. Vix est aliud quod præter illa duo cogitari possit; atque illorum etiam alterutrum necessario proferendum est, si non decertas fortiter. Dic enim quare cedis? nonne dices quia nimis te premunt aduersa, nec te parem illis putas? aut si conuinceris te posse cum gratia: posse quidem non negabis, sed difficilior esse asseres, quàm vt laborem illum suscipias. *Nequaquam ad hunc populum valemus ascendere, quia fortior nobis est.* Sic illi negabant se posse qui volebant pugnare pro terra promissa possidenda. Ah quoties sic cer-

Apoc. 21.

tamen detrectasti? *Qui vicerit, possidebit hæc: & ero illi Deus, & ille erit mihi filius. Timidis autem & incredulis, pars illorum erit in stagno ardenti.*

II. PUNCTVM.

SED vtrumque illud valde est injuriosum Gratia.

Primò quidem si dicas te non posse, perinde est ac dicere non esse satis potentem gratiam, non esse satis potentem Deum, aut non satis fidelem qui promisit plusquam potest dare. Quod

quis non videt esse injuriosum, & blasphemum? Cum enim Deus toties promiserit se tibi affuturum, neque timendum esse dum tibi adfuerit: Si quid dubitas, nonne de eius fidelitate aut de potentia dubitas? quasi nolit quod dixit, aut quasi non possit quod velit? *Noli metuerere*, inquit Deus, *& noli timere, quoniam tecum est Dominus tuus in omnibus ad quacunque perrexeris.* Quæ licet soli Iosue referantur dicta, tamen ad nos omnes spectare, scribit Apostolus, cum ex illis verbis sic ad fiduciam nos exhortatur, *Ipse enim dixit, non te deseram neque derelinquam, ita ut confidenter dicamus, Dominus mihi adiutor, non timebo quid faciat mihi homo.* Iosue 1.
Hebr. 13.
Ps. 117.

Et certe cum ex nobis, sine gratia, nihil possimus, iubeamur autem perpetuum inire certamen cum hostibus, qua tandem ratione, & quibus armis vinceremus, nisi gratiæ: aut nili gratia factis esset potens ad vincendum? *Infelix ego homo*, ait Apostolus, *quis me liberabit de corpore mortis huius?* Respondet idem: *Gratia Dei per Iesum Christum Dominum nostrum.* Tu vero id negabis, & non putabis injuriam facere Gratia? Imo est illa contumelia de qua idem Apostolus: *Qui Filium Dei conculcauerit, & sanguinem testamenti pollutum duxerit, in quo sanctificatus est, & SPIRITUI GRATIAE CONTUMELIAM FECERIT.* Expaucesce. Rom. 7.
Hebr. 10.

Alterum vero non est illi minus injuriosum, cum scilicet possis eius auxilio vincere si decertes; nolis tamen certare ne nimis labores. Hoc est enim sibi nimis indulgere, hoc est manifeste naturam deprauatam præferre gratiæ, corpus animo, appetitum rationi, terram cælo, voluptatem æternæ beatitudini. Nam nili quis legitime certauerit, non coronabitur. Qui non vult coronari, cælum ac Deum spernit; Qui non vult certare, non vult coronari. O probrum. O infamiam. *Numquid Fratres vestri ibunt ad pugnam, & vos hic sedebitis?* Nulli dubium est, quin peccetis in Deum; & scitote, quoniam peccatum vestrum apprehendet vos. 2. Tim. 2.
Num. 32.

III. PUNCTVM.

INIVRIAM igitur facit Gratia maximam, qui fortiter in iniuriis & aduersis non certat; Cum idcirco non certet, quia non putet se satis fortem cum Gratia, ut possit vincere; aut ipsam Gratiā non satis dignam iudicet, pro qua conseruanda pugnet, & in pugnando laboret. Quod vtrumque est Gratia valde inju-

Psalm. 1. riosum. *Extendi manum meam*, inquit, & non fuit qui aspiceret. Extendit nempe manum cum indicat aliquid esse faciendum, & patiendum, cum ad id exhortatur & confortat, cum nos propterea erigit & stimulat, quoties denique nos velut manuducit quoad tendimus. Sed quàm pauci & rari sunt qui ad motum Gratiae moueantur! Non fuit, inquit, qui aspiceret, qui attenderet ad illos gratiae motus, ut eos sequeretur: unde sic pergit irata sapientia seu diuina gratia: *Despexistis omne consilium meum, & increpationes meas neglexistis. Ego quoque in interitu vestrorum ridebo vos, & subsannabo, cum vobis id quod timebatis, aduenerit.* Quasi diceret, quando in extremum agonem & horrendum illud certamen vitae ac mortis deueneritis, tunc me meaque operâ maxime vos indigere significabitis, tunc me inuocabitis, & impense deprecabimini: sed frustra, quia sicut me paratam ad certamen pro vobis ineundum deseruistis, sic vos iam certare paratos deferi conuenit. Quod certe est expauescendum, tibi praecipue qui tam mollis es in certando.

Hebr. 12. Quamobrem audiendus attente Apostolus, *Deponentes*, inquit, *omne pondus & circumstans nos peccatum, per patientiam curramus ad propositum nobis certamen: aspicientes in Authorem fidei & Consummatorem Iesum.* Vide ut circumstans nos peccatum vocet Concupiscentiam, quæ cum triplex sit, ut heri diximus, una bonorum temporalium, alia delectabilium, & alia honorum mundi: aduerte diligenter nos ab illa triplici concupiscentia retardari ad certandum in aduersis. Ac proinde ut obliuiscas contrâ, fortiterque decertes: Aspice in Authorem fidei & Consummatorem Iesum. Aspice illum pauperem in præsepî, contra tentationem concupiscentiæ temporalis. Aspice illum patientem in cruce, contra delectabilia. Aspice illum denique gloriose regnantem in coelo, contra Mundi vanitates. Dic blandientibus bonis, aut deterrentibus malis: *Video caelos apertos & Iesum stantem à dextris Dei*, Qui mihi meliora præparat, si hæc terrena despicio. Mirum quantum ille aspectus Domini Iesu in Præsepî, seu in Cruce, seu in Coelo valeat ad certandum & vincendum contra triplicem illam concupiscentiam. *Inimici hominis domestici eius.* Mich. 7. *Ego autem ad Dominum aspiciam*, ait Propheta. *Vidi Deum, & salua* Gen. 32. *facta est anima mea. Adhuc visio in dies.* Dan. 10.

Vide in Indicibus Verbo, Gratia, Fortitudo, Timiditas.

IN FESTO



IN FESTO SANCTI IOANNIS APOSTOLI ET EVANGELISTÆ.

Discipulus quem diligebat Iesus. Ioan. 21.

VERITAS PRACTICA.

Qui diligit cordis munditiam, habebit amicum Regem. *Prov. 22.*

RATIO quæ de Rege regum Domino Iesu, Veritatem interpreta-
tur, hæc est, quod nullus Regi-ut Regi, acceptior est quàm qui
fidelem se præbet in omnibus.

Sed qui diligit cordis munditiam, maxime se fidelem præbet Regi
Iesu.

Ergo habebit eum amicum, & ab eo diligitur sicut Dilectus hic Dis-
cipulus, de quo expresse dicitur, quod specialis prærogativa Ca-
stitatis ampliori dilectione fecerat dignum, quia Virgo electus
ab Ipso, Virgo in ævum permansit.

II. PUNCTVM.

VALDE HONORANDVS EST BEATVS
IOANNES. Ingredere penitus in hunc pietatis Ec-
clesiæ sensum; & vide quàm id recte prædicetur. Nam
vix sunt vlli honorum Tituli, quibus alij quique Sancti honoran-
tur, qui non omnes conueniant sancto Ioanni, ad eius honorem
præ aliis exaltandum. Fuit enim, vt scribit sanctus Hieronymus, *Lib. de*
PATRIARCHA & fundator Ecclesiarum Asiæ. Fuit in- *Script.*
signis PROPHETA Noui Testamenti, vt patet ex eius Apo- *Eccl.*
calypsi infinita futurorum mysteria continente; vt ait idem S. *Lib. 1.*
Hieronymus. Fuit APOSTOLVS inter alios celeberrimus, & *com. tom.*
ex tribus vnus quos Columnas vocat S. Paulus. Fuit EVANGE- *Gal. 2.*

*Tract. 35.
in Ioan.*

*Math. 20.
l. 1. in Ioan.*

LISTARVM Aquila, *Sublimium nempe prädicator, & lucis internæ, atque æternæ fixis oculis Contemplator*, vt scribit sanctus Augustinus. Fuit **MARTYR** designatus à Domino, cuius calicem esset bibiturus, vnde S. Hieronymus: *Si legamus*, inquit, *Ecclesiasticas historias, in quibus fertur quòd & Ipse propter martyrium sit missus in feruentis olei dolium, & inde ad suscipiendam coronam, Christi Athleta processerit, statimque relegatus in Pathmos insulam sit, videbimus martyrio animum non desuisse, & bibisse Ioannem, ealicem confessionis quem & tres pueri in camino ignis biberunt, licet persecutor non fuderit sanguinem.* Fuit denique **DOCTOR**, **EPISCOPVS**, **CONFESSOR** & **VIRGO**. Ac proinde si alij ex horum aliquò coluntur & honorantur titulo, certe hic valde honorandus qui vnus omnes omnium titulos in se complectitur.

Præterea vero supra quàm alij, singulares quatuor & eximias obtinuit à Domino gratias. Prima est quod omnium Iunior ad Apostolatam, & omnium senior è vita discesserit, obiit enim tantum Anno Christi centesimo primo, vt est apud Baronium ex Eusebio. Vnde maximum meritorum cumulum sibi comparauit. Secunda, quod in sinu Christi Domini recubuerit, & fluentia Euangelij de ipso Sacro Dominici pectoris fonte potauerit. Tertia, quod in Filium Beatissimæ Virginis Matris coaptatus sit, illique Christus Dominus de cruce Virginem Matrem, Virgini commendarit.

Quarta est quam cæteris omnibus præfert, quamque omiſſis aliis maxime prædicat quod *Discipulus ille esset quem diligebat Iesus*. Hac se vna nota insignitum vult internosci, hoc se vno signare nomine, hac vna commendatione celebrari. Nec certe fallitur, quid enim amplius quàm sic diligi à Domino Iesu? Expende attentius. Congaude Sancto; Atque vt in aliquam huius diuinæ amicitiz participationem venias, propositam Veritatem reuolue, Cuius Ratio quoad primam partem ita est facilis vt non sit longius immorandum in ea declaranda vel pòderanda.

Quid enim clarius, quàm ex omnibus Regis aut regni Administris eum esse præcipue carum & acceptum Regi, qui fidelis sit in omnibus & qui quò fidelior est, eò sit acceptior: Vnde Sapientis, *Virum fidelem quis inueniet*, quasi diceret, illi sunt maxime qui quærentur, & illi sunt qui rarius inueniuntur. Atque ita pau-

Prov. 20.

lo post Idem; *Vir fidelis multum laudabitur.* Et certe apud Regem ^{Ibid. 28.}
 Iesum hic potissimum seruus probatur, *Quis putas est fidelis ser-*
uus? Euge serue bone & fidelis. Qui fidelis est in minimo, & in maiori ^{Math. 24.}
fidelis est. Hic iam quaritur inter dispensatores ut fidelis quis inue- ^{25.}
niatur. Esio fidelis usque ad mortem, & dabo tibi coronam vita. ^{Luc. 16.} O ^{I. Cor. 4.}
 vere debitum fidelitati præmium! o vere debitam tali præmio ^{Apoc. 2.}
 fidelitatem!

II. PUNCTVM.

SED qui diligit cordis munditiam, is maxime se fidelem exhibet
 Regi Christo.

Nam cum fidelitas his tribus potissimum indiciis innotescat:
 Primò, ut vniuersim in omnibus obseruetur: Secundò, ut exactè
 in singulis; Tertio, ut crebrò & frequenter ad omnes occasiones
 exerceatur: profecto hæc tria maxime reperiuntur in eo qui dili-
 git cordis munditiã. Primo enim vniuersim in omnibus quæ cor
 inficere possint ex quorumque vitio, plane viri fidelis est, ut se iis
 purget, aut non diligeret cordis munditiã. Deinde, non tantum
 prauos affectus, vel cogitationes quas vocant morosas prohibet,
 sed vel transitorias illas species quæ animo reluctanti obuersan-
 tur, ut ne vel minimâ labeculâ velit se infici, sitque eius anima ^{Ephes. 5.}
 verè *illa sponsa, quæ quantum humana infirmitas patitur, non habet*
maculam, aut rugam, aut aliquid huiusmodi, sed ut sit sancta & im-
maculata. Nullum plane commercium habeat nullumue cum
 alienis verbum quod suspicionem moueat, nullam prorsus crea-
 turæ dilectionem admittat quæ non sit pure in ordine Charitatis,
 propter ipsum Christum, ut illud etiam Apostoli perfecte im- ^{2. Cor. 11.}
 pleatur, *Despondi vos uni viro, Virginem castam exhibere Christo.*

Denique, quam crebro & frequenter in iis se exercent qui dili-
 git cordis munditiã, ex eo satis patet, quod toties id ipsum re-
 petit & frequenter, quoties aliqua incurrit species, quæ cor ip-
 sius possit inquinare. At quis non sentit quàm sint illæ frequen-
 tes & quàm importunæ species? ac propterea quanta & quàm
 manifesta sit fidelitas in ipsis repellendis? Vnde aptè Apostolus;
Si quis ergo emundauerit se ab istis, erit vas in honorem sanctificatum, ^{2. Tim. 2.}
& utile Domino, ad omne opus bonum paratum; Quod est vno verbo
esse, fidelem. Itane tu? *Laua à malitia cor tuum Ierusalem, ut salua* ^{Ierem. 4.}
fias; usquequo morabuntur in te cogitationes noxiæ?

III. PUNCTVM.

Apoc. 19. **Q**VI ergo diligit cordis munditiam, habebit amicum illum Regem
Ibid. 17. qui habet in vestimento, & in femore suo scriptum, REX
 REGVM & DOMINVS dominantium, vt scribit dilectus Discipulus, quia videlicet vt Idem ibidem ait, cum illo Rege Regum, Sunt vocati electi, & fideles. Fidelis est autem vel maxime qui diligit cordis munditiam, vt qui ad vnam vel leuissimam suggestionem, constanter in singulas horas dicat quod semel fidelis ille Ioseph ad ipsum crimen repellendum: Ecce Dominus meus, &c. Quomodo ergo possum hac malum facere, & peccare in Deum meum? Nonne hic fidelis fuit? Nonne in diligenda cordis & corporis munditia, fidelitatem suam ostendit? Nonne si cognitus fuisset Domino suo, magis illi carus fuisset & pretiosus? Sic ergo plane est de quouis diligente munditiam. Neque ultra labores in confirmanda Veritate satis nota, sed laborem omnem conuerte ad excitandam in te, cum diuina gratia, talem puritatis dilectionem quæ tibi faciat amicum Christum. Quanti hanc æstimes amicitiam, patebit ex dilectione puritatis: & quanta sit hæc dilectio, patebit ex vigilantia quam adhibebis, ad primas quasque vanitatis & voluptatis species exsufflandas. *Species dece-*
Dani. 13. *1. Thess. 5.* pit te. Ab omni specie mala abstinete vos.

Vide in Indicibus Verbo Castitas, Mortificatio, Puritas.



IN FESTO SS. INNOCENTIV.

Herodes videns quod illusus esset à Magis, iratus est valde; & mittens occidit omnes pueros qui erant in Bethleem, & in omnibus finibus eius, à bimatu & infra. Math. 2.

VERITAS PRACTICA

Inimici nostri magis prodesse possunt odio, quàm profuissent obsequio.

RATIO EST, Quia utilitas quæ spectat vitam spiritualem & æternam, longe maior est, quàm quæ temporalem.

Sed Inimici nostri nobis prodesse possunt odio suo, ad vitam spiritualem & æternam, cum solum ad temporalem nobis prodesse obsequio.

Ergo & magis prodesse possent odio, quàm obsequio; Dum bene scilicet utamur eorum odio; atque ad hunc bonum usum, valere multum potest ista Consideratio.

I. PUNCTVM.



Rudelis Herodes nouum

Non eripit mortalia,

Regem, venire quid times?

Qui regna dat cœlestia.

Rex iste qui natus est, non venit reges pugnando superare, sed S. Fulg. moriendo mirabiliter subiugare. Venit non ut pugnet viuus, sed ut Serm. 5. de Epiph. triumphet occisus. Quid est ergo quod ita turbatur & furit Herodes? Deprauata scilicet regnandi cupiditas, metus inordinatus, varia & inanis suspicio, similesque motus turbulenti, quos excitare solet ambitio, seu praua quæuis affectio. Illic trepidauerunt timore, ubi non erat timor! Nonne sicut tibi sæpe accidit? nonne sic Ps. 13. frustra sæpe commoueris, & sine causa concitaris? Recte sapiens, Multos supplantauit suspicio illorum, & in vanitate detinuit sensus Eccles. 3. illorum. Agnosce hic teipsum.

INTEREA verò pergunt impij satellites Regis, crudele in infantes edictum promulgant, non tam verbo quam facto; Vnus tantum quæritur, & in illo omnes mactantur, sicut ille in omnibus occiditur. Quale spectaculum! Quale impietatis Carnificum, cum pietate matrum certamen! Quid peccarant paruuli Serm. 10. de SS. sic mactati? Sed quam bene cum illis actum est! Quàm vere S. Augustinus. Ecce, inquit, profanus hostis nunquam beatis par-

culis tantum prodesse potuiffet obfequio, quantum profuit odio. Quid enim illis contuliffet? Quid tandem illud eft fi compareretur ad vitam illam beatam qua modo in coelis perfruuntur? Hi funt qui cum mulieribus non funt coinquinati, virgines enim funt; hi fequuntur Agnum quocumque ierit; Hi empti funt ab hominibus, primitia Deo & Agno, & in ore eorum non eft inuentum mendacium, fine macula enim funt ante thronum Dei. Congaude illis, pium deprome affectum. Saluete flores Martyrum, &c.

Sic porro nobifcum agitur, numquam foelicius quam cum miſerius creditur; numquam vtilius quam cum pernicioſius. Vere enim & de inimicis noſtris dicere poſſumus, quod de Herode S. Auguſtinus circa Innocentes: Magis prodesse poſſunt odio, quam profuiſſent obfequio. Expende accurate, ac primo illud quod præmittitur de maiori vilitate ſpirituale & æterna, quam temporali & caduca; quis dubitare poteſt, niſi de fide dubius aut de ſalute deſperatus? Quid enim prodeſt homini ſi mundum vniuerſum lucretur, anima vero ſua detrimentum patiatur? aut quam dabit homo commutationem pro anima ſua? TO TO non poteſt orbe animam emere, inquit S. Chryſoſtomus; Quid tibi totus igitur orbis, ſi perdis animam? Hæceſt vera & ſolida meditati materia. Non multa hic, ſed multum meditare quod eſt.

II. PVNCTVM.

SED Inimici noſtri nobis prodesse poſſent odio ſuo, ad vitam ſpiritualem & æternam, cum ſolum ad temporalem nobis prodeſſent obfequio.

Si enim patienter toleremus iniurias, probra, & quidquid odio ſuo Inimici congerent ad exercitationem humilitatis, & patientiæ, nonne inde profectus ſpirituſalis, & æternæ beatitudinis, cumulandæ ſeges ampliffima? Hæc eſt enim gratia, inquit ſanctus Petrus, ſi propter Dei conſcientiam ſuſtinet quis triſtitias, patienti iniuſte. Quæ enim gloria ſi peccantes & colaphizati ſuffertis? ſed ſi bene facientes patienter ſuſtinetis, hæc eſt gratia apud Deum. Et infra: Et quis eſt qui vobis noceat ſi boni æmulatores fueritis? ſed & ſi quid patimini propter Iuſtitiam, beati. Timorem autem Eorum ne timeueritis, & non conturbemini.

Si non haberemus qui aduerſum nos obſiſterent, ait Origenes,

*Agones non essent, nec victoribus munera ponerentur, nec regnum
cælorum vincen-^{Hom. 23.} tibus pararetur, neque momentaneum hoc & leue tri-
bulationis nostræ, supra modum, pondus gloriæ operaretur nobis in fu-
turo. Sic ipse & alij Patres fulissime narrant, quantum profue-
rit vnicuique sanctorum, habuisse aduersarium & inimicum
per quem factus est sanctus. Sic Innocens Abel à Caino primus
martyr effectus. Sic de Iacob & Esaü dicitur, *Quod hic maior* ^{Genes. 25.}
seruiet illi minori. Hic mali seruiunt bonis, inquit S. Augustinus,
non utique obsequendo sed persequendo, quomodo persecutores marty-
ribus, & lima vel mallei auro: quomodo mola seruiunt tritico, quomodo
panibus coquendis fornalia; sic mali seruiunt bonis, quomodo in fornace
aurificis palea seruit auro, ubi palea consumitur, & aurum probatur.
Sic dicitur de Israëlitis quod quanto magis opprimebant eos ^{Exodi 2.}
Ægyptij, tantò magis multiplicabantur & crescebant.*

Sic Iosephum inimici fratres extulerunt; Sic Dauidem Saul:
Iudæi Christum Dominum: atque vno verbo, quotquot san-
ctiores & beatiore^{Luc. 1.} veneramur, non nisi ex inimicorum iniqui-
tate, sanctitatem collegerunt, & beatitudinem sibi compararunt.
Salutem ex Inimicis nostris, & de manu omnium qui oderunt nos.
Ecce beatificamus illos qui sustinuerunt. Quasi diceret ille sanctus
Apostolus, Cur non ita nos existimamus beatos, si quid ab ini-
micis patimur, cum illos propterea veneremur ut sanctos & bea-
tos, qui talia passi sunt? ^{Iac. 5.}

III. PUNCTVM.

INIMICI ergo nostri magis prodesse possent odio, quàm profuis-
sent obsequio; Cum per odium illud tuum ad salutem & per-
fectionem nostram prodesse nobis possent; quæ est utilitas lon-
gè maior, quàm quæ humanis obsequiis deferretur. *Aufer rubi-*
ginem de argento, inquit sapiens, *& egredietur vas purissimum;* ^{Proem. 25.}
Hanc à nobis rubiginem auferunt Inimici, dum nos exacuunt,
aut potius dum eos patienter sustinemus. *Nam qui impatiens est,*
ut idem ait sapiens, sustinebit damnum, Id est patietur sine me-
rito, sine fructu, sine vllò emolumento, imo & cum detrimento
& iactura; Nam ad illa damna quæ ab inimicis patitur, adj-
cit Impatientiæ peccatum, & peccati pœnas consequentes ac-
cerfit. Quod aptè Propheta ille expressit qui dixit, *Ephraim*

- osée 7. *factus est subcinericius panis qui non reuerfatur; Hic enim panis ex utraque parte est maleficus; ex inferiori quidem, quâ est ambustus; ex superiori vero qua non solide coctus. Sic impatienti duplicatur damnum, quia malum male recipit, & priuatur bono quod inde haurire poterat. Fili hominis, versa est mihi domus Israel in scoriam: omnes isti as, & stannum, & ferrum, & plumbum in medio fornacis: scoria argenti facti sunt.* Egregius sanè Prophetæ locus, tum firmandæ Veritati propositæ, tum discutiendæ Conscientiæ, num tibi hæc verba competant: num proficias ex aduersis, vel deficias; num quod datur ad lucrum, accipias ad detrimentum; *Va his qui perdiderunt sustinentiam.* Erigere contra.
- Ibid. 1. Usque in tempus sustinebit patiens, & postea redditio iucunditatis.*



SI forte, in triduum sequens inciderit Dominica quæ est infra octauam Natiuitatis Domini, Vide infra, die nona Ianuarij: Et in die Purificationis B. Virginis, ad verba Simeonis, Tuam ipsius animam pertransibit gladius. Aut etiam formari potest

AD HÆC EIVSDEM VERBA:

Ecce positus est hic in ruinam, & in resurrectionem multorum in Israël. Luc. 2.

VERITAS PRACTICA:

Vel nouus homo Christus, veteris nostri hominis est ruina: vel vetus noster homo ruina est noui nascentis hominis: Alteruter alterius est ruina.

RATIO EST, Quia quando duo simul iuncti sibi contradicunt; alteruter alterius est ruina.

Sed nouus & vetus homo, simul iuncti sibi contradicunt. Ergo alteruter alterius est ruina.

PRIMA

RIMA propositio iam aperte patet ex iis quæ dicta sunt in die Natalis Domini.

SECUNDA sic facile persuadetur; Nam viuere secundum carnem, siue secundum naturales sensitiui appetitus inclinationes: & non ita viuere, sunt omnino contradictoria; Nihil est autem vetus & nouus homo, quàm vita secundum, & non secundum carnem, vt expressè habet Apostolus, locis hîc notatis, ac proinde sibi omnino contradicunt. Gal. 5.
Eph. 4.
Coloss. 3.

VNDE tandem manifesta hæc apparet Veritas, *Quod alter alterius est ruina.* Et sic disertè Apostolus, *Destruatur*, inquit, *cor. Rom. 6.* *pus peccati*, id est, moles illa peccatorum quæ à vetere procedit homine; neque est opus longiore discursu ad Veritatis probationem, sed ad praxis affectum, hinc etiam atque etiam, promouenda est voluntas. Nam sicut alteruter necessario debet in nobis viuere, prout nobis placuerit, ita plane videndum est cuiusnam ruina nobis magis placeat. Velles si posses vtrumque concordare & seruare, sed non potes; aut alterum necessario retineas, & alterum pellas. Times forte ruinam veteris hominis, times priuationem voluptatis, ambitionis, libertatis, & reliquæ concupiscentiæ, times destructionem illius corporis peccati, quam sequi necesse est, nouo se in nobis ædificante homine.

At vide quænam sit maior ruina, si ne pereat vetus homo, nouum perdis: sicut enim perdis Christum, perdis coelum, perdis pacem, perdis te ipsum, quâ tui parte tibi esse debes carior. Confer vtramque simul ruinam & iacturam. Ruina veteris hominis est ruina vanæ gloriæ; ruina noui hominis est ruina diuinæ gloriæ. Ruina veteris est destructio cogitationum carnis: at ruina noui est destructio cogitationum & consiliorum Dei. Ruina veteris est restrictio risus inanis, & moderatio lætitiæ sensibilis: ruina noui est priuatio solidæ & diuinæ consolationis. Ruina veteris est, humanæ contemptus gratiæ: ruina noui est diuinæ gratiæ coelestiumque simul omnium iactura bonorum & beatitudinū. Sic perge in aliis vtriūque hominis antithetis bonis & malis: & supposita necessitate alterutrum eligendi, vide ex duobus bonis quodnam melius: Vide ex duobus malis quodnam deterius. *Quæ societas luci ad tenebras? quæ consensio Christi ad Belial?* Non tibi vita tollitur, non gloria, non lætitia; sed in melius mutatur. 2. Cor. 6. Non est perdere, minus pro maiori dare. *Rapinam bonorum ve-* Hebr. 10

strorum cum gaudio suscepistis, cognoscentes vos habere meliorem & manentem substantiam.



TRIDVO sequenti, agitur de Pastoribus ad præsepe Domini, primò quidem proficiscentibus; tum ibi subsistentibus: atque inde regredientibus.

DIE XXIX. DECEMBRIS.
DE PASTORVM PROFECTIONE
AD PRÆSEPE DOMINI.

Transeamus usque Bethleem, & videamus hoc verbum quod factum est nobis: & venerunt festinantes. Luc. 2.

VERITAS PRACTICA.

Sicut discursum nostri Intellectus statim sequi debet affectus voluntatis; Ita & affectum effectus, seu exequutio.

RATIO EST, Quia idcirco statim affectus sequi debet Intellectum discurrentem, ne discursus evanescat, sine ullo voluntatis affectu.

Sed nisi effectus atque exequutio statim sequatur affectum, affectus non minus exarescet sine effectū, quam sine affectu discursus.

Ergo perinde sequi debet affectum effectus, atque affectus intellectum; Quod tamen rarum est, & diligenter aduertendum.

I. PUNCTVM.

PASTORES erant in regione eadem vigilantes, & custo- Luc. 2.
dientes vigilias noctis, super gregem suum. Et ecce Angelus
Domini stetit iuxta illos, & claritas Dei circumfulsit illos, &
timuerunt timore magno; Et dixit illis Angelus; Nolite timere, Ecce
enim euangelizo vobis gaudium magnum, quod erit omni populo, quia
natus est vobis hodie Saluator, qui est Christus Dominus, in ciuitate
David.

Vide quæ plura habentur in textu, & mirare quod ad pasto-
res potius quam ad alios prioris notæ homines, dirigantur à Deo
Angeli. Expende singulas Angeli voces, atque has præcipue,
*Et hoc vobis signum: Inuenietis Infantem, pannis inuolutum, & po-
situm in praesepe.* O qualem Christi nati notam! quale insigne
Regis Angelorum & hominum, *PANNI & PRAESEPE!*
Aduerte, vt in diuinis Laudibus quas decantant Angeli, datur
Deo gloria, & pax hominibus, vnderu si tibi assumis gloriam
quæ Dei est, pacem tibi Deus auferet, & erit gloria tua in con-
fusione. Denique obserua diligenter quàm citò pastores affe-
cti fuerunt ad videndum Infantem, de quo audierant Angelos,
& quam citò affectum effectus sequutus fuerit; Sic enim vt An-
geli discesserunt, pastores loquebantur ad inuicem, *Transeamus
vsque Bethleem, & videamus quod factum est; & venerunt festinantes.*

Sic plane in Meditationibus intellectum discurrentem statim
affectus sequi debet: & affectum effectus. Tota vis Veritatis est
in particula *statim*: Nemini enim dubium est quin aliquando ef-
fectus sequi debeat, sed an statim, aut æque cito atque affectus
discursum sequitur; hoc porro est quod pauci norunt, & ta-
men eadem prorsus est Ratio pro affectu & effectu.

Quid est enim quod tantopere commendatur in meditando,
vt affectus statim excitentur post discursum? Nempe ne discursus
evanescat, quo evanescente nullus sit voluntatis motus & af-
fectus, ac proinde nullus orationis fructus. Nam cum Volun-
tas non moueatur circa bonum suum, nisi prout est cognitum
& manifestatum ab intellectu: certe quamdiu ista præsens vige-
bit cognitio & manifestatio, magis affectiua erit voluntas, quàm
si non esset præsens. Sicut quando è filice scintilla excutitur,

debet esse paratus fomes qui scintillam excipiat, ne alioquin pereat: Ita in meditatione exardescit ignis, prout voluntas cum Gratia se opportune subiicit infuso Lumini. *Inueni quem diligit anima mea, tenui eum nec dimittam*; Hoc est affici, hoc est illustrari & ardere. In quo certe deficiunt hi de quibus dicitur, *Quia cum cognouissent, non sicut Deum glorificauerunt, aut gratias egerunt, sed euanuerunt in cogitationibus suis, & obscuratum est inspiens cor eorum*. Nonne tu ex his es?

Cant. 3.

Rom. 1.

II. PUNCTVM.

SED nisi effectus aut exequutio statim sequatur effectum, affectus non minus exarescet sine effectū, quā sine affectū discursus.

Ecclef. 8.

Est quidem tempus & opportunitas omni negotio, vt ait Sapiens, neque semper ita paratum est & opportunum tempus vt quamprimum afficimur ad aliquid efficiendum, effectus affectum sequi possit: Tunc certe differendum, & sat citò si bene, Nam vt est in sacris prouerbiis, *Vbi non est scientia anima, non est bonum: & qui festinus est pedibus offendet*. Verum non est tam frequens hæc præcipitatio, neque tam damnosa, quā tarditas: Vix defunt occasiones rei bene gerendæ, prout in meditatione quotidiana statuitur: quia dum res gerenda statuitur, circumstantiæ loci & temporis præuidentur, quæ tamen quando occurrunt, differtur sæpe effectus, & vix vnquam postea reuocatur; quandoquidem conceptus in meditatione affectus interim dum effectus differtur, elanguit; neque ita valet ad effectum dilatum exequendum, sicut dum calebat affectus. *Venerunt filij vsque ad partum, & vires non habet parturiens*.

4. Reg. 19.

Sap. 4.

Is. 56.

Hoc valde expendendum, sicut facile euanesceat discursus, ita & affectus: cito arefcit lachryma, omnis humana voluntas ambulatoria est, *Fascinatio enim rugacitatis obscurat bona, & inconstantia concupiscentia transuertit sensum sine malitia*, Id est, etiam si non aduertas nec cogites. Atque inde fit quod dictum est, vt nisi illo ipso calente motu & durante affectu voluntatis, statim effectus & exequutio, dum imperari potest, imperetur, vix vnquam fiet, quia mutabitur, aut refrigescet affectus; *Et erit sicut hodie, sic & cras, & multò amplius*, vt ait Propheta; Id est eadem semper peccabis, non conuertèris, non emendaberis, non proficies,

licet ad profectionem afficiaris, quia nimis longe diſiungis effectum ab affectu.

Hoc eſt quod Chriſtus Dominus exprobrauit Iudæis, qui cum ſatis bene affecti eſſent ad prædicationem S. Ioannis, quia tamen non ſtatim executio ſequuta eſt illum affectum, nihil illis profuit vel audiuiſſe Ioannem, vel in eo audiendo commotos *Ioan. 5.* eſſe. *Ille erat lucerna ardens & lucens, vos autem voluiſtis ad horam exultare in luce eius;* Quasi diceret, in hoc erraſtis, quod vobis ſatis eſſe putaſtis recte in illum affici: oportebat enim ultra progredi, & ſtatim ad effectum proſilire. Quod & alibi explicat clariſus dicens; *Publicani iuſtificauerunt Deum, baptizati baptiſmo Ioannis: Luc. 7.* *Phariſæi autem & Legiſſeriti conſilium Dei ſperuerunt in ſemetipſos non baptizati ab eo.* O quale eſt illud; *Conſilium Dei ſpernere,* dum affectum inefficacem reddimus!

III. PUNCTVM.

SICVT ergo diſcurſum Intellectus meditantis Veritates propoſitas ſtatim ſequi debet affectus Voluntatis, ita & affectum effectus: Quia vt aperte eſt demonſtratum, par vtrobique eſt ratio; neque minus timendum eſt quod effectus ab affectu diſiunctus, nullus ſit, quàm nullus eſſet affectus, ſi affectus à diſcurſu diſiungeretur. Propterea, inquit Apoſtolus, *abundantiſſe oportet Hebr. 2.* *obſeruare nos ea quæ audiuiſimus, ne forte perefluamus.* Non modo effluunt & pereunt diſcurſus & affectus, niſi effectus ſequatur; ſed nos ipſi, quod mirum eſt, perefluimus, Id eſt, toti conſumimur & perimus, quia ſine effectu nihil ſumus; Vnde & Prophetæ; *Ponite corda veſtra ſuper vias veſtras; ſeminatiſtis multum, & Agg. 1.* *intuliſtis parum: comediſtis & non eſtis ſaturati: Et qui mercedes congregauit, miſit eas in ſacculum pertuſum.* Nonne is ſe perire diceret, ſic pereunte mercede ſua?

In mente ergo habe, inquit Dominus, *qualiter acceperis, & am- Apoc. 3.* *diceris, & ſerua, & pœnitentiam age,* de neglectis ſcilicet occaſionibus, & toties dilatis effectibus. *Putasne quare moratur ſi- Tob. 10.* *lius meus, aut quare detentus eſt ibi?* Sic Tobias Pater de Filio; ſic de te Deus, dum nimis tardas. Eſto velocior, & funem magis præſcinde quam ſolue.

Vide ſupra Feriam 3. infra Hebdomadam primam Aduentus. Et Verbo, *Effectus.*



DIE XXX. DECEMBRIS.
DE INGRESSV PASTORVM
IN LOCVM, VBI NATVS EST DOMINVS.

Inuenerunt Mariam, & Ioseph, & Infantem positum in præsepio. Videntes autem cognouerunt de verbo quod dictum erat illis, de puero hoc. Luc. 2.

VERITAS PRACTICA.

Cum simplicibus fermocinatio eius, seu familiaris communicatio. *Prov. 3.*

RATIO EST, Quia his se potissimum communicat Christus, qui se illi totos subjiciunt.

Sed simplices sic se, inter alios, Christo subjiciunt.

Ergo & His maxime se Christus communicat. Quod certe est ad Simplicitatis commendationem, ac vitij oppositi detestationem illustrissimum, & maxime necessarium.

I. PUNCTVM.

SI tibi mirum fuit Pastores præ multis aliis vocatos & missos ab Angelis ad visendum Dominum; magis adhuc mirandū apparet, quod illi locum ingressi vbi reclinatus erat Infans in præsepio, statim agnouerūt illum esse Saluatorem & Christum Dominū, quem Iudæi expectabant, & qualem Angeli nunciauerant. Quam multa dubiam hanc illis fidem poterant facere! Quis facile crederet talem Regem nasci ex tam paupere matre, vt non haberet vbi eum reclinaret, nisi in præsepio? Quis nisi bene persuasus putaret eum Saluatorem aliorum qui

necessaria vitæ vix haberet? Quod si Angeli suum illum Regem agnoscunt, cur ei non ministrant? Cur non transferunt in nobiliorem & commodiorem locum? Cur non conuocant vniuersum mundum ad eum adorandum? Cur non saltem Iudæos omnes, aut certe cur non præcipuos? Cur potius pastores, viros simplices à quibus coli non est ita magnificum & regium, sicut à viris principibus?

Hæc & similia poterant sibi pastores objicere, atque à credendo retardari; sed nihil horum occurrit: statim vt vident oculis corporeis puerum, vident oculis mentis Saluatorem & Christum: Nihil contra discurrunt animo, nihil ratiocinantur aduersum, nihil opponunt contrarium. Ita se illis intime & plene communicat Verbum illud infans, vt intus loquatur, intus sermocinetur, intus dicat quod olim per Prophetam: *Ego ipse qui loquebar, ecce adsum.* Erant illi scilicet simplices animo & *1s. 52.* docibiles Dei, quos Christus maxime diligit, quibuscum sermocinatio eius, & familiaris communicatio. *Ioan. 6.*

Admirare, & adora hanc diuinam Sapientiam & Bonitatem: Tum vt videas manifeste quàm sit vniuersim certa Veritas, quæ ex Prouerbiis proponitur modo consideranda, *Prou. 3.* expende primam illam Rationis allatæ partem, quâ dicitur Christum se his maxime communicare qui se illi totos subiciunt, id est, intellectu, & voluntate. Nam cum ex iis quæ communicat, multa sint quæ superent humanum intellectum, & quibus etiam naturalis voluntas repugnat: certe nisi quis subiciat illi hanc duplicem animi facultatem, non est aptus tantæ communicationi, nec vero dignus tantæ familiaritati. *Vade post me satana, scandalum es mihi, quia non sapis ea quæ Dei sunt, sed ea quæ hominum.* *Matth. 16.* Hæc si dicta sunt illi viro qui Christo contradicebat in re tam noua & prope incredibili, qualis erat eius futura passio: quid diceretur illi qui repugnaret Domino in aliis quæ à communi sensu minus distarent. *O homo tu quis es, qui respondeas Deo. VAE* *Rom. 9.* *qui contradicit fictori suo, testa de samitis terræ; nunquid dicit lutum figulo suo, quid facis?* *1s. 45.*

II. P V N C T V M.

SED simplices sic se Christo subiciunt, intellectu, & voluntate. In hoc enim proprie est simplicitas animi, vt sicut paru-

lus, non reluctetur, non repugnet, sed simpliciter credat & faciat quod cognouerit à Domino reuelatum & ordinatum. *Quod precipio tibi, hoc tantum facito Domino*, ait Moyses, *nec addas quicquam nec minuas*. Hoc vere est esse simplicem; Atque hinc dicitur in prouerbiis: *Abominabile Domino cor prauum, & Voluntas eius in iis qui simpliciter ambulant*; Quia hi scilicet sese illi subiiciunt. Hoc dilerte S. Ioannes Chrysostomus allata similitudine paruulorum: *Etiamsi*, inquit, *Regina cum diademate atque purpura paruulis offeratur, non preponunt eam matri licet pannosa*; sic se simplices diuinæ fidei & prouidentiae totos addicunt, vt licet humilia & abiecta proponantur ad credendum, vel faciendum, iis potius acquiescant, quam quæ mundus iactat & offert. *Gloria nostra hac est*, inquit Apostolus, *testimonium conscientiae nostrae, quod in simplicitate cordis, & sinceritate Dei, & non in sapientia carnali, sed in gratia Dei, conuersati sumus, in hoc mundo*.

Possesne ita loqui? quid impedit? quid contra, se opponit? prudentia illa scilicet carnis quæ mors est, sapientia illa carnis, quæ inimica est Deo, *Legi enim Dei non est subiecta, nec enim potest*: ait idem Apostolus; vnde illud vix propheticum: *ux qui sapientes estis in oculis vestris, & coram vobismetipsis prudentes*. Nec minus tremendum illud quod est apud Iobum: *Qui apprehendit sapientes in astutia eorum, & consilium prauorum dissipat: per diem incurrent tenebras, & quasi in nocte, sic palpabunt in meridie*. Quasi diceretur, sua ipsi sapientia desipiunt: sua ipsi luce cæcantur; dum se volunt regere contra Deum, suis ipsi consilijs reguntur contra seipsos. Quod sanctus Gregorius variis illustrat exemplis. Tu à teipso dilce, quàm male tibi cesserit, quoties à Christo discesseris.

III. PUNCTVM.

PA T E T ergo quàm vere dictum sic à Sapiente: *Abominatio Domini est omnis Illusor, & cum simplicibus sermocinatio eius*: Id est, communicatio familiaris de diuinis mysteriis, aut quibuscumque rebus spectantibus ad salutem & perfectionem; Deo enim sermocinari est, inquit S. Gregorius, *per illustrationem suæ præsentiae, humanis mentibus arcana reuelare*; Cum simplicibus igitur sermocinari dicitur, quia de supernis mysteriis illorum mentes radio

radio suae visitationis illuminat, quos nulla umbrâ duplicitatis obscurat. Et sanctus Hieronymus, *Sermocinatio*, inquit, *Domini*, cum *In Pron.* simplicibus est, quia illos cœlestis sapientia secretis illustrat, quos terreni fastus ac duplicitatis nihil habere considerat. Hinc etenim dicit, *Matth. II.* abscondisti hæc a sapientibus & prudentibus, & reuelasti ea paruulis.

Denique quid apertius ad rem nostram quàm quod ipsa proclamât Sapientia: *Sentite de Domino in bonitate, & in simplicitate* *Sap. I.* cordis querite illum, quoniam inuenitur ab his qui non tentant illum: apparet autem eis qui fidem habent in illum: peruersa enim cogitationes separant à Deo, probata autem virtus corripit insipientes, quoniam in maleuolam animam non introibit sapientia, nec habitabit in corpore subdito peccatis. Spiritus enim sanctus disciplinæ effugiet fictum.

Hinc te agnosce, vix vnquam fateberis te fictum & simulatum: sed nonne agnoscis te aliquando & sæpius in oratione defertum à Deo, & in mediis versari tenebris, ubi alij clara luce fruuntur? Vnde hoc putas? Audi iterum Sapientem; *Quoniam* *Ecclesi. I.* accessisti maligne ad Dominum, & cor tuum plenum est dolo & fallacia. Fingis te sæpe velle quod non vis, nec velle quod vis. Atque illud ipsum si posses, ipsi Deo affingeres. *O plene omni dolo & fallacia, fili diaboli, inimice omnis Iustitia, non desinis pervertere vias Domini rectas. Et nunc ecce manus Domini super te, & eris cæcus, non videns solem vsque ad tempus.* Hæc ad dolosum Apostolus. *De-* *Ecclesi. 2.* prime magis ac magis cor tuum, ne se nimis efferat, ne sibi nimis credat.

Vide Verbo, *Simplicitas, Prudentia.*



DIE XXXI. DECEMBRIS.

DE REDITV PASTORVM, ET RELATIONE EORVM QVÆ AVDIERVNT, ET VIDERVNT.

Et reuersi sunt Pastores glorificantes, & laudantes


*Deum, in omnibus quæ audierant & viderant,
sicut dictum est ad illos. Luc. 2.*

VERITAS PRACTICA.

Ne quid nimis, aut quid minus, cum proximo.

SENSVS & RATIO est, quod ubi æquale apparet periculum incidendi in excessum vel defectum, adhibenda est maxime cura, ut moderatio teneatur, ne quid nimis aut minus fiat. Sed in communicatione cum proximo, tale apparet periculum. Ergo ibi maxime adhibenda est cura, ne quid nimis, aut minus cum illo fiat, quàm debet fieri.

I. PUNCTVM.

CCVRRVNT hîc duo consideranda, quæ nonnullam videntur habere oppositionem, unde tamen perutile documentum elicitur. Primum est, quod Pastores à præsepio Domini reuertentes, non cessabant omnibus obuiis prædicare, & miris efferre laudibus, quæ audierant ab Angelis & viderant in Puero nato. Alterum vero huic absimile est quod Maria & Ioseph mirum seruarent silentium, nequæ ulli cuiquam de hoc Mysterio verba facerent. De Iosepho quidem nihil prorsus habet Euangelista; de Maria autem hoc vnum, *Quod conseruabat omnia verba hæc, conferens in corde suo*, Id est sibi soli intenta, conferebat simul quæ ab Angelis & à Pastoribus dicebantur, ut inde vel ad laudandum Deum, vel ad profectum eliciendum excitaretur.

Quid porrò est, cur Ipsa non etiam sicut Pastores de his loqueretur, & quæ tam mira nouerat de Filio suo, non communicaret aliis? Aut quomodo Pastores, viri rudes & ignari hoc sibi assumebant? Videlicet ut hinc discas, & loquendum, & silendum. Disce à Pastoribus, opportune loqui de Diuinis & spiritualibus; Disce à Maria Matre, de iis etiam suo silere loco, & tempore. Vix aliud est ubi à Viris etiam spiritualibus peccetur

frequentius & grauius, quàm in horum aliquo extremorum, siue per excessum siue per defectum. Vel enim nimis se suaquè communicant, vel non satis. Et dum sæpe vnum euitare volunt extremum, in aliud incidunt. Quamobrem hic maxime seruanda est moderatio: *Ne quid nimis aut quid minus*. Atque vt practica reddatur Veritas, tùm adhibenda præcipue cautio, & attente consideranda Ratio quæ id suadet.

Quando scilicet æquale apparet periculum, & par vtrinque occasio imminet, incidendi in aliquod extremum, id est, in excessum vel defectum, circa quoduis obiectum: tum vel maxime attendendum, inuigilandum, & vno verbo, sic est cauendum, sicut in periculo & occasione peccati; Nam reuera omne extremum, quodcunque sit, siue excedens, siue deficiens, vitiosum est: & sicut virtus non consistit nisi in medio quod est inter vtrumquè extremum, ita nisi seruetur hoc medium, plane vitium est & peccatum. Hinc illa S. Gregorij Nazianzeni præclara sententia: *Virtutem excessus & defectus per aequè labefactant, non secus ac regulam additio aliqua, vel subtractio*. Sanctus item Hieronymus aptissime: *In virtutibus nec Hyperbases nec Ellypses, nec plus, vnde minus, sed omnia temperata: & si à recta via paululum declinaueris, non interest vtrum ad dextram vadas, an ad sinistram, cum verum iter amiseris*. Propterea toties admonemur in Scripturis; *Ne declinemus ad dexteram aut ad sinistram, sed per viam quam præcepit nobis Dominus noster, ambulemus*. Quo etiam spectant illa Sapientum monita: *Prudentia tua pone modum. Noli esse iustus multum, neque plus sapias quàm necesse est, ne forte obstupescas*. Itane tibi caues in omnibus? an potius temere & inconsulto te permittis corruptæ naturæ, quæ semper in aliquod propendet extremum?

Orat. 26.

In Isai.

Deut. 5.

Ios. 1.

Prou. 4.

Pro. 23.

Eccles. 7.

II. PUNCTVM.

SED in communicatione cum proximo, par est occasio & æquale vtrinque periculum, ne quid nimis, aut minus fiat.

Nam ex vna parte, qui tibi videntur sapere, & aliquid nosse de Diuinis, profusiores sæpe sunt in loquendo, & verendum magnopere ne illis accidat quod ait Ecclesiasticus; *Cor fatui quasi vas confractum, & omnem sapientiam non tenebit*. Et Sapiens in Pro-

Eccles. 28.

Prou. 29. uerbijs: *Totum spiritum suum profert stultus; sapiens differt & re-*
Rom. 12. *seruat in posterum.* Contra quos etiam manifeste Apostolus: *Dico*
enim per gratiam qua data est mihi, omnibus qui sunt inter vos, non
plus sapere quam oportet sapere; sed sapere ad sobrietatem: & unicui-
que sicut diuisit Deus, mensuram fidei.

Ex alia autem parte, non minus est periculi, si taceas quan-
Is. 6. do loquendum est; *Va mihi quia tacui*, ait Propheta. Et Sapiens,
Eccles. 4. *Ne reuerearis proximum tuum in casu suo, nec retineas verbum, in*
tempore salutis, non abscondas sapientiam tuam in decore suo. Et rur-
Prou. 11. sum, *Qui abscondit frumenta, maledicetur in populis; benedictio au-*
tem super caput vendentium. Quod sancti Patres interpretantur
1. Pet. 4. de communicatione rerum spiritualium, ad quam sanctus Pe-
 trus nos ita strictè obligare videtur, quàm sanctè est obligatus
 Dispensator dispensare bona sibi data in hunc finem: *Vnusquis-*
que, inquit, *sicut accepit gratiam, in alterutrum illam administran-*
tes, sicut boni dispensatores multiformis gratia Dei. Ac proinde qui
 tam pio desit operi, nonne is suo desit officio? Nonne is per de-
 fectum peccabit, & minus faciet quam oporteret? Aut si forte
 loquaris, si quæ sentis comunicas: Nonne suprà quàm tibi li-
 cet, tu tibi sæpe assumes? Nonne plus nimio te efferes? Nonne
 per excessum delinques? Videsne par vtrîmque periculum? Tene
 verò vides in horum alterutro sic versari, vt vix vnum effugias,
 quin deuoluaris in aliud?

III. PUNCTVM.

NE quid igitur nimis aut minus fiat, agenti cum proximo, tan-
 ta cura & diligentia est attendendum, quanta est præsens oc-
 casio & æquale vtrîmque periculum, incidendi in alterutrum extre-
 morum, nisi diligenter attendatur. Quod Sapiens apertissime mo-
 nuît, dum ait, *Qui conatur multa agere, incidet in iudicium:* tum
Eccles. 29. subdit, *Recupera proximum secundum virtutem tuam, & attende*
tibi ne incidas. Quali diceret, nisi attendas, incides, quia lubri-
 cum & periculotium est opus.

Tota autem attentio cum ex multis pendeat circumstantiis,
 tum personæ, tum loci & temporis, tum etiam modi & finis
 in agendo: Vide hic quæ tuæ partes sint, quæ naturalis inclina-
 tio aut diuinæ impulsus gratiæ, in alterutum ex his duobus?

Ante nimis aut minus quam par esset, communicas? An forte nimis cum quibusdam, & minus cum aliis? An forte nimis cum arridet; & minus quando non ita placet? An forte nimis cum nobilioribus; & minus cum plebeis? Hæc sunt vbi hætenus deliquisti: hæc sunt vbi deinceps ne delinquas, attentio est excitanda. Vide distinctius, vbi, & quando, & illud ibi applica. *Attende tibi ne incidas.*

Dixi, custodiam vias meas, ut non delinquam in lingua mea. Ps. 38.
Pone Domine custodiam ori meo, & ostium circumstantia labiis meis. Ps. 140.
In dubio satius est minus quam nimis. *Cessa prior causa discipli-* Eccles. 31.
na, & noli nimius esse, ne forte offendas.

Vide intra decimo octauo Ianuarij. Et in 2. parte, tota Hebdomada secunda post Octauam Paschæ. In tertia viro parte, Hebdomada decima, post Octauam Pentecostes.





DIE I. IANVARII ET ANNI.
IN CIRCVMCI-
SIONE DOMINI.

DE NOMINE IESV, ET DE PVRA
INTENTIONE RENOVANDA.

Postquàm consummati sunt dies octo, ut circumcideretur puer, vocatum est nomen eius Iesus, quod vocatum est ab Angelo, priusquam in utero conciperetur. Luc. 2.

Omne quodcumque facitis in verbo, aut in opere, omnia in nomine Domini nostri Iesu Christi. Coloss. 3.

VERITAS PRACTICA.

De pretio Nominis IESV, tantò plus circumciditur & nobis deperit, quantò minùs perfectè nos circumcidimus.

*RATIO EST, Quia de pretio sacri Nominis tantò plus deperit, quanto minus nobis applicatur.
Sed tantò minus nobis applicatur, quantò minùs perfectè nos circumcidimus.*

De circumcidendis affectibus ad puram Intentionem in N.D. 175
Ergo hinc etiam de pretio nominis Iesu, tantò plus circumciditur
& nobis deperit.

Quod cum sit valde deplorandum, idcirco circumcidendis prauis
affectibus, & purificandæ in omnibus intentioni, vacandum
est diligentius, ut omnia nostra in NOMINE DOMINI
NOSTRI IESV, FIANTE.

I. PUNCTVM.



RIA occurrunt hodie quæ simul considerata nos
ed ducent facilius quò potissimum spectare debe-
mus. Primum est CIRCVMCISIO DOMI-
NI, quam ut cæteri infantes octauo à Natiuitate
die subire voluit, in exemplum obedientiæ & hu-
militatis. O quale exemplum! Non solùm formam hominis
ut in Natiuitate, sed formam habet peccatoris. *Caput pro mem-
bris accipit curationem, quæ non est necessaria capiti, nisi ad sanitatem
corporis.* Hæc fufe sanctus Bernardus.

Serm. 3. in
Circumc.
Dom.

Secundum est, IMPOSITIO NOMINIS IESV.
Quod vnum continet alia Dei nomina, significatione, dignitate
& pretio. Nempe, ut ait idem S. Bernardus. *Ipsam est de quo* 1. Cant.
sponsa in Cantico amoris, Oleum, inquit, effusum, Nomen tuum. Hoc
enim in aliis diuinis nominibus expromitur & quodammodo
effunditur. Hoc est magnum, excelsum, sanctum & terribile No-
men eius. Hoc est nomen nouum quod os Domini nominauit; Hoc
est Nomen super omne nomen, in quo omne genu flectatur, cælestium, Ps. 110.
terrestrium, & infernorum. Hoc est nomen & non aliud sub cælo da- 1f. 62.
tum hominibus, in quo nos oporteat saluos fieri. Hæc tecum re- Phil. 2.
cole, cum metu & reuerentia, ut ait Apostolus. Act. 4.
Hebr. 12.

Tertium denique est, NOVI ANNI RECVRREN-
TIS INITIVM quo nos nostraque omnia Christo, vel per
ipsum Deo, qui est PRINCIPIVM à quo, Et FINIS ad
quem conditi sumus, offerre debeamus, & puram ei seruiendi
& placendi in omnibus, Intentionem renouemus. Atque hoc est
potissimum quod spectemus hodie, & ad quod exequendum
duo alia referuntur. Nam Circumcisione admouemur, omnia
illa amputanda esse, & velut circumcidenda quæ huic puræ

Coloss. 3.

+

Serm. 15.
in Cant.

oblationi & intentioni possent obesse. Per nomen vero IESV subministratur modus & formula tam facilis atque efficax purificandæ deinceps intentionis, vt quoties dicas, sicut monet Apostolus, *IN NÖMINE DOMINI*, totum dicas quod ad puritatem Intentionis sufficiat. Hæc est enim vis & virtus, hoc pretium & valor huius sancti Nominis, vt si operibus nostris præfigatur & infundatur, significationis suæ vim & virtutem impertiat, Id est, salutem & sanctitatem conferat. Vnde sanctus Bernardus, de hoc salutifero agens Nomine; *Semper tibi in sinu sit, semper in manu, quo tui omnes in IESVM & sensus dirigantur & actus: pone me, inquit, signaculum in corde tuo, signaculum in brachio tuo; habes in nomine Iesu unde actus tuos vel prauos corrigas, vel minus perfectos adimpleas. Itemque unde tuos sensus aut serues ne corrumpantur, aut si corrumpantur, sanes.*

Recte hoc postremum de sanandis corruptis sensibus & affectibus addit sanctus Bernardus, nam nisi sani essent affectus, sancti non essent actus, quantumcumque illis sanctum IESV nomen infunderetur: quamobrem Circumcisio simul & Nomen iungantur necesse est; nec Circumcisio valet sine Nomine, neque Nomen sine illa Circumcisione spiritali, quâ nostri corrigantur affectus. Hoc quidem difficilius, sed tamen ita necessarium est, *Vt de pretio Nominis IESV tantò plus circumcidatur, & pereat, quanto minus perfecte, prauos illos affectus circumciderimus.* Atque idcirco hæc Veritas consideranda proponitur, vt grauiore proposito malo, quod est in illa iactura Nominis tam pretiosi, leuior appareat quæuis difficultas opposita, & facilius acceptetur.

Gal. 5.

Age ergo expende quid sit, de pretio nominis IESV aliquid circumcidi & deperire: Nempe non applicari nobis. Quidquid enim Christus Saluator nobis sit meritis, nisi nobis applicetur per media ordinata, nihil prodest ad salutem. *Ecce Ego Paulus, dico vobis, quoniam si circumcidamini, Christus vobis nihil proderit. Euacuati estis à Christo; à gratia excidistis. Oportebat scilicet veterem legem in nouam verti: oportebat Legalem Circumcisionem in spiritualem mutari: oportebat, Iudaismum in Christianismum transferri, quod qui nollet facere, nollet Christum sibi applicare, nec proinde sibi prodesse. Quicumque in Christo baptizati estis, Christum induistis, ait Idem eisdem, Id est Christum*

Ibid. 3.

stum vobis in baptismo applicastis, sicut applicatur indumentum. Et quia variæ sunt applicationes meritorum Christi, Idcirco idem Apostolus etiam baptizatis dicebat, *Induimini Dominum Iesum Christum, & carnis curam ne feceritis in desideriis.* Rom. 13. Quasi diceret, qui carnis curam facit in desideriis, non sibi Christum induit, non sibi applicat, quo Ille deest modo; vnde & cuidam Dominus, *Suadeo tibi emere à me aurum ignitum, probatum, ut locuples fias, & vestimentis albis induaris, & non appareat confusio nuditatis tue.* Apoc. 3. Tepido loquitur, id est tibi. Tepiditatis autem hæc est nuditas, & hæc confusio nuditatis, ut malis esse nudus, quàm Christo indutus & ornatus.

II. PUNCTVM.

SED tantò minùs nobis applicatur valor & pretium sacri Nominis Iesu, quanto minus nos perfecte circumciderimus.

Vniuersum vera est propositio de omni genere applicationis meritorum Christi, cui tantum obesse potest Cor incircumcisum, quantum opponetur illi merito, seu certæ Gratia quæ erat communicanda. Verum hîc duntaxat agitur de applicatione sancti Nominis ad opera nostra, ut sic per puram Intentionem ad Deum dirigantur; sensusque propositionis est, quod prout intus, bene vel malè ordinatos affectus habuerimus, quod est esse circumcisum, vel incircumcisum; plus aut minus valebit pronunciatum Nomen ad formandam nostram Intentionem, seu ad dirigendos in Deum actus nostros. Debet enim concordare animus ori nostro, & dum ore profitemur nihil nos velle in opere, nisi quod significatur Nomine Iesu, nihil habere debemus repugnans huic significationi & valori: aut certe si quid est quod repugnet, impeditur applicatio & valor talis Nominis, atque ore tantum dicis, corde verò contradicis. Imo et si corde ipsum diceres, & toto affectu pronunciares, te velle in nomine Iesu operari quod agis, si tamen hoc agis propter honorem tuum, propter solam tuam commoditatem, delectationem, & lucrum, nihil agis, nihil dicis; quia repugnat te operari in nomine Iesu, & propter vanitatem, aut voluptatem tuam: vnde quantum volueris vnum ex his repugnantibus, tantum oportet te nolle aliud. Quantum volueris placere Deo, tantum oportet te nolle placere tibi, vel

mundo. Et quia naturaliter tibi & mundo magis placere appetis quam Deo; nisi circumcidas & reprimas hos appetitus, non placebis Deo, sicque nihil proderit pronuntiatio nominis Iesu quâ prætendis illi velle placere: nam per oppositum affectum illa destruitur & exhauritur; aut certe tanto minus proderit, tantoque minus applicatur eius valor & pretium, quanto magis de opposito restabit affectu, seu quanto minus perfecte atque integre teipsum circumcideris. *Qua est enim participatio Iustitiae cum iniquitate? aut qua societas Luci ad tenebras? Qua autem conuentio Christi ad Belial?* Responde Apostolo id quærenti, aut agnosce nihil tibi esse quod respondeas.

2. Cor. 6.

III. PUNCTVM.

STAT ergo Veritas, *Quod de pretio Nominis Iesu tantò plus circumciditur, & nobis deperit, tantò minus perfecte nos circumcidimus*; Quia quantum non applicatur, tantum deperit; non applicatur autem nisi circumcidantur contrarij Cordis affectus, aut nisi prout circumciduntur, & conformantur significationi Nominis, cum ex Corde tanquam ex Radice procedat Intentio & qualitas operis, quidquid ore proferatur. Hinc Christus Dominus; *Aut facite arborem bonam, & fructum eius bonum; aut facite arborem malam & fructum eius malum. Numquid colligunt de spinis vnas, aut de tribulis ficus? Sic omnis arbor bona bonos fructus facit, mala autem arbor, malos fructus facit.* Id est, qualis intus in animo fueris, tales erunt actus tui; si purus sis & vacuus prauis affectibus, pura & bona erunt opera facta in Nomine Domini: Sin contrà si deprauatus fuerit affectus, tùm praua inde erunt opera: Vnde aptè Apostolus: *Cognouit Dominus qui sunt eius: & discedat ab iniquitate omnis qui nominat nomen Domini.* Et Propheta Ieremias: *Quid est quod dilectus meus in domo mea fecit scelera multa? Numquid carnes sanctæ auferent à te malitias tuas, in quibus gloriata es.* Quasi diceret animæ peccatrici, numquid putas auferendas tuas malitias per sola sacrificia, nisi tu ipsa collabores in illis tuis malitiis auferendis? Vel sic, putasne per oblata mihi sacrificia, te mihi placituram in cæteris operibus tuis, nisi per gratiam quam tibi offero, coneris auferre malitias quibus tu mihi displices? Quod & Aggæus propheta prosequitur pluribus, patebitque

Matth. 12.
Ibid. 7.

2. Tim. 2.

Ier. 11.

Agg. 2.

etiam apertius ex dicendis sequenti triduo, vnde illud valide confirmatur, quod nisi naturales motus quibus teipsum inordinatè quæris in omnibus, circumcidas & amputes, non applices tibi vim & valorem Diuini Nominis; atque ex consequenti tantum tibi depereat quantum recepisses, si illud applicasses, & oppositos repressisses affectus.

Quale autem illud, *Sic tibi deperire pretium & valorem tanti Nominis!* sic tibi deperire meritum Christi, tot sudoribus paratum, tot votis exoptandum! *Qua utilitas in sanguine meo?* In *ps. 19.* Nomine meo? In vita & in morte mea, *Dum descendo in corruptionem?* Id est, dum applicor corruptis & deprauatis affectibus?

Deplora tu Ipse talem jacturam; atque vt diligenter in futurum prospicias, audi Prophetam: *Nonate vobis nouale, & non- 1er. 4. bile serere super spinas. Circumcidimini Domino, & auferite praputia cordium vestrorum.* Nihil hodie gratius offeres Christo, quàm præcisum ex corde tuo aliquid, quod ibi hærebat tenacius. Nec vllum motuum aptius huius præcisionis & oblationis faciendæ, quàm quod hîc modò proponitur, ne videlicet aliquid detrahatur & pereat de Christi merito & beneplacito. *Vt impleamini in omnem plenitudinem Dei. Vt dignetur vos vocatio- Ephes. 3. ne sua Deus noster & impleat omnem voluntatem Bonitatis. Et opus 2. Thess. 1. fidei in virtute, vt clarificetur Nomen D. N. IESV Christi in vobis: & vos in Illo, secundum Gratiâ Dei nostri, & Domini IESV Christi.*

E O D E M D I E,
EX VERBIS SVPRÂ RELATIS
APOSTOLI:

VERITAS PRACTICA.

Discedat ab iniquitate omnis, qui nominat nomen Domini. 2. Tim. 2.

RATIO EST, Quia Nomen Domini Iesu, ordinariè tantum nominatur, vel ad Laudem & honorem ipsius Nominis; vel

ad Inuocationem auxiliij: Vel ad Intentionem operis cuiuscumque nostri, sic formandam.

Sed quodcumque horum trium consideretur, siue laus Nominis, siue Inuocatio, siue Intentio: non potest propterea rite & fructuose nominari Nomen Domini, ab eo qui fuerit in iniquitate. Ergo discedat neceſſe est ab iniquitate omnis qui nominat nomen Domini, aut ne illud assumat; aut in Vanum assumet; quod nefas est.

PRIMA propositio tantum est explicanda in suis terminis. SECUNDA sic aperte declaratur per singulas partes. Prima est de laude Nominis, cuius præcipua commendatio est quod Saluatorem significet; non qualemcumque, sed à peccatis, ab iniquitate, & malitia. Singularis certè & eximia commendatio: sed si fiat ab iniquo, si fiat ab homine existente in peccato, & non discedente ab iniquitate sua, nulla prorsus erit, aut nisi ridicula talis commendatio. Commendabit enim verbo quod ipse facto reprobatur, dicet valde laudandum Iesum quod purget à peccato: & negabit id esse laudandum, cum suo ipse purgari nolit.

Pron. 25. *Aufer impietatem de vultu regis, dicebat Sapiens, si regem scilicet laudas, quod vultu suo indicet, quanto in odio habeat impietatem, quid tu audes inferre in eius vultum illam ipsam impietatem aut iniquitatem in qua auferenda, regem dicis esse laudandum? Sic aperte Psalter regius: Peccatori dixit Deus, quare tu enarras iustitias meas, & assumis nomen meum per os tuum. Denique*
Pf. 45.
Ecclesi. 15. *non est speciosa laus in ore peccatoris.*

Sic de Inuocatione auxiliij, quod aliud sequitur in propositione probandum. Rectè quidem per hoc sanctum Nomen, quacumque in necessitate, diuinam implores opem, cum non sit aliud nomen sub cælo datum hominibus, in quo oporteat nos saluos fieri: sed nonne scis, Deum opem suam retrahere ab iniquis? An ignoras quod probè sciuit ille Ammonites, qui sic de Deo quem Iudæi colebant, magnificè loquebatur; Deus illorum odit iniquitatem, perquire si est aliqua iniquitas eorum in conspectu Dei eorum; ascendamus ad illos, quoniam tradens tradet illos Deus eorum tibi, &

subiugati erunt sub iugo potentia tua. Si vero non est offensio populi huius, coram Deo suo, non poterimus resistere illis, quoniam Deus eorum defender illos.

Quod maxime patuit in electo illo viro Iosué qui sacri IESV nominis figuram suo ipse nomine præferebat. Cum enim ali-^{10f. 7.} quando præter morem vidisset Israël terga vertentem suis hostibus, quos semper ipso duce debellarant, *Mi Deus, inquit, quid dicam? Et quid facies magno Nomini tuo?* Tum vero Dominus, *Surge, cur jaces pronus in terra? peccauit Israël, Quasi diceret, frustra inuocās nomen meum, frustra per nomen meum tibi opem concilias: ne quid à me speres, quamdiu vel vnus erit inter tot millia, qui vel iniquitatem admiserit, vel non dimiserit. Stupendum certè exemplum, & diutius expendendum.*

Tertium denique quod spectat ad Intentionem operis nostri, sub hoc foelici formandum Nomine, non tam rectè & fructuose formabitur, si nominetur in peccato Nomen, quam si extra peccatum pronuntiaretur. Neque enim potest quidquam in Nomine Domini fieri, si cum peccato fiat, aut si peccatum fiat, aut si fiat in lethali peccato. Quæ quia fufius in crastino pertractantur discursu, satis modò sit agnoscere quàm vere Apostolus dixerit, *Discedat ab iniquitate omnis qui nominat nomen Domini; Qui-* cumque tandem ille sit, siue Sacerdos, siue Laicus: siue Religio-
sus, siue secularis, siue Dominus, siue seruus: absolute atque vniuersim denuntiatur *omnis*, nulla seclusa persona, nulla præ-
texta causa, nulla prætenta necessitate, vel occasione, vel consue-
tutine nominandi, nisi prius discedat ab iniquitate, si quam con-
traxerit, nisi conteratur & doleat, nisi sit in illa gratia quæ ani-
mam sanctam & gratam Deo reddit, ne sanctum hoc pronuntiet
Nomen, quia frustra pronuntiaret, frustra laudaret, frustra inuo-
carer, frustra se offerret: *Sanctum & terribile nomen eius, vt non* ^{Pf. 110.}
impune scilicet contaminetur à lingua iniqua. Irritat aduersarius ^{Pf. 73.}
nomen tuum in sinem. O miseriam peccatoris, qui sacrum nomen
Iesu non ausit tutò pronuntiare? O beatam verò necessitatem
deponendi peccati: vt vel discedat necesse sit à peccato, qui No-
men Iesu nominare velit; vel nisi velit à peccato discedere, ne-
fas sibi ducat proferre Nomen Iesu!

E O D E M D I E.
DE CIRCUMCISIONE SPIRITUALI.

Circumcidimini Domino, & auferte praeputia Cordium vestrum. Ier. 4.

VERITAS PRACTICA.

Quanta est modo nobis obligatio ad non suscipiendam Circumcisionem legalem, tanta est ad suscipiendam spiritualem.

RATIO EST, Quia tota obligatio quā tenemur ad non suscipiendam Circumcisionem legalem, petitur à lege seu religione Christiana quae illam modo vetat.

Sed eadem lege & religione Christiana iubemur suscipere Circumcisionem spiritualem.

Ergo quanta est unius obligatio, tanta est alterius. Quod certe est non parui ducendum.

PRIMA propositio per se patet, & declaratur infra fufius, Sabbato post Dominicam primam Epiphaniae, ubi quàm similis huic Veritati Veritas proponitur.

SECUNDA verò sic demonstratur; quia Circumcisio spiritalis, nihil aliud est quàm talis mortificatio interior vel exterior, qualis necessaria est ad vitandum omne peccatum, & faciendum omne bonum, à Deo tibi iussum. Talis autem mortificatio tam necessariò iussa est, quàm necessario est euitandum malū, aut tale bonum faciendum, quod non posset fieri, nisi per huiusmodi mortificationem: Vnde illa Christi Domini toties ^{Matth. 5.} iterata: *Si oculus tuus scandalizat te, si pes, si manus: erue, praescinde, amputa, Id est, si qua re externa aut aliquo rei affectu*

impelleris ad peccatum; mortifica hunc affectum; Quod idem *Dent. 10.* est ac circumcide, *Circumcidite praputia cordis vestri. NOS sumus Circumcisio*, qui spiritu seruimus Deo, inquit Apostolus; quasi *Phil. 3.* diceret, primò quidem, tam necessaria est talis Circumcisio *Rom. 2.* quàm nos esse spirituales, quàm nos esse Christianos, quàm nos seruire Deo. Deinde vero *Nos sumus Circumcisio*, Id est, quanti quanti sumus, omnino & non ex parte tantum, sicut Iudæis erat Circumcisio; Nos inquam Christianos, ex totis nobis, siue in animo, siue in corpore, sic nos oportet vsquequaque esse circumcisos, vt vere dici possimus quod simus Circumcisio. Denique *Nos sumus Circumcisio*, quia videlicet propter nos instituta erat legalis Circumcisio, nostram spirituales, illa carnalis figurabat; ac proinde cum venit tempus suscipiendæ spiritualis huius Circumcisionis, cessauit alia, sicut tenebræ desinunt lucente sole.

Ex quibus non modo est euidentia, tantam huius spiritualis Circumcisionis esse obligationem positiuam, quanta est negatiua alterius, sed ex eadem euidentia Concludendum est, positiuam illam obligationem esse quodammodo religiosiorem & priorem quam negatiuam. Quia finis semper est fortior illis omnibus quæ propter finem fiunt: finis autem abrogatæ legalis Circumcisionis, est spiritualis Circumcisio; Non enim idcirco præcipitur spiritualis Circumcisio, quia carnalis ablata est: sed idcirco carnalis aufertur quia spiritualis adducta est; Neque nouum statuitur Testamentum quia vetus abiit, sed vetus abiit quia nouum venit. Sic expressè Apostolus: *Aufert primum vt sequens* *Hebr. 10.* *statuat*, & res figurata semper nobilior est, & magis commendata quàm quælibet eius figura; Vnde sancti Patres & scripturæ Interpretes sic Christum Dominum aiunt esse Circumcisum vt Circumcisionem dissolueret, & aliam maiorem ostenderet id est *spirituales*, inquit Epiphanius. *V. Barad.*

O quantum ergo aberrant à Lege & Religione Christiana Incircumcisi corde & auribus! Hoc certum habet anima vt quam verè dictum est de Circumcisione legali: *Si circumcidamini, Christus nihil vobis proderit*, tam verè dicendum fit de spirituali: *Nisi circumcidamini, Christus nihil vobis proderit.* *Gal. 5.*

Vide infra die tertio & quarto Ianuarij. Sabbato infra Hebdomadam quintam post Epiphaniam de Communi Martyrum. Et passim vbi de *Mortificatione, Intentione, & Perfectione.*



TRIDVO sequenti, agitur de Triplici Puritate puræ Intentionis, seu de tribus puræ & rectæ intentionis Conditionibus, quæ ex effectis antiquæ Circumcisionis eruuntur.

Non aliter verò deinceps recensentur dies, quàm quo numero & ordine connectuntur in decursu mensis, usque ad Dominicam secundam post Epiphaniam, ubi resumetur nomen Feriæ.

De Dominica porro ante Epiphaniam occurrente, nullum est aliud institutum officium, quàm eius diei quo tùm occurrit, sicque vacare dicitur.

DIE II. IANVARII.

QVÆ EST OCTAVA S. STEPHANI.

DE PRIMA CONDITIONE PURÆ

INTENTIONIS, VT SIT PURA A PECCATO;

EX PRIMO ANTIQVÆ CIRCVMCISIO-

NIS EFFECTV, QVI EST PURGATIO

PECCATI ORIGINALIS.

Accedamus cum vero corde in plenitudine fidei, aspersi corda, à mala conscientia. Hebr. 10.

VERITAS PRACTICA.

Non sunt facienda mala, vt eueniant bona.

RATIO EST, Quia quod absolute & simpliciter vetatur à
Deo,

Deo, non potest ullo planè pretextu fieri.

Sed malum seu peccatum quodcumque sit, simpliciter & absolute vetatur à Deo.

Ergo non potest hoc pretextu fieri, ut eueniant bona. In quo tamen multi reipsa dissentiunt.

I. P V N C T V M.

I A N T I refert puram in omnibus adhibere Intentionem & rectum sibi finem proponere, ut plures de hoc argumento institui debeant Considerationes, siue ad pleniorē rei cognitionem, siue ad maiorem eiusdem commendationem. Ex multis autem quæ considerari possent, selectæ sunt tres Intentionis puræ Conditiones, quæ ex totidem antiquæ & Moisaicæ Circumcisionis effectis depromuntur; Quarum prima est ut Intentio sit pura ab omni peccato, sicut olim Circumcisio excludebat peccatum. Sic S. Ambrosius. *Circumcisio*, inquit, *purgationem significat delictorum.* *In Luc.*

Et vero dupliciter intelligi potest, purgationem à delicto esse necessariam puræ intentioni; Primò ut conscientia munda sit ab omni peccato mortali, sitque Ille in statu gratiæ sanctificantis qui præ se fert puram habere intentionem, cum alioquin non sufficeret illa intentio ad impertiendam actionibus vim & valorem æterni meriti. *Et si distribuero in cibos pauperum omnes facultates meas, & si tradidero corpus meum, ita ut ardeam, Charitatem autem non habuero, nihil mihi prodest,* ait Apostolus. Est autem eadem ratio Charitatis & Gratiae Sanctificantis, quantum ad valorem & meritum nostrorum operum. Quo de argumento præclare & fusè sanctus Bernardus, in illud Canticorum; *Pulchræ sunt genæ tuæ sicut turturis.* *i. cor. 13.* *Serm. 40.* *Cant. 1.*

Secundo, necesse est ut illud opus cui Intentio est præfigenda, non sit malum ex se, aut vetitum; Neque enim bonus finis, aut intentio boni alicuius, potest id bonum facere quod est malum, neque id quod est malum potest bene & licite fieri, ut fiat aliquod bonum. *Blasphemamur,* inquit Apostolus, *& sicut aiunt quidam nos dicere, faciamus mala ut veniant bona, quorum damnatio iusta est,* Id est, damnandus talis sensus. Nos Christiani longe

absumus ab illa sententia quam damnamus ; Hoc enim nunquam licet quouis prætextu. Hæc est communis interpretatio verborum Apostoli, quâ nonobstante, multi secus in praxi faciunt, qui non verentur mentiri, aut aliud quid mali facere, vt sibi vel proximo benefaciant ; Idcirco hæc Veritas attentius est consideranda ; statuendumque in praxi, prorsus *Nulla vnquam esse faciendâ mala, vt eueniant bona.*

Ratio est facilis & efficax, quia quod absolute & simpliciter vetatur à Deo, nullo plane prætextu potest licite fieri. Hoc est enim vnum & idem, absolute vetari, & nunquam posse fieri. Nam si posset esse aliquis casus quo contrauenire liceret, non esset absolute & simpliciter à Deo vetitum : Istæ namque voces, *Absolute & simpliciter*, excludunt omnem casum & omnem epijkeiæ actum. Quod enim de humanis legibus dicitur, aliquem posse euenire casum, quem non præuiderit Legislator, & 2.2 q. 120. in quo æquitas postulet vt à verbis legis discedatur, non potest dici de Diuinis, cùm nihil euenire possit quod non præuiderit Deus ; ac proinde quando aliquid aperte constat esse absolute vetitum, nullus relinquitur dispensationi aut excusationi locus ; Deut. 4. sic absolute est abstinendum vt vetatur. *Non addetis, inquit, ad verbum quod vobis loquor, nec auferetis ex eo. Custodite mandata Domini Dei vestri, quæ ego præcipio vobis.* Nonne id æquum ? Quid igitur contrà posset prætendi, nisi quod iniquum ? Sic vere di- 1. Ioan. 3. ctum est, *Omnis qui facit peccatum, & iniquitatem facit ; & peccatum est iniquitas.*

II. P V N C T V M.

SED malum quodlibet seu quodcumque peccatum, simpliciter & absolute vetatur à Deo.

Non quidquid verat Deus, sic absolute semper vetat, vt aliter Ipso dispensante, vel mutante leges, non possit fieri ; sicut patet in lege veteri abrogata : sed aliud est aliquid esse malum, quia 2.2. q. 110. vetitum : & aliud, esse vetitum quia malum. Tale est autem a. 3. ex S. mendacium & illud malum de quo hic agitur, malum est intrinsecè, vt dicitur, & ex natura sua tale, aut certe sic supponitur ; quo supposito affirmatur, id absolute & simpliciter vetari à Deo, quia non potest non vetare illud Deus, sicut non potest August.

non odisse. Quis enim nescit odium quod Deus habet de malo seu peccato, esse necessarium, esse infinitum, esse ita immutabile, sicut ipsius Dei natura est immutabilis? Nam cum à Natura sua, ac proinde necessariò amet Rectitudinem Legis æternæ, nec non Bonitatem & Perfectionem suam, necessariò etiam odit & vetat quidquid tali Rectitudini & Bonitate aduersatur: aduersatur autem illi omne peccatum, quia ratio peccati in eo sita est, quod sit contra legem Dei æternam, & illi Bonitati maxime repugnat, non ut forma formæ, sed ut inordinatum & distortum suæ regulæ & mensuræ.

*Lessus de
perf. diui.
l. 8. c. 1.
Iudith 5.
Habac. 1.*

Sic passim Scripturæ omnes: *Deus illorum odit iniquitatem. MVNDI sunt oculi tui ne videas malum, & respicere ad iniquitatem non poteris. NON dicas, ille me implanauit, non enim necessarij sunt ei homines impij. Omne execrumentum erroris odit Dominus, & non erit amabile timentibus eum. Nemini mandauit impie agere, & nemini dedit spatium peccandi;* Id est, nulla est persona cui liceat, nullus locus, aut tempus quo id liceat. Hinc Tobias Filio suo, *Omnibus diebus vita tua in mente habeto Deum, & caue ne aliquando peccato consentias.* Et in particulari, mendacium dicitur esse inter ea quæ Deus odit præcipue, imo & Abominatio est Domino, labia mendacia. Et ne quod forte excludas mendacium, *Noli inquit velle mentiri, omne mendacium.* Denique nihil est quod magis irriter Deum, quàm si quis sibi fingat aliquod esse tempus, aut locū, aut casum, in quo mentiri vel peccare liceat *Propter quid irritauit impius Deum? Dixit enim in corde suo, non requireret.* O Impietatem! ô blasphemiam! desineret esse Deus, si non requireret. Et tamen quàm multi hoc corde dicunt!

Eccles. 15.

Tob. 4.

Prou. 6.

Ibid. 12.

Eccles. 17.

Psal. 9.

Eccles. 12.

III. P V N C T V M.

NUNQUAM igitur sunt facienda mala, ut eueniant bona; Quia nunquam quocunque prætextu id faciendum est quod simpliciter & absolutè est veritum tanquam malum; & quod non potest non esse veritum, sicut non potest non esse malum. Nam bonum quod inde sequitur, non impedit quo minùs malum sit malum, nec proinde quo minùs sit veritum, nec denique quò minus sit cauendum. *Nimis odito execrationem, ait Sapiens, id est suprâ quàm quilibet aliud, quod te ab illius odio*

reuocare possit. Vnde & S. Augustinus præclare in sententiis, *Peccare est inhonorare Deum, quod non debet facere homo, etiamsi totum pereat quod non est Deus.* Et ne putes mendacium idcirco esse peccatum, quia potest prodesse, Nonne possunt, inquit Idem, *Et furando prodesse? nec ideo tale furtum quisquam dixerit non esse peccatum.* NVN QUID Deus indiget vestro mendacio, ut pro illo loquamini dolos? Numquid faciem eius accipitis, & pro Deo indicare nitimini? aut placebit ei quem celare nihil potest, aut decipietur ut homo, vestris fraudulentis? Ipse vos arguet. Sic aptissime Iob. Nec negligendus Author libri de Imit. Christi, qui hæc expresse habet; *Pro nullare mundi & pro nullius hominis dilectione, aliquod malum est faciendum; sed pro utilitate tamen indigentis, opus bonum libere aliquando intermittendum est.*

Vide in his quantum delinquas. Et illud sancti Hieronymi ad dirigendam intentionem tuam, & alia quæuis recte operanda plurimi facito; *Aedificanti tibi spiritualem domum, non super leuitatem arenæ, sed soliditatem Petra, Innocentia imprimis fundamentum ponatur.* Itemque illud Apostoli, *Volo vos sapientes esse in bono, & simplices in malo.* Nempe ut bonum fiat vel non fiat, sapienter est dijudicandum ex circumstantiis: Sed ad malum euitandum, sola simplicitas adsit. Quia omne malum est euitandum. Nullus mali delectus est, ubi omne malum excluditur.

Vide ferias infrà Dominicam secundam post Epiphaniam, & alias ubi de peccato, ex Indicibus.



DIE III. IANVARII,
 QUÆ EST OCTAVA S. IOANNIS APOSTOLI.
 DE SECVNDA CONDITIONE PVRE
 INTENTIONIS, VT STVDIVM CONTINVVM
 REPRIMENDÆ CONCVPISCENTIÆ COM-
 PREHENDAT, QVOD IN LEGALI
 CIRCVMCISIONE FIGVRABATVR.

Ad puram intentionem, studium continuum repr. Concupis. 189
Circumcidite praeputium cordis vestri, & cervicem
vestram ne induretis amplius. Deut. 10.

VERITAS PRACTICA.

Totius difficultatis de pura Intentione solutio, studium
est continuum reprimendæ Concupiscentiæ.

RATIO EST, Quia tota difficultas de pura intentione versa-
tur circa sufficientem voluntatis dispositionem, ad hanc purita-
tem inducendam.

Sed ex studio continuo reprimendæ Concupiscentiæ, cognoscitur suf-
ficiens voluntatis dispositio ad talem effectum.

Ergo inde est solutio totius difficultatis. Ac proinde illud studium
continuum maximopere est necessarium.

I. PUNCTVM.

QUOD Circumcisio legalis figura esset Circumcisionis
spiritualis, quæ est mortificatio interior seu studium re-
primendæ Concupiscentiæ, iam dictum est ex Apostolo
qui de se ac nobis omnibus. *Nos sumus, inquit, Circumcisio, qui spi-*
ritu seruimus Deo; Et alibi: Circumcisio cordis in spiritu, & non litera: Phil. 3.
Quali diceret, Hæc est vera Circumcisio, qua cordis concupiscen-
tiæ circumciduntur: hæc est spiritualis ad quam carnalis velut *Rom. 2.*
ad finem refertur: hæc est quæ fit per Spiritum sanctum non iux-
ta literam legis Mosaicæ. Et rursum ubi de Christo Domino: *Col. 2.*
Et estis, inquit, in illo repleti, qui est Caput omnis principatus & po-
testatis: in quo & circumcisi estis Circumcisione non manufacta in ex-
poliatione corporis carnis, sed in Circumcisione Christi. Quali ex-
plicaret in quo repleti essent, & quid esset, sic repleti in Chri-
sto, nempe quod lex antiqua, variis præmittebat figuris, id to-
tum spiritualiter adimpleri, per fidem, per Mortificationem, &
alia quæ modò profitemur.

Quam vero hæc spiritualis Circumcisio sit necessaria puræ

intentioni visum est etiam primâ die, & per se satis patet: Sed quàm necessario debeat esse continua aut eius saltem studium & propositum, nunc porro videndum est acuratius ex declaratione Veritatis practicæ, quâ statuitur totius difficultatis de pura intentione solutionem ex hoc continuo studio reprimendæ concupiscentiæ petendam esse.

Ratio hæc quæ assertur est valde consideranda, Quod videlicet tota difficultas de pura intentione versatur circa sufficientem voluntatis nostræ dispositionem, ad hanc puritatem inducendam. Nō desunt quidem aliæ difficultates de quibus Theologi disputant, sed hæc ad praxim potissima, imo & tota de habituali & virtuali quam vocant intentione, quid sit necesse, quidue sufficiat, ex parte nostra, cum diuina gratia ad hoc vt recta & pura in omnibus Intentio habeatur. Cum enim Intentio primò & principaliter sit actus voluntatis, vt expresse docet sanctus Thomas, certum est ex vna parte, quod vt pura sit intentio, necesse sit voluntatem esse puram seu purificatam prauis illis affectibus & desideriis quæ militant aduersus animam, & quibus in agendo tota naturaliter occupatur, nisi eis resistat. Ex alia vero parte, cum variis & longè diuersis modis voluntas possit resistere vel consentire illis motibus; nunc plenè & perfectè, nunc semiplenè & imperfectè; hinc fit, vt tot variis & diuersis dispositionibus sit affecta voluntas circa Intentionem operis, quot erunt illi varij & diuersi modi, quibus consentiet vel resistet prauis affectibus. Atque hinc demum oritur tota difficultas, quomodo cognoscatur in tanta varietate, sufficiens dispositio voluntatis, vt ipsa sufficienter pura sit, & recta intentio quam prætendit. *Proba me Deus & scito cor meum, interroga me, & cognosce semitas meas. Et vide si via iniquitatis in me est, & deduc me in via æterna.* Quasi diceret, fac me cognoscere, quod quidem cognitu est difficile, & tamen utile, an rectam in actionibus Intentionem habeam, an recte incedam ad vitam illam æternam, ad quam sum conditus, & à qua si deuiò, reduc me, & dirige me in viam rectam.

Sic orandum esset cum Dauide, vt simul cum illo etiam possis dicere: *Andiam quid loquatur in me Dominus.*

II. PUNCTVM.

SED ex studio continuo reprimenda Concupiscentia, cognoscitur sufficiens voluntatis dispositio ad hanc puritatem inducendam.

Primo intelligendum est, quid sit continuum studium reprimendæ Concupiscentiæ, nempe voluntas efficax cum diuina gratia sic continuo reprimendæ naturæ corruptæ seu naturalis eius propensionis, vt quantum aduerti poterit, semper reprimatur; Et vt semper aduertatur, non leuis cura adhibeatur: singulis mane diebus propositum renouetur, sæpe ad id Gratia petatur, quotidianum examen instituatur, & alia denique conferantur quæ indicent veram & efficacem voluntatem. Hoc est quod vocatur studium continuum: hoc est quod ait Sapiens, *Esse firmus in via Domini, & in veritate sensus tui.*

Eccles. 5.

Secundò, agnoscendum quomodo ex illo studio cognoscatur sufficiens voluntatis dispositio: Nempe quando verè dubitatur vtrum consenserit, necne, contrariis puræ Intentioni motibus, signū est probabilius non consensisse, quamdiu sic studiosa sicque affecta & disposita fuerit voluntas; quidquid sentiat in appetitu, si tum quis certo non agnoscit se aliquid voluisse inordinatum, certius est noluisse. *Non ego operor illud, sed quod habitat in me peccatum*, id est Concupiscentia. Quod si quidem consensisse videtur, nec tamen satis plene aduerterit ad illos prauos motus, signum est consensum illum non esse voluntarium, quia scilicet ex studio illo continuo, seu ex illa voluntate efficaci, certum est quod si aduertisset non consensisset, ac proinde consensus ille est veluti subreptitius & inuoluntarius. *Non enim quod volo bonum* *ibid.* *hoc facio; sed quod nolo malum, hoc ago*, ait Idem Apostolus. Si denique deficiat actualis intentio, & dubitetur vtrum virtualis vel habitualis sufficienter operetur, quando in operando, de recto fine non cogitatur, credibilius est ex illo studio, sufficienter pure & recte operari. Nam sic est affecta & disposita voluntas, vt si aduerteret, vellet actu & re ipsa sic recte operari: Quod autem non aduertat, infirmitatis est humanæ potius, quam malitiæ vel vitij oppositi puræ intentioni. *Nihil damnationis est iis qui sunt in Christo Iesu, qui non secundum carnem ambulant.*

Rom. 7.

Ibid. 8.

Quod si vero in aliquo defuerit illud continuum studium,

plane aliter de re tota definiendum est : & iudicium omnino contrarium erit ferendum. Licet enim is non magis expresse quam alius aduertat ad illos prauos naturæ motus qui puritatem Intentionis inficiunt & impediunt , tamen credibilis est illis consentire, & illos velle, quia scilicet non studet, nec vult sicut alius efficaciter eos reprimere: Nō idcirco sibi satis inuigilat, nec eos motus quo posset modo cum gratia præuenit, aut ordinarie repellit: licet eos actu & voluntarie velle non videatur, quando non aduertit: censetur tamen & præsumitur eos velle consequenter, quatenus voluntarie non agit quod posset & deberet. Cuius defectu sequitur vt voluntas male sibi complaceat in illis motibus; quidquid dicat ad se excusandum. *Ego scio, ait Dominus, iactantiam eius, & quod non sit iuxta eam virtus eius; Nec iuxta quod poterat, conata est facere.* Vnde illud accidit, quod ex alio

1e. 48. *Propheta sæpe memorandū venit; Colligata est iniquitas Ephraim, absconditum peccatum eius.* Hi sunt funiculi vanitatis in quibus trahitur iniquitas, & quasi vinculum plaustrum, peccatum. Hæ sunt

osæ 13. colligationes impietatis quæ dissoluendæ erant. Hi sunt fasciculi deprimentes nisi soluantur: hæc catena de medio tui auferenda.

1s. 5. & 58 Vide Isaia quinto & quinquagesimo octauo.

III. PUNCTVM.

TOTIVS igitur difficultatis de pura Intentione solutio, tam vere ex continuo studio Concupiscentia reprimenda petitur, quam vere ex illo studio cognoscitur, sufficiens voluntatis dispositio, vt pure velit quod est volendum sufficienter, vt pura sit intentio. Sic accommodate de vnoquoque nostrum dici potest quod de Christo refertur, si cum eo vere dicimus, *Deus meus volui, & legem tuam in medio cordis mei.* IN QVA VOLUNTATE SANCTIFICATI SUMVS: Vt è contra, cui deest talis voluntas, defunt ei omnia.

Hebr. 10.

Quod confirmatur ex iis qui assueuerunt iuramentis & blasphemis; Cum quæritur vtrum peccent, iurando & blasphemando, quando etiam non aduertunt: Respondetur, quod si studeant prauam deponere consuetudinem & sufficienter indicent, se, si aduerterent, nolle ita blasphemare, tunc non peccare cum blasphemant non aduertentes: quia ex illa voluntate seu studio desuescendi,

desuescendi, indicant se nolle quod faciunt aut quod loquuntur, ac proinde id illis non esse voluntarium. Quod si vero non studeant desuescere, tunc eos peccare quoties male iurant aut blasphemant, non aduertentes, quia sic censentur velle consequenter ex eo quod non studeant nec laborent in contrarium, nec proinde aliter velle præsumantur. *Blasphemantes in corruptione* ^{2. Pet. 2.} *sua peribunt, percipientes mercedem iniustitiae, voluptatem existimantes Dei delicias*, ait S. Petrus. Sic proportionate de aliis sentiendum, ut dictum est; Vnde apertius patet quam ut fusius ostendatur, quam sit necessarium hoc continuum studium sui reprimendi.

Quanta est enim differentia inter vitiosum, & non vitiosum: tanta dici potest inter studiosum huius praxis, & non studiosum. Hi sunt pii vel iniqui de quibus dicitur, *Novit Dominus pios* de *ibid.* *temptatione eripere: iniquos vero in diem iudicii reservare cruciandos; magis autem eos qui post Carnem in Concupiscentia immunditia ambulant, dominationemque contemnunt, audaces, sibi placentes.* At vero audi ex eodem quid statuas in posterum: *Vos autem curam* ^{ibid.} *omnem subinferentes ministrare in fide vestra virtutem, in virtute autem scientiam;* Et quæ plura refert ad hanc omnem curam & hoc continuum studium commendandum, de quo sic verè dictum à Kempensi: *Secundum propositum nostrum, cursus profectus nostri;* & ^{L. 1. de Imit. Chr. c. 19.} *multa diligentia opus est bene proficere volenti.*

Vide infra, Hebdomadam quartam post Epiphaniam, & verbo *Intentio. Voluntas.* Et vide ne plus cogites de carpenda Veritate, quam de vero eius fructu excerpto.



DIE IV. IANVARII

QUÆ EST OCTAVA SS. INNOCENTIVM.

DE TERTIA CONDITIONE PURÆ

INTENTIONIS, UT SIT VNIVERSIM IN OMNI-

NIBVS: SICVT CIRCVMCISIO LEGALIS

OBLIGABAT AD VNIVERSAM
LEGEM OBSERVANDAM.

Testificor omni homini circumcidenti se, quoniam debitor est vniuersæ Legis faciendæ. Galat. 5.

VERITAS PRACTICA.

Aut nullam vitæ partem, aut totam Deo debes.

RATIO EST, Quia quantam vitæ partem Deo debes, Illi debes ex aliquo titulo, seu iusta causa.

Sed ille ipse Titulus, eademque iusta causa, iure exigit vt totam Deo vitam debeas, atque reddas.

Ergo aut nullam vitæ partem, aut totam Deo debes. Et quia nolles ei nullam vitæ partem concedere, hinc te urgeri necesse est vt reddas totam, quam non minus debes, ac partem.

I. PUNCTVM.

L. 28.

Mor. c. 13.

RECTE monet S. Gregorius: *Vigilanti cura per cuncta opera, Intentio nobis nostra pensanda est, vt nil temporale in his quæ agit, appetat, & totam se in soliditate æternitatis figat: ne si extra fundamentum actionis nostræ fabrica ponitur, terra dehiscente soluatur.* Cum autem vnum & idem sit vniuersum in omnibus puram intentionem habere, atque omnem vitæ partem Deo reddere, non potuit efficacius motiuum proponi ad illam vniuersalem intentionem procurandam, quàm si cogitetur æque deberi, atque ipsam totam vitam, quæ non aliter Deo redditur quam per puram & rectam in omnibus intentionem Dignè, Deo per omnia placentes: sicut scribit Apostolus.

Coloss. 1.

Vt verò liquide patefiat quàm verè tota Deo vita debeatur, quàmque illi merito tota reddenda sit, non potuit apertius declarari quam Veritate proposita, Aut nullam vitæ partem, aut totam Deo debes. Quis enim nolit aliquam illi persolvere? at si æque totam

debet atque partem, cur non æque totam reddat? Necessaria certe reddendi consecutio, si æquale est totius, ac partis vitæ debitum. Quàm sit autem æquale hoc debitum, & quàm sit cerra hæc Veritas, declarat allata ratio, Quia scilicet si quam Deo partem debes, illi iure debes, ex aliquo Titulo, seu iusta quapiam causa, nempe quod sit Creator, & Dominus noster, quod Principium & Finis, quod Redemptor, quod Iustificator, quod Glorificator; Et si qui sint alij Tituli, si quæ iura & causæ: Nonne agnoscis ex horum omnium aliquo, vel ex omnibus te iure illi debere aliquam vitæ partem? *Nunquid non Ipse est Pater tuus qui possedit te, & fecit & creavit te? At nunquid, Filius honorat Patrem, & servus Dominum suum? An subtractionis Filius esse velles in perditionem anima?* Dices ergo libenter, O Domine, quia ego servus tuus, Ego servus tuus, & Filius ancilla tua. Mirum sanè quod vix ullus sit cui talis desit affectus: & vix ullus tamen, cui nō desit effectus.

Deut. 32.

Mal. 1.

Hebr. 10.

Ps. 115.

II. PUNCTVM.

SED ille ipse Titulus eademque iusta causa, eodem iure exigit, ut totam Deo vitam debeas atque reddas.

Percurre quos voles ex omnibus, nullus vnus est, ex quo non conuincaris te totum, omnino totum, & non ex parte, ad Illum spectare, à quo habes vt sis, vt sis redemptus, vt sis iustificatus, & aliquando glorificandus. *Totum quod es illi debes, à quo totum habes, illi præcipue Domino qui & te fecit, & bene fecit tibi, qui tibi ministrat syderum cursus, aeris temperiem.* Et quæ plura refert S. Bernardus. Et certe possesne tibi aliud persuadere? possesne de Deo tam abiectè sentire: aut de te tam magnifice: vt quantus quantus est Deus, te toto non esset dignus, sed parte tantum aliqua? Tu quis es? quem teipsum facis? Qualis qualiscumque sis, an aliquam tui partem à te, vel ad te tactam putas? An decertare velles cum Deo, de principio & fine tui? An ex parte tantum putas dici, quod *in Ipso viuimus, & mouemur, & sumus?*

Serm. de quadr. debito.

Act. 17.

Quid præterea! Sanguis ille diuinus, diuina illa Vita pro te fusa non esset satis digna, non satis ampli meriti vt totam vitam tuam promereretur, sed partem tantum aliquam? O te vecordem si hoc putes! Et vbi vox Apostoli, *Non estis vestri, empti enim estis pretio magno!* Vide in die Parasceues. Quid denique de illa æterna Beatitudine quam promittit, cogitabis? Quod pones

1. Cor. 6.

Serm. 44.
de SS.

ei pretium, quanti putabis illam valere? an dimidia, vel aliqua tui solum parte? Quàm longè aliter sentiebat Ille Martyr de quo S. Augustinus; *Qui huius beatissima æternitatis contemplatione nullum vitabat periculum, nullum horrebat supplicium, & si millies posset mori, non putabat se hanc digne posse aliqua ratione promereri. Rectene ille? rectene tu si contra sentias!*

III. PUNCTVM.

Dent. 6.
Math. 21.
Luc. 10.

AVT nullam igitur vitæ partem, aut totam Deo debes; Quia quo titulo, quo iure, quauē ratione debes partem, debes totum, vnde aut neges omnino necesse est te Illi debere aliquid, aut fatearis te debere totum. Cur enim aliquid? Loquere, dic cur debes aliquid? An verò præcisè hoc solum debes, nec amplius? Responde, si audes; Et adde, cur illam potius vitæ partem quam reddis, debere te agnoscis, quàm illam quæ à te subtrahitur? Quid! quod Illa quam subtrahis, illa pro certo est, quam magis vellet Deus, nam illa est quam cariorem habes, & in qua magis posses ostendere quanti præ te Illum ducas. Denique, an te putas diuino diuinæ Dilectionis præcepto teneri? At quale est illud præceptum, nisi *ex toto corde tuo, ex tota mente tua, ex tota anima tua, ex totis viribus, ex tota virtute, & ex tota fortitudine tua?* Potestne intelligi pars aliqua non comprehensa vbi toties T O T V M repetitur?

Job. 23.

Ac tandem, vt videas te, ne quidem vllam partem reddere, si non reddis totam: nihil reddis Deo, si Deus non acceptat quod reddis. Expende hoc accuratè, si Deum non inuenis in ea parte qua Illum quæris, vbi tandem eum inuenies, & quid tandem illi reddes? Audi verò beatum Iob: *Si ad Orientem iero, non apparet; si ad Occidentem, non intelligam eum: si ad sinistram, quid agam, non apprehendam eum: si me vertam ad dexteram, non videbo illum.* Nonne est mirum quomodo sic nullibi reperiatur Deus, cum vbique sit? Sed aptè ad rem nostram respondet S. Gregorius. *Creator quippe omnium in parte non est, quia vbique est: & tunc minus inuenitur, quando is qui totus vbique est, in parte quæritur.* Quasi diceret, si in aliqua vitæ tuæ parte, si in aliqua tantum actione eum quæris, & non in omnibus: non illum reperis, quia vult in omnibus quæri. Ibo ad optimates, aiebat Propheta, & Loquar eis, ipsi enim cognouerunt viam Domini, iudicium Dei sui, & ecce magis hi

Job. 16.
Mor. c. 15.

Ier. 5.

Stella Magis apparet, dum lucet ambulandū ne tenebræ fiant. 197
simul confregerunt iugum, ruperunt vincula. Cum enim scirent
quod placeret Deo, & facerent in aliquibus: displicebat maxime
Deo quod non in omnibus, quasi non ita mereretur vt vniuer-
sū in omnibus sicut in parte coleretur: Quod certe illi est valde
probrosū. Esto itaque vigilans, & confirma cetera quæ moritura
erant, non enim inuenio opera tua plena coram Deo meo. Christi
est qui tibi loquitur. Nec verbis illi respondendum, sed operibus,
quæ nisi plena sint plenitudine quam vocant extensiuā & inten-
sivā, nihil respondent. Apo. 3.



DIE V. IANVARII.
QVÆ EST VIGILIA EPIPHANIÆ.
DE STELLA TRIBVS MAGIS
APPARENTE, DEQVE HORVM ADVENTV
IN CIVITATEM IERUSALEM.

Vidimus stellam eius in Oriente, & venimus adora-
re eum. Math. 2.

VERITAS PRACTICA.

Dum lucet, ambulandum: ne tenebræ fiant.

RATIO quæ declarat tenebras fieri, si dum lucet, non ambules,
concludit etiam, tibi dum lucet, esse ambulandum. Cum enim
tenebras fieri tam aperte damnosum sit & cauendum: satis esse
videtur ad hanc cautelam persuadendā, si agnoscas fieri tenebras.
Sic autem Ratio suadet, Quia si dum lucet non ambulas, abuteris
Lumine.

Sed si abuteris lumine, eo priuaris, & fiunt tenebræ.
Ergo dum lucet ambulandum, ne tenebræ fiant.

I. PUNCTVM.

Num. 24.

POSTQVAM ex historia Euangelica consideraues stellam illam insolitam, quæ vt olim Propheta Balaam prædixerat, apparuit tribus Magis, aut Regibus qui erant huius Prophetæ successores: Ac deinde eorum in urbem introitum, totiusque Ciuitatis cum Herode perturbato commotionem, attenta mente peruolueris: Contemplare quàm diuerso se gerant modo, Magi & Iudæi: & vtroque quàm miro & stupendo.

Joan. 12.

Ecce Magi visâ stellâ quæ indicat nouum Regem Iudæorum natum, sese statim dant viæ ad illum adorandum, nullas itineris difficultates metuunt, nulla Ciuitatum horrent pericula: inquirunt palàm, vbi nam sit ille natus, neque ab inquirendo cessant donec eum inuenerint. Iudæi vero quorum magis intererat scire & videre suum Regem, vix suo se propterea mouent loco, vix vilo tanguntur eius visendi motu. O pauenda Dei iudicia! Vt illi feruent! vt isti frigent! Quàm vere Christus Dominus, *Ambulate dum lucem habetis, vt non vos tenebra comprehendant!* Dum enim Magi ambulant in luce sua, sic merentur videre Christum & maiori gratiarum lumine collustrari. Dum vero Iudæi negligunt aut differunt eo vti Lumine, quo Christum nosse poterant, sic illo tandem priuantur & obtenebescunt in sua perfidia, vt vix post vnquam, Christum cognouerint.

Prov. 21.

Sic plane nobiscum agitur. Sic plane nobis, *Dum lucet ambulandum, ne tenebrae fiant.* Quod vt declararet euidentius, sic procedit Ratio. Nisi fideliter ambules in eo quod tibi lucet Lumine, illo abuteris. Sicut enim ambulare in lumine, nihil est aliud quàm eo bene vti, quàm eò tendere quò te Lumen vocat, quàm id efficere quod declarat & innuit tibi faciendum: sic prorsus nihil horum moliri, nihil efficere, nec conari: abusus est luminis, quia tùm frustra tibi lucet quando non id agis propter quod lucet: Vnde est illud Sapientis, *Lucerna impiorum, peccatum.*

Iudic. 3.

O quoties tibi sic frustra, & quam pauendum! Numquamne hoc legisti ex Debboræ Cantico: *De Cælo dimicatum est contra eos: stella manentes in ordine & cursu suo, aduersus Sisaram pugnauerunt.* Manent scilicet in ordine & cursu suo stellæ, & Lumina quæ tibi hætenus frustra illuxerunt, vt appareat quoties illis

Stella Magis apparet, dum lucet ambulandū ne tenebra fiant. 199

abusus fueris, & confundaris. Sic in Apocalypsi, *Hac dicit qui* Apoc. 2.
tenet septem stellas in dextera sua: Id est, qui repræsentat gratias
 & lumina, quibus illi abusi sunt ad quos Christi sermo dirigitur.
 Audi quid dicat, audi quid exprobet, & minetur.

II. PUNCTVM.

SED si abuteris lumine, eo priuaris, & sunt tenebra. Pf. 34.
Fiat, inquit Propheta Regius, via illorum tenebra & Lubri-
cum. Nam, ut ait S. Augustinus, *illa est pœna peccati iustissima, ut* Lib. de li. arb.
amittat unusquisque illud quo bene uti noluit, cum sine difficultate
posset, si vellet: ut qui sciens recte non facit, omittat scire quod re-
ctum est. Hinc est illud celebre Iob: *Ipsi fuerunt rebelles Luminis,* Iob. 24.
nescierunt vias eius, nec reuersi sunt per semitas eius. *Quia enim prius* L. 1.
sciendo rebelles sunt, inquit S. Gregorius, *postmodum cecantur ut* Mor. c. 26.
nesciant. Idcirco ille ipse qui tenet septem stellas in manu sua, mo- Apoc. 2.
nebo, inquit, candelabrum tuum de Loco suo, nisi pœnitentiam egeris.
 Denique quid clarius, quam quod ait Dominus, *Vide ne Lumen* Luc. 11.
quod in te est, tenebrae sint.

Et certe si Apostolus Gentiles ait punitos esse & priuatos lu- Rom. 1.
 mine rationis, quia eo abusi fuerant; quanto tu magis eâ pœnâ
 dignus es qui sanctiori lumine abusus fueris: *Obscuratum est, in-*
quit, insipiens cor eorum; dicentes enim se esse sapientes, stulti facti
sunt; Vnde porro? Quia cum cognouissent Deum, non sicut Deum
glorificauerunt, sed enauuerunt in cogitationibus suis. Et paulo post,
Sicut non probauerunt Deum habere in notitia, tradidit illos Deus in
reprobum sensum, ut faciant ea quæ non conueniunt; Quia enim
glorificare noluerunt quem cognouerant, reprobo sensui traditi, ad hoc
relicti sunt, ut nescirent iam pensare mala quæ faciebant. Sic sanctus
 Gregorius: Vnde agnosces quod nisi videas quantum in hoc pec-
 caueris, iam forte cœcitas, pœna est peccati tui: & verè possis di-
 cere, *Comprehenderunt me iniquitates meæ, & non potui, ut viderem.* Pf. 39.

III. PUNCTVM.

DVM lucet igitur, ambulandum; ne tenebra fiant; Quia si
 abuteris lumine, lumen transiit in tenebras; & nisi dum
 lucet ambules, tam verè tunc luce abuteris, quàm verè dicereris

Rom. 13.
Ephes. 5.

Prom. 4.

Is. 30.

2. Tim. 2.

Luc. 9.

recte & fideliter ea vti, si ambulares dum lucet. Nam sic ambulare nihil est aliud quam fideliter, sincere, religiose, & prout nosti quæque esse digerenda, sic digerere & exequi, nihil vti per negligentiam, & incuriam omittatur. *Sicut in die honestè ambulemus; Vt filij Lucis ambulate. Fructus autem lucis est in omni bonitate & Iustitia, & veritate, probantes quid sit beneplacitum Deo.* Sic enim fiet, vt non modo fatales illæ tenebræ euitentur, sed contrà potius iam acceptum Lumen in dies augeatur, *Procedat & crescat vsque ad perfectam diem*, vt ait Sapiens; Vel vt Propheta, *Erit lux luna sicut lux solis, & lux solis erit septemplex sicut lux septem dierum.* Neque vnquam vt ait S. Augustinus, *Sol ille faciet à te occasum, nisi prius ab eo feceris casum.* *ILLE fidelis permanet, negare seipsum non potest*, inquit Apostolus: Imo & ipse Dominus: *Omni habenti dabitur: ab eo autem qui non habet, & quod habet, auferetur ab eo.*

Vbi duplex motiū proponitur fidelitatis seruandæ, vnum ne Lumen decrescat: & aliud, vt accrescat; Sicut enim male vtenti decrescit; ita & bene vtenti accrescit. *Domine Pater & dominator vitæ meæ, ne derelinquas me, ne adincrescant ignorantia meæ, & multiplicentur delicta meæ.*

Vide tu etiam ne derelinquas Dominum, & ne tibi plus nimio fidas, ac palpes.





DIE VI. IANVARII.
IN EPIPHANIA
DOMINI.

DE CHRISTO REGE A MAGIS
ADORATO, CVM OBLATIS MVNERIBVS.

*Et intrantes domum, inuenerunt Puerum cum Ma-
ria Matre eius, & procidentes adorauerunt
Eum; & apertis thesauris suis, obtulerunt ei mu-
nera, aurum, thus, & myrrham. Math. 2.*

VERITAS PRACTICA.

Non nisi tribus oblatis Concupiscentiis, Rex Chri-
stus, re agnoscitur.

RATIO EST, Quia Rex Christus re non agnoscitur, nisi re ipsa
te illi regendum præbeas.

Sed non nisi tribus oblatis Concupiscentiis, re ipsa te illi regendum
præbes.

Ergo nec aliter Rex Christus re agnoscitur. Quod certe est impri-
mis agnoscendum.

I. PUNCTVM.



IC pergit Euangelista de Magis: *Qui cum audissent Regem, abierunt; Et ecce stella quam viderant in Oriente, antecedebat eos usque dum veniens staret supra ubi erat puer. Videntes autem stellam gausi sunt gaudio magno valde. Et intrantes domum inuenerunt puerum cum Maria matre eius; Et quæ supra habentur. Sigillatim essent omnia expendenda. Si visa stella tantum fuit gaudium, quale putandum est, inuento Puer! qualis stupor, eo viso! qualis fides, eo adorato! qualis deuotio, eo munerato tribus illis mysticis donis quæ referuntur! His te adiunge, primis ex Gentilibus Regis Christi adoratoribus, vt simul cum illis Regem tuum agnoscas, simul cum illis fidei iuramentum præstes, aut renoues, ac denique simul cum illis tua munera offeras. Sic apte sanctus Leo: *Agnoscamus in Magis adoratoribus Christi, vocationis nostræ fideique primitias; Et post pauca: Ac sicut illi de thesauris suis mysticas Domino munerum species obtulerunt, ita & nos de cordibus nostris, quæ Deo sunt digna, promamus.**

Serm. 2. de
Epiph.

Sunt quidem multa quæ pro deuotione possis offerre, sed ex obligatione seu necessitate, tres sunt illi Concupiscentiæ offerendæ, quæ tribus Magorum muneribus designantur; *Auro* videlicet Concupiscentia oculorum, seu rerum habendarum cupiditas. *Thure* Concupiscentia superbiæ, seu honorum mundi. Ac denique *Myrrha*, Concupiscentia carnis seu voluptatum. Dicitur porro esse obligatio seu necessitas huius triplicis Concupiscentiæ offerendæ, quia, vt habet veritas valde consideranda, *Non nisi tribus his oblatiis Concupiscentiis, Rex Christus re agnoscitur.* Nihil etiam gratius, nihil nobilius & ditius offeres, quia cum Christus, Rex sit cordium, non aliter regnat in cordibus, quam si hæ tres offerantur & summittantur ei Concupiscentiæ.

Ratio est manifesta quæ id demonstrat, nam vt regnet in cordibus nostris, vtque re ipsa Rex agnoscatur, nos illi totos regendos sinere, & omnem in partem ducendos vltro præstare debemus. Dixerunt serui Regis Dauid ad eum, inquit Scriptura: *2. Reg. 15. Omnia quacumque præceperit Dominus noster Rex, libenter exequemur serui tui.* Hoc ipsum est dicendum & præstandum Regi

Christo qui vult seruos voluntarios & subditos sibi libenter addictos. *Rex regum est & Dominus dominantium*, etiam inuitis & renitentibus nobis, Venietque tempus quo qui dixerunt, *Nolumus hunc regnare super nos*, illud audient, quod est in parabola, *verumtamen inimicos meos illos qui noluerunt me regnare super se adducite huc, & interficite ante me*. Sed interea nisi nos illi linamus regendos, nos ille nobis sinet; nec reipsa Rex noster erit, quia reipsa non nos reget. Non enim aliter reipsa Rex noster est, quam si nos vere regat, neque reuera nos aliter regit, quam si nos ei regendos permiserimus. Hinc psaltes Regius, *Virga directionis virga regni tui*; Quasi diceret, quantum est directionis exercitium, tantum est regnum: seu clarius, tantum re & actu regnat in nobis, quantum re & actu regit & dirigit, vnde si tolleres eius directionem, tolleres eius regnum, & ex illis esses de quibus conqueritur; *Me abiecerunt, ne regnem super eos*. Velles ne id tibi dici? Apoc. 19.
Luc. 19.
Ps. 44.
1. Reg. 3.

II. PUNCTVM.

SED non nisi tribus oblatis Concupiscentiis, reipsa te illi regendum præbes.

Nam quid est te illi regendum dare, nisi te tuaque omnia sic illi subicere, vt quicquid prorsus extra vel intra, in animo vel in corpore, prosperum vel aduersum de te statuerit, & ordinarit, sic æquum bonum ducas, & tam libenter acceptes quam qui dicebat, *Dominus est, quod bonum est in oculis suis, faciat*. At quomodo sic te illi vniuersim in omnibus subicies, nisi his oblatiis & sublatiis Concupiscentiis, quæ tam directe opponuntur huic diuinæ subiectioni, quam caro spiritui, quam appetitus Rationi, natura gratiæ, & vetus Adam illi Homini nouo, *Qui secundum Deum creatus est in iustitia & sanctitate veritatis*? *Hæc enim sibi inuicem aduersantur*, inquit Apostolus, *vt non quæcunque vultis, illa faciatis, nisi eorum vnum alteri submitatur*; Quod egregia similitudine paulo ante idem Apostolus representarat, cum de Ismaële persequente Isaacum diceret, *Quomodo tunc is qui secundum carnem natus fuerat, persequabatur eum, qui secundum spiritum, ita & nunc*. Sed quid dicit Scriptura? *Ejice ancillam, & filium eius: non enim hæres erit filius ancillæ cum filio liberæ*. Id est

Ibid. 5. sic necessario reprimenda est caro cum Concupiscentiis, vt regnet Christus; *Nam qui sunt Christi, carnem suam crucifixerunt cum vitiis & concupiscentiis.*

Math. 22. Hoc manifeste patuit in illis inuitatis ad Nuptias Regias, aut ad coenam magnam, qui omnes noluerunt venire. Cur porro?

Luc. 14. quia videlicet vnus villam emerat, alius quinque iuga bouum, & alius vxorem duxerat, quæ tria impedimenta tres complectuntur Concupiscentias, inquit S. Augustinus, quæ solent homines

De Verb. Domini. auocare à Christo Rege, quocumque eos vocet. At quæso te, si inuitatos ad coenam & ad nuptias, concupiscentiæ retinent, quomodo putas retinebunt inuitatos ad ferendas iniurias, iacturam bonorum omnium, & alia quæuis aduersa, quibus tolerandis paratos esse oportet eos qui se regendos Christo præbent?

2. Cor. 6. *Quomodo in omnibus exhibebunt semetipsos sicut Christi ministros in multa patientia, per arma iustitiæ, à dextris & à sinistris, per gloriā & ignobilitatem, per infamiam & bonam famam, nisi eas subiecerint Concupiscentias, quæ dextra semper quærunt, nunquam autem sinistra?*

III. PUNCTVM.

NONNISI ergo tribus oblati Concupiscentiis, Rex Christus re & facto agnoscitur: Quia non aliter reuera in nobis regnat quam nos regendo & ducendo quò ipse velit, neque nos aliter regit & quò vult ducit, nisi subjiciantur ei Concupiscentiæ, quæ nos inde tam certo auocant, quàm ipse dæmon reuocat, qui nisi per ipsas Concupiscentias in nobis Christo repugnat. *Hæc sunt videlicet arma iniquitatis peccato, in quibus confidit fortis armatus custodiens atrium suum,* qui à fortiori superueniente victus est, & à quo illa sublata sunt arma, vt est in parabola Euangelica. Quæ certe consideratio plurimum valere potest ad hanc perfectam triplicis concupiscentiæ oblationem, cum nisi eam Christo perfecte offeras & submittas, non modo non eum Regem habes, sed quod horrendum est dictu, illum tibi facis Regem qui Rex est super vniuersos filios superbiæ, qui princeps huius mundi, & rector harum tenebrarum propterea dicitur, quia regnat in nobis per Concupiscentias, quæ faciunt tenebrosu hunc mundum, vt expresse affirmat S. Ioannes.

1. Ioan. 2. *Econtra vero Dominus, Regnum meum non est de hoc mundo;*

Non dicit, non est in hoc mūdo, inquit S. Augustinus, sed nō est de hoc mundo, de mundo enim est quidquid ex Adam vitata stirpe generatur: factum est autem non iam de mundo quidquid inde in Christo est regeneratum, unde Apostolus, eripuit nos de potestate tenebrarum & ^{Coloss. 1.} transtulit in regnum filij dilectionis suae. Cum itaque vnum & idem sit, esse de mundo, & secundum Concupiscentias viuere; Quam vere regnum Christi non est de hoc mundo, tam vere non regnat in nobis, nisi repressis concupiscentiis.

O fortem & amabilem reprimendæ concupiscentiæ necessitatem, qua compellor aut negare Christum Regem, aut omnem illi subicere Concupiscentiam! Quid hic statuas anime? quid deliberes? quid proponas? Audi sanctum Bernardum ad illa verba, *Et regnabit in domo Iacob in aeternum; QVIS ex nobis est qui* ^{Hom. 4. super Missus est.} *iuxta interpretatione nominis, Iacob, supplantet diabolum de corde suo, luctetur cum vitiis & Concupiscentiis suis, ut non regnet peccatum in suo mortali corpore, sed regnet in eo Iesus, & nunc quidem per gratiam, & in aeternum per gloriam? Beati in quibus Iesus regnabit in aeternum, quia & ipsi cum eo regnabunt. Et paucis interiectis, Veni interim Domine Iesu, aufer scandala de tuo regno, quod est anima mea, ut regnes tu qui debes in ea. Venit enim auaritia, & vendicat in me sedem: Iactantia cupit dominari mihi: superbia vult mihi esse Rex: Luxuria dicit, ego regnabo; ambitio, detractio, inuidia, iracundia certant in me ipso, de me ipso, cuius ego potissimum esse videar. Ego autem quantum valeo, resisto: renitor quantum inuor. Dominum meum Iesum reclamo; ipsi me defendo, quia ipsius me iuris agnosco: Ipsum mihi Deum, ipsum mihi Dominum teneo & dico, Non habeo regem nisi Dominum Iesum. Veni ergo Domine, disperge illos in virtute tua, & regnabis in me, quia tu es ipse Rex meus, & Deus meus qui mandas salutes Iacob.*

Vide infra, Hebdomadam vigesimam quartam post Pentecosten, & Verbo, *Affectus, Christus, Concupiscentia.*

E O D E M D I E.

ALIA VERITAS PRÆCEDENTI CONNEXA.

Non à magno regno, Rex magnus, Christus ita est

prædicandus, quàm à magno Rege, magnum eius regnum.

RATIO EST, Quia quod est dignitate & merito maius ac dignius, non tam prædicatur ab eo quod est minus & inferius, quàm hoc minus à majori.

Sed quantumcunque sit magnum Christi regnum, Christus est eo maior & dignior.

Ergo non à magno regno Rex magnus, Christus ita est prædicandus, quàm ab illo magno Rege, magnum eius regnum est dicendum: unde illud etiam ad uberiorem praxim intelligitur, quàm sit magnum & opportunum à tali Rege regi.

PRIMA propositio plana est, & facile demonstrabilis per vniuersa ea corpora quæ ex partibus heterogeneis, atque inter se differentibus componuntur. Non tam aurum à plumbo, vel à quouis metallo cui permiscetur, dignitatem & commendationem haurit, quàm ab auro plumbum. Non tam à conchyli vnio, seu margaritum, quàm à margarito conchyle commendabitur. Exornet animum qualecunque corpus, longe tamen ab animo, magis corpus exornatur: & quæcumque insint in animis nostris naturalia, seu acquisita bona; multo tamen amplius animi ab infusis & supernaturalibus donis illustrantur quàm ab humanis & naturalibus. *Timor Domini super omnia se superposuit.*

Exodi 15. SECUNDA vero propositio non est minus certa Christiano, qui de regno Christi quantumuis magnum sentiat, totum illud tamen esse creatum & finitum credit, ac proinde cum Christo Creatore & infiniti meriti, nulla ex parte conferendum. *Quis similis tui in fortibus Domine? quis similis tui?*

Ad maiorem tamen declarationem, tria possent hic pertraheri. Primum, quo iure Christus sit Rex. Deinde, quodnam & quale sit eius regnum. Tertio denique, qualis & quam magnus Rex ipse sit.

De primo, quinque reperiuntur iura, seu modi legitimi quorum vno vel altero Reges fiunt: ex quibus vniuersim omnibus,

Rex Christus factus est. Primò, Fundatione seu Institutione, sicut Romulus Rex Romanorum, Pharamundus Rex Francorum, & alij primi quique quarumcumque nationum Reges. Sic Christus regni sui primus est Institutor & Fundator, iuxta illud Apostoli: *Fundamentum aliud nemo potest ponere, prater id quod positum est, quod est Christus IESVS.* Licet Petrus & alij Apostoli dicantur fundamentum, sed non quale est Christus, qui seipso consistit, & omnia sustinet. *Fundamentum est primum & maximum,* inquit sanctus Augustinus, *quemadmodum dicitur sanctus sanctorum, sic fundamentum fundamentorum.* 1. Cor. 3.
In Ps. 86.

Secundò, Successione legitima, quæ quidem juris ratio sic pugnat cum præcedenti, ut nullus propriè possit esse fundator & successor regni. Nam si primus est, non est successor: si successor est, non est primus nec fundator; Sed in Christo Domino, duo illa simul tam aptè conueniunt, ut non minus sit successor quàm fundator. Successor est veteris illius regni, quo Deus Iudæos sibi singulariter subditos regebat, & sanctis Legibus temperabat, de quo ipse Dominus: *Auferetur à vobis regnum Dei: Et Dauid in eius persona, Ego autem constitutus sum Rex ab eo super Sion montem sanctum eius, prædicans præceptum eius:* Qualecumque illud esset spirituale regnum Iudæorum, ad Christum translatum est, sicut Sacerdotium, & quæ vniuersim de Synagoga, & veteri Testamento, conuersa sunt in nouam Gratiae Legem & Ecclesiam, quæ est illud regnum de quo tam sæpe Christus in Euangelio, sub diuersis Parabolis. *Translati in regnū Filij dilectionis sue.* Math. 21.
Ps. 2.
Coloss. 1.

Tertiò, Acquisitione, cum quis iusto bello aut alio ex iure gentium, recepto titulo, sibi regnum acquirit; Sic Christus sua morte debellans, vel ut ait Apostolus, *Expolians principatus & Potestates, palàm triumphans illos in semetipso,* Regnum hoc acquisiuit, sicut Idem Apostolus: *Vos, inquit, Spiritus sanctus posuit Episcopos regere Ecclesiam Dei, quam acquisiuit sanguine suo.* Sic & dicitur, *Factus principatus super humerum eius:* gestando scilicet Crucem, sui Principatus inigne. Coloss. 2.
Act. 2.
1. Th. 2.

Quartò, Donatione Dei, sicut Saul, Dauid, Ieroboam & alij, sic de Christo dicitur, *Dabit illi Dominus Deus sedem Dauid Patris eius, & regnabit in domo Iacob in æternum:* non eo quidem modo quo regnauit Dauid, sed alio spirituali & excellentiori, cuius typus & figura quædam fuit thronus Dauid, & domus Iacob. Da-

Ps 44.
Heb. 1.

tum est autem Christo regnum, in ipsa vnione hypostatica; tunc consecratus & vnctus est in Regem & Sacerdotem, non materiali vnctione, sed illo lætitiæ seu Diuinitatis oleo, de quo est in Psalmo, celebre illud, *Vnxit te Deus, Deus tuus oleo lætitiæ præ confortibus tuis.*

Is 33.

Quintò & postremò, Electione, cùm populus vnanimi consensu, sibi aliquem in Regem eligit. Sic Christum Dominum Christiani omnes, hoc ipso quo sunt baptisati & professi eius fidem, Eum in suum Regem & Dominum eligunt. *Dominus Iudex noster, Dominus Legifer noster, Dominus Rex noster, ipse saluabit nos.* Nonne id profiteris?

Ioan. 18.

Tract 50.
in Ioan.

Serm. 5 de
Epiph.

Opusc. de
regim.
Princ. c. 23.

I A M verò quodnam est & quale illius regnum? Duo sunt distincta quæ quærentur. Primum est, an regnum eius sit temporale, vel spirituale. Disputatur à plerisque, in vtramque partem: sed communior & verior sententia est, esse tantum spirituale, prout ipse Dominus dixit, *Regnum meum non est de hoc mundo*, quod explicans sanctus Augustinus: *Quod est, inquit, regnum eius nisi credentes in eum quibus dicitur, de mundo non estis, sicut & Ego non sum de mundo, quamuis eos vellet esse in mundo, propter quod de eis dixit ad Patrem: Non rogo ut tollas eos de mundo, sed ut serues eos à malo: vnde & hîc non ait, regnum meum non est in hoc mundo, sed non est de hoc mundo.* Itemque alibi. *Non Rex Israël Christus ad exigendum tributum, vel exercitum ferro armandum, hostesque visibiliter debellandos; sed Rex Israël, quod mentes regat, quod in æternum consulat, quod in regnum cælorum credentes, sperantes, amantesque perducatur.* Sic sanctus Fulgentius; *Quid turbaris Herodes, Rex iste qui natus est, non venit Reges pugnando superare, sed moriendo mirabiliter subjugare. Nec ideo natus est ut tibi succedat, sed ut in Eum mundus fideliter credat.* Sanctus denique Iohannes post allatum Scripturæ locum, *Ex quo, inquit, apparet quod Dominium Christi ordinatur ad salutem animæ, & ad spiritualia bona, licet à temporalibus non excludatur, eo modo quo ad spiritualia ordinantur.*

A L T E R V M autem quod in secundo hoc puncto quæritur, est, qualenam sit eius regnum, quænam sint eius qualitates quas vocant, quænam regni præcipua capita, vnde magnum, & cæteris præstantius terræ regnis, dici possit.

Quinque referuntur, quò alia reuocari possint. Primum est, ipsa

ipsa regni natura seu regendi ratio quæ tota est spiritualis, tota est Animarum, tota Cordium, tota interior & supernaturalis qualem in terra nullam videas similem. Licet enim totus homo sit Christi, qui de ipso statuatur prout velit, quia tamen prima & antecedens eius voluntas est, vt animos ad se trahat & corda sibi deuinciat, ibi potissimum regnare dicitur, vbi amor regnat, Quod genus regnandi & regendi est præcipuum, sublime, augmentum, coeleste, & Diuinum; *O felix hominum genus, si vestros am-* Boetius l. 2. metro. 8.
mos amor, quo cælum regitur, regat.

Secundum est regni amplitudo, est enim omnium non tantum hominum, sed & Angelorum & Dæmonum, licet diuerso modo. Sic enim exaltatus dicitur Dominus vt in *Nomine eius*, id est, ad eius imperium, *Omne genus flectatur coelestium, terrestrium, & Inferorum*, id est, omnes Ei Creaturæ subijciantur & pareant. Phil. 2.

Tertium est libertas, nobilitas, opulentia & beatitudo subditorum huius regni; Sunt enim ipsi omnes Reges, *Omnes Filij Dei, omnes eius heredes, & cohæredes Christi*; Quid nobilius, quid beatius. *Non timet ille habere consortes*, inquit sanctus Augustinus, *quia eius hereditas non sit angusta, si multi eam possederint.* Rom. 8.

Quartum, pax & securitas ex hac etiam vita; hoc enim singulariter de hoc regno dicitur, *quod sit pax & gaudium in Spiritu sancto*, id est, spirituale, verum & solidum gaudium, quod sicut non est à mundo, ita nec mundus auferre potest. *Et gaudium vestrum nemo tollet à vobis.* Rom. 14. Ioan. 16.

Quintum est regni firmitas atque aternitas, hoc est enim regnum de quo Propheta Daniel, *Quod in aeternum non dissipabitur, & regnum eius alteri populo non tradetur, comminuet autem & consumet vniuersa regna hæc, & ipsum stabit in aeternum. Et regni eius non erit finis.* Dan. 2. Luc. 1.

HÆC certe magna sunt & singularia, hæc sunt vnde magnum & singulare regnum Christi, merito dici debeat & gloriose prædicari. Sed Rex ipse Christus Dominus tanto interuallo superat illam omnem sui regni magnitudinem & singularitatem, quanto Creator creaturam.

Quinque sunt Eius etiam excellentiæ & perfectiones regię, quæ sunt ita notæ cunctis, vt eas vel appellare sufficiat.

Prima est, Sanctitas de qua expresse apud Danielelem, *Donec*

Dan. 9. *ungatur Sanctus Sanctorum.* Quantum verò Regi conferat ad Iplius cultum & obseruantiam, nemo nescit.

Secunda est, Sapientia quæ dirigendo regno imprimis est necessaria, vnde & disertè dicitur, *Regnabit Rex & Sapiens erit, & faciet iudicium & iustitiam in terra.*

Is. 11. Tertia est, Iustitia siue æquitas, nulli vt vnquam injuriam faciat, nullum violente cogat, nullius iura violet. *Non secundum visionem oculorum indicabit, neque secundum auditum aurium arguet, sed indicabit in Iustitia pauperes, & arguet in æquitate pro mansuetis terra. Virga æquitatis, virga regni tui.*

Hebr. 1. Quarta est, Bonitas seu Liberalitas, qua vel præueniat bonis innumeris, suos subditos, sibi etiam rebelles & infensos, vel comitetur & sequatur præmiis ingentibus tum gratiæ, tum gloriæ sempiternæ. *Benedicentur in Ipso omnes tribus terra.*

Pf. 71. Quinta est, Potentia & fortitudo suis conseruandis, protegendis, & ita promouendis ad suum optatum finem, *Vt non rapiat eos quisquam de ipsius manu,* Nemo diripiat, nisi se ipsi velint subducere. *Liberabit pauperem à potente, & pauperem cui non erat adiutor, Beati viri tui, & beati serui tui qui stant coram te semper, & audiunt Sapientiam tuam.*

I. Ioan. 3. EX quibus, & aliis prope infinitis quæ regiam Christi Domini Dignitatem spectant, diligenter expensis, aperte liquet quàm vere non à magno regno, Rex magnus Christus est, sed potius à magno Rege, magnum sit regnum. Esto sint magna quæ confert; at maior Ipse est suis donis. Sint serui eius liberi, sint nobiles, sint opulenti, sint beati omnes in quibus regnat: At suprema illa Sapientia qua eos regit, suprema illa Bonitas qua eos fouet: suprema illa Potentia qua eos vt pupillam oculi seruat, & ad æternam ducit beatitatem, longe maior est, longe excellentior est, ipsa eorum foelicitate qua in coelis fruuntur. *Maiores est Deus corde nostro,* inquit dilectus Discipulus: Quasi diceret, quidquid in nobis maius est, in corde nostro est, siue in ea nostri parte quæ capax est Dei possidendi. At quantumcumque pars illa sit capax & magna, maior est tamen Deus, cui toti totaliter capiendò, nil par creatum esse potest, cum se Ipse solus comprehendat.

Atque hæc intelligere & crebro cogitare multum prodest ad Praxim seruitutis nostræ, tanto Regi fidelius exhibendæ. Sic

enim purior est noster animus qui Christi meritum magis spectat quam ullam inde nobis promanantem vtilitatem. Sic nos Illi magis ac magis subdimus, cum quantumcumque obsequij deferamus, major sit Ille omni laude, maior omni obsequio. Sic quam insipienter illi agant euidentius patet, qui se ab Illo subtrahunt, quo nullus sapientior ad regendum, nullus potentior ad protegendum, nullus æquior ad imperandum vel exigendum, nullus melior ad benefaciendum, nullus maior ad beandum. Et tamen quam illi multi sunt, qui se ab Illo subtrahant ! Quam verè sanctus Augustinus : *Modo multi Christum Regem in cælo sedentem, & ubique regnantem habere nolunt.*

O quam iultè, quam prouidè præmaturo interitu puniuntur illi qui talem tantumque Regem nolunt in se regnare ! Quamquam quid grauius, quid acerbius non ad culpam modò, sed ad pœnam, quam hoc nolle ? Quid enim est hoc nolle, nisi se à pacato Rege ad iratum conuertere ? Quid est hoc nolle, nisi malle à sua praua cupiditate regi, quam à Diuina Sapientia ? nisi malle ibi viuere vbi loco Christi, Dæmon regnat ! Potestne grauius aliquid cogitari ?



DIE VII. IANVARII.

NISI SIT DOMINICA, CVIVS PROPRIA MEDITATIO
HABETVR INFRA, DIE DVODECIMA,
IN DECVRSV HISTORIÆ EVANGELICÆ.

DE REDITV MAGORVM IN PATRIAM SVAM.

Et responso accepto in somnis, ne redirent ad Herodem : per aliam viam reuersi sunt in regionem suam. Math. 2.

VERITAS PRACTICA.

Non aliud, sed aliter.

SENSVS EST, Quod consilia melioris vitæ, non tam sæpe spectant aliud in agendo, quàm modum & finem agendi; Non aliud in re & substantia, sed aliter in modo & fine.

RATIO EST, Quia ibi sunt figenda consilia melioris vitæ, ubi magis deficimus.

Sed ordinarie magis deficimus in modo & fine agendi, quàm in substantia rerum agendarum.

Ergo illa consilia non tam spectant aliud in agendo, seu aliud in re & substantia, quàm ut aliter in modo & in fine agatur.

I. PUNCTVM.

AUT indignus erat Herodes, cæterique Iudæi qui Magos audirent, referentes ea quæ viderant & fecerant: aut periculum erat Magis, ne male à Iudæis haberentur, & à fide atque à religione auocarentur: quamobrem admonentur in somnis, ne quæ venerant reuertantur, sed alia via remigrent in patriam suam. Sic fidelis Deus iis qui se suaque omnia semel ei obtulerunt. Est vero præterea moralis & mystica huius reuersionis, per aliam viam ratio, nempe ut Magi discerent se posse quidem viso Christo, repetere sua regna, sua negotia, & quicquid ante domesticum & ciuile agebant, sed non eodem modo & fine agendum; non ex naturæ deprauatæ impetu, non turpis lucri, aut vanæ ambitionis gratiâ, sed rectæ rationis & diuini ductu Numinis, ad supremi Dei cultum & æternæ beatitudinis consecutionem. Iamque illud meditabantur quod postmodum scripsit S. Petrus, *Vt iam non desideris hominum, sed voluntati Dei quod reliquum est in carne, viuant temporis. Sufficit enim præteritum tempus ad voluntatem Gentium consummandam.*

Sic ad nos pie deriuat S. Gregorius, hanc Magorum reuersio

nem, dum ait, *Magnum vero nobis aliquid Magi innuunt, quod in* Hos. 10.
in Euanga
regionem suam per aliam viam reuertuntur. Regio quippe nostra, pa-
radysus est, ad quam Iesu cognito, redire per viam quâ venimus prohi-
bemur. A regione etenim nostra superbiendo, inobediendo, visibilia
sequendo discesimus: sed ad eam necesse est, ut flendo & obediendo,
visibilia contemnendo, atque appetitum carnis refranando, redeamus.

Atque hinc Forma quædam Emendationis vitæ, seu Renouationis spiritus datur; vt quando de hoc negotio agitur, seu quoties melioris vitæ consilia suscipiuntur, non ita spectent vt aliò proficiscamur, quàm vt aliâ viâ redeamus ad idem officium nostrum; Non aliud meditemur agendum, sed aliter; *Non aliter in re & substantia, sed aliud in fine & modo.* Quæ Veritas quia est valde practica & opportuna, idcirco præcipuâ est consideratione digna. Sic autem aperte declaratur. Ibi sunt figenda melioris vitæ consilia, vbi magis deficimus: hoc primum expendendum, siue ille defectus vitiosus sit, siue imperfectio, aut perfectionis aliqua tantum priuatio, si quid à nobis desideratur, si quid nimis aut minus fiat, si quid denique corrigendum & emendandum; nonne in id præcipue incumbit negotium Emendationis aut Renouationis vitæ? Nonne hinc illi Prophetarum questus, & lamenta; *Vulnus & liuor & plagatumens non est circumligata nec curata medicamine, neque fota oleo. QVARE non est obducta ci-* Is. 1.
trix filia populi mei? QVOD infirmum fuit non consolidastis; & Ier. 8.
quod confractum est, non alligastis: & quod abiectum est, non reduxi- Ezech. 34.
stis: quasi dicerent, in defectibus emendandis erat posita tota vitæ emendatio.

Sic in Apocalypsi Christus Dominus suos illos Angelos seu viros Angelicos & Pastores, in quibus potissimum deficiant, se- Apoc. 2.
& 3.
uerè admonet & arguit. Sic denique author libri de Imitatione L. 1. c. 19.
& 25.
Christi, *Semper aliquid certi proponendum est, & contra illa practi-*
pue quæ amplius nos impediunt. Et alibi, *Duos specialiter ad magnam*
emendationem iuuant, videlicet subtrahere se violenter ad quod na-
tura vitiose inclinatur: & feruenter instare pro bono quo amplius
quis indiget. Res est seria, res salutis, res æternitatis: Itanè apprehendis?

II. PUNCTVM.

SED ordinariè magis deficiamus in modo & fine agendi, quam in substantia rerum agendarum.

Jer. 2.

Institue aliquod tui examen. *Vide vias tuas, scito quid feceris*, ait Propheta. A mane ad vespeream. A prima diei actione ad postremam, vbinam deficis? in quo delinquis præcipue? Non deferis orationem, sed modum rite orandi; Non omittis diuinum officium, sed attentionem & deuotionem. Missam quotidie celebras, & satis crebro frequentas Poenitentiae Sacramentum; sed quonam modo? Sic in studio, in mensa, in relaxatione animi, in conuersatione, & officio particulari, si quid peccas, nonne vel quia in his te ipsum quaris, tibi plus nimio complaces, nimis effunderis & dissiparis, non satis religiose te contines? qui sunt omnes defectus circa modum & finem; nec tamen propterea contemnendi quasi leues & modici, cum ex fine præcipue iudicium feratur de actibus. Vnde illa Domini celebris sententia,

Luc. II.

Lucerna corporis tui est oculus tuus. Si oculus tuus fuerit nequam, totum corpus tuum tenebrosus erit. QVIA, inquit S. Gregorius,

28. Mon.
c. 13.

cum peruersa intentione quid vel rectum agitur, etsi splendere coram hominibus cernitur, apud examen tamen Interni Iudicii obscuratur.

Dan. 5.
Sophon. 1.

Huic te siste examini, & appensus in statera, Vide num sis minus habens; minus rectæ intentionis, & minus perfecti operis. Horrendum nempe illud est quod ait Dominus per Prophetam: *Scrutabor Ierusalem in Lucernis, & visitabo super viros defixos in facibus suis, qui dicunt in cordibus suis: Non faciet bene Dominus, & non faciet male?* Id est, qui sibi fingunt nihil boni aut mali esse coram Deo in illis suis actionibus, quas ex naturali genio potius faciunt quàm spiritali motu.

III. PUNCTVM.

Dom. 1.
Aduen.

NON ergo aliud, sed aliter: Non tam aliud in re & substantia quod facias, excogitandum tibi est, quàm in modo & fine, vt emendes quod male & perperam facis. Nam idem tibi, vt supra dictum est, meditandi & orandi exercitium redit quotidie; idem officij persoluendi munus, idem pene studium, eademque

tecum particulatim, & cum alijs opera quotidiana, quæ nec mutare, nec augere, nec decurtare forsan ita conuenit, quam finem & modum adhibere, quibus perfecte magis & integre digerantur. Ibi ergo curatio sit ubi vulnus, & ibi restauratio ubi iactura.

Scrutemur vias nostras, & reuertamur ad Dominum. Iuste quod iustum est persequeris, ait Dominus. Et iterum, *Qui enim custodierint iusta iuste, iustificabuntur*: Id est, qui debito fine & modo. Sic Apostolus, hoc vnum in se & alijs promouebat: *Imitatores mei estote fratres, & obseruate eos qui ita ambulant, sicut habetis formam nostram*. Rursumque alijs, *Rogamus vos & obsecramus in Domino Iesu, ut quemadmodum accepistis à nobis, quomodo vos oporteat ambulare, & placere Deo, sic & ambuletis, ut abundetis magis*. Descende ad singula, quemadmodum acceperis, quomodo te oporteat meditari, orare, conuersari & viuere. *Memor esto unde excideris. In mente habe qualiter acceperis & audieris, & serua, & pœnitentiâ age.*

Thron. 3.

Deut. 10.

Sap. 6.

Phil. 3.

1. Tim. 4.

Apoc. 2.

& 3.

Vide Verbo *Renouatio. Emendatio.*



DIE VIII. IANVARII,

NISI SIT DOMINICA.

DE PRÆSENTATIONE PVERI IESU,
IN TEMPO:

ET DE PURIFICATIONE VIRGINIS MATRIS.

Postquam impleti sunt dies purgationis eius, secundum Legem Moysi, tulerunt Illum in Ierusalem, ut sisterent eum Domino. Luc. 2.

VERITAS PRACTICA

Non quid liceat, sed quid magis expediat.

SENSVS EST, Quod cum multa liceant, quæ non expediunt,

tunc in eorum electione, magis attendendum quid expediat, quàm quid liceat; seu quod idem est, Non ita est attendendum quid liceat, quàm quid expediat.

RATIO EST, Quia quando aliqua licent ex uno capite, & non licent ex alio, tunc potius attendendum est caput ex quo non licent, quàm aliud ex quo licent.

Sed quando non expediunt, perinde est ac si ex hoc capite non licerent, tametsi ex alio licent.

Ergo tunc potius attendendum non quid liceat, sed quid magis expediat; Exemplo sanctissimæ Virginis Matris, quod tamen pauci respiciunt ad imitandum.

I. PUNCTVM.

Exod. 13.
Leuit. 12.

UVDÆA Mulier si suscepto semine masculum peperisset, duplici lege tenebatur se sistere Ierosolymis, quadragesimo à partu die: alterà quâ se purificaret, alterà quâ filium Deo tunc offerret. Neutrâ vero lege Beatissima Virgo parens obligabatur, tunc quia Mater erat Virgo, quæ non suscepto semine pepererat, tû quia Filius erat ipse Legislatores, & Deo Patri oblatus antequam natus. Vtrique tamen legi obedire voluit, non quid liceret, sed quid magis expediret attendens. Id enim ita expediebat, non modo ratione Filij quî venerat non legem solvere sed adimplere; verùm & consideratione ipsius Matris, quæ multa & luculenta in hoc bono opere, virtutum exempla, cogitatione & imitatione colenda nobis reliquit.

Qualis quantaque Humilitas, sic apparere purificandam quati vnam ex immundis mulieribus! Qualis amor Puritatis, sic velle amplius, quantum id fieri posset, purificari! Qualis Religio & Deuotio, in offerendo Filio pro salute totius humani generis? Quale Paupertatis studium in pullis columbarum simul oblati, quæ erat expressa nota pauperum? Qualis denique Obedientiæ perfectio, seu perfectionis integritas, nulla re velle prorsus deesse officio, vbi tamen nullum erat officij debitum! Admirare, congaude, & illos imprimis affectus exprime, quî Veritati propositæ

propositæ ad imitandum magis erunt conformes. Est enim utilissima Veritas & in praxim frequentissima, *Vt non quod nobis liceat in multis quæ occurrunt, sed quid magis expediat, attendamus.*

Et quidem Ratio posset duci à consideratione maioris boni propter quod multa non expediunt, quæ alioquin licent; quo vno motivo non est dubium quin sanctissima Virgo Mater moveretur; sed quia pauci sic intuentur maius illud & perfectius bonum ad quod ex præcepto non tenentur, visum est potius Rationem petere à malo quod incurritur, nisi Veritas obseruetur.

Sic autem procedit Ratio: Quando aliqua licent ex vno capite, quæ non licent ex alio, tunc potius attendendum est caput ex quo non licent, quàm aliud ex quo licent. Nam vt supra consideratum est, bonum quidem omitti potest, malum autem *Die 2. Iar.* nunquam committi: Vnde si quid ex se suaque natura vel specie, licitum & indifferens, aut etiam bonum est, vt oratio, ieiunium, mortificatio corporalis, aut quid simile: si tamen ex alio capite vitietur aliquâ peccati notâ, vt quod vetetur à superiore, vel quod grauiter offendat sanitatem, vel quod manifeste maius impediat bonum: Nonne tunc omittendum esset istud opus, licet ex se licitum, licet bonum? Nonne tunc potius spectandum illud esset caput ex quo malum est, quia vetitum & non licet, quam aliud ex quoliceret? Sic fuse sanctus Bernardus in propria voluntatem, *Grande malum propria voluntas quâ fit vt bona tua, tibi bona non sint.* Expende accuratius quàm id verum, & tibi proprium.

II. PUNCTVM.

SED quando res non expediunt, perinde est ex hoc capite ac si non licerent, etsi ex alio licent.

De his enim rebus hic agitur quæ ita licent & non expediunt, vt ex qua parte non expediunt, non liceant, quia nempe sine notabili detrimento proprio, vel scandalo proximi, aut aliquo simili damno non possint fieri.

Tale est Sacerdoti vel Religioso tractare aliquid sæculare liberior. Tale & vni Religioso vel sæculari aliquid quod non alteri conueniret, propter diuersam conditionem, vel temperamentum naturale, vel aliquam aliam circumstantiam: Vnde Sapiens

Ecclesi. 37. sapientissime monet; *Fili in vita tua tenta animam tuam, & si fuerit nequam, non des illi potestatem: Non enim omnibus omnia expediunt, & non omni animæ omne genus placet. S A E P E aliis officiunt, quæ alijs profunt*, inquit sanctus Gregorius, *nam & plerumque herbae quæ hæc animalia reficiunt, alia occidunt, & lenis sibilus equos mitigat, catulos instigat: & medicamentum quod hunc morbum immittit, alteri vires iungit: & panis qui vitam fortium roborat, parvulorum necat.* Hinc diuinum illud, *Nosce te ipsum; Et apte Sapiens; Vbi non est scientia animæ, non est bonum.* Habesne hanc scientiam? Nosti ne te ipsum; quid noceat, vel quid magis proficit ad salutem?

III. PUNCTVM.

ERGO tunc potius attendendum, non quid liceat, sed quid magis expediat; Quia cum non liceat ex qua parte non expedit, hoc est spectandum potius quod non licet, quam quod licet. *Omnia mihi licent*, inquit Apostolus, *sed non omnia expediunt.* Atque iterum in eadem Epistola; *Omnia mihi licent, sed non omnia expediunt; omnia mihi licent, sed non omnia ædificant.* Ex quibus locis & verbis, Veritas nostra valde confirmatur: Nam ibi quæstio erat de litibus non agitandis à Christiano apud Infideles, & de Idolothytiis non manducandis: quæ duo per se erant licita, sed non erant ædificationis, imo scandali & offensionis, ac proinde non expediebant: & sic considerata, erant velut mala & illicita, nec minus fugienda, quam si per se mala fuissent. Vnde idem Apostolus. *Noli propter escam destruere opus Dei; omnia quidem sunt munda, sed malum est illi qui per offendiculum manducat.* Idemque alibi; *Sic peccantes in fratres, & percutientes conscientiam eorum infirmam, in Christum peccatis.* Quapropter si esca scandalizet fratrem meum, non manducabo carnem in æternum, ne fratrem meum scandalizem.

Sic plane tibi dicendum de his omnibus quæ quotidianâ experientia potes obseruare tibi non expedire, tametsi liceant; *Non quid Liceat, sed quid magis expediat*, attendendum. Hoc enim non expedit vobis, inquit Apostolus, hoc vnum affert quo illis persuadeat quod persuadendum proponit. Sic Christo Domino quanta licebant in vita Ipsius, si his uti voluisset? Sed quia non

expediebat tibi, ut aliter viueret, idcirco sic vitam instituit, sicque à se institutæ vitæ rationem hanc reddit, *Quia sic tibi expedit.* Quare ab eo cur ita natus, cur circumcisus, cur fugatus in Ægyptum, cur ita mortuus, cur denique in cœlum rediit, *Expe-* Ioan. 16.
dit, inquit, *vobis, ut ego vadam.* Non quid liceat, sed quid magis expediat, hoc attendo. Tu vero quid dicis ne abstineas licitis, ne te tuis priues commodis, aut ne arctius quàm velles, te constringas? Quid excusas? Quid objicis? Non est inquis, culpa lethifera, non est obligatio, *Sit fortitudo nostra, lex Iustitia,* quidquid Sap. 2.
possumus citra grauem culpam, hoc demum liceat, & quicquid licet, hoc intrepide audeamus. O vocem effrenatæ licentiæ! Quàm recte dictum à Propheta: *Declinantes in obligationes addu-* Ps. 124.
cet Dominus cum operantibus iniquitatem? Si tantum respicis quod ex præcepto te obligat, si non quid expediat, sed quid tibi liceat in agendo spectas, non eris immunis à peccato, non erit innocens illa licentia; aut illa cito peribit innocentia. Neque enim tenetur ipse Deus tibi conferre Gratias quibus abuteris, & quibus priuatus corrues. *Quasi liberi & non quasi velamen habentes* 1. Pet. 2.
malitia, libertatem: sed sicut serui Dei.

Vide in festo Purificationis Beatæ Virginis.



DIE IX. IANVARII

NISI SIT DOMINICA.

DE OCCVRSV SIMEONIS

IN TEMPLO: ET DE IIS QUÆ VENTURA

CHRISTO AC VIRGINI MATRI.

P R A E D I X I T.

Ecce positus est Hic in ruinam, & in resurrectionem multorum in Israël, & in signum cui contradicetur, & tuam ipsius animam pertransibit gladius. Luc. 2.

Ee ij

VERITAS PRACTICA.

In pace amaritudo : & pax in amaritudine.

SENSVS EST, Quod ſicut in pace & tranquillitate noſtra, debet eſſe aliqua cordis amaritudo ; ſic in cordis amaritudine, pax & tranquillitas inſunt neceſſe eſt ; Neutra ex his ſeparatim, ſed utraque ſimul conjunctim.

RATIO EST, Quia idcirco in pace debet eſſe amaritudo aliqua, ne alioquin pura pax animam obruat.

Sed niſi pax eſſet in amaritudine, ſola etiam amaritudo animum abſorberet.

Ergo & in pace amaritudo, & pax in amaritudine.

I. PUNCTVM.

E Tecce homo erat in Ieruſalem cui nomen Simeon, & homo iſte iuſtus & timoratus. Vide quæ plura habentur de eo, in textu, & ex ſingulis decerpe aliquid ad proſectum : Tum vero præcipue ex iis quæ prædicit ventura Chriſto Domino, & Virgini Matri. Mirum enim quanta inde in pace amaritudo fuerit, & quanta pax in amaritudine. Quàm tranquilla & quam iucunda pax eſſet in animo Virginis à nato Filio, ab auditis Angelis, à viſis Magis, & ab ipſo etiam benedicente Simeone, quis ignorat? At quanta mox fuerit amaritudo in hac pace, cum audiuit poſitum Filium in ruinam multorum, & in ſignum cui contradiceretur, ſuamque ipſius animam pertransituum gladium, quis non videt? Sic itaque ſimul deinceps coniuncta fuerunt in corde beatiffimæ Virginis pax & amaritudo, vt nulla pace frueretur niſi amara, nec vlla etiam amaritudine affligeretur niſi pacifica & tranquilla, cum illa eſſet Sapientia, *Quæ in omnibus requiem quaſuit, & in hereditate Domini morata eſt.*

Eccleſ. 24.

Nos in utroque peccamus ordinarie ; & nimis puram pacem appetimus, & nimia tabeſcimus amaritudine. Vtrumque ſeorſim malum, vtrumque conjunctim bonum : *Et ſicut in pace amari-*

tudo aliqua insit necesse est, sic pax in amaritudine.

Ratio utriusque est eadem, & valde consideranda; Quia videlicet quando sola pax & tranquillitas animam possidet, animum dissolvit quodammodo, dissipat, & ita disperdit, ut sanctiores quique sibi vel maxime timeant ab illa pace. *Non solum temporalis latitia, sed & spiritualis*, inquit S. Hieronymus, *est tentatio possidenti, ita ut indigeam aliquando Angelo corripiente, & Angelo Satanae qui me colaphizet, unde & Salomon ait, divitias & mendicitatem ne dederis mihi. Sic Monitor*, inquit idem S. Doctor, *Paulo datus est ad premendam superbiam, uti in curru triumphali, triumphanti datur Monitor suggerens, hominem te esse memento. Sic sanctus Augustinus: Magna virtutis est cum felicitate luctari, magna felicitas a felicitate non vinci. Cui conformiter S. Bernardus, Magnus cui presens felicitas si arrisit, non irrisit. Unde & sanctus Ambrosius: Deus deliciis & gaudiis nostris ponit modum, ne supra alveum effusa rationem obruant. Idemque notat datum esse filio prodigo annulum in manu quasi signaculum, quo cordis interiora signarentur, ne in tanta lætitia sese nimis effunderet; Vide libri tertij de Imitatione Christi caput vigesimum quintum, ubi hæc inter alia; Pax tua in multa patientia; non aestimes te veram pacem invenisse, si nullam senseris gravitatem. O quam multi falluntur dicentes, pax pax, cum non esset pax.*

1. Cor. 12.

Prov. 30.

3. de conf. 12.

De Cain & Abel. Luc. 15.

Iere. 8.

II. PUNCTVM.

SED nisi pax esset in amaritudine, sola etiam amaritudo animum absorberet.

Sic expresse Apostolus; *Ne forte abundantiori tristitia absor- beatur qui cuiusmodi est. Quod quidem non tantum est perniciosum corpori, ne offendatur nimia tristitia, Quæ exsiccat ossa, & sicut tineæ vestimento, & vermis ligno, ita nocet cordi; Sed & animo maxime officit, qui nimia intabescit amaritudine, & suis quodammodo destituitur facultatibus, unde Sapiens, Non est sensus ubi est amaritudo, scilicet nimia. Imo & ipsi animæ ad salutem & perfectionem valde aduersatur, quia sic magis patet tentationibus, diffidit Deo, languet virtute, sibi gravis, onerosa est aliis, prope in desperationem agitur; in quodam denique peccatorum inferno detinetur. Sic sanctus Augustinus interpretatur illud quod*

2. Cor. 2.

Prov 17. & 25.

Eccles. 21.

Lib. 12. de
Grn. ad
lit. c. 33.

Iacob dicit ad filios ſuos, *Deducetis ſenectutem meam cum triſtitia ad inferos. Videtur, inquit, hoc magis timuiſſe, ne nimia triſtitia ſic perturbaretur, ut non ad requiem beatorum iret, ſed ad inferos peccatorum. Neque enim paruum animæ malum eſt triſtitia, cum etiam Apoſtolus cuidam tam ſolicite timeret ne maiore triſtitia abſorbere-
Hebr. 12. tur. Atque idem denique Apoſtolus, poſt commendatam pacem, Nequa inquit, radix amaritudinis ſurſum germinans impedi-
& per illam inquinentur multi. Videſne quantum inde aliquando fueris inquinatus?*

III. PUNCTVM.

IN pace igitur amaritudo, & pax in amaritudine; Ne nimia pax efferat, aut nimia amaritudo nimis deprimat; *Omni cuſtodia
Prou. 4. conſerua cor tuum, ait Sapiens, Ne declines ad dexteram neque ad ſiniſtram, auerte pedem tuum à malo; Vias enim quæ à dextris ſunt, no-
uit Dominus: peruerſæ vero ſunt quæ à ſiniſtris ſunt. Ipſe autem rectos faciet curſus tuos, itinera autem tua in pace producet. Ipſe eſt qui ut
ait Iob, utque interpretatur ſanctus Gregorius, Sic facit ventis
Iob. 28. pondus, & aquas appendit in meſſura. Ipſe eſt qui, ut habet ſacrum
lib. 19. prouerbium, Riſum dolore miſcet, & extrema gaudiij luctu occupat.
c. 5. 6. Ipſe eſt denique qui nos facit quaſi triſtes, ſemper autem gaudentes.
Prou. 14. Vide ergo ne te illi opponas, ne ſi pure bona & tranquilla viſ ha-
bere omnia: dicatur tibi, *Eli recordare quia recepiſti bona in vita
2. Cor. 6. tua; aut ſi mala, ſine pace & patientia recipias, tu cum illis ge-
Luc. 16. mas qui dicunt, Laſſati ſumus in via iniquitatis, & ambulauimus
Sap. 5. vias difficiles: viam autem Domini ignorauimus. In praxi Veritatis
Luc. 9. & propoliæ, via eſt Domini, qui in monte Thabor dum abundat
23. lætitia, de paſſione loquitur: Et in monte Caluariæ dum ſatura-
tur opprobriis, & doloribus immergitur, de paradyſo cogitat &
fermocinatur. Vade & tu fac ſimiliter.**

Vide Dominicam ſecundam Quadrageſimæ, & libri tertij de Imitatione Chriſti, caput ſeptimum.



DIE X. IANVARII.

DE FUGA SANCTI IOSEPH IN ÆGYPTVM.

*Surge, & accipe Puerum & Matrem eius, & fuge
in Ægyptum. Matth. 2.*

VERITAS PRACTICA.

Non contristabit Iustum, quidquid ei acciderit. *Prou. 12.*

RATIO EST, Quia nihil sibi accidere Iustus putat, nisi Deo
volente.

Sed quidquid Deo volente accidit, non contristabit Iustum.

Ergo nec quidquid ei acciderit. Et tamen tam multa te contristant.

I. PUNCTVM.

PRACTIS de more omnibus quæ spectabant ad Le-
gem purificationis, reuerſi ſunt in Galilæam, in ciuita-
tem ſuam Nazareth. Ita expreſſe ſanctus Lucas. Tum Luc. 2.
vero vix vnum aut alterum diem exegerant, Cùm ecce Angelus Do-
mini apparuit in ſomnis Ioseph, dicens, ſurge & accipe puerum & ma-
trem eius, & fuge in Ægyptum, & eſto ibi uſque dum dicam tibi: fu-
turum eſt enim vt Herodes quærat puerum ad perdendum eum. Qui
conſurgens accepit puerum, & matrem eius nocte, & ſeceſſit in Ægy-
ptum. Sic diſertis & paucis quidem verbis ſanctus Mathæus, ſed Math. 2.
quibus magna latent myſteria, & multâ conſideratione digniſſi-
ma. Qualis namque hæc agendi ratio, & quàm ſtupenda Dei
Prouidentia erga tres illas perſonas, quas habebat in mundo ca-
riſſimas? Nonne Deo ſuauiores erant viæ ſeruandi Filij? Non- Prou. 2.
ne ille eſt qui in manu ſua cor Regum tenet? Nonne cor Hero.

dis immutare poterat, aut aliorum detorquere? Nonne Ciuitatem Nazareth, aut Iosephi domum, aut selectam illam familiam ab omni tutam injuria conseruare? Nonne inuisibilem reddere? aut inaccessam, aut terribilem, aut fulminatricem! Quid denique non poterat Omnipotens? Et ecce quasi nihil posset, procul amandatur vniuersa familia; protinus fugit, & fugit in Ægyptum!

At saltem præsto sint currus, præsto equites, ipsique non desint Angeli, qui fugientes vehant aut portent: saltem expectetur clara dies, vel nox inclarescat illustrandæ, quantum est satis, tenebræ viæ; saltem iusta concedatur mora comparando viatico, componendæ supellectili, salutandis vicinis, ac tam longo molestoque itineri præparando. Nihil horum; sed illo ipso momento consurgens Ioseph accipit puerum & matrem eius, domum deferit, dat se itineri, vnam Ægyptum cogitat.

O Iudicia Dei, vere abyssus multa! quis crederet hos tres exules familiam Dei esse! vel quis crederet, sic Deum regere familiam suam! Sed erigere anima mea, erigere altius quam sunt humana omnia. Cernenti quidem illos oculis carneis, vt sunt omni humana ope destituti, nihil videri possit miserius; sed attenta mente consideranti qua promptitudine obediunt, qua modestia incedunt, quo silentio, qua quiete, qua tranquillitate, & quibus canticis Deum laudant, nihil videri debet sublimius.

Sic itaque illos attente considera, vt videas ad imitationem & praxim, quàm vere Sapiens dixerit, *Non contristabit Iustum quidquid ei acciderit*, Nempe nihil sibi accidere putat Iustus, nisi Deo Volente, aut permittente, qui idcirco expresse dicit, *Ego Dominus & non est alter, formans lucem, & creans tenebras, faciens pacem, & creans malum*. Ego Dominus faciens hæc omnia. Qui & queritur & minatur, si quis aliter sentiat; *Quis est iste qui dixit, vt fieret Domino non iubente? Ex ore Altissimi non egredientur nec bona, nec mala?* Quasi diceret, quis est iste ignarus, quis iste temerarius, quis iste blasphemus in diuinam Prouidentiam, qui dubitet non æque eam procreare mala atque bona? Adeo non ille iustus est qui de hoc dubitet, vt tanquam injustissimus & iniquissimus sit puniendus.

Et certe is erat inter alios, error amicorum Iob, qui putabant alienum à Deo esse, punire bonos & innocentes, contra quos Dominus

nus vni eorum loquens, *Iratus est furor meus in te, & in duos amicos tuos, quoniam non estis locuti coram me rectum, sicut seruus meus Iob.* Quid clarius? quid expressius? Credisne Angelum nunciasse Iosepho fugam, aut illum nuncium non nisi à Deo esse? Cur non æque credes, alia sic à Deo prouenire mala, cum id æque scriptura testetur?

II. PUNCTVM.

SED quicquid Deo volente accidit, non contristabit Iustum.

Aut certe iustus non erit, si inordinate contristetur. Nam sicut nihil iustius quàm Deo volenti & iubenti parere & subjici, sic nihil iniustius quàm velle se, suamque voluntatem præferri diuinæ. *O homo tu quis est, qui respondeas Deo?* Vel enim iudicas illud quod accidit iniuste à Deo accidisse, vel iuste; si iniuste, iniustus & iniquus ipse es, qui Deo iniustitiam imputare ausis. *Nunquid iniquus est Deus qui infert iram,* inquit Apostolus, *absit,* *alioquin quomodo indicabit Deus hunc mundum?* Quod si id iuste putas factum, nec aliter nisi iuste & sanctè posse Deum aliquid facere credis, sicut ait Deo Sapiens, *Cum sis iustus, iuste omnia disponis;* Nonne etiam tu iniustus es, si contristeris & doleas de eo quod tu ipse iustum & iuste factum putas? Sic egregie S. Gregorius in hæc verba Iob, *Sicut Domino placuit ita factum est, CV M enim in hac vita, ea que nolumus patimur, necesse est vt ad Eum qui iniustum velle nihil potest, studia voluntatis nostræ inclinemus.* Magna quippe consolatio in eo quod displicet, quod illo ordinante erga nos agitur, cui non nisi iustum placet. Si igitur iusta Deo placere scimus: pati autem nulla nisi que Domino placuerunt, possumus: iusta sunt que patimur; & valde iniustum est si de iusta passione murmuramus.

Hoc est ita certum vt ab impiissimo mortalium, nempe Antiocho Rege, voluerit Deus publica confessione declaratum, ne vt deinceps auderet aliquis id negare, quod tam nefarius protulisset, ipsa veritate conuictus, *Iustum est,* inquit ille, *subditum esse Deo.*

III. PUNCTVM.

NON contristabit ergo Iustum, quicquid ei acciderit; Cum nihil nisi Deo volente, sibi quidquam putet accidere, & quid-

Ps. 118.
Apoc. 16.

Sap. 5.

Iudith 8.

Iob. 40.

Ps. 38.

2. Reg. 16.

quid à Deo accidit, tam iustum putet, vt iustè de eo contristari non possit. *Iustus es Domine, & rectum iudicium tuum. ETIAM Domine Deus omnipotens, vera & iusta iudicia tua*, cum vel detru-
dit animas in infernum, non possunt incusare Dei Iustitiam, sed
omnes coguntur dicere, *In malignitate nostra consumpti sumus.*
Quanto magis iustus & bonus est cum te hic punit, ne in æter-
num puniaris: *Non vliscamur nos pro his quæ patimur*, inquebat
fortissima Iudith, *sed reputantes peccatis nostris, hæc ipsa supplicia*
minora esse flagella Domini, quibus quasi serui corripimur, ad emen-
dationem & non ad perditionem nostram, euenisse credamus. Obserua
illud quo vtitur, verbum, non *vliscamur*. Est enim quoddam vl-
tionis & vindictæ genus in Deum, cum nimis contristati contra-
riis euentibus rationes prætendimus nostræ tristitiæ & afflictio-
nis, quasi vellemus illum arguere aut nos ita iustificare, quasi hoc
immeritò pateremur quod patimur, hoc est vt illa ipsa Iudith
admonebat, *Improperium murmurationis suæ contra Dominum pro-*
ferre; Vnde & ipse Dominus, *Nunquid irritum*, inquit, *facies iu-*
dicium meum: & condemnabis me vt tu iustificeris? Vides quam id
sit iniustum & impium! sed videsne quoties hanc impietatem
admisseris? Ingemisce, & deinceps illud Dauidicum in aduersis
habeto familiare, *Obmutui & non aperui os meum quoniam tu fe-*
cisti. Et in illatis iniuriis; *Dominus precepit vt malediceret, &*
quis est qui audeat dicere, quare sic fecerit?

Vide Feriam 2. infra Hebdomadam sextam post Epipha-
niam: Ferias Quadragesimæ, & præsertim Passionis, ac Verbo
Aduersitas.



DIE XI. IANVARII.

DE REDITV AB ÆGYPTO

IN NAZARETH.

Surge, & accipe Puerum, & Matrem Eius, & va-
de in terram Israel: Defuncti sunt enim qui
querebant animam pueri. Math. 2.

VERITAS PRACTICA.

Meliore rerum statu non magis gaudet Iustus, quàm deteriore doluit.

RATIO EST, Quia idcirco deteriore statu non doluit Iustus, quod in illo magis spectaret diuinam voluntatem, quàm suum particulare commodum vel incommodum.

Sed in meliore statu sic Iustus magis Deum considerat, quàm seipsū. Tum ergo non magis gaudet quam ante doluit. Quod perfecta Indifferentiæ est, à paucis cognita.

I. PUNCTVM.

IAM de sancto Iosepho secedente in Ægyptum, dixerat Euangelista: *Et erat ibi vsque ad obitum Herodis.* Tum vero paulò post; *Defuncto,* inquit, *Herode, Ecce Angelus Domini apparuit in somnis Ioseph in Ægypto, dicens; Surge & accipe Puerum & Matrem eius, & vade in terram Israël.* Ac denique, hanc subiungit rationem, *Defuncti sunt enim qui querebant animam pueri.* Cur sic toties fit mentio de Herodis obitu? Nempe vt aduertas diligentius, sic diuinam Patris æterni prouidentiam suauiter & temperate omnia disponentem, vt non prius Filium ab Ægypto reuocauerit, quàm defunctus ille fuerit, cuius causa Filius in Ægyptum secesserat; neque prius illum defungi voluerit, quàm naturalis vitæ cursus exigeret. O rem plane miram! Ecce nec pro Filio suo carissimo vices rerum aut ordinem mutat Deus: & tu sæpe velles tui causa peruertere omnia! Confundere ad hanc peruersitatem animi tui, & cum Dauide dicito: *Dixi, Ps. 30. Deus meus Tu, in manibus tuis sortes meæ.*

Monitus ergo Ioseph ab Angelo, statim accipit Puerum & Matrem, & venit in terram Israël, iterumque admonitus secessit in partes Galiliæ, & habitauit in Ciuitate Nazareth. Quanto putas cum gaudio, quantaque communi Trium lætitiâ? Certe non videtur alienum à pietate & Iustitia, si cogitetur Sanctos hos Exules tantisper recreatos fuisse, vel cum primùm auditus est

repetendæ patriæ nuncius, vel cùm foeliciter eò remearent, vbi meliusculè Puero Iesu futurum esset. Caue tamen putes, tum eis accidisse quod sentis in meliore rerum statu; caue putes exultauerint inordinato gaudio, gestierint insolita quadam lætitia, aut sermones longos de re sua miscuerint. Sunt hæc solita scilicet humanæ leuitatis probra; sed vir Iustus & fortis, sui semper similis sicut aduersis non frangitur, sic neque prosperis emollitur. Sua secum sic portat omnia, vt nulla rerum mutatione mutetur, nec tristiores illum aut lætiores videat vlla dies; quæ si de paganis dicuntur, quanto magis de Christianis, quanto verius de his dici debet, *Melior rerum statu non magis gaudet Iustus, quàm deteriore doluit?*

Hoc tibi modo est expendendum ad praxim; Et Ratio quidem est facilis ad intelligentiam, sed praxis non ita expedita, quamobrem non leuiter insistendum in eo quod ponitur fundamento: Vnam Dei Voluntatem spectare Iustum, hanc vnam esse causam, cur in deteriore rerum statu non doleat, quia videlicet magis spectat diuinam ordinationem, quam suum priuatum commodum aut incommodum. Hoc omni iure exigitur, hoc Iustitia & æquitas imperant, & hoc recta ratio, ne dicam fides, religio & pietas statuit; vt quàm Deus infinite supra nos est, sic diuinæ Voluntati nostram modis omnibus subijciamus. Nam si Iustitiæ est suū cuique reddere, cùm id maxime repetit: cur non se suaque Iustus redderet Deo repetenti, cuius se totum quod est esse agnoscit; aut nisi se Ei redderet, vel nisi se eius esse agnosceret, quomodo iustus esset? Hinc *sicut palma iustus fletet, quia, vt notat S. Gregorius, habet hoc mirum præ ceteris arboribus palma, vt cum vix terra hæreat, totaque in cælum sese extendat, nullo pondere premitur, sed magis pressa exaltatur*: Sic plane Iustus non humanis & terrenis innixus rationibus, sed diuinis, nullo aduersitatum pondere flectitur sed potius induratur. Sic de Iusto Tobia dicitur, *Non est contristatus contra Deum, quod plaga cecitatis euenerit ei, sed Immobilis in Dei timore permansit, agens gratias Deo, omnibus diebus vitæ suæ*. Itane tu?

II. P V N C T V M.

SED in meliore rerum statu sic Iustus Deum magis considerat quàm seipsum.

Pf. 91.
Lib. 19.
Moral. c.
25. 26.

Tob. 2.

Nam cum melior ille status sit æque à Deo atque deterior, cur non in illo Deum, Iustus æque spectet ac in isto? Nonne id æque Iustitia postulat, quæ est constans & perpetua voluntas reddendi quod cuique suum est? An non minus se Dei esse cognoscit Iustus, cum melius à Deo sibi est, quam cum deterius? Imo nonne suum magis benefactorem tum agnoscat, quando se magis ipse Benefactor suis beneficiis agnoscendum facit? Quid à Iustitia magis alienum, quam ei minus reddere cui plus debeas; aut quam se minus ei reddere cui te totum magis debeas?

Nonne hoc est quo ingratitudo notatur, & quod ingratis Deus exprobrat, *Incassatus est dilectus & recalcitrauit: incassatus, impinguatus, dilatatus, dereliquit Deum Factorem suum, & recessit à Deo salutari suo.* An velles hoc tibi objici? an te vere iustum crederes, si tibi hoc vere obiiceretur? Multus est in his Dominus, quo iniustitiam & impietatem nostram nobis repræsentet. *Ego plantavi te vineam electam, omne semen verum: quomodo ergo conuersa es mihi in prauum, vinea aliena?* Id quidem fit naturaliter, ut nos magis quam Deum amemus, ut magis dona quam donantem spectemus: sed naturam Ratio & fides corrigunt, aut nisi corrigant, natura valde praua dicenda est. *Rudix tua, & generatio tua de terra Chanaan.* Vide caput integrum Prophetæ valde aptum his fusius declarandis.

III. PUNCTVM.

MELIORE igitur rerum statu non magis gaudet Iustus, quam deteriore doluit; Quia si in deteriore non doluit, ne à Deo recederet, quem spectare debebat in aduersis: non debet meliore gaudere, ne inani hoc gaudio, se potius spectet quam Deum, seque ab eo disiungat, cui non minus tamen adherere par est, in prosperis, quam in aduersis. *Pondus æquum voluntas Domini,* ait Pr. 11. Sapiens, Id est, Dominus vult ut æque ponderes quidquid ab eo accidit, & neque vno magis gaudeas aut contristeris quam alio; Vel sic aptius, *Quidquid vult Dominus debet nobis æquum pondus esse,* ut non magis in vnum propendamus quam in alterum, sedynam in omnibus spectemus eius voluntatem. Quò etiam referri potest quod idem Sapiens eodem prouerborum libro: *Pon-* Ibid. 16. *dus & statera iudicia Domini sunt.* Id est, quidquid de nobis Deus

statuit, siue id prosperum, seu aduersum sit, sic vtrumque in pondere & mensura nobis est ordinatum, vt nobis etiam excedere vel deficere non liceat, in illis acceptandis.

Non omne quidem gaudium in prosperis, sicut nec omnis sensus doloris in aduersitate prohibetur; sed vtrumque Iustus affectum sic temperat & conformat Diuinæ Voluntati, vt non magis gaudeat aut contristetur quam velit Deus: imo nec gaudeat nec contristetur, nisi quia Deus sic eum vult gaudere aut contristari. Sic enim *mæstis rebus quadam saepe iucunda permiscet*, vt obseruat sanctus Ioannes Chrysostomus, *Neque suos tribulationes, neque Iucunditates sinit habere continuas, sed tum de aduersis, tum ex prosperis, iustorum vitam quasi admirabili varietate contextit.* Quod deinde probat in persona sancti Iosephi; & tum hic, tum alias docet, quod licet status Iustorum mutaretur, non tamen Iusti mutantur: aut certe si mutari videntur, non tamen alij sunt animo, sed sensu quodam duntaxat gaudij & tristitiæ, qui nihil eorum animum tangat, neque vultum ipsum afficiat; vt de vnoquoque eorum dici possit, quod de Anna matre Samuelis, *Vultus illius non sunt amplius in diuersa mutati*; aut sicut de Dauide, *Sic est Dominus meus Rex, sicut Angelus Domini, vt nec benedictione, nec maledictione moneatur.* Tanto minus es iustus quantum ab hoc distas statu; Inquire quantum, neque cesses, *Donec implearis agnitione voluntatis Dei*, nullus vt super sit locus aliis rationibus & affectibus.

Vide in Indice Verbo *Indifferentia*, *Resignatio*.



DIE XII. IANVARII
DE TRIDVANA COMMORATIONE
PVERI IESV DVODENNIS
IN TEMPIO.

Remansit Puer Iesus in Ierusalem, & non cognoverunt parentes eius. Luc. 2.

VERITAS PRACTICA.

Sensitiuæ deuotionis subtractio, veræ & solidæ Deuotionis est probatio.

RATIO EST, Quia veræ & solidæ Virtutis tunc est probatio cum necessitas & difficultas simul occurrunt in eius exercitio. Sed subtracta deuotione sensibili, tunc necessitas & difficultas Deuotionis exercendæ simul occurrunt.

Ergo tunc veræ & solidæ est Deuotionis probatio; ac proinde fideliter exercenda est, exemplo Beatissimorum Parentum Iesu quem à se subtractum quærent & inueniunt, in templo Ierosolymitano.

I. PUNCTVM.

QVM factus esset Iesus annorum duodecim, ascendentibus illis Ierosolymam, secundum consuetudinem diei festi, consummatisque diebus, cum redirent, remansit puer Iesus in Ierusalem, & non cognouerunt parentes eius. Videri possunt quæ plura referuntur ab Euangelista; & in vnoquoque eorum, tantum immorare, quantum deuotio retinebit, ac tandem peruolutis attentamente omnibus, sic tecum statues, mirabilem hanc pueri Iesu à parentibus insciis separationem, nihil aliud magis innuere quam subtractionē illam Gratia & deuotionis sensibilis, quæ sic nobis interdum ab Illo contingit, ad probationem veræ & solidæ Deuotionis, seu ad experimentum, vtrum vera sit an solida nostra deuotio. Quod certe maximopere est considerandum, vt quid tum factō sit opus, attente præuideamus.

Hoc itaque primum quod assertur ad propositæ Veritatis declarationem, diligenter expende, tunc esse veræ & solidæ virtutis cuiuslibet probationem, quando necessitas & difficultas occurrunt in eius exercitio. Dicitur autem necessitas virtutis exercendæ, quando in contrarium abires vitium, oppositumque peccatum, nisi virtutem exerceres. Non est enim maior necessitas

Hom. 5. ad
popul.quam non peccare, nam ipsa vitæ degendæ necessitas illi cedit. *Vna est inenitabilis necessitas, Deum non offendere*, inquit sanctus

Luc. 10.

Ioannes Chrysostomus, *Imo hoc vnum necessarium*, de quo Christus Dominus, cum in fuga peccati potissimum consistat nostra salus, diuinusque cultus.

Rom. 5.

At vero cum tantæ necessitati iungitur difficultas exercendæ actu & re ipsa virtutis, Vndecumque tandem difficultas proueniat, tunc maxime dicitur probari virtus, an sit vera & solida, quia tentatur & sollicitatur animus ex diuersa parte ad virtutem & vitium. Necessitate virtutis excitatur ad eius exercitium, sed eiusdem difficultate, inde auocatur. *Tribulatio, seu difficultas*, inquit Apostolus, *patientiam operatur, patientia autem probationem*. Quod & sanctus Iacobus paulo expressius, *Omne gaudium existimate fratres mei, cum in tentationes varias incideritis, scientes quod*

Iacob. 1.

probatio fidei vestræ patientiam operatur, patientia autem opus perfectum habet, ut sitis perfecti & integri, in nullo deficientes. Id est, sic ostendentes veram & solidam vestram virtutem, cuius probandæ

Judith 8.

causa, permittuntur tentationes. *Memores sint*, aiebat suis Iudith, *Quia tentati sunt patres nostri ut probarentur, si verè colerent Deum suum*. Expende illud *verè*. Nam in eo totus Dei cultus, & tota virtus, cum alioquin nihil nisi superstitio & species adumbratæ pietatis. Illudque est quod hic quæritur, utrum verè an fictè, utrum certò an falsò colatur Deus. Quod cum probet & declaret difficultas, vide quomodo contra decertes, *Vosmetipsos tentate si estis in fide*, aiebat Apostolus: si estis in charitate, in patientia & aliis Virtutibus: *ipsi vos probate*.

2. Cor. 13.

II. PUNCTVM.

SED substracta Deuotione sensibili, necessitas & difficultas veræ & solidæ Deuotionis, simul occurrunt.Serm. 54.
in Cantic.Quæ sit deuotio sensibilis aut que eius substractio, discere ex his sancti Bernadi verbis. *Sane ab heri & nudius tertius, inuasit me languor iste animi & mentis hebetudo, insolita quadam inertia spiritus. Currebam bene, sed ecce lapis offensionis in via, impegi & corruui: superbia inuenta est in me, Dominus declinauit à seruo suo. Hinc ista sterilitas animæ meæ, & deuotionis inopia quam patior. Quomodo ita exaruit cor meum, coagulatum est sicut lac, factum est sicut terra sine*

sine aqua, nec compungi ad lachrymas queo, tanta est duritia cordis. Non sapit psalmus, non legere libet, non orare delectat, meditationes solitas non inuenio. Vbi illa inebriatio spiritus? Vbi mentis serenitas & pax & gaudium in Spiritu sancto? Ideo ad opus manuum piger, ad vigilias somnolentus, ad iram præceps, ad odium pertinax, lingua & gula indulgentior, segnior, obtusiorque ad prædicationem. Heu omnes montes in circuitu meo visitat Dominus, ad me autem non appropinquat. Quid me aliud putem quam vnum de montibus Gelboe, quem præterit in ira & indignatione sua Ille caterorum omnium, benignissimus visitator.

Similia quædam & plura habet Cassianus, cæterique Patres ^{4. Collat. c. 2. lib 10. de Acedia. Ps. 118.} ascetici atque illius verficuli interpretes: *Dormitauit anima mea præ tadio.* Ex quibus satis patet quanta sit eo tempore necessitas veræ & solidæ deuotionis; Nam cum oppositum vitium inuasert penitus animam, & ita quodammodo constrictam teneat, vt vix se contra mouere possit; quibus armis, quibus præfidiis sese tandem à vitio tutabitur, nisi tam certa solidaque sit deuotio, vt nullis cedat impugnationibus, & contrà potius ex infirmitate fiat robustior?

Quanta sit verò difficultas sic secum decertandi, quis non videt? quis non sentit? Cum ipsi feruentiores & sanctiores vix pares sint certamini, & tantum non deficiant, tantum non cedant; *Ecce Gigantes gemunt sub aquis, & qui habitant cum eis,* inquit ^{Iob. 26.} Beatus Iob: Quasi diceret, ipsi fortiores tum ingemiscunt præ difficultate; quid alij debiliores? Vbi duo aduerte in illa voce *gemunt*, primum illud quod dictum est, vt significet difficultatem quam sentiunt robustiores quique. Secundum, vt indicet illos certare qui ita gemunt in difficultate; nam qui cedunt, non gemunt: & qui non gemunt, satis indicant se difficultati cessisse. O quam multi hoc errore deluduntur, vt putent vel non licere sibi gemere in difficultatibus; vel si gemant non posse difficultates frangere. Permittit Naturæ Gratia suos gemitus, si natura concedat. Gratiæ, suos effectus.

III. PUNCTVM.

SENSIBILIS igitur deuotionis subtractio vera & solida deuotionis est probatio; Quia tum duo illa simul concurrunt ex quibus certa probatur virtus, nempe necessitas & difficultas, quæ

fic in diuerfa rapiunt animum, vt si quis tum fidelis sit, vere solifi-
Genes. 22. deque deuotus censeatur. *Nunc cognoui*, dicet Dominus, sicut de
 Abrahamo, *Quod vere colis Deum*. Id est, ex illa fidelitate quam
 seruasti in tali occurſu necessitatis & difficultatis, cognoscendum
 te præbuiſti, qualis eſſes, an vere coleres Deum. Sic beatissimi
 parentes Pueri Ieſu, veros ſe probauere parentes, & veros Dei
 cultores. Ita dolent ſubſtractione filij, vt ex illo dolore nihil
 inordinatum cogitent. Neque impatientes ſint in damno quod
 inde ſentiunt, neque negligentes in eo reparando; Non plus af-
 fectant quàm poſſunt, neque quod poſſunt deſerunt; Inquirunt
 diligenter, ſed quiete: Conſeruant animi tranquillitatem, ſed ſi-
 mul etiam debitam ſeruant ſolicitudinem. Soliciti ſunt ſine
 perturbatione, & imperturbati ſunt ſine deſidia. Euitatis vtri-
 que extremis, in medio ſemper conſiſtunt, vt neque plus neque
 minus agant, quam ſibi agendum putent. Sic Sapientia quæ in
Prou. 8. illis tota reſidebat, *Meum eſt*, inquit, *conſilium, & equitas: mea eſt*
prudencia, mea eſt fortitudo: In viis iuſtitie ambulo, in medio ſemita-
rum iudicij.

Tu è contra quid pecces audi ex libello nunquam deponendo:
3. de Imit. ch. c. 6. *Propter modicam contrarietatem deſicis à cæptis, & nimis auide con-*
ſolationem quæris. Fortis amator ſtat in tentationibus, nec callidis cre-
dit perſuaſionibus inimici. Affectus ille bonus & dulcis quem interdum
percipis, effectus gratiæ præſentis eſt, & quidam præguſtus gratiæ cæ-
leſtis, ſuper quo non nimis innitendum, quia vadit & venit. Certare
autem aduerſus incidentes malos animi motus, ſuggeſtionesque ſper-
nere diaboli, Inſigne eſt virtutis & magni meriti.

Vide integrum caput, & ſic defectus tuos agnoſce, vt eos cor-
 rigas: ſic vero corrige, non vt alios in defectus mutentur, quod
 ſæpe tibi accidit; ſed vt muteris in alium, quod raro fit.

E O D E M D I E.

ALIA VERITAS PRACTICA.

Nemo iam Chriſtum amittit, niſi qui dimittit.


Vel, vt habet S. Ambroſius.

In Luc. c. 5. Nemo tibi Chriſtum auferre poteſt, niſi te illi auferas.

Nisi te subdas Deo , Deum tibi subdis.

235

RATIO EST, Quia nemo tibi Christum auferre potest, nisi
velis. Vel, Nemo iam Christum amittit, nisi sua culpa.
Sed si velis Christum tibi auferri, tu te illi aufers. Vel ; Qui sua
culpa Christum amittit, ipsum dimittit.
Nemo igitur tibi Christum auferre potest, nisi te illi auferas. Et
iam nemo Christum amittit, nisi qui dimittit.

 VÆ quidem omnia tam plana sunt & aperta, vt sint so-
lum termini proponendi. Nec illud etiam obscurum est
quàm sit pauendum & cauendum, sic à te Christum dimittere ;
sic tibi Christum auferre. *Quid inuenerunt in me iniquitatis, quia* Ier. 2.
elongauerunt à me, & ambulauerunt post vanitatem : & vani facti
sunt.

E O D E M D I E,
DE MANSIONE NAZARETHANA:
ET SVBIECTIONE D. IESV, VSQVE
AD ANNUM TRIGESIMVM.

Et erat subditus illis. Luc. 2.

VERITAS PRACTICA.

Nisi te subdas Deo , Deum tibi subdis.

RATIO EST, Quia nisi te subdas Deo, tuam potius quam Dei
voluntatem facis.
Sed suam potius quam Dei voluntatem facere, est sibi Deum sub-
jicere.
Ergo nisi te subdas Deo, Deum tibi subdis: Quod cum sit horren-
dum dictu, & facto etiam magis execrandum, potens est moti-
uum ad nos perfecte Deo subjiciendos.

Gg ij

I. P V N C T V M.

Luc. 2.



Ab anno duodecimo Christi Domini, atque ab ipsius re-
ditu Ierosolymitano in Nazareth, pauca hæc de illo re-
feruntur; *Et descendit cum eis, & venit Nazareth, & erat
subditus illis. Et Mater eius conservabat omnia verba hæc, in corde
suo. Et Iesus proficiebat sapientia, & ætate, & gratia apud Deum &
homines.* In quibus illud supra omnem hominum atque Ange-
lorum admirationem est, quod esset subditus illis. Expende lin-
gillatim omnia. Quis, quibus, quamdiu, quo fine, quomodo, &
in quo illa esset subiectio; Nempe in arte fabrilis, & in omnibus
obsequiis domesticis, quasi ille servus esset, Ille qui est vniuer-
forum Dominus, *Nonne hic est fabri filius? Nonne hic est faber, fi-
lius Maria?* dixerunt Iudæi postea cum primum prædicare cœpit.

Math. 13.

Marc. 6.

Sap. 15.

O mundi Architectum & fabricatorem vniuersi, quò te deue-
xit mea superbia, vt in angustias fabrilis officinæ descenderes,
nec aliud per duodeviginti annos continuos, quàm illud vile of-
ficium, ad vnius hominis directionem & imperium, exerceres!
Certe nisi discamus subjici, & humiliari hoc exemplo, vere de
nobis illud sapientis asseretur; *Omnes insipientes & infelices su-
pra modum animæ superbi.* Quod quidem manifeste patebit ex Ve-
ritate proposita, si attente consideretur; Quid enim insipientius
& infortunius quam velle Deum sibi subdicere? *At nisi te subdas
Deo, Deum tibi subdis.*

Exod. 10.

Ratio est plana & facilis; Nam nisi te subdas Deo, tuam potius
quàm Dei voluntatem facis; Quid planius? sicut enim nostra
subiectio consistit in voluntate Dei facienda, sic nostra rebel-
lio seu nostræ subiectionis defectus, nihil est aliud quam diui-
næ illius voluntatis neglectus. *Vsquequo non vis subjici mihi?*
Nonne hoc perinde est ac si diceret, *vsquequo non vis quod volo
facere?* O qualem Dei Domini Bonitatem! Hoc à creatura pe-
tere, hoc à seruo postulare!

II. P V N C T V M.

SED suam potius quàm Dei voluntatem facere, est Deum sibi
subdicere, Nam Deus & diuina eius Voluntas sunt vnum &

idem ; vnde aptè sanctus Augustinus : *Quantum Deus distat ab homine , tantum Voluntas Dei à voluntate hominis* : ac proinde si tibi subdicis diuinam voluntatem , subdicis tibi Deum. At vero cum tuam potius quam Dei voluntatem facis , nonne tùm tibi subdicis diuinam illam Voluntatem ? Nonne ergo tum etiam tibi Deum subdis ? Nec aliter Christus Dominus dicitur fuisse subditus suis parentibus , nisi quod ad eorum voluntatem se totum faceret ? Neque se ipse Deo Patri aliter sujiciebat , nisi quod non suam sed Patris voluntatem spectaret in omnibus , sicut ipse toties professus est : *Non quero , inquit , voluntatem meam sed eius qui misit me. NON sicut Ego volo , sed sicut tu. Non quod ego volo , sed quod tu. Non mea voluntas , sed tua fiat.* Hoc est se Deo subdicere. Tu vero qui contraria prorsus desideras , Tu qui tuis desideriis Deo contradicis , ac perinde Deo dicis , Non quod tu vis , sed quod volo ; Non tua sed mea voluntas fiat ; Quid hoc esse dices , nisi te tibi Deum subdicere ?

In Ps. 32.

Conc. 1.

Ioan. 5.

Math. 26.

Marc. 14.

Luc. 22.

III. PUNCTVM.

NISI ergo te subdas Deo , tam manifeste tibi Deum subdis , quàm manifeste tibi subdis eius voluntatem , cui tuam præfers , hoc ipso quo te illi non subdis ; Cum nihil aliud sit subiectum illi esse vel non subiectum , quam voluntatem eius facere vel non facere. *Rom. 16.* Nescitis , inquit Apostolus , *Quoniam cui exhibetis vos seruos ad obediendum , serui estis eius cui obeditis ?* Quasi diceret , an ignoratis quod est tam manifestum vt omnes videant , hac notâ seruum alicuius & subiectum designari , si obediat eius voluntati ? Non potest quidem homo sic negare suam seruitutem & subiectionem Deo , vt se penitus retrahat à diuina voluntate , nam si recedit ab vno voluntatis ordine , cadit in alium , vt docet omnes sancti Patres , sicque non ita Deo resistitur , quin fiat ocysus serius quod absolute velit : Sic enim Ille , *Consilium meum stabit , & omnis voluntas mea fiet.* *Is. 46.* Quando tamen peccas , aut quando citra graue peccatum , vel etiam si nulla forte videretur inesse culpa , quando te à diuina Prouidentia subducis , sic te ab aliqua eius voluntate retrahis , sicque velles Deum se potius ad tuam voluntatem accommodare , quam tu ad ipsius nutum & ordinationem : quod est tam vere tibi subdicere Deum , quam vere illi subiectus esses , si

Is. 43.

non tuam, sed Ipsius magis spectares voluntatem. *Servire me fecisti in peccatis tuis, præbui mihi laborem in iniquitatibus tuis.* Vix sine peccato talis subtractio fieri potest; & quando in tali peccato nihil aliud graue esset quam sic se à Deo retrahere, sic sibi Deum subdere potius, quam te illi; Nonne hoc esset satis graue & deplorandum? Si quòd Christus suis esset subditus, tam mirum videtur & alienum à diuina eius Maiestate: Quid, quod Ille tibi subdatur? Ille tibi in concupiscentiis, & in peccatis tuis! O quàm longe magis stupendum! siue Eius Bonitatem, siue tuam spectes audaciam.

Sic itaque pro præterito confundere; vt ad futuram subiectionem sis cautior, illudque Dauidis ad filium suum, tibi proponas; *Fili mi, scito Deum patris tui, & seruito ei corde perfecto.* 2. Par. 28. *& animo voluntario, omnia enim corda scrutatur Dominus, & vniuersas mentium cogitationes intelligit: si quaesieris eum inuenies: si autem dereliqueris eum, projiciet te in aeternum.*

Vide Verbo Servire, Discipulus, Obedientia.



DIE XIII IANVARII.
QVÆ EST OCTAVA EPIPHANIÆ.
DE BAPTISMO CHRISTI DOMINI.
Sine modò, sic enim decet nos implere omnem Iustitiam. Matth. 3.

VERITAS PRACTICA.

Exemplo suo Christus Dominus, nos magis vrget
quàm imperio.


RATIO EST, Quia quòd se Superior magis demittit ad inferiorem, vt eum prouocet ad aliquid, eo magis vrgetur inferior ad illud præstandum.

Exemplo suo Christus nos magis urget quam imperio. 239

Sed Christus Dominus, cum exemplo suo nos prouocat ad sui Imitationem, magis se demittit, quam si illud ipsum quod facit, imperaret.

Ergo nos exemplo suo magis urget quam imperio: Proindeque in ijs etiam quæ non sunt ex præcepto, fidelissime est imitandus.

I. P V N C T V M.

 VÆ de sancto Ioanne Baptista referuntur ab Euangelistis, possent aliquantisper cogitari; tùm vero hæc diligentius quæ de baptismo Christi Domini: *Tunc venit Iesus à Galilæa, in Iordanem, ad Ioannem, ut baptizaretur ab eo; Ioannes autem prohibebat eum, dicens, Ego debeo à te baptizari, & tu venis ad me! Respondens autem Iesus, dixit ei: Sine modo, sic enim decet nos implere omnem Iustitiam, tunc dimisit eum. Baptizatus autem Iesus confestim ascendit de aqua: & ecce aperti sunt ei cæli, & vidit Spiritum Dei descendentem sicut columbam, & venientem super se. Et ecce vox de cælis dicens: Hic est filius meus dilectus, in quo mihi complacui.* *Math. 3.*

Ex quibus cùm multa possint ad profectum elici, tum illud verò quod fecit & quod dixit Dominus, *Sic nos decet implere omnem Iustitiam*: ut nos exemplo scilicet suo prouocaret ad perfectionem, siue ad ea fideliter præstanda quæ sunt tantum consilij & non præcepti. Neque enim hic solum ad baptismum qui est ex præcepto suscipiendus, nos excitat, sed ad alia quæuis non præcepta, quæ nomine, *Omnis Iustitia adimplenda* comprehendit, sicut & ipse baptismum suscepit, ad quem nulla eum necessitas obligabat.

Atque hinc excellens illa Veritas, & valde potens ad multa quæ non tam præcipiuntur quam consuluntur, *Exemplo suo Christus Dominus nos magis urget quam imperio.*

Ratio est valde familiaris; nempe id vsu quotidiano discitur, quò se Superior magis demittit ad inferiorem, ut eum prouocet ad aliquid, eò magis vrgetur inferior ad illud præstandum, cùm præcipue posset Superior pro iure suo imperare, & inferiorem cogere sub grauissimis pœnis: tùm si non imperet, sed potius roget: si pœnarum loco proponat præmium, aut si denique aliquid

longius remotum à sua dignitate non dedignetur; tunc certe inferior, aut durissimæ ceruicis est, aut flectetur tanta superioris demissione; Neque enim generosus animus se vinci benignitate patitur, ne dum ab inferiori, aut à pari, quanto minus à suo Superiore. Hinc est illud Ecclesiastici valde notandum, *Sedes ducum superborum destruxit Deus, & sedere fecit mites proeis. Radices gentium superbarum arefecit Deus, & plantauit humiles ex ipsis gentibus.* Pergitque pluribus Sapiens ostendere eos duces vel reges qui cum mansuetudine & humilitate subditos suos regerent, longe apud illos plus valuisse, quam superbos & efferatos.

Luc. 15.

Indignabatur foris, filius senior quod Pater fratrem suum iuniorē à luxu & à meretricibus reuertentem liberaliùs excepisset; tum vero Pater domo egressus *cœpit rogare illum*, & statim sedatus est. Nonne sic regi malles mansuetudine quam rigore? sed itane tuos regis, si quos habes regendos?

II. PUNCTVM.

SED Christus Dominus cum exemplo suo nos ad sui imitationem prouocat, magis se demittit, quam si illud ipsum quod facit, imperaret. Hoc est enim superiorem sese magis demittere, quando quod superior facit, magis est alienum, magis remotum, magis infra dignitatem illius qui se ita demittit. Est autem manifestum quod præire nobis exemplo sicut præiuit Christus in Natiuitate, in baptismo, & in reliquo vitæ cursu, longe magis remotum est & distans à summa eius dignitate, quàm imperare illa ipsa, quibus ad exemplum nostrum abstinuit, aut quæ sustinuit. Nam imperare proprius actus est Dominationis, & Excellentia; obedire vero & humiliari, seruitutis, & abiectæ conditionis. Vnde quantum dominatio & seruitus, quantum excellentia & abiectio, longe inter se distant; tam procul & remote à se ipso, se Christus demittit, cum ad illa infima & abiecta descendit, quæ mauult facere, & facto suo nobis commendare, quàm imperare.

1f. 28.

Hinc forte dictum à Propheta; *Vt faciat opus suum, alienum opus eius, vt operetur opus suum, peregrinum est opus eius ab eo.* Quasi diceret, opus proprium Christi Regis, & Domini esset imperare, & imperando nos regere: at vero aliena sunt ab eo, & peregrina illa, quæ ad nos instruendos prælegit. Atque illud est quod

Apostolus

Apostolus tantopere de Christo Iesu prædicat, *Qui cum in forma Phil. 2.
Dei esset, non rapinam arbitratus est esse se æqualem Deo: sed semet-
ipsum exinanivit, formam serui accipiens.* Et quæ plura illic sequun-
tur, non minus ad affectum ardentia, quam ad intellectum clara
vt videas quò se vsque demiserit qui se nostrum exemplar fecit.
Ah quoties vel videre dissimulasti, vel vidisse nil profuit?

III. PUNCTVM.

SIC nos igitur Christus Dominus exemplo suo magis vrget quàm
Imperio; Non modò quia inferiorem pudet non facere quod
Superior facit, sed quia Superioris demissio & humanitas quæ in
exemplo dato magis lucet quàm in imperio exercito, tantam
vim habet in animis hominum, vt qui alioquin forte resisterent
imperio, cedant exemplo. Irritatur lege & præcepto concupif-
centia, vt fufe probat Apostolus: at emollitur exemplo & gra- ^{Rom. 7.}
tia. Hæc est *lingua tertia* quæ vt est in Ecclesiastico, *multos com-* ^{Ecclef. 28.}
mouit. Prima lingua est conceptus mente formatus; secunda est
verbum quo conceptus exprimitur; tertia vero est factum seu
exemplum, quod longe magis mouet quam verbum. Sic de
Christo, postquam propheta dixit, *Et factus est principatus super Is. 9.
humerum eius,* paulo post addit, *Multiplicabitur eius imperium, &
pacis non erit finis,* id est, magis se ostendet principem & ducem
exemplo quam imperio aut præcepto, neque tamen propterea
minus erit imperium eius, imò inde augebitur, & à multò plu-
ribus tranquille coletur, & pacifice.

Hoc Christus stimulo suos imprimis vrgebat; *Scitis,* inquit, ^{Ioan. 13.}
*quid fecerim vobis: Vos vocatis me Magister & Domine, & bene di-
citis, sum etenim: si ergo laui pedes vestros, Dominus & Magister; &
vos debetis alter alterius lauare pedes. Exemplum enim dedi vobis, vt
quemadmodum ego feci vobis, ita & vos faciatis. Amen amen dico vo-
bis, non est seruus maior Domino suo, neque Apostolus maior eo qui mi-
sit illum. Si hac scitis, beati eritis, si feceritis ea.*

Obserua hæc postrema verba, non beatum dicit qui sciat, sed
qui faciat, vnde tu vide quam multa scias, & pauca facias; Vide
quàm parum finas te moueri tot exemplis quæ quotidie con-
templaris. Vide quàm sit ferreus quem tanta non emollit & vr-
get Charitas, tanta humilitas, tanta mansuetudo, & aliæ virtu-

Lib. 3. de tes ad imitandum propositæ. *Hen quanti longe retròque manerent*
Imit. Chr. nisi tua præclara exempla inspicerent ; Ecce adhuc te pesimus auditis
c. 18. tot signis tuis, & doctrinis ! Quid fieret si tantum lumen ad sequen-
 dum te non haberemus. Lege integrum caput notatum ; & illud
 familiare habeto in omnibus : Itane Christus fecit ? Aut sicut si
 has Christi voces audires : *Sequere me. QVI mihi ministrat, me se-*
quatur : Quid ageres ? Quid responderes ?

Vide, Verbo Exemplum, Imitatio.



DIE XIV. IANVARIJ.

Nisi forte sit Dominica secunda, post Epiphaniam ;
 Quæ dum occurret, illi standum, prætermisiss aliis.

DE SOLITVDINE CHRISTI DOMINI

PER QVADRAGINTA DIES IN DESERTO.

Et statim Spiritus expulit eum in desertum ; Et erat
in deserto, quadraginta diebus & quadraginta
noctibus, eratque cum bestiis. Marc. I.

VERITAS PRACTICA.

Ex lib. 1. de Nemo secure apparet, nisi qui libenter latet.
Imit. Chr. Nemo secure loquitur, nisi qui libenter tacet.
c. 20.

RATIO EST, Quia nemo secure apparet aut loquitur, nisi qui
 bene tutus est à damnis linguæ, & humane conuersationis,
 quantum quidem cum Gratia se tueri potest.

Sed nemo ab his damnis bene tutus est nisi qui libenter latet &
 tacet.

Ergo etiam Nemo alius securè apparet aut loquitur. Ac proinde
 quàm expedit latere & tacere, patebit euidenter.

I. P V N C T V M.

SI quid est stupendum in vita Domini Iesu, Illud est maxime, quod cum homo factus esset ut inter homines conuersaretur & ad se conuerteret, cum is esset finis aduentus eius in hunc mundum, cum tantus inde fructus in eos omnes quibuscum versaretur, redundare posset, cum eius essent *deliciae* Prou. 8. *sic esse cum filiis hominum*, cum nihil inde mali esset quod sibi merneret; Tam tarde tamen, tam modicum, & tanta cum præcautione conuersatur cum hominibus, ut alienum ab eius fine atque instituto id prope videretur. En triginta totos annos in solitudine Nazarethana ponit! En quadraginta iterum dies integros in deserto solus cum bestiis degit! & ex tribus annis qui supersunt ad docendum & viuendum cum hominibus, quam frequenter sese à coetu & turbis segregabit! Quam sæpe solus in montes secedet, siue oraturus patrem, siue tantum ab omni humano consortio quieturus!

Quid est Domine Iesu? Quid ita moraris loqui & prædicare? Cur non ab ipso primo Natiuitatis die thesauros sapientiæ absconditos aperuisti? Cur non saltem duodennis cum primum apparere & loqui coepisti? aut certe cum adolescentiæ metas excessisti? Cur te ita contines? Cur mundum tamdiu tuo priuas sermone, tuo congressu destituis? Ah qualem oportet esse causam tui silentij & solitudinis, cum tam multæ viderentur esse rationes tuæ manifestationis, ac humanæ conuersationis? Sed sic oportebat me erudiri tuo silentio, sic me doceri tua solitudine, ut timerem apparere inter homines, ut vererem loqui; ac denique ut discerem quod ille pius expressit Author, qui dixit, *Nemo secure apparet aut loquitur, nisi qui libenter latet & tacet.*

Hoc est modò perpendendum, & exemplo Christi iungenda est Ratio qua id declaratur, & quæ tota fundatur in præcauendis illis periculis imminetibus & grauissimis damnis, quæ nobis impendent à lingua & à conuersatione. Hoc est enim secure apparere & secure loqui, quasi vnum & idem quod tutum esse ab his damnis, à quibus si nemo tutus est & contra præmunitus, nemo secure apparet aut loquitur, sicut nemo se hosti aut bello secure exponit nisi armis instructus: cum alioquin ut ait Sapiens, *Qui*

Ecclef. 3. amat periculum, peribit in illo.

Est autem duplex genus periculi seu damni ex humana conuersatione impendentis, nempe à nobis, & ab aliis loquentibus. Cauendum est ori & auri; de quo duplici periculo sic aperte & grauitur Scriptura nos pramonet, *Cave tibi, & attende diligenter auditui tuo, quoniam cum subuersione tua ambulas. MORS & vita in manu lingue. SICUT vrbs patens & absque murorum ambitu, ita vir qui non potest in loquendo cohibere spiritum suum.* Denique cum his similibus abundant sacræ paginæ, vel ex vno Ecclesiastici loco, quæ alia reſcentur, facile possunt intelligi: *Flagelli plaga liuorem facit, plaga autem lingue comminuit ossa. Multi ceciderunt in ore gladij, sed non sic quasi qui interierunt per linguam suam. Iugum illius, iugum ferreum est, & vinculum illius, vinculum æreum est. Mors illius mors nequissima, & utilis potius infernus quam illa: qui relinquunt Deum, incident in illam, & exardebit in illis & non extinguetur, & immittetur in illos quasi leo, & quasi pardus ledet illos. Sepi aures tuas spinis, linguam nequam noli audire, & ori tuo facito ostia & seras. Aurum tuum & argentum tuum conſla, & verbis tuis facito stateram, & franos ori tuo rectos, & attende ne forte labaris in lingua, & cadas in conspectu inimicorum insidiantium tibi, & sit casus tuus insanabilis in mortem.*

Videsne damna? videsne pericula? videsne teipsum ibi periclitantem? videsne quàm nemo secure loquitur, nisi qui se tutum ab illis damnis & securum facit? Certe si non vides, tantò est tibi periculosius?

II. P V N C T V M.

SED nemo ab illis damnis & periculis bene tutus est, nisi qui libenter latet & tacet.

Certum est quod quamdiu quis latet, securus & tutus est, sed quia loquendum est, & conuersandum inter homines, is dicitur cum diuina gratia magis tutus ab illis damnis & periculis qui libenter latet & tacet: Primò, quia non se exponit periculo, sicut alius qui propensus est ad loquendum. Non nisi ex necessitate, vel charitate, aut alia legitimâ causa impellente, apparet & loquitur, qua in occasione credibilius est Deum magis illi affuturum ne labatur, aut ne periclitetur, quàm alteri qui se periculo exponeret.

Cum enim ut ait S. Iacobus, *Linguam nullus hominum domare possit, inquietum malum, plenam veneno mortifero*, plane opus est singulari Dei auxilio, quod sicut non deest in necessitate loquendi, sic extra necessitatem, quis sibi ausit promittere? quis hoc præsumere? quid? tibi ut nugas agenti adsit Deus! tibi ut otiosa, ut ludicra, curiosa, mundana, & vana pertractanti, sic auxilietur Deus sicut si religiose, si nonnisi necessario, nonnisi ex ratione & debito muneris, seu officij tui: nonnisi ex obedientia & charitate loquereris? Caue id præsumas, ne similem tui facias Deum, & blasphemes. Audi enim ut loquitur, *Os tuum abundavit malitia, & lingua tua concinnabat dolos: sedens aduersus fratrem loquebaris, & aduersus filium matris tue ponebas scandalum. Existimasti inique quod ero tui similis, arguam te, & statuam contra faciem tuam.* Iac. 3. Ps. 49.

Deinde vero cum diuinæ Gratiae sit cooperandum ex parte nostra, quis potest certius dici cum illa cooperari ad loquendum quam qui minus propensus est ut loquatur, sine illa inuocata, sine illa obtenta? *Pone Domine custodiam ori meo, & ostium circumstantiae labiis meis.* Hoc dicit omnis qui libenter tacet; At vero alius, *Labia nostra à nobis sunt, quis noster Dominus est?* Id est, re ipsa sic se gerit quasi hoc diceret, nullam habet rationem necessitatis gratiæ, nullam curam aut cogitationem Dei adiuuantis, ne forte nimis constringatur, & minus liber sit ad loquendum. *Labia dolosa in corde & corde loquenti sunt: disperdat Dominus vniuersa labia dolosa: qui dicunt, labia nostra à nobis sunt.* Ps. 140. Ps. 11. Ibid.

Denique, quantumcumque etiam diuinam opem implorasses, nisi sis in loquendo consideratus & attentus, vix te à periculis & damnis redimes; at vero nisi libenter taceas, libido loquendi opposita, omnem attentionem & considerationem plane exhaurit; & illud tandem accidit quod sæpius Scriptura monet, *Vidisti hominem velocem ad loquendum? stultitia magis speranda est, quam illius correctio.* Cum è contra, *Qui odit loquacitatem, extinguit malitiam.* Tota malitia est in illa profusione loquendi, quam nemo continet nisi qui libenter latet & tacet, ac proinde nemo alius tutus ab illis damnis, quæ in loquendo incurruntur. Nonne id toties expertus & confessus es? Iterumne oportet te in pericula & detrimenta conijcere, ut scias damno tuo esse pericula? Satiùs esset scire alieno, & sapere. Prov. 29. Eccli. 19.

III. PUNCTVM.

NEMO igitur securè apparet, nisi qui libenter latet: Nemo secure loquitur, nisi qui libenter tacet: Nam nemo secure apparet aut loquitur, nisi qui tutus est ab illis damnis quæ à lingua importantur: Nemo autem securus est nisi qui libenter tacet & latet. Sic apte Rex Propheta, *Timor & tremor venerunt super me, & contexerunt me tenebrae, & dixi, quis dabit mihi pennas sicut columba, & volabo & requiescam? Ecce elongaui fugiens & mansi in solitudine.* Est solitudo non modo corporis, sed etiam cordis de qua præclare sanctus Gregorius, ad illa verba Iob: *Cum Regibus & Consulibus terræ qui ædificant sibi solitudines; Rursumque ad ista Domini, in eodem libro, Cui dedi in solitudine domum.* Hanc utramque solitudinem paucis videtur comprehendisse Sapiens cum dixit; *In multis esto quasi inscius, & audi tacens simul & quaerens; In medio magnatorum non præsumas, Et post pauca; Præcurre prior in domum tuam, & illic auocare, & illic lude, & age conceptiones tuas, & non in delictis, & verbo superbo.*

Mirum quod dixit Seneca, *Quoties inter homines fui, minor homo redij;* sed magis mirum, quod hoc testimonium tanti facit diuini author libri de Imitatione Christi, ut hoc vnum & alterum ex Paganis referat. Vide libri primi caput vigesimum, & vigesimum primum, ex quo illud est aureum & diuinum, *Quando homo est perfectè compunctus, tunc grauis & amarus est ei totus mundus.* Tu forte nimis effusus es; & nimis timenda tibi hæc maledictio: *Effusus es sicut aqua, non crescas.* Hæc tibi esset apta compunctionis materia.

Vide Verbo *Recollectio. Silentium. Lingua. Conuersatio.*



DIE XV. IANVARII

NISI SIT DOMINICA.

DE TENTATIONIBVS DOMINI.

Nemo periculose magis tentatur, quàm qui se, &c. 247

Erat in deserto, quadraginta diebus & quadraginta noctibus, & tentabatur à Satana. Mar. i. Math. & Luc. 4.

VERITAS PRACTICA.

Nemo periculose magis tentatur, quàm qui se non putat tentatum.

RATIO EST, Quia cùm totum tentationis periculum sit in consensu præbendo, nemo periculose magis tentatur, quàm qui magis periclitatur consentire tentationi.

Sed nemo magis periclitatur consentire, quàm qui se non putat tentatum.

Ergo nemo alius periculose magis tentatur: Ac proinde prospectandum unicuique suum periculum, & deponenda illa vana præsumptio, qua quis se non putat tentatum, nisi forte cum sentit grauiores molestias.

I. PUNCTVM.

CONSIDERANTI attentius quæ in Euangelio habentur de tribus Domini tentationibus, duo quædam occurrunt ex æquo mira. Primum est, audacia Tentatoris, qui non vereatur aggredi Dominum Iesum. Alterum est Bonitas seu facilitas ipsius Domini, qui non modo patienter audiat Tentatorem, eique respondeat: sed & patiatur se ab eo tangi, se ab eo portari & transferri de monte in montem; atque etiam quod horrendum est dictu, se sollicitari ad ipsum adorandum! *Hæc omnia, inquit, tibi dabo, si cadens adoraueris me.*

Math. 4.

O quis se tutum à tentatione audebit dicere, cum ipse Dominus se permittat tentari, vt omnes intelligant, quam sit sibi cauendum ab hoc aduersario, *Qui tanquam leo rugiens circuit querens quem deuoret.* Et tamen quàm pauci propterea sibi attendunt & vigilant! Imo quàm multi se tentari non putant, quasi id iam

I. Pet. 5.

solis Religiosis aut Nouitiis relictum esset opus. Itane vero non tententur? Imò illi maximè omnium & periculosissimè tentantur, quàm se non putant tentari.

Quod certe est consideratione dignissimum, & ad vigilantiam nostram excitandam imprimis scitu necessarium. Sic autem facile declaratur: Nam cum tentationis periculum & damnum in hoc vno versetur, si tentationi consentias: profecto illi dicendi sunt periculosius tentari qui euidentius periclitantur consentire; seu qui euidentiori viuunt in periculo consentiendi motibus cuiuscumque tentationis. *Vigilate & orate*, inquit Dominus, *ut non intretis in tentationem*. *NON ne tentemini, sed ne tentatione superemini*, ait sanctus Hieronymus. Et cum petimus à Deo ne nos inducat in tentationem, *Non petimus*, inquit S. Augustinus, *ut non tentemur, nemo enim sine tentatione probatur, sed ne inferamur in tentationem*. Id est, ne succumbamus, neue illi consentiamus; in quo consensu totum est periculum, totum est damnum. *Illumina Domine oculos meos ne vnquam obdormiam in morte, nequando dicat inimicus meus, praeualui aduersus eum*. O quoties iam id dixit!

II. P V N C T V M.

SED nemo magis periclitatur sic tentationi succumbere, quàm qui se non putat tentatum.

Nam cum reuera tentetur, ut paulo post demonstrabitur, si non resistat tentationi, nonne illi cedit & consentiet? At quomodo illi resistet, si se non putat tentatum? Quomodo quis aduersarium repellet, aut cum illo confliget, si non putat se habere aduersariū, aut sibi cum eo esse confligendum? Nonne ergo succumbit? nonne saltem versatur in euidenti periculo succumbendi? Nec dicas dæmonem non videri, nec semper percipi quando nos expugnet & tentet, ac proinde non esse mirum nec capitale, sed potius excusandum si succumbamus. Id enim ad excusationem dici non potest, cum nemo legitime possit ignorare, quod est in religione Christiana notissimum; imo & ipsis Paganis non ignotum, nullum esse hominem qui quamdiu viuunt, non tentetur; Nam ut ait beatus Iob, *Militia est*, seu ut Septuaginta vertunt, *Tentatio est vita hominis super terram*. Tentatio ipsa militia est, inquit sanctus Gregorius, *quia contra malignorum spirituum*

tuum insidias vigilat, in bellorum procinctu proculdubio exudat. Ipsa autem hominis vita tentatio est, cui ex semetipsa nascitur, unde perimatur. Quæ etsi semper ex virtute succidit quod ex infirmitate generat; semper tamen ex infirmitate generat, quod ex virtute succidat. Humana vita tentatio est, ut etsi iam ab iniquitatis perpetratoe compescitur: in ipsis tamen bonis operibus, modò malorum memoria, modò seductionis caligine, modò intetionis suæ interruptione fuscetur.

Sunt quidem tempora, seu loca, aut negotia quibus grauiore possint inesse tentationes, sed numquam deest ille qui vbique & semper insidias ponit, qui idcirco vocatur *Diabolus & Satanas*, ut *Apoc.* est in Apocalypsi, quod seducat vniuersum orbem, per se, & per suos administros, quos Apostolus vocat *mundi Rectores tenebrarum harum*, qui non dormitant, non fatigantur, non cicurantur, non explentur. Accedit Mundus, seu obiecta quæuis extrinseca, de quibus Sapiens; *Creatura Dei facta sunt in odium, & in tentationem animabus hominum, & in musculam pedibus insipientium.* *Sap. 14.*

Et quando illa omnia externa deessent, *Vnusquisque tentatur à concupiscentia sua abstractus & illectus*, ait sanctus Iacobus, unde sicut nemo viuit sine concupiscentia, sic nemo viuit sine tentatione. Hæc est caro semper concupiscens aduersus spiritum, hæc lex carnis seu membrorum semper repugnans legi mentis nostræ. *Gal. 5.* *Quid nequius*, ait Sapiens, *quam quod excogitauit caro & sanguis?* *Rom. 7.* *Quid porro cogitas, quid loqueris, aut quid aliud tractas quam quod caro & sanguis excogitant, nisi contra pugnes & resistas?* *Eccli. 17.* *Moneris*, inquit Seneca, *perpetuam tibi cum vitiis imminere pugnam, cuius nulla sit per diem, nulla etiam per noctem relaxatio.* *Lib. de prof. mori.* *Vix enim cessant excubia aut desunt voluptates quæ te infestent.* Plena his monitis sacra Scriptura, pleni sunt Patrum Codices: sed homo Ethnicus fuit audiendus, ut Christianus se excusare non possit si nesciat quod ipso naturæ lumine satis est notum, & ipso communi sensu perspectum: Vnde tandem id patet euidentissimè quod erat declarandum, de periculo in quo Ille versatur qui se non putat tentatum, nempe cum minus aduertat, facilius cedit tentationi & peribit: *Quasi bos ductus ad victimam*, inquit Sapiens, *Et quasi agnus lasciuens, & ignorans quod ad vincula stultus trahatur, donec transfigat sagitta iecur eius: velut si auis festinet ad laqueum, & nescit quod de periculo animæ illius agitur.* *Prov. 7.* Idemque postea luculentè; *Oculi tui videbunt extraneas, & cor* *Id. 22.*

tuum loquatur peruersa, & eris quasi dormiens in medio mari, & quasi sopitus gubernator, amisso clauo, dices, verberauerunt me sed non dolui, traxerunt me & ego non sensi. Nonne hoc est periclitari? Nonne hoc est periculum tuum?

III. PUNCTVM.

NEMO igitur periculose magis tentatur, quam qui se non putat tentatum; Quia totum tentationis periculum in eo est vt quis tentationi consentiat, nemo autem euidentius in eo versatur periculo quàm ille miser qui reuera tentatur sicut alij homines, & tamen præter alios se putat non tentari; Sic enim non resistit, non repugnat, non contradicit, ac proinde sic succumbit, & perit. O quam multi tales de quibus grauitè sanctus Petrus: *2. Pet. 2. Hi velut irrationabilia pecora naturaliter in captionem & in perniciem in his quæ ignorant, blasphemantes, in corruptione sua peribunt percipientes mercedem iniustitiæ, voluptatem existimantes dici delicias; Quasi diceret, quod nos Christiani vocamus tentationem & pericula, illi voluntariè ignorantes, & velut blasphemantes, vocant suas voluptates & delicias: in quibus quanto magis acquiescunt, tanto facilius pereunt. Hi sunt qui cum volunt diuites fieri, incurrunt in tentationem, inquit Apostolus, & in laqueum diaboli, & desideria multa inutilia, & nociua, quæ mergunt homines in interitum & perditionem. Radix enim omnium malorum est cupiditas, quam quidam appetentes, errauerunt à fide, & inseruerunt se doloribus multis.* Quid clarius ad periculum indicandum? quid manifestius ad perditionem totius pene vniuersi declarandam? Non enim dicit, qui sunt diuites, aut qui diuitiis abutuntur, sed tantum qui volunt diuites fieri; Nam illa voluntas & cupiditas est occulta tentatio quâ nullus se putat tentatum, & quâ tamen omnes tentantur & pereunt, sicut omnes volunt diuites fieri; Quis enim est in sæculo & forte etiam in Monasterio qui non velit esse diues? Quis tamen propterea se tentatum putat, aut in periculo; cum potius vt se à periculis & miseriis huius vitæ eripiat, vult esse ditior.

Hinc vero est propterea, inquit Apostolus, hinc est tentatio & laqueus diaboli, quod non se putent tentari. Hinc ille est interitus & perditio in quam ignari merguntur qui volūt diuites fieri,

& qui vno verbo cupiditatem appetunt, siue quæ in diuitias, siue quæ in vanum honorem, aut voluptatem pertrahit. Vnde idem Apostolus consequenter pergens, *Tu autem, ô homo Dei, hæc fuge, sectare verò Iustitiam, pietatem, fidem, Charitatem, patientiam, mansuetudinem. Certa bonum certamen fidei, apprehende vitam æternam:* Quasi diceret, persuade tibi te in continuo versari certamine ac discrimine, nisi certes & pugnes in teipso contra teipsum! Et quoties de virtute exercenda contra vitium aliquod agitur, sic certa fideliter, quasi de fide ageretur; aut de æterna vita, *In omni. Ephes. 6. bus, inquit, sumentes scutum fidei, in quo possitis omnia tela nequissimi ignea extinguere, & galeam salutis assumite.* Quid ageres vbi de summa fidei & salutis ageretur? hoc ipsum age in quavis occasione virtutis exercendæ. In hoc erras quod in iis quæ videntur parua, parum certes: & nisi euidens cernatur periculum, non te putas periclitari. Aduerte diligenter. *Vigilantes in omni instantia. Ibid.*

Vide Verbo *Tentatio, Demon, Pugna, Fortitudo.*



DIE XVI. IANVARII

NISI SIT DOMINICA.

AD HÆC S. IOANNIS BAPTISTÆ

DE CHRISTO DOMINO, VERBA:

Ecce Agnus Dei, Ecce qui tollit peccatum mundi.

Ioan. 1.

VERITAS PRACTICA.

Injuriosum est Christo, Agno Dei, si nulli quidem velis inferre injuriam, nolis tamen illatam ferre.

RATIO EST, Quia iniuriosum est Christo Agno Dei, velle esse mansuetum alia mansuetudine ab ea quam docuit.

Sed nulli quidem velle inferre injuriam, nolle autem illatam ferre,

*hoc est velle esse mansuetum alia mansuetudine ab ea quam di-
vinus ille Agnus docuit.*

*Ergo Illi injuriosum est, si nulli quidem velis inferre injuriam, no-
lis tamen illatam ferre; Ac proinde discendum pari lege non
inferendas & sufferendas esse injurias.*

I. PUNCTVM.

TRANSACTIS in deserto quadraginta diebus & no-
ctibus, reiectoque à se Tentatore, Dominus redijt ad
suum Præcursores & Præconem sanctum Ioannem Bap-
tistam, qui statim atque Illum vidit ad se venientem, *Ecce, in-
quit, Agnus Dei, ecce qui tollit peccatum mundi, Hic est de quo dixi,
post me venit Vir qui ante me factus est; quia prior me erat; Multa-
que alia in illius commendationem & præconium populo qui
frequens aderat, euulgavit. O quanta loquendi materia, & au-
diendi vtilitas!*

Iterum vero, *Alterà die, inquit Idem Euangelista, stabat Ioan-
nes; & ex discipulis eius duo, & respiciens Iesum ambulantem dixit,
Ecce Agnus Dei.* Nempe ille singulariter, ait S. Augustinus, *qui
conceptus est sine macula, qui figuratus est in agno quotidie immolato,
& qui se semel immolare Deo debet, ut tollat omne mundi peccatum.*
Addit Beda: *Ecce Agnus qui vellus dedit ex quo vestem nuptialem
facere possemus, id est, exēpla viuendi quibus in dilectione calefieremus.*

Et sicut Agno maxime proprium est mansuetum esse ea man-
suetudine qua nullum non modo lædit, sed se etiam lædentibus
non resistit; sic plane Christus Dominus inter exempla vitæ, hoc
præcipue nobis dedit & proposuit, quod imitando sequeremur.
Hinc illa Veritas quæ modo consideranda exhibetur, & quæ tam
efficaciter perfectam illam mansuetudinem nobis commendat, ut
nisi eam obseruemus, *Injuriosum id Agno Dei, seu Christo Domino
reputemus.*

Ratio hæc affertur valde consideranda, quod iniuriosum
Christo sit velle esse mansuetum alia mansuetudine ab ea quam
docuit. Cum enim ille, Deo patre sic ordinante, se Doctorem
& ducem nostrum fecerit, qui verbo & exemplo virtutes omnes
edoceret quæ formæ nobis essent exercendæ; Nonne id illi ma-

nifeste iniuriosum est, si neglecta illa forma, tu aliam quæras & præferas, quasi ille nesciuerit quid tibi expediret, aut quasi tu contempnas quod ille probe nouit tibi magis expedire? *Ecce, inquit Ipse Deus, testem populis dedi eum, ducem & præceptorem Gentibus. Et ibunt populi multi & dicent, venite & ascendamus ad montem Domini, & ad domum Dei Iacob, & docebit nos vias suas, & ambulabimus in semitis eius.* Tu vero contra ex his eris, *Qui dixerunt Deo, Recede à nobis, scientiam viarum tuarum nolumus; Et non putabis hoc iniuriosum illi esse?*

Quàm longe aliter ille sentit, qui scripsit, *Ex Ipso vos estis in Christo Iesu, qui factus est nobis sapientia à Deo, & Iustitia, & Sanctificatio, & Redemptio; Quæ quatuor ab Apostolo commemorata, sanctus Bernardus refert ad quatuor Cardinales Virtutes, quarum forma & exemplar Christianis Christus est, sicque concludit; Incassum proinde quis laborat in acquisitione virtutum, si aliunde eas sperandas putat quàm à Domino virtutum, cuius doctrina seminarium prudentia, cuius misericordia opus iustitia, cuius vita speculum temperantia, cuius mors insigne est fortitudinis.*

Sic sanctus Augustinus; *Illam, inquit, virtutum formam teneamus, quam verbo & exemplo commendauit Christus præsens in carne.* Omnis virtus nostra, tam longe est à vera virtute, quàm longe est ab ea forma. Expende hæc postrema verba, hinc enim liquet apertius quanta Christo fiat iniuria. Nam si vel alia virtus, si alia mansuetudo ab ea quam Christus docuit, vera esse possit, non esset tamen illi præferenda, quam Dominus & magister noster nos docuit; quanto longe minus, si nulla est vera, præter eam quam ipse docuit? Et quanto longe magis iniuriosum illi est falsam aliorum virtutem malle, quam illius veram, si vel aliorum veram malle non posses, sine illius iniuria? Responde, aut acquiesce.

II. PUNCTVM.

SED nulli quidem velle inferre iniuriam, nolle autem illatam ferre, hoc est velle esse mansuetum alia mansuetudine ab ea quam Christus docuit.

Distinguenda duplex quædam mansuetudo, nempe vna est quæ nulli nocet, nullum verbo aut facto lædit; sed non ultra

progredditur; non illatam suffert iniuriam. Et hæc quidem mansuetudo communis est omnibus hominibus, siue Iudæis, siue Ethnicis, cum in ipsa naturæ lege sit expressa, qua nulli licet
Math. 7. facere, quod nobis nollemus fieri. *Hæc est enim lex & Prophetæ,* inquit Dominus, id est, hoc omnes docent, qui aliquid docent. ALTERA vero mansuetudo est quæ non modo nulli infert ullam iniuriam, sed à quocumque illatam patienter suffert: Quæ quidem virtus maxime est propria Christo & Christianis, sic enim de illo Isayas antequam pateretur, *Sicut ovis ad occisionem ducetur, & quasi Agnus coram tondente se, obmutescet.*
1. Pet. 2. Sic postquam passus est, *Cum malediceretur,* inquit S. Petrus, *non maledicebat: cum pateretur, non comminabatur;* Sic ipse Dominus in suo illo celebri sermone in monte, palam & præcipuè hoc professus est, atque in hoc pene vno, suam legem & doctrinam
Math. 5. definiuit. *Audistis,* inquit, *quia dictum est, oculum pro oculo, & dentem pro dente,*
Luc. 6. *Ego autem dico vobis, non resistere malo, sed si quis te percusserit in dexteram maxillam tuam, præbe illi & alteram. Vobis dico qui auditis: Diligite inimicos vestros, benefacite his qui odierunt vos.*

Vide quæ plura habentur Mathæi quinto, & Lucæ sexto, quibus adiunge quod Apostolus conformiter docet, *Benedicite persequentibus vos, benedicite & nolite maledicere, nulli malum pro malo reddentes. Non vos ipsos defendentes Carissimi, sed date locum iræ. Si esurierit inimicus tuus, ciba illum: sitit, potum da illi. Noli vinci à malo, sed vince in bono malum.* Itemque alibi: *patientes estote ad omnes, videte ne quis malum pro malo reddat, sed semper quod bonum est sectantes in inuicem, & in omnes.* Hoc ipsum pene totidem verbis sanctus Petrus. *Non reddentes malum pro malo, nec maledictum pro maledicto. Sed è contrario, benedicentes: quia in hoc vocati estis, ut benedictionem hereditate possideatis.*

Ex quibus manifeste vides, qualis ea sit Mansuetudo quam Christus docuit, & quam longe ab ea sis, nisi patienter feras iniurias. Esto sis ita mansuetus ut nullas inferas, non est ea Mansuetudo Christianæ legis, sed Mosaicæ & naturalis, quâ tu si sola contentus es, quid tibi Christus proderit?

III. PUNCTVM.

INIURIOSVM est igitur Agno Dei seu Christo Domino, si nulli quidem velis inferre injuriam, nolis tamen illatam ferre; Quia vis quidem esse mansuetus nullis inferendo injuriam, sed nō vis esse mansuetus ea mansuetudine quam Christus docuit, dum illatam injuriam non vis sufferre. Quod illi non minus iniuriosum est quam si legem & doctrinam eius negligeres, aut minus æstima- res quam quod aliæ docent leges. *Nos scimus quia Moysi locutus* *Ioan. 9.*
est Deus; hic autem nescimus unde sit. Velles ne sic loqui cum Iu- daeis? At nescire in praxi eius doctrinam, seu perinde illam negli- gere quasi nescires, aut quasi non probares, quid putas esse aliud quam ipsum nescire unde sit, an è coelo, an è terra, an vere aut falso dixerit? Nam si vere dixit, cur non credis? cur non profi- teris? *Si veritatem dico vobis, quare non creditis mihi?* *Ibid. 8.* Dices id esse difficilius quàm possis ferre. Sed nonne sic pergis injuriam Christo facere, quasi ille duriora aut impossibilia iusserit, quasi deneget gratiam, quasi gratia non sit satis potens adimplendo mandato, aut quasi non sit satis dignus Christus cui seruiendo parum laboremus? Audi S. Augustinum. Et vide quid hīc cor- *Serm. 5. de*
rigas, quid emendes: *Convincimur certissimaratione, quia propter Sanctis.*
Deum possumus quidem, sed nolumus injuriam sustinere. Si nobis ali-
qua potens persona injuriam facit, si nos etiam in faciem maledicit;
nec respondere aliquid asperum, non dicam, vicem reddere ausi sumus.
Quare hoc? Ne ab illa potenti persona, adhuc majora quàm pertulimus,
pattiamur. Quod à nobis torquet hominis timor, deberet à nobis exi-
gere Dei amor. Aut si minus in te valet Diuinus Amor, huic ad-
iunge timorem, & expauesce ad hæc S. Iacobi verba; Vnus est *Iac. 4.*
Legislator & Index qui potest perdere & liberare.
Vide Verbo Mansuetudo.



DIE XVII. IANVARII
NISI SIT DOMINICA.

AD HÆC PRIMORVM CHRISTI
DOMINI DISCIPVLORVM, VERBA:

Magister, ubi habitas? Dicit eis, venite & videte.
Ioan. 1.

VERITAS PRACTICA.

Qui dicit se in Ipso manere, debet sicut Ille ambula-
uit, & ipse ambulare. 1. Ep. Ioan. c. 2.

RATIO EST, Quia qui dicit se in Christo manere, debet, ut
verum dicat, verè cum ipso consentire.

Sed nisi ambulet sicut ille ambulauit, non verè cum ipso consentiet.
Ergo debet sicut Ille ambulauit, & ipse ambulare. Quod tamen
pauci recogitant.

I. PUNCTVM.

Ioan. 1.

LOQUENTEM de Christo Domino, sanctum Ioan-
nem Baptistam cum audirent duo Discipuli; *Secuti sunt*
Iesum, ait Euangelista. *Conuersus autem Iesus, & videns*
eos sequentes, dicit eis, quid queritis? Qui dixerunt ei, Rabbi, quod
est interpretatum Magister, ubi habitas? Dicit eis, venite & vi-
dete. Venerunt & viderunt ubi maneret, & apud illum manserunt
die illo.

Hi sunt primi Iesu Discipuli, qui prius erant Ioannis: hi sunt
qui primi cum illo manserunt, nondum quidem inseparabiliter,
sed ad tempus, ad vnā diem & noctem, quam in mutuis vltro
citroque

citraque habitis sermonibus cum ipso transegerunt. Quam beatam diem duxerunt! quam beatam noctem! quis est qui nobis dicat quid audierint illi à Domino? adificemus & nosmetipsi in cordeno-
stro, & faciamus domum quò veniat Ille, & doceat nos, & colloqua-
tur nobis. Sic apte sanctus Augustinus, vnde ad Veritatem pra-
cticam modo considerandam, proposita est illa Diuina Senten-
tia sancti Ioannis Euangelistæ, Quod, Qui dicit se in Ipso manere,
debet sicut Ille ambulauit, & ipse ambulare. Est autem vnum &
idem, nos in Christo manere, & Christum in nobis, cum vnum
ex altero sequatur, sicut ipse dicit, In me manet & ego in illo. Ma-
nete in me & ego in vobis. Sed quid cum mansione ambulatō?
cur manenti cum Christo ambulandum, sicut Ille ambulauit?

Tract. 7.
in Ioan.

Ioan. 6.
& 15.

Ratio est facilis & valde familiaris, quòd simul cohabitanti-
bus, sicut & simul peregrinantibus, hoc imprimis est commen-
datissimum, vt bene inter se conueniant & concordent: Vnde
apte Propheta, Numquid ambulabunt duo pariter, nisi conuenerit
eis? Et Sapiens de iis quibuscum est difficile conuenire, Noli, in-
quit, esse amicus homini Iracundo. NE comedas cum homine inuido.
MELIUS est sedere in angulo domatis, id est sub dño & incommo-
dè, quàm cum muliere litigiosa, & in domo communi; Vbi scilicet
multi strepitus, multæ lites & contentiones. Nihil enim ad ha-
bitationem & conuictum accommodatius & desiderabilius,
quàm mutua simul habitantium, concordia: proindeque tan-
quam munus & donum præcipuum quod à Deo hominibus
concedatur, ita canit Regius Psaltes, Deus in loco sancto suo, Deus
qui inhabitare facit vnus moris in domo.

Amor. 3.
Prou. 22.
Ibid. 23.
Ibid. 25.

ps. 67.

Quod cum vniuersim verum sit de his omnibus qui simul con-
uiuunt, quantò magis de nostra cum Christo mansione, de quo
præcipue dicitur, In pace locus eius, & habitatio eius in Sion: Ibi
confregit potentias arcuum, scutum, gladium & bellum. Illudque erat
quod à suis, domum aliquam intrantibus, vellet ante omnia
dici, Primum, inquit, dicite, Pax huic domui; Quod quidem di-
ctum illi tam familiare erat, vt hac eius pronuntiatione tan-
quam certissima sui nota, se cognoscendum præberet Apostolis,
dum resurgens primum illis apparuit, Pax, inquit, vobis: iterum-
que confirmandis in sui notitiam eorum animis, Pax vobis. De-
nique quid ad rem nostram apertius quàm quod ipse suis iam di-
xerat, Hac locutus sum vobis, vt in me pacem habeatis. H AEC non

Luc. 10.

Ioan. 20.

modo qua dicit, inquit sanctus Augustinus, *sed quacumque illis locutus est, ex quo eos cepit habere discipulos, eò scilicet omnia spectant, ut non obstante quolibet aduerso casu, pacem & concordiam cum ipso seruent.* Nonne id æquum? Ah Domine Iesu, quis tecum nolle conuenire? aut quis tecum dissentiens præsumeret tecum habitare? Fili, pauci tamen mecum conueniunt; & multi mecum esse putant, qui longe disiuncti sunt.

II. PVNCTVM.

SED nisi quis ambulet sicut Ille ambulauit, non vere cum ipso conueniet.

Hæc enim sunt velut Synonyma, id est, vnum & idem significantia, *Ambulare sicut ille, & conuenire cum illo*; Nam hoc vnum hæc duo significant, vitam instituere conformem eius præceptis & exemplis, quantum vniuscuiusque vocatio & vitæ degendæ ratio exigit; vnde toties in scripturis quod dicitur, *Ambulare in lege, in præceptis, & in via Domini*, perinde est ac si diceretur vivere conformiter legi diuinæ, atque vniiformiter cum Deo conuenire, sicque euidentius patet quàm vt probari fufius sit necesse, quod qui non ambulet sicut Christus, non cum eo conueniat, nam hoc ipso quo aliter ambulat, aliter viuit; viuendo autem aliter, vita dissentit; vita denique dissentiendo, dissentit iudicio & voluntate, quod est plane non conuenire. *Gravis est nobis ad videndum, dicunt impij, quoniam dissimilis est aliis vita illius, & immutata sunt via eius. Tamquam nugaces æstimati sumus ab illo, & abstinet se à viis nostris tanquam ab immunditiis*; Quasi dicerent, cum simili via non ambulemus, Imo cum dissimilem agamus vitam, non possumus simul conuenire: Tam dissentimus animis quàm moribus.

Vnde & ipse Dominus suis Galilæis, mundana sapientibus. *Non potest, inquit, mundus vos odisse, me autem odit, quia ego testimonium perhibeo de illo, quod opera eius mala sunt.* Id est, idcirco non conuenit mecum mundus, quia mecum non ambulat: idcirco mihi aduersatur, quia mea illi est aduersaria vita, cui suam cum nolit conformare vitam, nec mecum proinde conuenit, imo mecum dissentit, & me odit. *Nam qui non est mecum, contra me est: & qui non colligit mecum, dispergit.* Itane mundus oderit Chri-

sum, & sim ego de mundo! Ah mi Iesu, vel de mundo me tolle!
vel mundum tolle à me.

III. PUNCTVM.

QVI ergo dicit se in Ipso manere, debet sicut Ille ambulauit, & ipse ambulare; Nam nisi ambulet sicut ille, non conueniet cum illo; & nisi cum illo conueniat, non in ipso manebit. *Sicut* 1. Ioan. 2. docuit vos, manete in eo, inquit dilectus Discipulus; At vide quomodo docuerit esse manendum in se, vide quantum ex hac mansione, fructus emanet, & quantum detrimenti sequatur, nisi constanter in eo manseris. *Sicut palmes*, inquit, *non potest ferre fru-* Ioan. 15. *ctum à semetipso, nisi manserit in vite, sic nec vos nisi me manseritis. Ego sum vitis, vos palmites: qui manet in me, & ego in eo, hic fert fructum multum, quia sine me nihil potestis facere. Si quis in me non manserit, mittetur foras, sicut palmes, & arefcet, & colligent eum, & in ignem mittent & ardet. Si manseritis in me, & verba mea in vobis manserint, quodcumque volueritis petetis, & fiet vobis.*

Quid magis timendum palmiti, quàm si comburatur? At comburetur si à vite excidatur: Excidetur vero si nullum fructum ferat; Nullum autem fructum feret, si non in vite manserit: Nec in vite porro manebit, nisi eodem veluti succo nutriatur. Sic plane tecum discurre: si à Christo diuidaris, perijsti: Diuideris autem nisi constanter in eo maneas: At in Ipso non manebis, nisi cum ipso conuenias, & sicut ille ambulauit, ita tu ambules. Nonne ergo est ita ambulandum? Vis ne ab ipso diuidi? Vis perire? ô miseriam perituri, si diuidatur à Christo animus! sed ô foelicem necessitatem non diuidendi à Christo animi, quod alioquin pereas! Neque hic alia modo perditio quarendam est quàm ipsa diuisio animi à Christo suo, cum Christum perdere, sit perire; nec vlla, Christo perduto, sit iactura grauior, sicut nihil est Christo pretiosius; non sanitas, non humana vita, non ipsa æterna beatitudo.

Restat hic expendere accurate cum Apostolo: *Quis ergo nos* Rom. 8. *separabit à Charitate Christi? Tribulatio, an angustia, & quæ plura proponit. Forte vel vnus auræ mundanæ flatus: vnus mundi rumusculus; Attende tibi.*

Et Vide Dñicā 3. Quad. Verbo item *Christus. Mundus. Concupisc.*



DIE XVIII. IANVARII.

NISI SIT DOMINICA.

DE CHRISTO DOMINO COMMV-
NICATO; SEV DE CONVOCATIS ALIIS
AD IPSVM DISCIPVLIS.

*Inuenimus Messiam, quod est interpretatũ Christus.
Inuenimus Iesum, Filium Ioseph à Nazareth.*

Ioan. I.

VERITAS PRACTICA.

Nemo magis sibi Christum seruat, quàm qui minus
sibi soli seruat.

Vel è contrario.

Nemo minus sibi Christum seruat, quàm qui magis
sibi soli seruat.

RATIO EST, Quia nemo magis aut minus sibi Christum ser-
uat, quàm qui magis aut minus Christum diligit.

Sed qui minus sibi soli seruat, magis Christum diligit: aut è contra
minus eum diligit qui magis eum sibi soli seruat.

E go nemo magis aut minus sibi Christum seruat, quàm qui magis
aut minus sibi soli seruat. Ac proinde quanto quis magis illum
sibi seruare velit, tanto magis communicet aliis, nec sibi soli
seruet.

I. PUNCTVM.

RAT autem Andreas frater Simonis Petri, unus ex duobus ^{Ioan. I.} qui audierant à Ioanne, & secuti fuerant Iesum. Inuenit hic fratrem suum Simonem, & dicit ei, Inuenimus Messiam; & adduxit eum ad Iesum. Intuitus autem eum Iesus dixit, Tu es Simon, Filius Iona: tu vocaberis Cephas, quod interpretatur Petrus. In crastinum voluit exire in Galileam, & inuenit Philippum: Et dicit ei Iesus, sequere me. Inuenit Philippus Nathanael, & dicit ei, quem scripsit Moyses in Lege, & Propheta, inuenimus Iesum filium Ioseph, à Nazareth. Veni & vide.

Multa hic expendi possent, vt, quid sit modò inuenisse Christum: qualis thesaurus; quali cura conseruandus, & quali studio aliis communicandus. Sed hoc imprimis obseruandum est, ex his viris qui primi commemorantur cognouisse Christum, solos illos duos fuisse Apostolos, qui inuentum & cognitum alijs communicarunt, nempe Andream & Philippum, quorum ille fratrem suum Simonem Petrum, hic autem Nathanaelem ad Dominum Iesum adduxerunt. De socio Andree & de ipso Nathanaele quid factum fuerit, non narratur; Hoc nempe est quod ex proposita Veritate nobis est modo considerandum attentius, *Nemo magis sibi Christum seruat, quàm qui minus sibi soli seruat.* Vel è contrario, *Quia plerumque magis nos mouent quæ aperta mala important, Nemo minus sibi Christum seruat, quàm qui magis sibi soli seruat.*

Ratio quæ assertur est euident, & vtramque propositionem quâ Veritas enunciat, comprehendit, quia scilicet nemo magis aut minus sibi Christum seruat, quàm qui magis aut minus Christum diligit. Sicut enim dilectione generatur Christus, sic dilectione nutritur & conseruatur. Nam quod de cæteris rebus dicitur, hoc etiam Christo conuenit, vt quibus medijs res aliquæ fiunt, iisdem conseruentur. Atque idcirco Christus Dominus, ^{Ioan. 14.} Si quis, inquit, diligit me, sermonem meum seruabit, & Pater meus diligit eum, & ad eum veniemus, & mansionem apud eum faciemus; Quamdiu scilicet me diligit, & quamdiu sermonem meum seruabit; Veniunt ad nos, inquit sanctus Augustinus, dum venimus ad Tract in eos: veniunt subueniendo, illuminando, implendo: venimus obediens ^{Ioan.}

Rom. 30. in do, intuendo, capiendo. In quorundam etenim corda venit, ait sanctus Gregorius, & mansionem non facit; quia per compunctionem quidem, Dei respectum percipiunt, sed tentationis tempore, hoc ipsum quod compuncti fuerant, obliuiscuntur, sicque ad perpetranda peccata redeunt, ac si hac minimè planxissent. Qui ergo vere Deum diligit, qui eius mandata custodit, in eius corde Dominus & venit, & mansionem facit, quia sic eum Diuinitatis amor penetrat, ut ab hoc amore, tentationis tempore non recedat.

Ep. 3. ad Seuerum. Denique quod sic per dilectionem nascatur & crescat Christus in nobis, apte sanctus Paulinus; *Qui sicut in illo ipso homine, quem gessit, ita in nostris mentibus, gradus quosdam corporeæ ætatis exequitur, nascitur, crescit, roboratur, senescit.* O foelicem illum in cuius mente sic Christus nascitur; ac longe foeliciorem illum, in quo natus sic crescit & roboratur Christus!

II. PUNCTVM.

SED qui magis aut minus sibi soli Christum seruat, magis aut minus illum diligit.

Matth. 12. Id est, qui de Christo Domino ad aliorum ædificationem cumulatur loqui posset; nec tamen loquitur, aut nisi parum & frigide, hic certe indicat se tam minus Christum diligere, quam minus ardentem & frequenter de illo loquitur. *Ex abundantia enim cordis, os loquitur, & bonus homo de bono thesauro profert bona.* Talis ille Apollo de quo sic in Actis Apostolorum scribitur, *Hic erat edoctus viam Domini, & feruens spiritu, loquebatur, & docebat diligenter ea quæ sunt Iesu.*

Ioan. 17. Quis enim nescit zelum & feruorem spectare ad Charitatem? At vero in quo zelus & feruor magis exerceri possunt, quam in Christo Domino clarificando, sicut ipse à Patre petijt, per suos aliquando futurum: *Pater, venit hora, clarifica Filium tuum, ut Filius tuus clarificet te.* Iam vero sit aliquis qui horâ commodâ Christum clarificandi, se continet, conticescit, & sibi soli seruat quod de Christo didicit, quodque opportunè posset aliis communicare, retinet contra sapientis monitum, *Ne retineas verbum in tempore salutis;* An ille censendus est Christum diligere? *Væ mihi quia tacui! Væ mihi si non euangelizauero! NO N recte facimus,* inquiebant illi, *hæc enim dies boni nuntij est, si tacerimus &*

noluerimus nunciare, sceleris arguemur.

4. Reg. 9.

Certe qui Christum ex corde diligit, cor suum tam angustum tali Dilecto diligēdo sentit, vt omnium corda vellet habere, quibus eum diligeret, aut in omnium cordibus vellet Iesum infigere, vt tanto magis diligeretur, quanto à pluribus diligeretur. Verum quia hæc extra suam potestatem videt; quod superest, vt in quibus commodè potest Christum parere, pariat: nonne id enitetur? nonne in id tam vehementer intendet, quam vehementer Christum diligit? Et nonne sic etiam indicabit se tanti Christum facere & diligere, quanta erit contentio, quantus labor & zelus in eo communicando aliis, nec sibi soli seruando?

Aperi mihi soror mea, columba mea, perfecta mea, quia caput meum plenum est rore, & cincinnati mei guttis nocturnum. Hæc dilecti ad dilectam, & ad sponsam Sponsi verba esse, satis nosti; sed quanam sit illa dilecta & sponsa, quidue ab illa Sponsus velit, audi sanctum Augustinum. *Aperi mihi de sanguine, soror mea; de spiritu meo, columba mea; de sermone meo, quem plenius ex me didicisti, perfecta mea.* *Aperi mihi, prædica me, ad eos quippe qui clauserunt contra me.* Quomodo intrabo sine aperiente? Hæc sunt Dilecti monita: hæc sunt dilectæ officia; An illa fideliter audis? An hæc constanter reddis?

Cant. 5.

Tract. 17.
in Ioan.

III. PUNCTVM.

NE MO igitur magis minusue sibi Christum seruat, quam qui magis aut minus sibi soli seruat. Nam cum præcipue dilectione seruetur Christus, & in Eo aliis communicando, præsertim innotescat dilectio: tanto magis minusue tibi Eum seruabis, quanto magis minusue Illum pro rei opportunitate communicabis, nectibi soli seruatum voles. *Quid enim, inquit Apostolus, dum omni modo siue per occasionem, siue per virtutem, Christus annuncietur, & in hoc gaudeo, sed & gaudebo: scio enim quod hoc mihi proueniet ad salutem.* Perpende hæc Apostoli verba; si enim vel gaudenti quod Christus ex quauis occasione annuncietur, fructiferum & salutare est; quanto magis annuncianti ex virtute, & ex illa virtute præcipua quæ est Dilectio? In alia sermocinandi materia quantumuis pia, posset esse periculum, & posset timeri excessus, vt supra vilum est: sed vbi de Christo notificando agitur

Phil. 15.

timere potius debet qui diligit, ne deficiat, quam ne excedat.

Et tamen tam rarus es, & parcus in his habendis cum proximo de Christo Iesu sermonibus! & quod peius est, te excusatum putas, quasi tibi aliquid inde sit perituum, nisi tibi soli serues! ô cæcitatem! ô fallaciam! Tantum abest ut aliquid tibi decedat & pereat, quin potius tanto magis augeatur cognitio, & amor, & possessio Christi, quanto magis Illum communicaues: aut tanto magis depereat quanto minus alios in participationem tanti boni vocaueris.

Ecclesi. 30. *Theſaurus ille est, de quo Sapiens: sine defectione sanctitatis, id est in quo exhauriendo nulla interuenit defectio, nulla iactura,*

Ier. 17. *nulla perditio. Vena est aquarum viventium, de qua Propheta: quæ eo largius & purius effluit, quo hauritur frequentius. Vnde iam nihil est quod retarderis à loquendo: sed potius ingens & acre subministratur motuum communicandi aliis Christi, ex triplici scilicet Capite, quod est attente perpendendum.*

Primo quidem agitur Christi Domini honor & gloria, qui eo magis agnoscitur & elucidatur. Deinde proximi salus & perfectio sic manifeste promouetur. Ac denique redundat in nostrum particulare bonum, cum præter dicta, hoc insuper sibi

Ecclesi. 14. *laborantibus promittat Sapientia, Qui operantur in me, non peccabunt: & qui elucidant me, vitam æternam habebunt.*

Sap. 7. Hinc Sapiens tam liberalis & profusus in sapientia sua communicanda, *Quam, inquit, sine fictione didici, & sine inuidia comunico, & honestatem illius non abscondo; infinitus enim thesaurus est hominibus, quo qui vsi sunt, participes facti sunt amicitia Dei, propter disciplinam dona commendati.* Nonne id veriùs de Christo dici posset? Cur non igitur tam libenter illum comunicas? Latet profecto aliquid quod te retardat, & quod vix auderes agnoscere. Adeo probrosum est, & infandum. Aut te pudet, aut te tædet de IESV loqui! Res nimis vulgaris est, res nimis trita & obuia, res nimis grauis & importuna. Ecce vnde auocaris, ecce vnde obmutescis, ecce vnde argueris & confundis te non Eum diligere, de quo sic pudet & tædet loqui!

Vide Feriam 4. infra Hebdomadam primam Aduentus. Feriam 5. infra Hebd. tertiam: nec non 31. Decembris, & alibi passim, Verbo *Christus. Zelus. Amor. Colloquia.*



DIE XIX. IANVARII

NISI SIT DOMINICA.

AD HÆC CHRISTI DOMINI

VERBA, DE NATHANAEL:

Ecce verè Israelita, in quo dolus non est. Ioan. 1.

VERITAS PRACTICA.

Veras virtutes magis times, quàm amas.

RATIO EST, Quia veræ virtutes ea sunt quæ divino potius quàm humano iudicio aestimantur.

Sed has virtutes magis times, quàm amas.

Ergo & veras virtutes; Quod certe est non minùs probrosum quàm damnosum.

I. PUNCTVM.

VIDIT Iesus Nathanael venientem ad se, & dicit de eo; *Ecce Ioan. 1.*
vere Israelita in quo dolus non est. Dicit ei Nathanael, unde me nosti? Respondit Iesus, & dixit ei, priusquam te Philippus vocaret, cum esses sub ficu, vidi te. Respondit ei Nathanael, & ait: Rabbi, tu es Filius Dei, tu es Rex Israel.

Mirum certe quod ex prima hac notione quam de Christo Nathanael habuit, cognouit & professus est Ipsum esse Filium Dei, & Regem Israel! Sed magis mirum quod cum Iste Nathanael, multis esset ornatus virtutibus, hac vna tamen præcipue commendatur à Domino, quod esset verus Israelita, sine dolo, & malitia: id est, vir simplex & minime malus. Adeone magna virtus, Simplicitas, vt cum aliæ non desint plurimæ à quibus Vir præstantissimus commendaretur, tamen ab illa vna, prætermis-

cæteris, celebretur? Quis hominum in magna laude poneret, se simplicem dici & haberi? An velles sic de te sentirent & loquerentur homines? Nonne potius id timeres? nonne potius inde erubesceres, & quasi de illato doleres probro?

Sic plane est, sic apparentes & speciosas quasdam virtutes satis diligis, quia sic vulgo æstimantur, *Sed veras & solidas magis times, quam diligas.* Quod quàm sit verum & damnosum, ac proinde attentius expendendum si forte dubitas, demonstrabit hæc ratio.

Illæ sunt veræ virtutes & solidæ, quæ diuino potius quàm humano æstimantur iudicio; Nonne est ita? Cum enim de virtutibus sicut de cæteris rebus diuersa Dei sint, & hominum iudicia; certe quantum Dei Iudiciū, iudicio præualeat omnium hominum, & Angelorum; tantum eas oportet esse certiores & superiores virtutes, quæ diuino Iudicio tales proferentur. *Mendaces quippe filij hominum in stateris, ut decipiant ipsi de vanitate in idipsū; At vero iudicia Domini vera, iustificata in semetipsa. Cognoui Domine quia equitas iudicia tua.* Sic conformiter Sapiens, *pondus & statera, Iudicia Domini sunt.* Nonne id agnoscis, nonne id fateris?

II. PUNCTVM.

AT QVI has virtutes quæ diuino magis æstimantur iudicio quàm humano, magis times quàm diligas.

Hæ nempe sunt inter alias, *Abiectio sui, Tolerantia iniuriarum, Paupertatis amor, Simplicitas, & Humilitas cordis,* Nonne hæ virtutes humano iudicio aut nullæ sunt, aut valde abiectæ, & infimorum tantum hominum? Nimis enim verum illud Iob: *Deridetur Iusti simplicitas, lampas contempta apud cogitationes diuitum.* Quod egregiè ad rem nostram sic interpretatur Sanctus Gregorius; *Huius mundi sapientia, Id est virtus quæ æstimatur à mundo, hæc est, cor machinationibus tegere, sensum verbis velare, quæ falsa sunt, vera ostendere: quæ vera sunt, falsa demonstrare.* Hæc nimirum prudentia vsu à Iuuenibus scitur, hæc à pueris pretio discitur, hanc qui sciunt, ceteros despiciendo superbiunt; hanc qui nesciunt, subiecti & timidi in aliis mirantur. Et post pauca; *At contra sapientia iustorum est, nihil per ostensionem fingere, sensum*

verbis aperire, vera ut sunt diligere, falsa deuitare, bona gratis exhibere, mala libentius tolerare, quàm facere, nullam iniuriæ ultionem querere, pro veritate contumeliam, lucrum putare. Sed hæc Iustorum simplicitas deridetur, quia ab huius mundi sapientibus puritatis virtus, fatuitas creditur. Omne enim quod innocenter agitur, ab eis proculdubio stultum putatur, & quidquid in opere veritas approbat, carnali sapientiæ fatuum sonat. Quid namque stultius videtur mundo quam mentem verbis ostendere, nil callida machinatione simulare, nullas iniuriis contumelias reddere, pro maledicentibus orare, paupertatem querere, possessa relinquere, rapienti non resistere, percutienti maxillam, alteram præbere? Vnde bene huius mundi dilectoribus ille egregius sapiens dicit, Abominationes Aegyptiorum immolabimus Domino Deo nostro. Oves quippe Aegyptij edere dedignantur, sed quod abominantur Aegyptij, hoc Israelita Deo offerunt: quia simplicitatem conscientie quam iniusti quique velut infamam abiectamque despiciunt, hanc iusti in virtutis sacrificium vertunt, & excolentes recti puritatem & mansuetudinem Deo immolant quam abominantes reprobi fatuitatem putant, quæ nimirum iusti simplicitas breuiter, sed sufficienter exprimitur, cum protinus subinfertur, lampas contempta apud cogitationes diuitum. Videri possent quæ fufius pergit, sed hæc sufficiant ex quibus satis aperte patet, quænam sint illæ Virtutes quæ diuino magis æstimantur iudicio quàm humano.

Exodi 9.

At vero, nonne has virtutes magis times quam diligas? Nonne magis times occasionem humilitatis & patientiæ exercendæ quàm illa delecteris? Nonne te æstimas miseriorem in paupertate, quàm beatum: & beatorem in diuitiis quàm miserum & infœlicem? Denique nonne magis times videri simplex & candidus, ne forte irridearis ab hominibus, quàm simplicitate & candore animi gaudeas, quæ sunt virtutes à Domino maxime commendatæ? Diligis enim gloriam hominum magis quam gloriam Dei; Id est gloriam quæ ab hominibus venit, quàm quæ à Deo est. Quid hoc esse putas, nisi præferre iudiciū hominis iudicio Dei; quasi homo de virtute melius sentiret, quàm ipse Deus! O intolerandam blasphemiam! Et tamen quæ ab omnibus vniuersim toleratur!

Ioan. 12.

III. PUNCTVM.

ERGO veras Virtutes magis times, quàm amas; Nam dubitare non potes, quin ex sint veræ virtutes quas Christus prædicat, licet mundus repugnet: Neque te verò lateret quantum timeas imo & horreas illas à Christo prædicatas virtutes, & beatitudines? Quid proinde sequitur nisi te, veris & solidis repudiatis virtutibus, nescio quas apparentes & speciosas diligere quas mundus probat, & quas alioquin non diligeres, nisi mundus probaret? *Habentes speciem quidem pietatis: virtutem autem eius abnegantes.*

O quanta inde damna, quanta pericula! sic enim fit vt cum nullas veras virtutes habeas, hoc ipsum tamen ignores, quia virtutem te putas habere, cuius habes tantum speciem & simulachrum. *Scio opera tua, inquit Dominus, quia nomen habes quod viuas, & mortuus es: non enim inuenio opera tua plena, coram Deo meo.* Rursumque ibidem, *Quia dicis, quod diues sum, & locupletatus, & nullius egeo. Et nescis quia tu es miser, & miserabilis, & pauper, & cæcus & nudus.* Velle ne hoc audire à Domino? Quid tibi tunc proderit exterior illa vrbinitas, aut apparentia virtutum quam ex iudicio tantum assumis humano? *Non enim qui seipsum commendat, aut qui ab humano commendatur die, ille probatus est; sed quem Deus commendat.* Et recte sanctus Augustinus de eo qui humana magis quam diuina spectet iudicia. *Hic licet laudetur ab hominibus, à te tamen vituperatur: Qui autem ab hominibus laudatur, vituperante te, non defendetur ab hominibus, indicante te; nec liberabitur, condemnantes te.* Nonne hoc ita modò sentis? At nonne re ipsa post contrà senties, magis humana timendo iudicia & vituperia, quàm diuina! grauius putando condemnari ab hominibus, quàm à Deo damnari! Resipisce ab hac infania, *Et da locum timori Altissimi, quia omnis sapientia timor Dei, & in illa timere Deum.*

Vide infra Feriam 4. post Dominicam sextam Epiphaniæ & Verbo Iudicium. *Virtutes. Mundus.*



DOMINICA II. POST EPIPHANIAM.

NISI sit Septuagesima, Quæ aliquando, licet rarius, in hanc Dominicam incidit. Frequentius autem in sequentes; tùm verò relictis aliis, Ipsi Septuagesimæ Adhærendum.

DE AQUA IN VINVM MUTATA,
A CHRISTO DOMINO, AD NVPTIAS
INVITATO.

Implete hydrias aqua. Ioan. 2.

VERITAS PRACTICA.

Si vis quod non habes, da quod habes.

SENSVS & RATIO est, quod cùm Deus in omnibus suis operibus Misericordiam simul & Iustitiam coniungat, si quid à Misericordia petimus, Iustitiæ non denegemus quod à nobis petit.

Sed diuina Iustitia hoc à nobis petit, ut si quedam difficiliora velimus quæ non habemus, demus aliqua faciliora, quæ habemus.

Ergo si vis quod non habes, da quod habes. Aut certe iniquè agis contra Deum.

I. P V N C T V M.

Joan. 2.



*N*UPTIAE factae sunt in Cana Galilae, & erat Mater Iesu ibi: Vocatus est autem & Iesus, & Discipuli eius ad Nuptias: Et deficiente vino, dicit Mater Iesu ad eum; vinum non habent; tum Illa ministris, quodcumque dixerit vobis, facite; Dicit Illis Iesus: implete hydrias aqua, & impleuerunt eas usque ad summum, Quae statim aqua in vinum optimum conuersa est. Videri possunt, & considerari alia, quae de hoc primo miraculo Christi referuntur ab Euangelista. Tum vero Illud imprimis consideratione dignissimum, quod cum Dominus vellet Indigentibus dare vinum, non aliter Illud dederit, quam datâ prius ab eis aquâ. Cur ita porro? Nonne poterat vinum ex nihilo, aut ex aëre facere sine aqua? Aut nonne poterat simul ipsam aquam & vinum facere? Cur illam sibi dari iussit, & in illas infundi hydrias, in quibus vinum merum erat factururus?

Ratio literalis est, vt sic miraculum vini facti, magis apparet, quando constaret omnibus nihil in vasis esse nisi aquam. Allegorica vero est quam refert sanctus Maximus, *Noni nobis poculi praeibatum est sacramentum*, Id est per illam aquae conuersionem in vinum, praesignificare voluit Dominus, sacramentalem conuersionem vini in sanguinem suum: Vel vt ait, sanctus Augustinus, *Fecit de aqua vinum Christus, cum aperuit sensum & exposuit scripturas; sic enim sapit quod non sapiebat*. Anagogico item sensu, ad paratas in coelo delicias ex his paucis operibus nostris quae per Gratiam Dei facimus, referri potest.

Joan. 6.

Denique Tropologica, & Moralis expositio est, idcirco petita & datam esse aquam, ad habendum vinum, vt intelligeremus sic à nobis ea peti à Domino quae habemus, vt ab Eo impetremus quae non habemus. Sic quando in deserto satiauit multitudinem iam triduo se sequentem, nec habentem quod manducaret: Non nisi ex datis sibi panibus, & pisciculis, eam satiauit: multiplicauit quidem panes, sed panes sibi datos, & non alios. Sic planè tecum ager, si sic cum Illo egeris; *Da quod habes & quod petit à te Deus, si vis habere quod non habes & quod ab ipso petis*.

Ratio quae affertur eò magis certa est, quò in ipsis Dei Attri-

butis fundatur: Sunt autē duo attributa, Misericordia & Veritas seu Iustitia quæ in omnibus Dei operibus reperiuntur, iuxta illud Psalmistæ; *Vniuersa via Domini, misericordia & veritas; & Misericordiam & Iudiciū cantabo Tibi Domine;* Quo de argumento articulum expressum habet S. Thomas, vbi ostendit in his quæ nobiscum agit Deus, sic Misericordiam nos præuenire & subsequi, vt Iustitia simul iungatur, quatenus scilicet de Nostro agendum est aliquid, quod ita iustum & æquum est, vt nisi Illud agamus, nos plane indignos reddamus misericordia. Si verò fideles simus in agendo, tunc & ipse se fidelem ita præstat, vt non solum plura retribuat, sed & meritis nostris tribuat, ne cuncta gratis agat. Sic paucis apte S. Bernardus: *Qui omnes homines vult saluos fieri, merita nobis extorquet à nobis, & dum nos præuenit tribuendo quod retribuat gratis: agit, ne gratis tribuat.* Hom. 4.
super mis-
sus.

Vide caput decimum octauum Ezechielis, vbi postquam de hac Dei iustitia, & æquitate actum est fusius; Tum Ipse Dominus instat: *Et dicunt Filij Israel, non est æqua via Domini! Nunquid via mea non sunt æque, domus Israel, & non magis via vestra praua? Quasi diceret, numquid Illud quo volo à te fieri, iustum & æquum est, vt obtineas quod à me petis? Quod si vero iustum & æquum est, nunquid tu iniustus, & iniquus es, qui non Illud præstes? Responde & dic cum Propheta, iustus es Domine, & rectum Iudicium tuum. Mandasti iustitiam testimonia tua & veritatem tuam nimis.* re. ps. 113.

II. PUNCTVM.

SED Diuina Iustitia seu æquitas hoc à nobis exigit, vt si quæ difficiliora petimus quæ non habemus, demus aliqua facilia quæ habemus, ad illa facilius impetranda.

Sic enim ab vna Gratiā disponimur ad aliam, vt cum fideles fuerimus primæ acceptæ gratiæ, fidelem etiam experiamur Eum qui dixit: *Omni habenti dabitur, & abundabit: ab eo qui non habet, & quod habet auferetur ab eo.* Sic apte Dauid: *Et retribuet mihi Dominus secundum Iustitiam meam, Et secundum puritatem manuum mearum, in conspectu oculorum eius. Cum sancto sanctus eris, Et quæ plura pergit ad Dominum, quibus indicat eum fore talem erga vnumquemque, qualis ipse erga eum fuerit, in vltu gra-* Luc. 19.
ps. 17.

Sap. 8.

tiarum & mediorum quæ ordinauit ad finem aliquem. Hinc Sapiens, *Vt sciui*, inquit, *quoniam aliter non possem esse continens, nisi Deus det, & hoc Ipsum erat sapientia scire cuius esset hoc donum, adij Dominum, & deprecatus sum Illum.*

Videsne orationem exigit tamquam aliquid facile, vt Continentia quæ res est difficilior, obtineri possit?

Ep. 121.

ad probam

Sic vniuersim S. Augustinus de Iplius orationis necessitate ad alia quæuis impetranda: *Qui nouit*, inquit, *bona data dare filiis suis, petere nos & querere, & pulsare compellit. Quod quare faciat, qui nouit quid nobis necessarium sit prius quàm petamus ab eo, mouere animum potest, nisi intelligamus quod Dominus & Deus noster non voluntatem nostram sibi velit innotescere quam non potest ignorare, sed exerceri in orationibus desiderium nostrum, quo possimus ca-*

Math. 18.

pere quod praparat dare. Sic vt dimittat nobis decem millia talenta, id est, grauia, & multa peccata, vult à nobis dimitti centum denarios, id est modica quædam debita, leues quasdam offensas à proximo nobis illatas, quæ tametsi graues nobis videntur, non nisi tamen leues sunt, si comparentur cum peccatis nostris, quibus diuinam offendimus Majestatem.

Denique quid sunt præcepta omnia, quid consilia, quid sacrificia, quid sacramenta, quid virtutes, & alia Instituta moralia, nisi viæ quædam, & media quæ à Diuina Iustitia exiguntur vt sic ab vno ad aliud procedentes mereamur assequi quod promittit? *Si volueritis & audieritis me, bona terra comedetis. Quod si nolueritis & me Iracundiam prouocaueritis, gladius deuorabit vos: quia Os Domini locutum est.* Id est, hoc firmum fixum est, quod quæ statuta sunt à Deo media, ad aliquid obtinendum, tam exactè seruanda sunt, quàm cupidè volumus illud obtinere. Velle ne hanc diuinam ordinationem proscindere tamquam iniustam: aut cum aperte iusta sit, deprauare? Quid hæres, quid dissimulas? Numquid qui contendit cum Deo, tam facile conquiescit? *Vtique qui arguit Deum, debet respondere ei.*

Job. 29.

III. PUNCTVM.

SI vis ergo quod non habes, da quod habes; Si vis Continentiam cordis, contine oculos, contine linguam, & membra corporis. Illud difficilius & magis remotum à tua potestate, sed istud facilius

facilius & magis à se dependens. Quamobrem si vis illud quod non habes & quod est obtentu difficilius: Da libenter istud quod habes facilius; quia sic exigit Diuina Iustitia, vt non nisi per istud, possis aliud obtinere; *Dimittite, & dimittemini; Date & dabitur vobis: mensuram bonam & confertam & coagitatam & superrefluentem dabunt in sinum vestrum;* Certe quando non ita exigeret Diuina Iustitia, quando sola nostri ratio haberetur; nonne sic pauca quædam danda essent vt maiora redderentur? Quis non libenter seminat, vt colligat? Quis non libenter aquam daret pro habendo vino? Quis non modicum olei & farinæ porrigat, vt quantum recepit Vidua sareptana, recipiat? Luc. 6.
3. Reg. 17.

O damnosam hominum parcitatem, qui se vino priuant quia dare nolunt aquam! Qui se Deuotionis, Meditationis, Continentiæ, Charitatis, & aliarum Virtutum dono, seu præcipuis actibus indignos reddunt, quia faciliores exhibere nolunt, nec de suo conferunt illud exiguum quod ab eis Deus petit! Si nostra peteret non remuneranda, nonne etiam illi danda essent? Quanto magis cum nihil petat quod non multiplici fœnore cumulat, tum reddat? Hinc sapiens; *Bono animo gloriam redde Deo; In omni dato hilarem fac vultum tuum, quoniam Dominus retribuens est; & septies tantum reddet tibi;* Et sanctus Leo; *da quod accipias, fere quod metas. sparge quod colligas;* Quin & ipse Dominus, tam aperte: *Quare non dedisti pecuniam meam ad mensam, & ego veniens cum usuris utique exegissem illam?* Tibi tam verè loquitur, quàm verè tibi dedit quod illi offerres, ad ampliora promerenda, quæ vix tamen offers. Quid excusas? Ecclesi. 35.
Luc. 19.

O Virgo potentissima, rogarem te libenter, vt quod mihi deest indices Filio tuo, dicasque illi; humilitatem non habet, deuotionem, charitatem aut quidquid est aliud magis necessarium: Sed quandoquidem mihi de meo est aliquid conferendum: da id efficiam quod meum est vt quod est Domini, Dominus in me operetur. Vide in particulari quid à te requirat, ad perfectiorem Virtutum praxim.

IN EADEM DOMINICA.

Vocatus est Iesus ad Nuptias. Ioan. 2.

VERITAS PRACTICA.

Sicut in tristibus, sic in lætis: Sicut in aduersis, ita in prosperis, aduocandus est Iesus.

RATIO EST, Quia idcirco in tristibus & aduersis aduocandus est Iesus, quia sunt periculosa peccandi tempora, quibus sine Iesu vix te à nimia continere possis tristitia.

SED leta & prospera non sunt minus periculosa, suo modo, peccandi tempora.

Ergo in istis non minus aduocandus est Iesus, quàm in illis. Quod tamen pauci persuasum habent.

Pf. 49.



Ecclesi. 18.

AD primam propositionem exponi posset, quod cum semper & in omnibus inuocandus est Iesus, tum vero maxime, periculosis in negotiis ac diebus. Inuoca me, inquit, in die tribulationis. Ex omnibus autem periculis nulla magis timenda sunt quàm peccati: Sapiens in omnibus metuet, & in diebus delictorum attendet ab inertia. Peccandi porro pericula sunt aduersitates, funera, calumniæ, morbi, iactura & quidquid tale est in mundo, vnde magis contrahitur & angitur animus, atque ex illa nimia contractione & angore animi nascuntur iræ, rixæ, murmura, blasphemix desperationes, & similes deprauati affectus, qui grauiora sunt peccata quàm putentur, quia tum Afflicti licere sibi omnia putant. Quapropter tum aduocandus Iesus, & concilianda diuina gratia. Tristatur aliquis vestrum? oret.

Iac. 5.

SED leta & prospera non sunt minus, suo modo, periculosa peccandi tempora.

Tum enim animus facile dissipatur, insolescit, superbit, iacta-

Sicut in aduersis sic in prosperis aduocandus est Iesus. 275

bunde multa effutit: tum deliciae, tum conuiuia, ioci, risus, amores, scurrilia, ludicra, profana & quæ nominari non debent vitia, quis nescit inde redundare? *Mensa eorum coram ipsis in laqueum* & Ps. 68. *in scandalum. DVCVNT in bonis dies suos, & in puncto ad inferna* Job. 2. *descendunt.* Tunc enim eò descendunt quando peccant. *Hi sunt* Iudas. *in epulis suis macula, conuiuantes sine timore, semetipsos pascentes, fluctus feri maris, despumantes suas confusiones, sidera errantia quibus procella tenebrarum seruata est in aeternum.*

NON minùs ergo in istis latis quam in tristibus; neque minùs in prosperis quàm in aduersis, aduocandus est Iesus; Quia non minus pernicioſa peccandi sunt tempora, quæ lata sunt, quàm quæ tristia, sicque propterea, si iustis & probis licet, aliquando epulari & gaudere, epulentur certe & exultent, *Sed in conspectu Domini, sed in timore* Ps. 67. *Domini, sed in Domino;* Cū alioquin iniustè exultarent, plus æquo exultarent, & tum iusti esse desinerent. *Erat populus iucundus se-* Iudith. 16. *cundum faciem sanctorum,* ait sacra scriptura; quasi diceret, ficerat iucundus quales possunt esse sancti, quali modo sancti possunt esse iucundi, qualis potest esse iucunditas sine detrimento sanctitatis; nam si periclitetur sanctitas, pereat potius iucunditas; quæ tamen salua sanctitate non peribit, cum sit ipsa iucunda sanctitas.

Vide Verbo Gaudium. Moderatio, Pax. Aduersitas, prosperitas. Et suprà, die nona & undecima Ianuarij.

AD HÆC VERBA:

Vinum non habent. Ioan. 2.

VERITAS PRACTICA:

Non est magis fidendum humano gaudio, quam homini mentienti.

RATIO EST, Quia propterea non est fidendum homini mentienti, quod decipiat.

Sed humanum gaudium sic decipit.

Prou. 14.

A M. primò ibi putatur esse gaudium vbi non est: Deinde putatur maius bonum quàm re vera sit. Denique cùm extrema gaudij, luctus, angor, & peccatum occupent, fatius esset non fuisse gaudium, quam talem eius exitum; Vnde apertè Ecclesiastes: *Dixi ego in Corde meo, vadam & affluam deliciis & fruor bonis. Et vidi quod hoc quoque esset vanitas. Risum reputavi errorem, & gaudio dixi, quid frustra deciperis.* Primò quidem decipitur, cùm nullo solido nitatur bono, tum gaudentem decipit, quem non potest quietum reddere, nec beatum.

Ecclesi. 2.

NON est ergo magis fidendum humano gaudio, quàm homini mentienti, quia non minus decipit quam qui mentitur, nec minus modo quam olim risus error est, & gaudium deceptio. Vnde sanctus Iacobus: *Risus vester in luctum conuertatur, & gaudium in mœrorem.* Quasi diceret, sic vos decipit gaudium, vt quâ humanâ re gaudetis, sit potius ipsâ lugendum. Sic præclare sanctus Augustinus. *Voluptates mentiuntur, moriuntur, & in mortem trahunt.* Et tu his fidas! Caue si sapias.

*Iac. 4.**Ep. ad Lucil.*

Vide Sabbato infra Hebdomadam sextam post Epiphaniam ad hæc Verba: *Qui habet sponsam, sponsus est.* Item in 3. parte, Dominicam 4. post Pentecosten. Et Verbo, *Vanitas.* In die Assumptionis, ad hæc Salomonis verba: *Pete Mater mea.* Et alibi passim, de B. Virgine, de Temperantia vel Intemperantia.



HAC HEBDOMADA, Quæ occurrunt ex Evangelica serie consideranda mysteria, diuersa quidem sunt, & nulla inter se connexionione iuncta; sed eò tamen omnia præcipuè tendunt, vt affectus humanos, ratione & Gratia discamus regere.

FERIA SECVDA.
DE PRIMA CHRISTI DOMINI
PRAEDICATIONE, IN CIVITATE NAZARETH
HABITA, ET A CIVIBVS MALE ACCEPTA.

Si ad humanam gratiam diuina postulas, diuinam repellis. 277.

Repleti sunt omnes in Synagoga, Ira; hæc audientes.

Luc. 4.

VERITAS PRACTICA.

Si ad humanam gratiam diuina postulas, Diuinam Ipsam repellis Gratiam.

RATIO EST, Quia tum diuinam repellis gratiam, quando statutum peruertis finem, & ordinem quo ipsa confertur.

Sed quando ad humanam gratiam Diuina postulas, statutum peruertis finem, & ordinem, quo Diuina confertur gratia.

Ergo tum hanc diuinam Gratiam à te repellis; Quod certe est frequentissimum inter homines, & maximopere considerandū.

I. PUNCTVM.

QUOD narrat sanctus Lucas, capite quarto, de reditu Christi Domini in Ciuitatem suam Nazareth, & de prima eius prædicatione illic habita, videtur ordine temporis, ea proximè sequi quæ ante dicta sunt. Sic autem paucis res habet; Cum Ingressus fuisset in Synagogam, atque ex libro Isaïæ, Prophetiam de se manifestam explicasset, primo admirationem sui maximam, loquendo, concitauit; Tum vero cum animaduerneret auditores suos expetere miracula, sicut nuperri-
mè patrarat in Ciuitate Capharnaum, arguit illos inuidiæ & curiositatis, docetque, non omnibus passim à Deo dari miracula sed quibus, & quando vult, neque ad humanam Gratiam aut ad humanos affectus & fines diuina esse postulanda.

Quod cum audissent Nazaræi, tam male acceperunt hunc sermonem, vt statim omnes ira correpti, è Synagoga illum deturbârint, atque in supercilium montis, inde dejiciendum duxerint, nisi se sua diuina virtute subduxisset; O miram & stupendam hominum insaniam, qui sic cœlestia terrenis subdunt, sic æterna temporalibus, & humanis diuina subijciunt, vt non nisi ad naturalem complacentiam, diuina postulent: non nisi ad humanam Gratiam, diuinam exigant! *Non est iste sermo qui mi-*

Indib. 8. sericordiam prouocet, sed potius qui iram excitet, & furorem accendat: Non est hic ordo neque modus obtinendæ diuinæ Gratiæ, sed potius repellendæ.

Hoc modo est attentè considerandum, quia certè in hoc multi delinquant, & sibi malè prospiciunt, quando non nisi ob affectus naturales, & humanos fines, diuinum aliquid quærunt, quod propterea non obtinent, sed à se repellunt tanto longius, quanto id magis naturale est & humanum, propter quod petunt.

Ratio quæ affertur est euidens, quia tum manifestè diuinam repellis gratiam, quando statutum peruertis ordinem & ratum finem quo illa nobis confertur: licet enim Deo liberum sit quando, ubi, quantum, & quibus velit sua dare, præscriptos tamen sibi constituit fines & ordines, seu statuta quædam ordinauit media, in certos fines, quibus sic ordinariè gratias suas impertit, ut non aliter soleat impertire. *Sic à Propheta visus funiculus lineus in manu eius, Et calamus mensura in manu eius, Nempe ut quod dixit sapiens, omnia in mensura, & numero, & pondere disponat & ordinet; Sic Sacramenta certis quibusdam gratiis conferendis instituit, ut non nisi per illa in re vel in voto suscepta, & non nisi habito fine conuenienti conferantur hæ gratiæ. Nisi quis renatus fuerit ex aqua, & Spiritu sancto, non potest introire in regnum Dei. NISI manducaueritis carnem filij hominis, non habetis Vitam in vobis; NISI pœnitentiam habueritis, omnes simul peribitis.*

Putaresne sine Baptismo vel Pœnitentiâ, peccatum posse remitti? An ignoras nullam esse remissionem peccati sine pœnitentiâ, nullam pœnitentiâ sine dolore aliquo, nullum dolorem sine emendationis proposito, nullum tale propositum sine auersione animi ab obiecto quod peccati causa fuit? Hic est ordo remittendi peccatum ita constitutus, atque ita seruandus, ut nisi obseruetur, non remittatur peccatum; O quàm pauci seruant! Non tres, non duo, non vnus, nam *Nullus est*, inquit Propheta, *qui agat pœnitentiam super peccato suo dicens, quid feci!*

II. PUNCTVM.

SED quando ad humanam Gratiâ, ad naturalem complacentiam & ad fines merè humanos diuinâ postulas, peruertis finem & ordinem, quo diuinâ confertur gratia.

Non enim ad hunc finem ordinatur & confertur gratia, sed potius ad humanos illos affectus corrigendos, & in statū nobiliorē euehendos, qui supernaturalis, spiritualis, coelestis, & diuinus dicitur, sicut ipsa Gratia tota supernaturalis, tota coelestis est, & diuina. Sic sanctus Petrus: *ut per hac efficiamini diuinae consortes* 2. Petri. 1. *Natura, fugientes eius quae in mundo est, concupiscentiae corruptionem.* Sic sanctus Prosper: *Virtus Gratiae non hoc in voluntatibus operatur* Contra Col. *ut non sint, sed ut ex malis bonae, & ex infidelibus sint fideles; ut qui ex* laudem.
sepeptis erāt tenebra, lux efficiantur in Domino. Sicut igitur ille finem & ordinem conditi solis peruerteret, qui solem peteret ad tenebras effundendas, vel ad excitandum frigus, aut quid aliud alienum ab eius natura, & proprietatibus; sic planē qui diuinam aliquam Gratiam postulat ut suae Glorīae seruiat, vtilitati tantum temporali consulat, aut naturale aliquod inde commodum hauriat: quia non est diuinā Gratiae hos humanos effectus producere, sed potius contrarios, & oppositos; non est diuinā Gratiae vanitatem sectari, sed potius fugere; non temporalia quærere sed contemnere, non subesse libidini, sed praesse; Et sicut ipse author Gratiae dicebat, *se non venisse ministrari, sed ministrare,* sic Math. 20. omnino non venit gratia nec aduocanda est in hunc finem, ut naturales illos affectus foueat, sed potius reprimat & extinguat. *Numquid colligunt de spinis vuas, aut de tribulis ficus?* quasi diceret, Ibid. 7. nonne ille rerum peruerteret ordinem qui a spinis vuas, aut a vite spinas quæreret, qui a tribulis ficus, aut a ficu tribulos expectaret? sic qui a gratia quod alienum est ab eius virtute, postulat, gratiae finem & ordinem prorsus inuertit. *Non est tibi pars neque sors in sermone isto, cor enim tuum non est rectum coram Deo: In felle amaritudinis, & in obligatione iniquitatis, video te esse;* Sic Act. 2. S. Petrus cuidam petenti gratiam, ex deprauato affectu.

III. PUNCTVM.

S*I ad humanam igitur Gratiam diuina postulas, diuinam ipsam repellis gratiam, Quia non propterea datur, nec propterea eit petenda; imo cum ad oppositum finem detur, non minor est iniuria Gratiae, velle hunc finem & ordinem peruertere, quam si coelum terrae subjiceret, si tenebras luci praeferret, si spiritum carni manciparet, aut Rationem libidini regendam traderet;*

280 FERIA 3. infra Heb. 2. post Epiph. Venite post me.

Hebr. 10. *Hoc est filium Dei conculcare & sanguinem Testamenti pollutum ducere; hoc est Spiritui gratia contumeliam facere.*

Et tamen quoties id appetis! quoties velles maiori pollere gratia ad concionandum, ad gubernandum, ad docendum aut aliquid simile aliud, vt magis appareres, vt maiorem tui concitares famā, & Nominis celebritatē; vel vt commodius viueres, vel denique vt quod naturaliter desideras, facilius obtineres? Itāne verò Coelestes & diuinæ Gratia terrenis his finibus & humanis affectibus seruiant, quibus dominari deberent! *Quæ participatio iustitiæ cum iniquitate, aut quæ Societas luci ad tenebras? Hi sunt maledictionis filij, de quibus grauitè S. Petrus & S. Iudas Apostoli; Hi sunt qui dereliquentes rectam viam errauerunt, secuti viam Balaam ex Bozor, qui mercedem iniquitatis amauit, Cor-reptionem verò habuit sua vesania subingale & mutum animal hominis voce loquens, prohibuit Propheta insipientiam. Hi sunt fontes seu nubes seu aqua, quæ à ventis circumferuntur. Et quæ plura ibi habentur, ex quibus intelligas quā graue sit detorquere diuinas gratias ad priuatum suum commodum, & quantum in hoc deliqueris, vt seridè deinceps caueas. Gratia Dei vita aterna in Christo Iesu Domino nostro.*

Vide Verbo Gratia.



FERIA TERTIA DE ALTERA VOCATIONE APOSTOLORVM.

Venite post me, & faciam vos fieri Piscatores hominum. At illi continuo, relictis retibus, secuti sunt Eum. Matth. 4.

VERITAS PRACTICA.

Magis renemur omnes affectu nostra relinquere, quā effectū Apostoli.

RATIO

Magis tenemur omnes affectu nostra relinquere, quàm, &c. 281

RATIO EST, Quia magis tenemur omnes ad præcepta, quàm ad consilia. —

Sed præceptum est ut affectu: Consilium vero ut effectu, omnia nostra relinquamus.

Ergo magis tenemur omnes affectu nostra relinquere, quàm affectu Apostoli: Quod sanè est valdè expendendum.

I. PUNCTVM.

AM pridem Petrus & Andreas cognorant Christum Dominum, iamque illum multis diebus & horis secuti fuerant tanquam eius discipuli, sed nondum suis se propterea bonis abdicarant; nondum ita illi adhæserant, ut præter illum nihil haberent; nondum denique illi dicere poterant, *Ecce nos reliquimus omnia, & secuti sumus te*: Donec altera hac vocatione vocati, dum piscarentur, audierunt, & intellexerunt has Christi Domini voces, *Venite post me, & faciam vos fieri pisces hominum*. Tum enim continuo relictis retibus secuti sunt eum. Quod item paulo post, audientes Iacobus & Ioannes filij Zebedæi; relictis statim retibus, & patre, secuti sunt eum, inquit Sacer Euangelista.

Matth. 46

Admirabile prorsus hoc consilium Dei qui velit homines, & hos homines, sui diuini operis Coadiutores! Admiranda planè diuinæ Virtus Gratiæ, quæ sic suauiter & fortiter homines à suis, & à se retrahit! Considerandum est & illud quod Christus loquitur, *Venite post me*, quasi diceret, quocunque est eundum, vos præcedam, & non minùs tutum est quàm gloriosum, me posse sequi. Nec prætermittendum quod addit, *Faciam vos fieri pisces hominum*, quasi homines in mundo velut in turbulentissimo mari naufragerentur, quorum quantà est miseria, & periculosa conditio, tanta eorum est dignitas & felicitas, qui primo inde sunt eruti, tum ad alios simul eruendos & saluandos adhibentur. O singulare beneficium quo Apostoli & Apostolici Viri donati sunt! Quis non libenter suis se omnibus abdicaret bonis, ut Christum Dominum ad tale munus vocantem sic sequeretur?

Verùm non omnes eò vocantur ut relictis effectibus bonis, se &

alios saluent; vocantur autem omnes vt relictis affectu suis, suæ salutis vacent. Et quidem tam stricta est hæc omnium vocatio ad sua, corde & affectu relinquenda, Vt minùs cuiquam liceat ei vocationi resistere, quam licuisset Apostolis aut Apostolicis illis viris, sua effectum deferere. Dignissima certe Veritas, quæ attentissimè consideretur.

Est autem ratio perfacilis, & euidentissima; Quis enim nescit, nos ad præceptum magis obligari quam ad consilia? Quis ignorat quod ait apertè S. Thomas, hanc esse differentiam inter consilium & præceptum, quòd *præceptum Importet necessitatem; Consilium autem in optione ponitur eius, cui datur? VELLE* M, inquit Apostolus, *omnes vos esse sicut me ipsum*, Id est virgines & continentibus: Id tamen unicuique liberum facio quia non est præceptum, sed consilium: At vero si qui matrimonio iuncti sunt; *Vxor*, inquit, *à viro non discedat*; neque hoc sibi liberum putet, sed omnino necessarium, quia *Præceptum Domini est*, cui longè magis tenemur obedire quam Consilio. Sic ille pluribus.

O bonitatem Domini nostri in seruos suos, quibus cum posset, si veller, omnia illa præcipere quæ consulit: mauult tamen libertati relinquere, quam necessitate premere; mauult nos sibi filios quàm seruos, aut seruos mauult voluntarios, & liberos, quam coactos & repugnantes.

II. PUNCTVM.

SED præceptum est vt affectu: Consilium vero, vt effectum, omnia nostra relinquamus.

De præcepto patet tribus modis. Primo quidem quatenus per affectum quo creatis bonis, nimis inhæremus, auocamur à fine nostro, qui est Dei Cultus & æterna salus: sicque fit vt quantum iubemur aspirare ad finem nostrum, tantum præcipiamur abstinere iis quæ nos inde auertunt; *Si manus tua vel pes tuus scandalizat te*, inquit Dominus, *abscide eum, & projice abs te*. Bonum tibi est ad vitam ingredi debilem vel claudum, quam duas manus vel duos pedes habentem, mitti in ignem æternum, Vbi S. Hieronymus, *omnis hic truncatur affectus*.

Matth. 5.
& 18.

Deinde, affectus rerum prohibetur, quia vix est vllus ordinatus: inordinatus autem est peccatum, ac proinde quantum

Magis tenemur omnes effectū nostra relinquere, quā, &c. 283

præcipimur abstinere omni peccato, tantum & affectu inordinato. *Ab omni specie mala abstinete vos. NON simus concupiscentes malorum, sicut & illi concupierunt.* Non quia res mala fuerit, quam concupierint, sed mala & inordinata concupiscentia. Vnde Sapiens Domino; *omne desiderium auerte à me.* Denique quo præcepto iubemur, Deum diligere *ex tota anima, HOC est,* inquit S. Thomas, *ut appetitus seu affectus noster reguletur secundum Deum,* quod idem est atque affectu omnia relinquere. Nam non aliter affectus regulatur secundum Deum, quā ut sic utamur *hoc mundo, tamquam non utamur.* Putasne vere esse præceptum, ut diligas Deum, ex tota anima tua? Sic puta tibi præcipi ut deponas ex anima, inordinatum quemuis affectum, quia non aliter diligitur Deus ex tota anima.

I A M vero quod sit tantum consilium & non præceptum, sua effectū relinquere, audi sanctum Thomam: *Quod homo totaliter ea qua sunt mundi, abjiciat, non est necessarium ad perueniendum in finem prædictum, nempe beatitudinis aeternae, quia potest homo utens rebus huius mundi, dum modo in eis finem non constituat, ab beatitudinem aeternam peruenire: sed expeditius perueniet totaliter boni huius mundi abdicando, & ideo de hoc dantur consilia Euangelij. SI vis perfectus esse,* inquit Dominus Adolescenti; *vade, vende qua habes, & da pauperibus, & habebis Thesaurum in Cælo,* quasi diceret, non cogo, non præcipio, relinquo tuæ libertati, si vis, consulo, & consilij accipiendi motuum propono, quod in cælo repones ea quæ in terra reliqueris. Sic expressis verbis S. Chrysostomus: *Hoc in tuo pono arbitrio, te electionis Dominum constituo, non in necessitatem traho.* O Magni Consilij Angele, quā pauci tua sequuntur Concilia, quī nec præcepta seruant.

III. PUNCTVM.

MAGIS ergo tenemur omnes affectū nostra relinquere, quā effectū Apostoli, aut quivis alij qui sua reliquerunt; Cum magis teneamur omnes ad Præcepta quam ad Consilia, sitque inter præcepta tam expressum illud, ut nihil in rebus creatis, ex inordinato appetitu diligamus, quā est expresse mandatum, *ut diligamus Deum ex toto corde, ex tota mente, & ex tota anima*

In Ps. 118. nostra: Nam ut iam alibi dictum est, ex S. Basilio, quod dicit in toto, nullam in res alias diuisionem admittit, quantum enim dilectionis, in hac inferiora insumpseris, tantum necesse est ut demas de toto.

Et tamen, quis hominum se putat ita obligatum? Aut quis in saeculo huic obligationi satisfacit, cum omnes ita rebus creatis afficiantur, ut inter usum & affectum, nulla sit differentia, nisi quod magis afficiantur rebus quam utantur, cum plura vellent habere quam sint suis usibus necessaria, & iis non utantur nisi ut affectui satisfaciant: quasi affectus sit finis usurpandarum rerum, quasi non manducent & induantur, ut viuant: sed viuant ut manducent & induantur: ô peruersitatem affectus! *Filij hominum, usquequo graui corde!*

Sed quidquid sit de aliis, Tu vide quam parum sis ordinatus in affectibus tuis. Vide quantum inde damni & periculi, vel ex hoc vno capite, etsi alia taceantur, quod magis teneris ad affectum mundi deponendum, quam qui vocaretur à Deo, ad ipsum mundum effectui deferendum.

Quid diceres manifestè resistentibus diuinæ vocationi, manifestè contradicentibus Christo se vocanti in religiosum statum? Nonne illis proponeres tremendas istas voces; *Vocaui, & renuistis: ego quoque in interitu vestro ridebo & subsannabo, cum vobis id quod timebatis aduenerit.* At nonne illi relinquitis? Nonne Vocantem renuis, cum aperte voceris ad deferenda corde & affectu omnia quæ nimio colis affectu? Si despicienti consilium tanta imminent damna, quanta referuntur in scripturis: quanta putas imminere despicienti præceptum? Si nolenti sua effectui relinquere, periculolum est, cum id tantum consulit Christus, & liberum facit: quanto magis non affectu relinquere, cum id absolute præcipiat, & necessitatem obseruandæ legis imponat? *Quis est Dominus, ut audiam vocem eius,* dicebat impius ille rex Pharao: Velleſne ita loqui? velleſne tibi, & hoc objiceret Christus quod de seruis suis Iob querebatur, *Seruum meum vocaui, & non respondit mihi: ore proprio deprecabar illum.* Quot sunt Veritates propositæ temperandis affectibus, tot sunt eius voces, tot sunt propositæ vocationes, tot declarata præcepta, quibus additæ minæ, preces, promissiones, & quidquid ad voluntatem eblan-diendam, aptissimum iudicauit; Tu quid respondisti? quid

Prov. 1.

Exodi. 5.

Iob. 19.

Magis tenemur omnes affectu nostra relinquere, quàm, &c. 285.
effecisti? cùm tam acres, & violenti sint omnes affectus tui,
quasi nihil te contra monuisset, quasi non ille te toties inde re-
uocasset? Confundere, *Et aufer malum de medio tui.*

Dent. 12.



FERIA QVARTA DE DÆMONE IMMUNDO

EIECTO AB HOMINE.

*Et erat in Synagoga eorum, homo in spiritu im-
mundo, cui Dominus, Exi de homine. Marc. 1.*

VERITAS PRACTICA.

Non tam à Dæmone quantumuis immundo, immunda
fit anima, quàm à seipsa.

*RATIO EST, Quia per solum peccatum anima fit immunda.
Sed peccatum non tam à Dæmone quàm ab anima fit.
Ergo non à Dæmone tam fit immunda anima, quàm à seipsa.*

I. PUNCTVM.

VOCATIONEM Apostolorum sequitur quod refert
S. Marcus de Dæmone eiecto in Synagoga Capharna-
tarum. *Et erat, inquit, in Synagoga eorum, homo in spi-
ritu immundo, & exclamauit dicens; Quid nobis & tibi Iesu Naza-
rene? venisti perdere nos? Scio qui sis, sanctus Dei. Et comminatus
est ei Iesus dicens, obmutesce, & exi de homine; Et discerpens eum
spiritus immundus, & exclamans vocemagna, exiit ab eo. Et mirati
sunt omnes, itavt conquirerent inter se, quidnam est hoc? quanam
doctrina hac noua, quia in potestate etiam spiritibus immundis impe-
rat, & obediunt ei.*

Hæc sanctus Euangelista, in quibus quid mirabilius sit Dæ-
monem ita prædicare Christum, vel Christum nolle prædicari à

dæmone, cogitari facilius potest quam dici. Est autem spiritus immundus ita dictus, vel quod in locis immundis libenter habitaret, vel potius quod in immunditiam, hominem quem possidebat impelleret; sunt enim ad id vitium præcipue destinati, à quibus quidem nobis est cauendum, cum diuina Gratia, quam Christus Dominus nobis offert: sed magis à nobis cauendum, quia vt habet proposita Veritas: *Non tam à demone quantumuis immundo, immunda fit anima, quam à seipsa.* Quod vt patefiat, primum illud proponitur, solo peccato immundam fieri animam, vbi duo sunt consideranda; alterum quod peccato, alterum quod solo peccato immunda fiat anima. Quod vtrumque planum est ex Scripturis. *Maculata es in iniquitate tua coram me, dicit Dominus Deus.* Et iterum. *Quàm vilis facta es nimis, iterans vias tuas;* Quod & de ipso veniali peccato intelligendum est, & eo præcipue quod ex concupiscentia seu affectu inordinato fit. Vnde S. Augustinus, *Quibus peccatis,* inquit, *licet occidi animam non credamus, ita tamen eam veluti quibusdam pustulis, & quasi horrenda scabie replentes deformem faciunt, vt eam ad amplexus illius sponsi Cælestis, aut vix aut cum grandi confusione venire permittant;* Nam sicut manus ex contactu luti lutosa fit, sic anima in res creatas & terrenas inordinate affecta, cum se his suo modo immiscet, indè maculam contrahit, vnde immaculatum se custodire ab hoc sæculo, est affectum omnem cohibere, quæ pars est veræ religionis potissima, authore S. Iacobo.

Quod autem solo peccato contrahatur macula seu immunditia, patet euidenter, quod quæcumque est animæ pulchritudo, siue naturalis, id est naturæ non corruptæ; siue supernaturalis, id est diuinæ Gratiae, solâ foedetur peccati maculâ propter quam solam, animæ peccatrici dicitur: *Abominabilem fecisti decorem tuum.* Erant quidem apud Iudæos legales quædam immunditiæ, sed præterquam quod illæ iam omnes sublatae sunt, neque ipso quo vigeant tēpore, foedabant animam: Vnde Dominus de his agens, & de peccatis: *Hæc sunt, inquit, quæ coinquinant hominem: non lotis autem manibus manducare, non coinquinat hominem.* Tolle peccatum, & sunt omnia sanctis in bona, dicebat Sapiens: Quo item sensu Apostolus, *omnia munda mundis.*

O peccatum, tam vere deplorandum malum, quam verè solum est animæ malum.

Ier. 2.

Serm. 41.
de sanctis;
Ex lib. 50.
Hom. Hom.
50.

Iac. 1.

Ezech. 16.

Matth. 15.

Ecclesi. 39.

Titi 1.

II. PUNCTVM.

AT QVI peccatum nostrum non tam à demone quam ab anima fit. Latrare potest, inquit S. Augustinus, sollicitare potest, mordere omnino non potest nisi volentem, Et apte S. Gregorius ad illa Verba Iob, Conuulnerauit lumbos meos; QVIA, inquit, ad culpam sine nostra voluntate non potest rapere, sed nos cum illo pariter nos vulneramus. Itemque appositè S. Bernardus. Sane diabolo nos nostra mancipat voluntas, non ipsius potestas; Et alibi: serpens callidior utique non fortior ceteris animantibus, ô Eua, decepit te: decepit profecto, non impulit aut coëgit: Mulieritibi, ô Adam, de ligno dedit, sed offerendo utique, non violentiam inferendo, neque enim potestate illius, sed tua factum est voluntate, ut eius voci plus obedieris, quàm diuina.

Denique celebris illa S. Augustinus sententia, de nullo peccato, nisi voluntario, rem omnem conficit. Vsq̃ue adeo, inquit, peccatum voluntarium est malum, ut nullo modo sit peccatum, si non sit voluntarium. Et hoc quidem tam manifestum est, ut nulla hîc doctorum paucitas, nulla indoctorum turba dissentiat. EGO sum qui peccauit! ego qui malum feci! sic perge te inculcare.

III. PUNCTVM.

IGITVR à nullo demone quantumuis immundo tam immunda fit anima, quam à seipsa; cùm omnis immunditia sit à peccato, & omne peccatum à propria voluntate. Hæc est immundissima lepra animi, de qua fufe S. Bernardus, & à qua nobis cauendum ait, tanquam à vipera pessima & nequissima, & qua sola deinceps damnare possit animas nostras. Cogita quantopere horreas dæmonem, & si ab eo scires aliquid tibi suggeri, quantum refugeres: sic te aduersus te ipsum compara, quia tu tibi voluntarius es dæmon, & longe illo peior, quem Dominus ejicit: quia Christo magis resistis. En vides, ut obedit ille spiritus immundus, Tu vero ut obsistis contra! Ecce ille de quo dicitur; Cor eius indurabitur tanquam lapis, & stringetur quasi Malleatoris incus: Ille tamen emollitur ad vocē Christi, & tu permanes in tua duritia, nec affectum prauum, spiritum illum immundū tuum finis à te expelli!

Hoc est quod Prophetæ gemunt, & quod tibi cum illis est
 oste 5. deplorandum. *Non dabunt cogitationes suas, ut reuertantur
 ad Deum suum, quoniam spiritus fornicationis, in medio eorum;
 Amos 4. & Dominum non cognouerunt. ASCENDERE feci putredinem
 castrorum vestrorum in nares vestras, & non rediſſis ad me, dicit
 Num. 21. Dominus.* Scisne quid accidat illis, qui pertinacius resistunt
 Deo? Sicut olim Iudæis, sic illis immittit ignitos serpentes, &
 tantum abest, ut expellat ab eis immundum spiritum, ut potius
 Ps. 34. finat eum desæuire crudelius, & tunc fiant, *Via illorum tenebræ,
 & lubricum, & Angelus Domini persequens eos: Quæ sunt viæ
 certissimæ ducentes in interitum & perditionem.* Proponere ali-
 quid particulare circa affectum vehementiorem, quod caueas
 Ecclesi. 23. diligentius cum Dei Gratia. Recte omnino sapiens: *Anima ca-
 lida quasi ignis ardens, non extinguetur nisi aliquid glutiat.* Quam-
 obrem sic temperandus iste calor, ut possis dicere quod est in To-
 Tob. 3. bia: *mundam seruavi animam meam ab omni concupiscentia.*



FERIA QUINTA. DE SOCRV PETRI FEBRICITANTE ET SANATA A CHRISTO DOMINO.

Imperauit feбри, & dimisit illam. Luc. 4.

VERITAS PRACTICA.

Febris animi, animo longè periculosior, quam febris
 corporis, corpori.

RATIO hæc est inter alias, quod illa sit periculosior febris quæ
 remedia refugit, & sanitatem.

Sed talis est febris animi, non corporis.

Ergo illa periculosior; Quod tamen vix creditur, quia non senti-
 tur, nec attente consideratur.

I. PUNCTVM.

Synagoga illa, vbi expulsus est daemon, *Surgens Iesus,* ait Euangelista, *introiuit in domum Simonis: socrus autem Simonis tenebatur magnis febribus, & rogauerunt illum pro ea, & stans super illam, imperauit febre, & dimisit illam, & continuo surgens ministrabat illis.*

Non hîc deesset meditationis materia considerare volentî Bonitatem & Potestatem Imperantis, effectum imperij tam veloce in sanitate consequente, ac denique sanatæ mulieris gratitudinem, in parando ministerio. Verum attentius expende quod hîc scribit S. Ambrosius. *Fortassis in typo Mulieris illius, variis criminum febribus Caro nostra languebat: & diuersarum cupiditatum immodicis astuabat illecebris: nec minorem febrem amoris esse dixerim, quàm calor. Itaque illa animum, hæc corpus inflammat. Febris enim nostrâ, auaritia est: febris nostra, libido est: febris nostra, luxuria est: febris nostra, ambitio est: febris nostra, iracundia est; In quibus porro conueniant illæ febres satis facile est obseruare. Quàm longè etiam damnosior sit febris animi, febre corporis, ex damno animi longè magis formidando, non est difficile explorare. Sed quod minùs fortè attendas, illud est quod habet proposita Veritas. *Febrem animi, animo longe esse periculosiorem, seu magis perniciosam, quàm febrem corporis, corpori.**

Ratio hæc affertur, quia tum perniciosior est morbus cum refugit remedia, seu quia æger non vult ea recipere, seu quia ægritudo non ea sustinet: nonne tum periculi plena sunt omnia? Quamobrem monemur à Sapiente, non abjiciendam in infirmitate, sanitatis & modestiæ curam, neque remedia tam corporalia, quàm spiritualia negligenda. *In tempore infirmitatis, inquit, Eccl. 18. ostende conuersationem tuam. Et rursus: Altissimus creauit medicamenta, & vir prudens non abhorrebit illa; Fili in tua infirmitate ne despicias te ipsum, sed ora Dominum, & ipse curabit te; Auerte à delicto, & dirige manus, & ab omni delicto munda cor tuum. Da locum Medico; etenim illum Dominus creauit, & non discedet à te, quia opera eius sunt necessaria. Est enim tempus, quando in manus illorum incurras; ipsi vero Dominum deprecabuntur, vt dirigat requiem*

290 FERIA 5. infra Hebd. 2. post Epiph. De Socru Petri sanata.
 illorum & sanitatem.

Sap. 12. O QVAM bonus & suavis est Domine spiritus tuus in omnibus,
 qui nobis ita remedium prouidisti, vt tamen ad te tūm agri
 tū medici recurrerent: Et sic nos omnes ad te venire voluisti, vt
 tamen remediis ordinatis vteremur. Si quis ergo esset, qui tum
 neque ad Deum, neque ad homines confugeret, neque vllō reme-
 dio vti vellet, nonne is & ægrotaret periculose; & in suo se ne-
 gligens periculo, nonne peccaret grauiter? Quare negligitis?
 Gen. 42. NOLITE negligere, nolite cessare. QVI negligit viam suam, mor-
 Ind. 18. tificabitur.
 Prov. 19.

II. PUNCTVM.

SED talis est maximè qui laborat febris animi.
 Primò, vix morbum sentit, vnde Propheta, in doloribus
 Is. 50. dormietis. Deinde, adeo non sentit morbum, vt numquam me-
 lius sibi putet esse, quàm cum vehementiori cupiditate ardet;
 cum amat, cum desiderat, cum sperat, aut cum gaudet. Tran-
 Ps. 92. sierunt in affectum cordis, concupierunt concupiscentiam. Denique
 propone ægroto concupiscentiæ remedia: si adolescens est, non-
 dū est tempus: si senex, tempus præterit. Vlnus, & liuor & plaga
 Is. 1. tumens non est circumligata, nec curata medicamine, neque fota oleo;
 Hæc de morbis animi Propheta, non de corporeis. Sic & alius:
 Ier. 8. Transiit mæsis, finita est æstas: & nos saluati non sumus; super con-
 tritione filia populi mei, contritus sum & tristatus, stupor obtinuit
 me! Numquid resina non est in Galaad, aut medicus non est ibi? quare
 igitur non est obducta cicatrix filia populi mei. Quia scilicet no-
 lunt curari: Hoc fatebatur de se S. Augustinus cum nondum
 resipuisset. Timebam, inquit, ne me citò sanares à morbo concupiscen-
 8. Conf. 7. tia, quam malebam expleri quàm extingui. Nonne hoc ipsum fate-
 beris? Vis sanus fieri? Responde Christo. Vis remedia? en pa-
 Ioan. 5. rata! cur ergo non sanaris? fingis te velle quod reuera non vis.
 Ibid. Et non vultis venire ad me, vt vitam habeatis!

III. PUNCTVM.

FEBRIS igitur animi, animo longè est periculosior, quàm fe-
 bris corporis, corpori; Cum vix vllus æger corpore, non se cu-

Febris animi animo periculosior, quàm febris corporis, corpori. 29
 rari velit & sinat; qui vero cupiditate corripitur, de augendo
 potiùs morbo cogitat, quàm sanando. *Cum sanare vellem Israel*
reuelata est iniquitas Ephraim, Id est tunc maxime apparuit mor- *osie 7.*
 bus Israelitarum periculosus, insanabilis, & desperatus, quando
 sanare eum voluit Dominus, quia recusauit sanitatem; & hoc
 est morbi desperati signum apertius. Quid enim tandem fiat illi
 ægro, qui parata remedia recusauit? Audi & treme: *Curauimus Ier. 51.*
Babylonem, & non est sanata, derelinquamus eam. O derelinquamus
eam! Quis ita loquitur? Cui loquitur? & quid illud quod loqui-
tur, derelinquamus eam! Expende singula, & serio de remediis
cum supersunt, cogita. Erudire Ierusalem, ne forte recedat anima *Ibid. 6.*
mea à te.

Vide conformem huic Veritatem, Feria 5. infra Hebdoma-
 dam sextam post Epiphaniam. Et Verbo, *Morbus. Sanitas. Con-*
cupiscentia.



FERIA SEXTA.

DE PRÆDICATIONIBVS CHRISTI

DOMINI, VNIVERSIM CONSIDERATIS.

Aliis ciuitatibus oportet me Euangelizare regnum
Dei, quia ideo missus sum. Et erat predicans in
Synagogis Galilææ. Luc. 4.

VERITAS PRACTICA.

Si quid nos reuocat à doctrina Christi, vel ob id ma-
 ximè recipienda est.

RATIO EST, *Quia quidquid nos reuocare potest, id nonnisi*
à proprio iudicio, vel ab inordinato appetitu prouenire potest.
Sed propterea maxime recipienda est doctrina Christi, ut ordi-
nentur prauis illi motus.

Ergo, si quid nos ab ea reuocat, vel ob id maximè recipienda est: In quo sane multi deficiunt.

I. P V N C T V M.

Luc. 4.

CVM pro more suo Dominus secessisset in quendam desertum locum, oraturus Patrem, apparuit plebi Galilææ mirum in illum studium. Primò enim, vt narrat Euangelista, *requirebant eum*; deinde non cessarunt à quærendo, donec eum inuenerint: ac denique inuentum sic apud se retinere certatim contendebant, vt inde volentem discedere non paterentur. Quibus ille ait; *Quia & aliis ciuitatibus oportet me Euangelizare regnum Dei, quia ideo missus sum. Et erat prædicans in Synagogis Galilææ*; Quod alius Euangelista sic refert, *Et ait illis, Eamus in proximos vicos, & ciuitates, vt & ibi prædicem: ad hoc enim veni. Et erat prædicans in Synagogis eorum, & in omni Galilæa.*

Marc. I.

Hic igitur apte institui potest Meditatio de prædicationibus Christi Domini vniuersim considerandis, qua in consideratione Circumstantiæ illæ quæ actionem quamlibet comitari, & insigñire solent, expendi possunt, *Quis, quid, ubi, quibus auxiliis, cur, quomodo, quando*; Quæ dum pro deuotionis affectu tantisper reuolueris, persuasum hoc habe, illud ipsum Euangelium, illam ipsam doctrinam Christi Domini, tibi proponi in vsum & praxim quotidianam. O beneficium! Sed quomodo vteris? Quid est, quod te ab illa reuocet? Quidquid sit, *Vel ob id maximè recipienda est.*

Eccles. 17.

Nā quidquid illud sit, non nisi inordinatū est aliquid, vel à prauo iudicio, vel à deprauata voluntate, & appetitu naturali proueniens; Quid enim aliud Veritati, quid aliud Christo & diuinæ Gratiæ sese opponat, quod non sit falsum, deprauatum & inordinatum? Vnde porro illa falsitas & deprauatio, nisi à nobis, nisi à natura corrupta, & corrumpente iudicium, atque voluntatem? O quàm verè Sapiens, *Quid nequius quàm quod excogitauit caro & sanguis?* Nam cum id contra doctrinam Christi sit excogitatum: quid nequius cogitari potest?

Habetur integra Veritas in hanc sententiam, FERIA 2. infra hebdomadam Septuagesimæ.

II. P V N C T V M.

SED ob id maximè recipienda est doctrina Christi Domini, ut ordinentur illi motus.

Primo enim vniuersim docet cohibendos omnes illos motus, qui aduersus rationem, & fidem insurgunt. *Quid cogitatis in-ter vos, modica fidei?* Deinde speciatim, si quis sit superbix, libidinis, auaritiæ, aut cuiusvis concupiscentiæ sensus, particularia documenta subministrat, quibus hi corrigantur. *Nolite in sublime tolli.* Denique confert gratiam quâ refrænatur concupiscentia; intellectum illustrat, voluntatem mouet, memoriam excitat, & omni modo adiuuat, ut dum recipitur illa Doctrina, fiat in animis nostris, quod in corporibus fieri solitum narrant Euangelistæ, cum prædicaret Dominus; quotquot scilicet ægroti aderant, sanabantur: quotquot dæmoniaci, liberabantur: quotquot malè affecti, recreabantur.

O verè lex Domini immaculata conuertens animas: testimonium Domini fidele, sapientiam præstans paruulis! **L**EX per Moysen data est, lex antiqua quæ malum quidem demonstrabat, sed non sanabat: At gratia, & veritas per Iesum Christum facta est, ut quod scimus faciendum, faciamus. *Hac est lex spiritus vitæ in Christo Iesu, quæ liberat nos à lege peccati & mortis,* ut ait Apostolus; Nam quod impossibile erat legi in quo infirmabatur per carnem, Deus filium suum mittens in similitudinem carnis peccati, de peccato damnauit peccatum in carne, ut iustificatio legis impleretur in nobis, qui non secundum carnem ambulamus, sed secundum spiritum: qui enim secundum carnem sunt, quæ carnis sunt sapiunt; qui vero secundum spiritum sunt, quæ sunt spiritus sentiunt. Sensus est, in hoc vel maximè legē & doctrinam Christi Domini præcellere aliis, quod ipse docendo communicet suis spiritum suum quo ita euadant spirituales, ut iam non secundum carnem, sed secundum spiritum viuant. Quò referri potest & illud quod dicebat Dominus: *Spiritus est qui viuificat, Caro non prodest quidquam. Verba quæ ego locutus sum vobis, spiritus & vita sunt.* Id est, vitam communicant spirituales, non tantum per Sacramenta, sed per attentas considerationes, lectiones, collationes, & alios quibus illa Verba diuina usurpantur, modos. Quod cum Dominus Iudæis diceret: *Ex hoc,*

inquit Euangelista, *Multi discipulorum abierunt retrò, & iam non cum illo ambulabant. Dixit ergo Iesus ad duodecim: Numquid & vos vultis abire? Respondit ergo ei Simon Petrus: Domine, ad quem ibimus? Verba vita aeterna habes. Quali diceret, ut interpretatur S. Augustinus: da nobis alterum Te ad quem ibimus, si te relinquimus: cum verò nullus alter sic tui similis, quantumcumque recedant alij, nos à te numquam discedemus. O vere Apostolicam vocem! O verè dignum Christo pectus!*

III. PUNCTVM.

S*I quid est igitur quod nos reuocet à doctrina Christi, vel ob id maxime recipienda est: Cum nihil aliud nos inde reuocet, quam aliquid inordinatum, cui remedium affert illa doctrina, proindeque tanto ardentius est amplectenda, quanto vehementius ab ea te repellere sentis; Venite ad me omnes qui laboratis, & onerati estis, & ego reficiam vos. Quid times anime, si secundum Euangelium viuas? Ne superbire, ne irasci, ne aliquo demum affectu inordinatè rapi non liceat? Hoc est scilicet quod maxime times; Sed hoc est maxime quod te excitare debet ad Christum, ne tibi aliter, quàm ex Euangelio liceat viuere: alioquin quid tibi prodesset audire, si non credis? aut quid credere, si non conformiter viuis? An tu erubescis Euangelium? An negas illud esse, Virtutem Dei in salutem omni credenti? An ignoras non auditores, sed factores solos commendari?*

Nonne audiuiisti quid Geraseni cum Christo egerint, quando Christus permisit porcos eorum in mare demergi: *Rogauerunt illum, inquit sacer textus, ut discederet ab ipsis. Maluerunt scilicet carere Christo quam porcis suis. O rem, inquis, execrandam! sed rem quæ tamen à te quotidie perficitur, cum ne sensuali appetitu priueris, te Christi doctrina priuas. Nūquid propterea dicebat Dominus: Nolite sanctum dare canibus, neque mittatis margaritas vestras ante porcos, ne forte conculcent eas pedibus suis. Sanctum dicitur quidquid docuit Christus ne corrumpatur aut profanetur: Margaritæ sunt, quæcumque sunt eius voces, ut in pretio habeantur. Canes vero sunt Impugnatores: & porci, Contemptores, ait S. Augustinus. Nonne te pudet vel horum nominum? Oppone autem eis excellentia hæc quibus Christus honorat audientes, & facientes verbum Dei. Mater mea, & fratres*

Si quid nos reuocat à doctrina Christi, vel ob id, &c. 295
mei hi sunt qui verbum Dei audiunt & faciunt. Potuitne dignius
rem commendare? poterisne verò tam dignæ commendationi
semper oblistere?

Vide Verbo Verbum Dei, & Dominicam Sexagesima in 2. parte,
ubi & alia indicantur.



S A B B A T O.

DE HIS PETRI VERBIS

AD DOMINUM.

Præceptor, per totam noctem laborantes, nihil ca-
pimus: in verbo autem tuo laxabo rete. Et cum
hoc fecissent, concluderunt piscium multitudinem
copiosam. Luc. 5.

VERITAS PRACTICA.

Nisi diligenter aduertas, stulto labore consumeris.

RATIO EST, Quia ille stulto labore consumitur qui relicto
labore facili & fructuoso, totam aut maiorem vitæ partem
transigit in labore difficili, & infructuoso.

Sed nisi diligenter aduertas, talis est vitæ tuæ labor, labor diffi-
cilis & infructuosus, quem ultrò suscipis, neglecto facili &
fructuoso.

Ergo stulto labore consumeris; Quod sane est diligenter perpenden-
dum ad cautionem adhibendam.

I. P V N C T V M.



E G I potest narratio fusior, quam habet S. Lucas, & de *Dominica*
qua occurret in tertia parte iterum dicere. Hic modo si *4. post Pē-*
tecosten.
ite in consideratione duplicis operæ & laboris, quem

posuit Petrus cum sociis, in piscando. Ecce enim tota nocte laborant, & nihil capiunt: Mane autem facto, iactis tantum, ad Domini iussione[m], in mare retibus, concludunt piscium multitudinem copiosam. Nonne magna est diuersitas vtriusque laboris: cum ex vna parte multum laborarint, & nihil caperint: ex alia verò, parum laborarint, & multum profecerint?

Hæc est diuersitas Laborantium in hoc mundo: hic est duplex hominum labor tam diuersus & directè sibi oppositus, vt alter sapiens, alter stultus dicatur, sicut patebit in declaratione Veritatis propositæ, quæ tibi vni ad vberiore[m] fructum est applicanda; Nisi enim diligenter aduertas, totus in hac stultitia viuïs, & laboras, totus *hoc stulto labore consumeris*; Quod iam pridem dicitur *Exodi. 18.* Cum fuit Moyfi, à socero Iethro, vt est in libro Exodi.

Ratio quæ affertur non tam indiget probatione quàm attentata rei propositæ consideratione, subiiciendo sibi distinctè duplicem illum laborem valde diuersum & oppositum, ex illis duabus circumstantiis simul inuolutis, quæ faciunt totam diuersitatem, *Nempe difficultas, siue vllò fructu: Et facilitas cum multo fructu.* Sit itaque ex his duobus alteruter propositus labor, vel iste facilis & multum fructuosus; vel ille difficilis & plane infructuosus, quis sapiens non eligeret facilem & fructuosum, si maximè sciret æquè, aut etiam magis isto labore facili, se Domino suo gratum futurum? Quis nisi stultus vellet se adstringere ad id quod est difficilius, & infructuosius? Nam si saltem difficillimi laboris esset aliquis fructus! aut si nullus est fructus, si saltem labor esset facilis: sed multum laborare sine fructu, cum præcipuè possis, si velis, aliunde fructum percipere sine magno labore; certe hoc est stultescere, hoc est stulto labore cōsumi; hoc est quod arguunt sacræ Scripturæ, Quando sic culpā nostrā fit vt vltro vitam transigamus in tali labore, & voluntaria[m] miseria. *Hæc dicit Dominus; ponite Corda vestra super vias vestras: seminastis multum & intulistis parum. Qui mercedes congregauit, misit eas in sacculum pertusum.* *Agg. ei. 1.* Contrā laudi datur, quod ait de se Sapiens; *Modicum laboraui, & inueni mihi multam requiem.* *Ecclesi. 51.* Et Dominus vniuersim de suis; *Electi mei non laborabunt frustra;* Vnde consequens est illos non esse electos, sed reprobos, qui laborant frustra, & qui dicunt. *Lasati sumus in via iniquitatis, & perditionis: & ambulauimus vias difficiles.* *Is. 65.* Ex vtris esse velles? *Sap. 3.*

II. PUNCTVM.

SED nisi diligenter aduertas, talis est vite tua labor, labor difficilis & infructuosus; neglecto facili & fructuoso.

Quatuor hic sunt distinctè declaranda; Primum est, laborem vitæ tuæ esse difficilem: Cum enim penè in omnibus, velis concupiscentiæ seu naturæ deprauatæ satisfacere, quid imperiosius? quid durius? Et quid difficilius? Illa est ancilla quæ cum hæres fuerit Dominiæ suæ, *Sustineri non potest*, vt ait sapiens. *Prou. 3.* Illa est occupatio magna, vt ait alius, *creata omnibus hominibus, & iugum graue super filios Adam: cogitationes eorum, & timores cordis*; Et quæ plura pergit Ecclesiasticus; Hæc est tinea de veste nascens & eandem vestem corrumpens, de qua fusè & præclare S. Gregorius ad illa verba Iob; *Qui quasi putredo consumendus sum, & quasi vestimentum, quod comeditur à tinea.* *Iob. 13.*

Denique nihil laborosius, quàm quod fit cum inquietudine animi; nam labor & quies opponuntur, & maiori quieti maior est labor oppositus; Non est autem maior quies, quàm quies animi, nec proinde maior aut difficilius labor quam inquietudo animi. Iam verò quidquid fit ex concupiscentia, fit ex inquietudine animi; nihil enim magis inquietum quàm affectus deprauatus, *Vnde bella & lites in vobis? nonne hinc? ex concupiscentiis vestris, quæ militant in membris vestris? Concupiscitis & non habetis! ô tristitiam! ô angorem! Omnis plaga, tristitia hæc cordis est*, ait Sapiens. *Ecclesi. 28.*

QUIS vero fructus huius laboris? Secundum est declarandum, Quidquid fit, in morte terminabitur, & quidquid mortale est, parum est fructuosum. *Quem fructum habuistis tunc in illis, in quibus nunc erubescitis?* inquit Apostolus, *Nam finis illorum mors est.* *Rom. 6.* **Q**UID nobis profuit superbia? aut diuitiarum iactantia quid contulit nobis? *Transierunt omnia illa, tanquam umbra.* Vide sapientiæ quinto, quantum illi deplorent se nullum sui laboris fructum ex hac vita retulisse. Sed ante mortem dum adhuc viuus, quid præmij, quid emolumenti ex inquieta vita? Præclare omnino Iaias: *Conceperunt laborem, & pepererunt iniquitatem, oua aspidum ruperunt, & telas aranea texuerunt; tela eorum non erunt in vestimentum, neque operientur operibus suis: opera eorum, opera inutilia.* Et alibi; *Sicut somniat esuriens & sitiens, comedit* *Is. 59.* *ib. 29.*

Osee 8.

Eccl. 5.

Ibid. 2.

& bibit, & postquam fuerit expergesactus, lassus adhuc bibit, & anima eius vacua est. Sic plane somnia sunt, humana hæc omnia, quæ ut apparent, euanescent; Quod & Propheta Osee sic egregie; *Quia ventum seminabunt, & turbinem metent: culmus stans non est in eo: germen non faciet farinam, quod etsi fecerit, alieni comedent eam.* *VID* ergo prodest ei, quod laborauit in ventum? ait ille Sapiens, qui cum se conuertisset ad vniuersa opera, quæ fecerant manus eius, & ad labores in quibus frustra sudauerat, vidit in omnibus vanitatem & afflictionem animi, ac tandem addit; *Quid enim proderit homini de vniuerso labore suo, & afflictione spiritus, quæ sub sole cruciatus est? Quasi diceret, nihil plane, nihil omnino fructus & pretij refert ex illo labore difficili.*

Ps. 149.

L. 8. c. 6.

AT verò, quæ duo restant explananda, vide contrà, quàm facilis sit & fructuosus ille labor quem negligis. Facilis quidem, quia totus consistit in firma voluntate placendi Deo, Cui si velis placere, places. *Qui beneplacitum est Domino in populo suo.* Id est, statim atque se aliquis esse Domini profiteatur, Dominus illum acceptat ut suum: & tam sibi Dominus in seruo placet, quàm seruus Domino vult placere. Quod egregie admodum Nobilis ille, de quo sanctus Augustinus in Confessionibus, Contubernali suo repræsentabat: *Dic quaeso te, omnibus istis laboribus nostris quò ambimus peruenire? Quid quarimus? Cuius rei causa militamus? maiorne esse poterit spes nostra in palatio, quàm ut amici imperatoris sumus? Et ibi quid non fragile, plenumque periculis? Et per quot pericula peruenitur ad grandius periculum? Et quamdiu istud erit?* *AMICVS AVTEM DEI, SI VOLVERO, ECCE NVNC FIO.* Est ne autem operosum, id velle, cum diuina Gratia quæ ut velimus & possimus vltro se offert, quæ nos idcirco præuenit, comitatur & sequitur?

Exod. 23.

Epist. ad
Valer.

Quid est quod voluntas appetit, nisi bonum? Et quale bonum melius, & magis appetendum, quàm placere Deo, qui est summum bonum? Ego, inquit, *ostendam omne bonum tibi?* omne scilicet vtile, omne honestum, & omne bonum iucundum. Nonne unicuique rei innatum est velle attingere finem suum: & velle sibi vitam, quam quidem potest longissimam prorogare? Atque illud est quod agitur labore in te salutare. *Amantes vitam hortamar ad vitam,* inquit Eucherius; *vera ratio est persuadendi,*

cum id poscitur ut impetremus à vobis quod concupiscitis; pro vita quam diligitis, legatione apud vos fungimur: & sanè quàm omnes exiguam amatis, insinuamus ut ametis æternam: Quasi diceret, quidquid à vobis petitur pro salute æterna comparanda, non potest non esse facile; cum nihil sit facilius, quàm velle semper viuere. Denique quis neget, amanti nihil esse difficile, ipsum enim difficultatis nomen amor erubescit, inquit sanctus Augustinus: At quis in amando Iesu labor, qui totus est ad amo- *In Man.* rem nostrum excitandum effectus, & qui hoc maximè motiuo facilitatis nos ad se vocat, *ingum enim meum suauē est,* inquit, & *Mar. I.* enus meum leue.

De fructu autem inde consequente non est dubitandi nec dif- *Sap. 3.* ferendi locus, cum illud Sapientis sit apertissimum: *Bonorum la-* *Ecclesi. 6.* *borum gloriosus est fructus.* Itemque illud: *In opere ipsius exiguum laborabis,* & cito edes de generationibus illius. Quidquid egeris in *Cor. 10.* hunc finem, ut illi placeas, siue manducando, siue bibendo, siue *Coloss. 3.* aliud quidpiam operando, quod est tibi obuium & quotidianum, ingentes præsentis gratiæ, & futuræ thesauros gloriæ promereri. *Et folium eius non defluet, & omnia quacumque faciet, pro-* *Ps. 2.* *sperabuntur.* Non sic impij, non sic, sed tamquam puluis, quem projicit ventus à facie terræ.

III. PUNCTVM.

NISI ergo diligenter aduertas, stulto labore consumeris. Nam hunc facilem & fructuosum laborem tam facile deferis, quàm difficilem & infructuosum illum, facillimè suscipis. Neque hoc tibi fusiùs probandum fuit, cum id affectus tui satis apertè clament, qui penè toti sunt in concupiscentiis, licet fortè non pessimis, non tamen bonis & probatis. *Abiimus unusquis-* *que in sensum cordis nostri maligni.* Quod de se Propheta fatetur, *Baruch. 1.* non potes de te negare: Cum autem nihil aliud sit stulto labore consumi, quàm sic relicto labore facili, & fructuoso, se labori duro applicare, vnde nullus extet fructus & operæ positæ pretium; quid restat nisi diligenter tibi esse aduertendum, aut nisi diligenter aduertas, te hoc stulto labore consumendum? *Sic stulti* *Gal. 3.* *estis, ut cum spiritu caperitis, nunc carne consumimini.* Tanta passi estis sine causa; si tamen sine causa: Quasi dicat Apostolus, hoc

certè est esse stultum, multa pati sine fructu, sine vlllo merito: sic autem frustra patiuntur, qui carne viuunt non spiritu. Quod quidem eo deterius & infan-ius est, cum illi aliquando bene cæperunt, nunc vero propter modicum laborem à cæptis desistunt, & in grauiorem incidunt, in quo consummantur & pereunt;

Iob. 6.

Qui timent pruina, ait Iob, irruet super eos nix. At nonne stultum esset se niui obicere, vt pruina euitares? Neque enim fugitur labor, sed augetur, cum ab vno leui transitur ad grauiorem. Esto sit labor resistere concupiscentiis, sed longe maior est non resistere; Nonne ergo qui sapiunt, minorem illum laborem potiùs ferant, cum præsertim sit salutaris: aut qui non fe-

1. Tim. 6.

runt, planè decipiant, cum se inferant *doloribus illis multis*, de

Prov. 9.

quibus sanctus Apostolus. Serio id apprehende. *Si sapiens fueris, tibi metipsi eris: Si autem illusor, solus portabis malum.*





DOMINICA III. POST EPIPHANIAM,

NISI SIT SEPTVAGESIMA.

DE LEPROSO MVNDATO.

Et confestim mundata est lepra eius. Matth. 8.

VERITAS PRACTICA.

Non dixeris, per Deum abest. Ecclesi. 15.

SENSVS EST, praesertim de iis quae spectant ad salutem nostram.

RATIO EST, Quia si quid per Deum abesset; id defectu potestatis, vel voluntatis eius abesset.

At neutro ex his capite, dici potest.

Ergo omnino ne dicas, per Deum abest, sed potius per teipsum, quod est valde probrosum.

I. PVNCTVM.

PRECEDENTI per urbem Capharnaum Domino occurrit leprosus, qui auditâ famâ miraculorum eius non dubitavit de illius potestate, sed de voluntate incertus, post humilem adorationem, sic exclamavit; *Domine, si vis potes me mundare: Et Iesus*

extendens manum, tetigit eum, dicens, Volo, mundare, Et confestim mundata est lepra eius.

Ex quibus attentè lectis, vel aliquamdiu consideratis, facile est ad Veritatis propositæ sensum & declarationem pertingere. Cùm enim Christus Dominus apertè leproso, & nobis indicet se æquè velle quod rogatur, ac potest: si quid non obtinemus quod maximè ad salutem nostram pertineat, planè non potest in eum rejici; Quod tamen fit à plerisque sese excusantibus, & defectum gratiæ causantibus; Tu illud caue, *Et ne dicas, per*

Deum abest. Sic Sapiens expressis verbis.

Ecclesi. 15. Et ratio est euidens, quia si ex parte Dei deesset aliquid, vel defectu potestatis, vel voluntatis eius, deesset. Nonne ita? Nam si vellet & posset, quid deesset? hæc duo sunt præcipua Dei attributa, quæ ad omnium rerum effectiorem Scriptura commemorat, *Domine, Domine Rex omnipotens, in ditione enim tua cuncta sunt posita: Et non est qui possit tue resistere voluntati, si decreueris saluare Israel.* Si quid aliud cogitari potest, ut scientia siue sapientia ad inueniendum modum executionis, sub nomine potestatis continetur, unde aliud nihil restat quod defectus reiici possit. Nonne tu si quid non facis, si qua re præstanti non excellis, inde solum prouenit, aut quia non vis, aut non potes. Nam si velles quod posses, aut si posses quod velles, quid non præstares? Verè id fateor, Domine Deus, & iam me accuso vel negligentia, quod ea nolim quæ possem cum tua gratia; vel arrogantiæ & nimia cupiditatis, quod ea velim quæ non possum.

II. PUNCTVM.

Sap. 11. **A***T neutro ex his duobus capitibus dici potest: per Deum abest.* Non quidem defectu potestatis, tu enim facile cum Sapiente dices, *subest enim cùm volueris, posse: aut cum Leproso, Domine, si vis, potes me mundare.* Sed cum eodem etiam fortè dubirabis de eius voluntate: Verùm audi Dominum Iesum: *Volo, mundare;* quasi dicat, perinde volo ac possum: non minùs esto certus de mea voluntate, atque de mea potestate.

Non vult quidem modò miraculum, si fortè peteres; non vult humana quædam & temporalia, quæ dare posset si vellet. Neque etiam ita simpliciter & absolutè vult illa quæ spectant

ad animæ tuæ salutem, ut non iterponat conditionem tuæ cooperationis. Nam ut ait S. Hieronymus, in illa verba Apostoli, *Qui operatur omnia secundum consilium voluntatis suæ: VULT Deus* Ephes. 1: ea quæcunque sunt plena rationis atque consilij; vult saluari omnes, sed quia nullus absque propria voluntate saluatur, liberi enim abitrij sumus, vult nos bonum velle, ut cum voluerimus, velit in nobis & ipse suum implere consilium. At verò hac posita conditione, & 1. Tim. 2. quo sensu dixerunt Apostoli: *Deum velle omnes homines saluos* 2. Petr. 3. fieri, & nolle aliquos perire, sed omnes ad pœnitentiam reuerti; tam vera est eius Voluntas quam vera est eius Potestas: Et quàm verè potest omnes saluare, tam verè vult te saluum fieri, per media ordinata.

Licet enim sit voluntas conditionata, non desinit tamen esse voluntas, quæ, si posita conditione effectum fortiatur, de conditionata transibit in absolutam: si fortè autem non perueniat ad effectum, defectus erit non voluntatis, sed conditionis quam exigebat talis voluntas, & sine qua nolebat effectum producere. Ille porrò defectus conditionis, non tam in Deum quàm in causam deficientem est rejiciendus, sicut expressè & disertè docet Lib. 2. de S. Ioannes Damascenus: *Neque latendum est, inquit, Deum præcedenter velle omnes saluari: non enim ad puniendum nos plasmauit, sed ut efficiat nos bonitatis suæ participes, ut bonus: peccantes autem puniri vult ut iustus: Dicitur igitur prima præcedens voluntas & Acceptatio, ex ipso existens; secunda vero voluntas sequens, & permissio ex nostra causa existens.* Fide c. 29.

Atque hoc ipsum est quod tam clarè, & toties ipse Deus per Prophetas: *Numquid voluntatis meæ est mors impij, dicit Dominus* Ezech. 18. *Deus, & non ut conuertatur à viis suis, & viuat; Et quare moriemini domus Israel, quia nolo mortem morientis, dicit Dominus Deus: reuertimini & viuite.* Rursùmque postea, *Dic ad eos; viuo* Ibid. 33. *ego dicit Dominus, nolo mortem impij, sed ut conuertatur impius à via sua, & viuat; Conuertimini, Conuertimini à viis vestris pœsimis: & quare moriemini domus Israel?* Sic Christus Dominus non iam per Prophetas, sed per se ac ore proprio; *Ierusalem, Ierusalem!* Math. 23. *quoties volui, & nolui?* Putasne eum verè loqui? Quod si verè loquitur, potesne dubitare eum verè velle, qui se dicit velle, & qui verè dicit?

III. PUNCTVM.

If. 5.

NON dicas igitur, per Deum abest. Nam cum nihil desit nisi defectu voluntatis, & potestatis; hic autem, neque voluntatis, neque potestatis diuinæ ullus defectus notari possit, quid est quod per illum desit? *Quid est, inquit, quod debui ultra facere vineæ meæ, & non feci ei? An quod expectavi ut faceret vinas, & fecit labruscas?* Quasi diceret, hoc vnum dici potest, quod expectavi ut de suo mecum conferret ad salutem, sed nihil inde detrahitur de mea potestate, aut voluntate, cum non aliter debuërim velle: Ac proinde nemo ausit dicere; *per Deum abest*, nisi blasphemus in eius potentiam, aut bonitatem: & nisi dicat aut illum nolle aut non posse. Vtrum dices? vtrum cogitabis? Certe de neutro restat dubium; sed si quod minus est dubitandum, profecto minus vellet Deus de bonitate sua, quam de potestate à nobis dubitari. Intuere Crucifixum, vide ut se sua potestate quodammodo priuat; quorsum vero? Ut suam nempe Bonitatem magis indicet; ut propensam in te voluntatem suam aperiat manifestius, ut denique minus dubites de eius voluntate, quam de potestate.

Osée 13.

O verè bonum! vere beneuolum, verè volentem, æque ac potentem Christum meum! absit ut aliquid dicam, vel cogitem per illum abesse si quid in me desit! Mea est omnis culpa, meus defectus, ego ipse sum qui nolo, nolo mundari etiam si ipse velit, quia volo affici rebus creatis. O prauitatem affectus mei, qui non modo repugnat voluntati diuinæ, sed etiam blasphemare me facit, quasi non velit Deus! Quam verè dixisti Domine, *perditio tua Israel, tantummodo in me auxilium tuum!* Hoc ergo modò auxilium inuoco, ne cum me vis saluum, ego ipse me perdam! Et cum me vis mundatum, ipse me inficiam.

AD HÆC CHRISTI D. VERBA.

Vide, nemini dixeris. Matth. 8.

VERITAS PRACTICA.

Interrogatus quid primum in præceptis Christianæ religionis

gionis obseruandum : quid secundum, quid tertium:
Responde, Humilitatem.

RATIO declaratur in 4. parte, FERIA sexta infra Hebdomadam
decimam sextam post Octauam Pentecostes, ex sancto Augu-
stino, cuius est tota hæc Veritas.

Alie Veritates de Humilitate huc referri possent : vide Verbo
Humilitas.

AD HÆC ITEM DOMINI VERBA.

*Vade, ostende te Sacerdoti, & offer munus quod
præcepit Moyses, in testimonium illis. Matth. 8.*

Sex veritates proponuntur in sequenti Hebdomada,
quas unicuique licet ad hanc reuocare diem.

DE FIDE CENTVRIONIS
A CHRISTO D. COMMENDATA.

*Amen dico vobis, non inueni tantam fidem in Is-
rael. Matth. 8.*

VERITAS PRACTICA.

Maiores est animi, te Diuinæ Fidei supponere, quàm te
illi opponere.

RATIO habetur declarata in 3. parte, FERIA secunda infra Heb-
domadam septimam post Octauam Pentecostes. Et quæ de fide
spæsim proponuntur : vide Verbo Fides.



HAC HEBDOMADE, Materia Considerationum elicitur ex his Christi Domini verbis quæ Leproso mundato dixit: *Vade, ostende te Sacerdoti, & offer munus quod præcepit Moyses, in testimonium illis.* Matth. 8.

Quæ ut melius intelligantur, aduerte morbum lepræ apud Iudæos fuisse frequentem, diuersum, & cognitu ac curatu difficilem: proindeque multas circa illum morbum conditas esse leges, quarum omnium præcipua fuit, ut Leprosi adirent Sacerdotem, qui iudicaret de lepræ genere, de periculo, de remediis, de sanitate, ac multis ceremoniis quæ habentur in libro Leuitici, capite 13. & 14.

Poterat quidem Dominus dispensare leprosum quem mundauerat ab his legibus; sed maluit eas seruare & commendare, donec planè abrogarentur, siue ut Sacerdotio veteris Synagogæ honorem deferret, siue ut Sacerdotes nouæ legis sic colendos & adeundos de nostris morbis spiritualibus ostenderet. Sic expressè habet Glossa interlinearis: *Disciplina nostri est, ut nos ostendamus Sacerdoti nostro.* Non enim Sacerdotibus nostris minorem potestatem Christus tribuit, quàm antiquis; nec minus Christiano, quàm Iudæo, præceptum est, ut adeat Sacerdotem, ostendat illi lepram animæ, expectet ab eo remedium, sanitatem, & aliâ quæ ad sex præcipua Capita referuntur, de quibus singulæ considerationes & Veritates in singulos Hebdomadæ dies, proponuntur.

SACERDOTIS autem nomine Superior, Confessarius, Instructor, seu Director Conscientiæ, hic intelliguntur; Et hic Illi intelligent, quid respondere debeant se consulentibus.

FERIA SECVNDA.

DE ADEVNDO SACERDOTE

SEV DIRECTORE, PRO SANA ET RECTA
CONSCIENTIA, IN DVBIIS, SIBI FORMANDA.

Multorum est Conscientia cauteriata nisi se sinant dirigi. 307.

Vade, & ostende te Sacerdoti. Matth. 8.

Si difficile & ambiguum apud te iudicium esse perspexeris, inter lepram & lepram: Surge & ascende ad locum, quem elegerit Dominus Deus tuus, veniesque ad Sacerdotem Levitici generis, &c. Deuter. 17.

VERITAS PRACTICA.

Multorum est Conscientia cauteriata & peruerfa, nisi se sinant dirigi.

RATIO EST, Quia illa Conscientia cauteriata & peruerfa tunc esse intelligitur, quando quis non sentit lepram seu vulnus peccati.

Sed multi, nisi se sinant dirigi, sic se insensibiles reddunt ad certam quadam peccata.

Igitur illis est Conscientia cauteriata, nisi recurrant ad Directorem & se dirigi velint. Quod quam sit necessarium, iam facile est indicare.

L. PUNCTVM.

CVM, vt dixi, dubius esset lepræ morbus, vel inter plurima Leprarum genera, cum dubium esset qualinam afficeretur Leprosus; tum precipuè mandatum erat, vt is adiret Sacerdotem qui de morbo cognosceret, & Sacerdotis responso Leprosus staret.

Hæc in figuram eorum, quæ iam à nobis gerenda sunt, circa Conscientiæ, seu peccatorum dubia. Certum est apud omnes, quod si quæ occurrant quæ nos meritò dubios, & incertos faciant, tum Confessario vel Directori esse aperienda; neque licere in dubio peccati, quidquam facere. Sed quàm pauci hoc curant; quàm multi vel præsumunt se scire omnia, vel se doceri

& dirigi negligunt! Quid porro his inde accidit? Audiant Veritatem propositam; Audiant sibi inde fieri Conscientiam cauteriatam & peruersam, quâ sit ut quod minus sibi putent Directore opus esse, eò magis indigeant, & eorum unicuique idcirco dictum, *Vade & ostende te Sacerdoti.*

Hic finis Meditationis, & propositæ Veritatis, ut agnoscamus & persuadeamus nobis tam necessario adeundum esse Sacerdotem, quàm periculosum est alioquin nos habere Conscientiam cauteriatam, & quàm infestum est saluti, in ea Conscientia vitam traducere & finire.

Ratio est ex utraque parte, seu ex utraque propositione sua, valde consideranda, multumque illud quod primò dicitur, expendendum est, illam scilicet esse Conscientiam cauteriatam & peruersam, quæ non sentit vulnus peccati, non dubitat, non angitur, nihil timet, nullo scrupulo, seu nulla religione tangitur, quæ ut est in libro Iob: *Bibit quasi aquam, iniquitatem.* Sic Iob. 15.
1. Tim. 4. Apostolus quorundam licentiam carpens, *Cauteriatam*, inquit, *habentium suam conscientiam*, id est prope similem cauterio, seu cauteriatæ carni: Sic enim explicant Patres, quod sicut cauterio exusta caro, vulnus habet quod non sentit; ita illorum Conscientia vulnus peccati habet, & non sentit, non agnoscit, non eos poenitet: insensibiles sunt, non mouentur.

Sic expressè Theodoretus; *Locus*, inquit, *cauterio iniustus priorem sensum amittit*; Et S. Thomas dilucidè: *Sicut cauterium corruptio est in carne per ignem suæ ferrum ignitum, ex qua egreditur continua putredo, ita ex igne peruersæ voluntatis, quasi cauteriata vlceratur Conscientia.* In Epist. Pauli.

Quod confirmatur ex his quæ Apostolus ait, de quibusdam, Ephes. 4. *Qui desperantes semetipsos tradiderunt impudicitia, &c.* In Græca versione dicuntur, ἀπληγkότες, id est indolentes, quod explicans S. Hieronymus, ait indolentiam esse quâ animus ita obscuruit & obduruit in malis ut peccata non sentiat: ut cum peccat, omnem Conscientiæ remorsum amittat, & quasi Conscientia amputata non poeniteat, nihil doleat. Sic enim, ut ait S. Ambrosius: hoc In Ps. 118. bona mentis est vulnus sentire peccati; sic est peruersæ indicium, non sentire, non dolere.

O indolentiam, omni dolore accerbiores! Fieri ne possit Anime, ut sic aculeum remordentis Conscientiæ retunderes? aut

si fieri posset, itane velles retundere, & callum facere vitis tuis?

II. PVNCTVM.

SED multi, nisi se sinant dirigi, sic se insensibiles reddunt ad certa quadam peccata.

Nonne vides quàm multi peruersè & inordinatè afficiantur ad res creatas, ad honorem, ad pecuniam, ad sensibiles amicitias, & ad reliqua concupiscentiæ nutrimenta? Videsne verò quid hinc eueniat, quando videlicet suis affectibus indulgere volunt? Resistit primo Conscientia, & vbi peccatum agnoscit, angitur illico animus, dolet, æstuat: fugiatne culpam, an admittat? Hinc affectu impellitur, hinc religione retrahitur: *Inter Rom. 2. se inuicem cogitationibus accusantibus, aut etiam defendentibus, vt ait Apostolus; vult & non vult animus obiectum prauis affectus; placet idem & displicet: vult delectationem, sed illi adiunctam culpam refugit. Quid faciat tandem? quid concludat? Ergone priuabitur re amata? Etiam, quamdiu culpa simul apparebit, & quamdiu Conscientia culpam refugiet: quamdiu scrupulum injiciet, aut remorsum, seu animi reluctantis excitabit commotionem. Vnde alterutrum necessario sequetur, aut renuntiandum affectui inordinato, aut Conscientia contrà obstitens conculcanda: Nam nimis durum est contra stimulum calcitare, & *ASH. 9. nonnisi perturbatâ conscientia, atque animo anxio, & in certam suam perniciem consentienti viuere: concilianda sibi pax est, & requies animi, vnde cumque proueniat: Quid hinc ergo statuent? Quam se in partem dabunt?**

Certè si saperent, Directorem adirent, difficultates animi proponerent, à quo quid noxium, quid innoxium in suo sit affectu, discerent; qua ratione affectus ordinandi, quo res vsu & quo fine possideri possint, aliaque conscientia bene formandæ consilia simul discuterent; Hoc est enim Directoris munus, hæc gratia directionis, vt si quid est ambiguum explicet; si quid obscurum, illustret: si difficile & asperum, complanet, & expediat; vnde apud Ezechielem Deus conqueritur de Pastoribus, *Qui quod infirmum fuit non consolidarunt, & quod agrotum non sanarunt: quod confractum non alligarunt, & quod abiectum non reduxerunt.* *Ezech. 34.*

Nunc vero quàm pauci sunt, qui se ita sinant regi, quàm mul-

ti sunt contrà, qui vt affectui libentiùs indulgeant, Conscientiam premunt, opprimunt, & ita conculcant, vt iam reluctari non auit, non culpam indicare, non scrupulum seu religionem mouere, nullo denique modo reclamare.

2. Par. 26.

Quiesce, ne interficiam te: Dicebat Rex Amazias Cuidam Prophetae, se admonenti. Sic plane illi, suae Conscientiae, suo illi Admonitori Domestico imperant, vt quiescat à monitis & stimulis: Tùm vero si acquiescit, se pacatos, & tranquillos sentiunt in suis affectibus inordinatis, quia iam peccatum ibi non agnoscunt; nihil contrà audet Synderesis, nihil Conscientia, nihil ratio, nihil denique sese opponit affectui: Indolentes, & insensibiles redditi, iam ibi non agnoscunt culpam vbi est, cum antè

Pro. 2.

ibi agnoscerent, vbi non esset; *Qui, vt ait Sapiens, relinquunt iter rectum, & ambulant per vias tenebrosas: qui latantur cum malefecerint, & exultant in rebus pessimis;* Id est, nullo Religionis, & Conscientiae punguntur stimulo, imo numquam se beatiores & tranquilliores putant, quàm cum liberiores sunt in suis concupiscentiis; Quod idem Sapiens sic apte exprimit: *In magno uiuentes inscientia bello, tot & tam magna mala pacem appellant.*

Sap. 14.

Ioan. 14.

Hac est videlicet falsa pax mundi quam Christus Dominus reprobat, & cui suam opponit, dicens, *Pacem meam do vobis, non quomodo mundus dat, ego do vobis.* In qua Domini verba, S. Augustinus, *Propterea, inquit, mundus dat sibi pacem, vt sine molestia mundo fruatur.* Id est, vt sine remorsu conscientiae, suis indulgeat affectibus.

O damnosissimam cupiditatem, quae sic animarum salutem prodis & perdis! Etiam peritissimos quosque Doctores sic illudis, vt cum aliis satis periti sint, sibi tamen sunt imperiti.

III. PUNCTVM.

MVLTORVM est igitur Conscientia cauteriata & peruersa, qui suis se affectibus sinant potius abripi quàm à Sacerdote, seu Instructore dirigi patiantur. Cum enim insensibilitate sua velut cauterio sibi facto non sentiant vulnus peccati, quænam illis restare potest Conscientia, nisi cauteriata & peruersa? Quænam pax animi nisi fatalis illa de qua Dominus, *Non veni pacem mittere sed gladium?*

Matth. 10.

At nonne tu ex illis es? Nonne tu inordinate afficeris erga aliquid? Nonne affectum sequeris? Nonne ex animi libidine potius, quam ex ratione viuis? An ibi culpam agnoscis? An saltem dubitas? An in dubio Directorem adis? An eius consiliis libentius quam naturæ motibus acquiescis? Fatere quod est, coram Deo? Nonne si vel Conscientia vel Superior, aut quiuis alius te admoneat, non magni pendis monita, quasi non magni Reus peccati, quasi nullum aut leuiculum sit quod moneris! sic te excusas, sic tibi palpas & blandiris in eumentita pace, vt non dubites dicere, te nullo hinc scrupulo angî, te nulla religione moueri. *Benedixit sibi in corde suo, dicens: pax erit mihi, & ambulo in prauitate cordis mei.* Deut. 29.

O nimis blandam perniciem! ô nimis suaues dolos! *Videntur* Ezech. 13.
visionem pacis, & non est pax. VADE & ostende te Sacerdoti. Communica cum illo de interiori tuo statu, expone illi nudè omnia; Tuam in manus eius animam conjice. Accipe illum vadem & sponforem tuæ salutis; Animam suam pro tua spondeat, nec ab illo vnquam discede, nisi in eo statu, in quo velles mori: vt cum Christus Dominus rationem peret, quamobrem hoc aut illud egeris, respondere possis, quod Rechabitarum apud Prophetam: *Obediimus voci patris nostri, in omnibus quæ præcepit nobis;* Ier. 31. Adiui Sacerdotem quò tu me misisti; ostendi lepram meam, sic me instruxit, sic erudiuit; ô securam vocem! Si vero huic desis officio, si adire refugis, si audire detrectas, si te securum putas; ô te Cauteriatum hominem! ô perditissimam securitatem! *Cum dixerint pax & securitas, inquit Apostolus, tunc repente eis superueniet interitus, sicut dolor in utero habenti, & non effugient.* 1 Thess. 5.



FERIA TERTIA.

DE RECVRSV AD SACERDOTEM

PRO RITE OBEVNDÆ CONFESSIONE.

Vade, & ostende te Sacerdoti. Matth. 8.

Plaga lepræ si fuerit in homine, adducetur ad Sacerdotem, & videbit eum. Leuit. 13.

VERITAS PRACTICA.

Quod magis confert ad faciendam Confessionem, minus efficitur, nisi cum Sacerdote prius conferatur.

RATIO EST, Quia quod magis confert ad perfectam Confessionem, est auersio animi ab obiecto quod est causa peccati. Atqui hoc minus perficitur, minusque omnino fit, nisi prius cum Sacerdote conferatur.

Ergo & minus perficitur quod magis confert ad perfectam Confessionem, nisi ante Sacerdos adeatur. Vnde imperfecta & nulla sæpe fit Confessio; Quod ne damnum accidat, certe adeundus Sacerdos seu Director.

I. PUNCTVM.

QUOD Leprosi adirent Sacerdotem pro lepra sua curanda, non tantum figurabat nostros Sacerdotes esse conueniendos, pro peccatorum remissione ab eis obtinenda, in Sacramento Confessionis: sed etiam pro ipsa Confessione rite & debite à nobis obeunda. Neque verò putes id rudibus tantum & pueris esse necessarium, ut instruantur: sed grandæui & eruditi quique imò & religiosi & Sacerdotes ipsi, nisi aduertant, & nisi de sua salute ac perfectione sint valde solliciti, ignorabunt in praxi, & omittent quod maxime sciri & obseruari debet in Confessione sacramentali, ac proinde his etiam conuenit, & his valde considerata est Veritas proposita, cuius hæc est Ratio, quæ est fundamentum veræ Conuersionis.

Quod est præcipuum & maxime necessarium in Confessione rite peragenda, seu quod maxime obseruari debet, est auersio ab obiecto, seu à re creata, circa quam vel cuius gratia, peccatum, quod confiteris commissum est. Sicut enim nulla esset Confessio nec ulla remissio peccatorum, nisi esset dolor de peccato,

eato, siue per contritionem, siue per attritionem: sic nulla planè Contritio vel Attritio, nisi auertatur animus à peccato & ab affectu inordinato rei, quæ causa fuit peccati. Nam in illo inordinato rei creatæ affectu consistit tota deformitas & malitia peccati, quæ nullâ vîquam confessione, nullâ satisfactione, nullâ poenitentia, nullis lachrymis, nullis muneribus, nullo alio denique modo expiari potest, quàm auersione animi à creatura, & conuersione ad Deum.

Hoc enim propriè est reuerti & conuerti, sicut passim Scripturæ docent, & iam supra dictum est. *Cum auerterit se impius ab impietate sua, ipse animam suam viuificabit.* Considerans enim & auertens se ab omnibus iniquitatibus suis, vita viuet. **PROIICITE** à vobis omnes prauaricationes vestras, in quibus prauaricati estis, & facite vobis cor nouum, & spiritum nouum. Quid clarius? quid expressius, vt videas non esse satis, detestari peccata, sicut fieri solet à plerisque, qui peccatum quidem nollent in vsu rei quâ inordinatè afficiuntur, sed tamen inordinatum illum affectum, cui annexum est peccatum, non deponunt, non se auertunt, vt scriptura loquitur, nec faciunt sibi cor nouum, ac proinde non reuertuntur, nisi fictè & simulatè. *Non est reuersa ad me prauaricatrix Iuda in toto corde suo, sed in mendacio,* ait Dominus apud Ieremiam; tum verò post: *Si reuerteris Israël ad me conuertere, si absteris offendicula tua à facie mea,* Id est, res illas omnes quibus in offensam cadis; hoc est nempe conuerti, dummodo auferantur non tantum exteriùs, sed ex animo per veram animi auersionem & conuersionem ab illarum affectu inordinato; Quod expressè dixit Apostolus: *Anuntiamus vobis ab his vanis conuerti ad Deum.* Et hæc quidem, tam de veniali, quàm de mortali intelligenda sunt, cum nullum omnino peccatum remittatur sine dolore, & nullus propriè sit dolor sine illa animi auersione & reuersione expressa vel tacita. *Pereat Samaria, quoniam ad amaritudinem concitauit Deum suum.* Sic de quacunque re dicere debuisti, vt periret ex animo. Itane vero verè dixisti?

II. P V N C T V M.

AT QVI hoc est quod minus obseruari solet, & quod vix facies nisi cum Sacerdote priùs conferas.

R. r

osce 7.
Ibid. 10.

Nam cum illi affectus qui deponendi sunt, sint valde naturales, seu naturæ corruptæ multum conformes, natura sui amans, sui tenax, & in suis conseruandis solers, & callida, tam facile eos semper affectus retinere satagit, quàm difficile se finit illis exui. *Non dabunt cogitationes suas, ut reuertantur ad Deum suum*, inquit Propheta; Et rursum: *Ephraim vitula docta diligere trituram*: id est, ita assueri sunt adhærere iis quæ diligunt, ut vix desuescant & auertantur.

Iob. 26.

Atque hinc fit, ut aliqui sibi persuadeant, id omnino impossibile: alij possibile quidem, sed tam difficile & violentum, ut vix pares se credant violentiæ sibi faciendæ. Alij ignorantiam affectantes non magis in confessione cogitabunt de affectibus moderandis, quàm si ad remissionem peccati, moderatio illa nihil spectaret. Alij dum non sentiant affectum inordinatum, quo tempore confitentur, sibi satis esse putant, licet de futuro nihil statuant. Alij quidquid de affectu reprimendo dicitur, non ut præceptum sed ut consilium religiosi relinquunt. Religiosi verò non ut affectum priuatum retinere se dicunt sui gratia, sed vel in bonum aliquod proximi, vel sui ordinis zelo, aut aliqua simili prætexta causa. Alij peccatum quidem in re amata detestantur, sed ipsum tamen amorem inordinatum qui facit peccatum, non dimittunt. Alij sic toti sunt in enumerandis & enarrandis ad calculum culpis, ut nihil illis otij & animi videatur superesse ad culparum radices agnoscendas & euellendas. Alij denique pro suo quique ingenio, & naturæ impulsu, quo id cumque modo particulari fiat, sic deficiunt hac in parte Confessionis, ut à Sacerdote ijdem prorsus discedant, ut accesserant; quia ut dictum est, natura sui nimium amans & tenax, mirum quantum in hoc affectuum naturalium negotio resistat rationi & Gratiae, nisi à perito & solerti Directore ita iuuetur, instruatur, & quodammodo cicaretur ac manuducatur, ut de eo dici possit quod est in libro Iob; *Obstetricante manu eius eductus est colubet tortuosus*.

Ex. 3.

Sicut enim à Sacerdote discitur quid rei alienæ sit restituendum, quid ablatae famæ reparandum, quid proximæ in malum occasionis auferendum; sic placet ab eodem audiendum esset, tanquam à Deo, quid ex animo euelli debeat, quid in meliorem usum conuertri, quid ex parte tolerari, quid funditus abijci; *Audies de ore meo verbum*, ait Dominus, & *annuntiabis eis ex me*. Sed

quàm pauci hoc docent, aut doceri volunt! Atque hinc fit, vt licet tam multi confiteantur, verè etiam modò Dominus dicat quod olim: *Attendi, & auscultavi, nemo quod bonum est loquitur, Ier. 8. nullus est qui agat pœnitentiam super peccato, suo dicens, quid feci? Omnes conuersi sunt ad cursum suum, Velut equus, impetu vadens ad prælium.*

O deplorandum malum! & eò magis deplorandum, quò est magis commune & vniuersale: Et verò anima mea, sic deplora malum illud commune, vt tuum in particulari præcipuè defleas.

III. PUNCTVM.

HINC ergo manifestè patet, vt quod est præcipuum in Confessione, non fiat, nisi adsit Sacerdotis directio; Cùm illa animorum conuersio & auersio à rebus creatis, quæ est præcipua Confessionis pars, vix aliter bene fiat: Ac proinde patet etiam necessitas adeundi Sacerdotis, vbi agitur de re talis momenti, qualis est Confessio. Quid enim anime sentis? quanti illud ad salutem referre putas benè aut malè confiteri? *Si sal insul. Marci 9. sum fuerit, in quo illud condietis?* dicebat Dominus, hoc est, si Confessio, quæ reparandis aliis malis est destinata, mala & peruersa ipsa sit, quo tandem alio modo reparabitur? At quo modo non erit mala, si nullus est dolor? Qualis autem erit dolor, si nulla est auersio animi à peccato, seu à re cui peccatum est adiunctum? Aut quis tandem modus illius sanctæ auersionis procurandæ, si tibi & naturæ deprauatæ relinqueris, quæ non obstante qualibet gratiâ, vix patietur se priuari, & auerti ab eo quod nimis amat, nisi à perito Sacerdote difficultas mitigetur, & via quodammodo complanetur? Adeòne graue est communicare cùm Illo, de modo ritè confitendi, cui non est graue confiteri!

Hoc sit itaque fixum ratumque, vt quàm studiosè vīs debite conteri, & reconciliari Deo, tam verè desideres erudiri & dirigiri à Sacerdote, vt quod præcipuum est in hoc negotio, præcipuè impleas. *Si videris sensatum, enigila ad eum: & gradus ostiorum illius exerat pes tuus. Ecclesi. 6.*

Vide Dominicam 4. in Aduentu.



FERIA QVARTA.
DE NECESSITATE RECVRRENDI
AD SACERDOTES, PRO REMEDIIS
SPIRITVALIBVS.

Si fuerit plaga lepræ in Aedibus, ibit cuius est domus, nuntians Sacerdoti, & dicet, quasi plaga lepræ videtur mihi esse in domo mea; at ille precipiet vt efferant vniuersa de domo. Leuit. 14.

VERITAS PRACTICA.

Ne dicas, sufficiens mihi sum. Ecclesi. 11.

RATIO EST, Quia vel id omnino credis, vel non credis. Sed si non credis te sufficientem tibi esse, non est id dicendum, & recurrere debes ad Sacerdotem; Quod si id credis, hoc ipso magis ad eum tibi est recurrendum, vt te vana illa & damnosissima præsumptione liberet.

Ergo siue te credas sufficientem tibi esse, siue non credas, debes semper recurrere ad Sacerdotem, nec dicere sufficiens mihi sum.

I. PVNCTVM.

IANTVM erat lepræ malum vt parietibus domesticis sæpè adhæreret, atque inde periculum esset, ne in personas transfret, & perniciem illis afferret, vnde illico iubebantur Iudæi adire Sacerdotem, vt remedium futuro malo, ne grassaretur, ordinaret.

Sic planè nobis idem contingit, in nostris affectibus: Adhæ-

rescunt rebus domesticis, etiam si à nobis pulsi sint & excussi: redibunt, & inuadent hominem, nisi remedium adhibeatur, & nisi propterea Sacerdos adeatur. *Coinquinationes illæ sunt mundi*, 1. *Per. 1.* de quibus S. Petrus, *quas qui fugerunt, his rursus implicati superrantur, & fiunt eis posteriora deteriora prioribus.* In hunc finem aptissimè Sapiens, à quo desumpta est Veritas nobis hodiè proposita; *Ne dicas, quid est mihi opus, & quæ erunt mihi ex hoc bona? Ne dicas, sufficiens mihi sum, & quid ex hoc pessimabor?* Quod *Ecclesi. 11.* enim in hac materia maximè cauendum, illud est, ne quis se satis sufficientem dicat, nec proinde aliò sibi recurrendum putet. Sed planè id vetitum dicere & sentire; *Ne dicas.*

Nam vel id gratis dices, licèt non sentias ita esse; vel seriò & ex animo ita putabis, ita credes; ita dices vt credis, & ita credes vt dicis. Vtrum è duobus? Ne dissimula; Deo teste lo- *Reg. 16.* queris, *Dominus intuetur cor, & si dixeris, vires non suppetunt, aut etiam suppetunt, qui inspector est cordis,* inquit Sapiens, *ipse in-* *Pr. 24.* *telligit, & Seruatorem animæ tuæ nihil fallit, reddetque homini iuxta opera sua.* Est autem alterutrum necessariò tibi dicendum. O necessitatem aperiendi pectoris! quid enim profit Eum celare, quem latere nihil possit?

II. P V N C T V M.

SED si non ita sentis, & te insufficientem putas, qui prauis tuis affectibus remedium efficax asferre possis: certè obligaris pro ea quam de salute & perfectione tua habere debes, curâ & sollicitudine, illum adire Sacerdotem qui prouideat & medeatur. Cum enim tot sint à Christo Domino instituta remedia, nimis probrosum esset, non iis vtì, & eorum defectu salutem in discrimen vocare. Numquid resina non est in Galaad, aut medicus non est ibi? Quare *1er. 8.* igitur non est obducta Cicatrix? quid responderes, nisi quod neglexeris & Medicum & medicamenta, contrà ac præcipitur: *Da locum medico, etenim Dominus creauit illum, & non discedat à* *Ecclesi. 38.* *te, quia opera eius sunt necessaria; est enim tempus quando in manus illorum incurras.*

Quod si te sufficientem tibi putas, & idcirco non alium esse adeundum credis; Vide quid dicas, etiam si tu ipse medicus spiritualis & Sacerdos esses; falleris, nimis de te præsumis, &

In consi-
tut.

I. Cor. 12.

De Serm.
Dom. in
monte c. 3.

Apo. 3.

illa præsumptio tantum est malum, ut hoc ipso magis alius tibi sit adeundus, quo magis te tibi sufficientem putas. An ignoras medicum quantumvis peritum non posse sibi mederi: sed alium esse adhibendum? Quia videlicet amore proprio sic impeditur ut quod aliis remedium apte ordinaret, non possit sibi præscribere aut usurpare. At nonne id verius in morbis, & remediis spiritualibus? Nonne ibi natura magis corrupta est & deprauata, ut quod aliis diceret faciendum, tibi ipsi non dicas, vel dicenti non obedias? Illud firmissimum tenendum, inquit sanctus Basilius, omnium difficillimum esse se ipsum cognoscere & curare; propterea quod naturaliter quisque se ipsum amet. Quod si spectas ordinationem diuinam, quæ ad medicum corporalem pro sanitate corporis, vnumquemque mittit; quanto magis eam spectare debes in hoc negotio, cum ita de sanitate animæ procuranda statuerit Deus, ut gratiam quæ dicitur Discretionis spirituum & sine qua nemo aptus est ad dirigendas animas, dederit tantum Ecclesiæ ad alios curandos, non ad seipsum. Est enim gratia ex iis quæ dicuntur gratis datae, quæ non nisi ad alios dantur. Denique audi S. Augustinum: *Nisi quisque adiuvetur à superiore, nullo modo sibi est idoneus, ut sese tantis miseriarum implicamentis expediat.* Tu contra non vereberis dicere: *sufficiens mihi sum.* O præsumptionem animi, si sic de te sentis! O cæcitatem, si non vides hanc sensus tui præsumptionem! *Quia dicis quod dives sum, & nullius egeo: & nescis quia tu es miser, & miserabilis, & pauper, & cæcus, & nudus.* Hæc verba sæpius tibi sunt ingerenda.

III. PUNCTVM.

Pr. 16.

Rom. 8.

& 12.

In episto-
lis.

NE dicas igitur, *sufficiens mihi sum*: Et siue id reuera sentias, seu non: semper tibi recurrendum ad alium, si verè sapias. Attende ad hæc duo verba, *vere sapere*, nam qui sibi sapientes videntur, ut nihil aliis egere putent, sapientes quidem sunt, sed non verà sapientia, si Sapientem & Apostolum audis. *Vidisti hominem sapientem sibi videri*, inquit ille, *magis illo spem habet insipiens*; Hic autem: *Nolite esse prudentes apud vosmetipsos, prudentia carnis mors est*; vnde S. Bernardus. *Qui se*, inquit, *magistrum sui facit, se stulti discipulum constituit, & omnia illi desunt, qui sibi nihil deesse putat*; Nec pudeat adire alium, cum apud

omnes hæc sit recepta consuetudo, vt in nostris negotiis peritos quosque consulamus, & his magis credamus quam nobis. Alioquin peruersus est ille pudor, de quo sapiens, *Pro anima tua ne confundaris dicere verum: est enim confusio adducens peccatum, & est confusio adducens gloriam & Gratiam.* Denique illa etiam atq; etiam diuina reuolue Monita: *Ne inuitaris prudentia tua. Ne sis sapiens apud te metipsum.* *Ecclesi. 4. Prou. 3.*



FERIA QUINTA.

DE CONSVLENDO SACERDOTE,

PRO BONIS OPERIBVS FACIENDIS.

Cum (Sacerdos) inuenerit lepram esse mundatam praecepit ei qui purificatur, vt offerat duos passeres viuos pro se, &c.

Quod si pauper est, & non possit manus eius inuenire quae dicta sunt, pro delicto assumet Agnum ad oblationem, &c. Leuit. 14.

VERITAS PRACTICA.

Grande malum propria voluntas, quæ se in bono bene faciendo, non sinit dirigi.

RATIO EST, Quia illud est grande malum, cum bona nostra nobis bona non sunt.

Sed propria illa voluntate, quæ se non sinit dirigi sic fit, vt bona nostra, nobis bona non sint.

ergo est illud grande malum: quod vt caueatur, amanda est Directio.

I. P V N C T V M.

EPROSO mundato præscribebat Sacerdos sacrificia & oblationes quasdam, pro diuersa hominum conditione, adeo vt Diuitibus aliud, & aliud Pauperibus ordinaretur. Sic Peccatori reconciliato mox in satisfactionem, aut etiam ad maius meritum Gratiæ & Gloriæ comparandum, præcipiuntur aut consuluntur à Sacerdotibus nostris, orationes eleemosynæ, ieiunia, & alia bona opera pro facultate Pœnitentis, quæ longè maiorem vim habent ad remissionem pœnæ peccatis debitæ, quando sic ex Sacramento pœnitentiæ, seu ex pœnitentis obedientia peraguntur, quàm si ex propria deuotione susciperentur. *Quamobrem, Rex consilium meum placeat tibi, & peccata tua eleemosynis redime, & iniquitates tuas misericordis pauperum: forsitan ignoscet delictis tuis;* Sic Daniel Nabucodonozor Regi.

Dan. 4.

Et quia non tantum pœnitenti in satisfactionem pro peccatis, sed nobis omnibus in diuinum cultum, in proximorum subsidium, & nostram salutem stabiliendam, vt in scripturis tantopere commendatur, bona sunt opera facienda: tam necessaria est in his operibus bene faciendis Directio, & consilium Sacerdotis, quàm damnosa est propria voluntas, quæ sine directione & consilio præsumit se posse aliquid bene operari. Tantum enim abest vt illâ propriâ voluntate, fiat aliquod bonum, quin potius censeretur debeat, *Grande malum propria voluntas, quæ non vult dirigi, & quâ fit vt bona tua tibi bona non sint.*

Serm. 7. c.
in Cantic.

Sic expressè S. Bernardus à quo est desumpta Veritas, modò expendenda. Atque imprimis illud considerandum, quàm sit grande malum, cum bona nostra, nobis bona non sunt. Hæc est enim maledictio Iudæis denunciata: *Sementem multam iacis in terram, & modicum congregabis, quia locusta deuorabunt omnia. Tu seminabis & non metes, tu calcabis oliuam, & non ungeris oleo: & mustum, & non bibes vinum.* Vbi duplex agnosci debet malum: vnum quidem in labore & expensis, aliud autem in priuatione fructus, & emolumentum quod sperabatur ex impenso labore. Quæ si priuatio fructus dolenda est in bonis temporalibus, quanto magis deploranda in iis bonis quæ sic æternitati

Deut. 28.

Mich. 6.

tati deseruiunt, vt nili adsint vnicuique, quanta esse debent ex suæ vocationis gradu, nulla sit illi speranda æternitas. *Omnis Matth. 7. enim arbor, quæ non facit fructum bonum, excidetur, & in Ignem mittetur.*

Quid verò iuuat facere fructum, si non sit bonus? aut quid confert bonus fructus, si nobis non sit bonus? Nonne est igitur grande malum, cum bona nostra nobis bona non sunt: quandoquidem perinde est ad æternam vitam, ac si nulla essent bona; peius autem & damnosius ad hanc præsentem vitam, quod multum fuerit laboris, impensæ plurimæ, tempus perditum, spes illusæ; *Quoniam deuastatum est triticum, inquit Propheta, Isai. 17. confusum est vinum elanguit oleum, periit messis agri, demolita sunt horrea, dissipata sunt apotheca. Plange hoc malum.*

II. PUNCTVM.

SED propria illa voluntate quæ se non sinit dirigi, sic fit vt bona nostra, nobis bona non sint.

Hæc est scilicet propria voluntas de qua S. Bernardus in illud Canticorum, *qui pascitur inter lilia*; quæ idcirco propria dicitur, quia non erat communis cum Superiore, in iis Religiosis qui plura bona faciebant, suo proprio motu, secus quam ille vellet à quo regebantur, & cui non communicabant quod facerent. Vt autem ostendat eis sua bona non ipsis esse bona, adducit locum Isaia, vbi Iudæi apud Dominum sic conqueruntur, *quare ieiunauimus, & non aspersisti? humiliauimus animas nostras, & ne-* Is. 58. *scisti?* Quibus tum Dominus, *ecce in die ieiunij vestri inuenitur voluntas vestra, & omnes debitores vestros repetitis*; Atque hunc locum prophetæ, S. Pater cum illo componens quem explanabat ex Canticis; *Vereor, inquit, ne inter nos aliqui sint, quorum non acceptet munera sponsus, eò quod non redoleant lilia*; Etenim si in die ieiunij mei inuenitur voluntas mea, non tale ieiunium elegit sponsus; non sapit illi ieiunium meum, quod non lilium obedientiæ, sed vitium propriæ voluntatis sapit. Ego autem non solum de ieiunio, sed & de silentio, de vigiliis, de oratione, de lectione, de opere manuum, postremò de omni obseruatione Monachi, vbi inuenitur voluntas sua in ea, & non obedientia Magistri sui, id ipsum sentio, minime prorsus obseruantias illas, et si bonas in se, tamen inter lilia, id

est inter virtutes censuerim deputandas : sed audiet à Propheta , qui eiusmodi est , numquid tale est obsequium quod elegi , dicit Dominus ? Et addit , in die bonorum tuorum inveniuntur voluntates tue : Grande malum propria voluntas , quâ fit ut bona tua tibi bona non sint : oportet proinde extra lilia fiant , qui huiusmodi sunt , quia nihil omnino , quod propria inquinatum sit voluntate , gustabit Is qui pascitur inter lilia : sapientia est ubique contingens propter munditiam suam , & nihil inquinatum in eam incurrit.

Serm. 19.
in Cant.

Rom. 12.

Reg. 138.

Pf. 74.

1. Cor. 5.

Quæ sancti Patris dicta ex eodem sic confirmantur & declarantur , ubi ait : Sapientia est Deus , vult se amari non solum dulciter , sed & sapienter , unde Apostolus , rationabile , inquit , obsequium nostrum : facillimè Zelo tuo spiritus illudet erroris , si scientiam negligas ; nec habet callidus hostis machinamentum efficacius ad tollendam de corde dilectionem , quàm si efficere possit , ut in ea incaute , & non cum ratione ambuletur . Sic est autem omnis propria voluntas , indiscreta , irrationalis , insipiens , ac proinde Deo minime placens , unde fit tandem ut quæ per eam fiunt bona , bona non sint : quod pridem dixerat S. Basilii in suis regulis brevioribus , prorsus edicens , quidquid fit ex propria voluntatis arbitrio Θεοσβετής & ἀλλότριος , alienum id esse à cultu pietatis . Numquid propterea dictum : Cum accepero tempus , ego iustitias iudicabo ? at nonne hoc tremendum ? Nescitis , quia modicum fermentum , totam massam corrumpit ? Et tota massa corrupta , quid restat sanum ? quid restat sanctum ? quid restat compensandum ? quid restat non plectendum ?

III. PUNCTVM.

GRANDE est igitur malum propria voluntas , quæ se in bono bene faciendo non sinit dirigi ; Cum sic bona nostra , non magis sint nostra , quàm si nulla essent ; sicque bonis omnibus destituti , eò inferiores scimus , quò minus cognoscimus miseriam nostram . Nam si nihil omnino boni egissemus , saltem agnosceremus inopiam , & cum Publicano clamaremus , Deus , propitius esto mihi peccatori . Sed dum multa nos putamus rectè operatos , quæ nec tamen recta , nec bona sunt , Pharizæi fortem incurrimus , cuius bona , diuino iudicio , tam parum probata sunt , quàm multum ipsa suo probabat.

Luc. 18.

Hoc est videlicet, quod regius canebat Psaltes: *Dominus de Ps. 13. Cælo prospexit super filios hominum, ut videat si ex intelligens, aut & 52. requirens Deum. Omne declinauerunt, simul inutiles facti sunt: non est qui faciat bonum, non est usque ad vnum.* Non deerant forte qui ieiunarent, qui orarent, aut qui etiam eleemosynas elargirentur: sed quia nullus erat intelligens aut requirens Deum in illis suis operibus faciendis, id est, non ex ordinatione diuina, non ex Sacerdotis directione, non ex prudenti dictamine illa obibat: sed ex voluntate quadam propria, quâ fiebat, ut qui ieiunabant, orare potius aut eleemosynas facere debuissent; & contrà iis esset ieiunandum qui orabant, aut sua pauperibus erogabant: sic eueniebat ut omnes simul inutiles fierent, & nullus esset qui faceret bonum, bonum scilicet quod ab vnoquoque vellet Deus, licet aliquod fieret bonum quod quisque vellet. Vnde ex Hebræo vertit Bellarminus, *putrefacti sunt*: Hac videlicet sua propria voluntate, quæ quod facit bonum, corrumpit.

Hinc aptè Sapiens, *Multi homines misericordes vocantur, vi. Prom. 29. rum autem fidelem quis inueniet?* Quasi diceret, sat multi sunt, qui aliqua misericordiæ opera exercent, & hi vulgò vocantur misericordes: sed non sunt coram Deo, nili sint fideles: id est nisi sua illa misericordiæ opera faciant ex fidelitate quâ debent respondere gratiis, & donis acceptis in sua vacatione, adeò ut tot tantaque faciant, quanta ab eis exigit Deus: hoc est enim esse fidelem, tam fideliter sibi data expendere, quantum ille velit qui expendenda dedit. Sed talem virum quis inueniet? Rarus est & penè nullus, quia nullus se vult dirigi, & dum suo quis potiùs, quàm Directoris consilio regitur, magis spectat quid velit, quàm quod Deus: sicque fidelitatem illam non assequitur, quæ in vna Dei voluntate peragenda consistit.

Vide quantum in his deficias, & prospice. *Numquid vult i. Reg. 15. Dominus holocausta & victimas, & non potiùs ut obediatur voci Domini?* Pro eo ergo quod abiecisti sermonem Domini, abiecit te Dominus, id est, abiecit & reculauit opera tua. Durum certe, sic abiecta opera tua! Sed quanto durius sic abiectum sermonem Domini.



FERIA SEXTA.
DE SINCERITATE, QUA REQUIRI
DEBET SACERDOS, AD PARTICIPANDA
EIVS SACRIFICIA.

SIVE AD QUIDVIS ALIUD CUM IPSO
COMMUNICANDUM.

Rogabitque pro eo, coram Domino, & faciet sacrificium pro peccato. Leuit. 14.

VERITAS PRACTICA.

Væ duplici corde. Ecclesi. 2.

SENSVS & RATIO est, quia vae homini illi qui fîctè & dissimulatè cum Deo agit.

Sed qui duplex est corde cum Directore, sic fîctè & dissimulatè agit cum Deo.

Ergo vae duplici corde; Ac proinde hic maximè procurandum est quod ait Apostolus; In simplicitate cordis, & sinceritate Dei, & non in sapientia carnali.

2. Cor. 1.

I. PUNCTVM.

NICET Leprosi pro se orarent, & munera sacrificanda offerrent, non id tamen sufficiebat illis mundandis: sed præterea Sacerdos pro ipsis rogabat Dominum, & faciebat Sacrificium quod fusè describitur Leuitici decimo quarto. Sic planè nobis parum est, aut certè minus esse putandum est, quidquid egerimus, nisi Sacerdos potentissimo ille sacrificio

quod quotidie in Ecclesia immolatur, nos adiuuet, & nisi propterea illum adeamus & requiramus, ad peculiarem eius sacrificiorum participationem nobis conciliandam: sicut quondam amicis Iob dictum est ab ipso Domino: *Ite ad seruum meum Iob,* ^{Iob. 40.} *& offerre holocaustum pro vobis. Iob autem seruus meus orabit pro vobis: faciem eius suscipiam, & non imputabitur vobis stultitia.* Sic nobis dictum putemus, si perfectè satisfactum Deo volumus.

Hoc videlicet est quod satis liberè & frequenter facimus, cum nos eorum precibus, & sanctissimis Sacrificiis commendamus: nihil frequentius, nihil vulgarius; sed vtrum id in simplicitate cordis, & sinceritate Dei dicatur, tu de te videris. Certè periculum est, ne id potius assentatoriè, vel solitæ vrbauitatis gratiâ vsurpetur, quàm ex ea sinceritate animi, quâ procedendum esset. Itâne reuera sentis te illius Sacrificiis indigere, cui te vis commendatum, vt qui te ipso parum possis, parum tibi proffis: & nisi eius saluari præsidio adiuueris, te minus idoneum & sufficientem esse, qui diuinum tibi Numen propities? Hæc est illa simplicitas cordis, & sinceritas Dei, quâ non modo roganda essent sacerdotis merita, & Sacrificia, sed quidquid vniuersim cum eo agitur de negotio salutis & animæ, sic sincerè communicandum esset.

Verùm, vt dixi, multum in hac parte deficiamus, & tam longè absumus ab illa simplicitate & sinceritate mentis, quàm longè abest à simplicitate, duplicitas cordis. *Sed væ duplici corde,* ait sapiens, *& labiis scelestis & peccatori terram ingredienti* ^{Ecclesi. 2.} *duabus viis.*

Hoc modò est expendendum diligentius, sic discurrendo. Dubitari non potest, quin sit væ homini illi, qui fiètè & simulatè cum Deo agit. Nam vel existimat id Deum nosse, vel ignorare: si putat Deum nosse, vt certè nouit omnium corda, nonne est apertè illum irridere, sic velle dissimulatè cum eo agere? Nonne est illud *cor prauum*, quod dicitur, *abominabile* ^{Prov. 11.} *Domino?* Quod si putat Deum ignorare, & sese ab eo quodammodo posse abscondere, quid iniuriosius Deo? quid diuinæ Scientiæ & Sapientiæ magis oppositum? *Væ qui profundi estis corde,* ^{Is. 29.} *vt à Domino abscondatis consilium!* Id est, vt putetis posse abscondi. Atque hanc ipse Deus inter alias rationem reddit, cur illos præcipuè puniat, qui se putant Deum celare sua consilia;

Apoc. 2. Vt sciant, inquit, omnes ecclesia, quia ego sum scrutans renes, & corda, & dabo unicuique vestrum secundum opera sua. Foelices qui sapere possunt, alienis damnis: Infoelix ille cuius poena proponitur ad exemplum & terrorem. Scio Deus meus quod probes corda, & simplicitatem diligas; Vide an possis hoc Deo sincere cum Dauide dicere.

1. Par. 29.

II. PVNCTVM.

SED duplex corde cum Directore, sic fictè & dissimulatè cum Deo agit. Nam duplicem esse corde, perinde est ac fictè, & dissimulatè cum Deo agere. *Iac. 4.* Purificate corda, duplices animo, licet verò immediatè cum Deo non is agat, qui fictè & dupliciter cum aliquo agit, sic tamen cum Deo agere dicendus est, quatenus non ignorat à Deo veritatem, & puniendam quamlibet duplicitem: non ignorat sibi propterea rationem Deo reddendam, non ignorat quod dicit sapiens, *Prou. 3.* Abominatio Domini est omnis illusor, siue sit illusor Dei, siue hominum, abominatio Domini est. Quod certè hic eò verius censeretur debet, quò illa duplicitas agitur in negotio salutis, quod est negotium Dei, & cum Sacerdote agitur, qui Deum magis repræsentat quàm quis alius. *Iur. 5.* Vndè id certiùs dici possit quod est in actis Apostolorum, non es mentitus hominibus, sed Deo.

Hoc autem potissimum accidit, cum vel excusantur peccata, vel prætenduntur excusationes, cur aliquid non fiat: vel cum ita proponitur aliquod dubium, ut cogas quodammodo Directorem respondere ad tuam mentem, dissimulando aliqua quæ si sincerè diceres, aliter responderet; *Ibid. 15.* O plene omni dolo & omni fallacia! *Ier. 9.* DOCEVERUNT linguam suam loqui mendacium, inquit Propheta, ut iniquè agerent, laborauerunt. Quod sic declarat *3. p. Pass. Adm. 12.* S. Gregorius. Qui amici esse veritatis potuerunt sine labore, ut peccent, laborant: cumque viuere simpliciter renuunt, laboribus exigunt, ut moriantur. Nam plerumque in culpa deprehensi, dum quales sint cognosci refugiunt, sese sub fallacia velamine abscondunt, & hoc quod peccant, quodque iam apertè cernitur, excusare moliantur: ita ut, sæpè is qui eorum culpas corripere studet, aspersa falsitatis nebulis seductus, penè amissè se videat quod de eis iam certum tenebat; unde rectè sub Iudæ specie per prophetam, contra peccantem

Is. 34.

animam excusantemque se, dicitur: ibi habuit foueam hericius. Hericij quippe nomine, impura mentis seseque callidè defendentis duplicitas designatur, quia videlicet hericius dum apprehenditur, & caput eius cernitur, & pedes videntur, & corpus omne conspicitur: sed mox ut apprehensus fuerit, semetipsum in spheram colligit, & pedes introrsus subtrahit, caput abscondit, & intra tenentis manus totus simul amittitur, qui totus simul ante videbatur. Sic nimirum sic impurae mentes sunt, cum in suis excessibus comprehenduntur.

Videri possunt, quæ plura hic habet S. Doctor, & iis non modò conueniunt, qui se excusant in peccatis iam perpetratis, sed iis etiam qui ne peccare deinceps videantur, excusant falsò aliqua, vel, ut dixi, dissimulatè proponunt dubia, & supponunt incerta vel falsa; Filij sunt illi mendaces de quibus Propheta, filij nolentes audire legem Dei, qui dicunt videntibus, nolite videre: & aspicientibus, nolite aspicere nobis ea quæ recta sunt. Loquimini ^{Is. 30.} nobis placentia, videte nobis errores; Auferte à me viam, declinate à me semitam, cesset à facie nostra sanctus Israel.

Tu sic fortè non loqueris, nec propterea tibi hæc conuenire credes: sed putasne esse aliquos, qui sic apertè loquantur? Vix est ullus tam vecors & impius. At vero cum multi sint, qui id corde sentiant, & de quibus alibi dicitur, labia dolosa in corde, & corde loquuti sunt: Tibi magis timendum est, ne ex his ^{Ps. 11.} forte sis, quàm præsumendum audacius, te ex illis vnum non esse. Sapiens quodcumque audierit, ad se adjiciet.

Ecclesi. 21.

III. PUNCTVM.

VÆ igitur duplici corde, sicut væ homini illi qui sic fide & dissimulat cum Deo agit. Nam ut habet Sapiens, Spiritus sanctus disciplinæ effugiet fictum. Hoc est, seminare mala in sulcis ^{Sap. 1.} iniustitia, quod verat Ecclesiasticus, ne metas ea in septuplum. ^{Ecclesi. 7.} Nam vel additur hæc duplicitas peccato ut excusetur, vel isti duplicitati adiungitur quædam gloriatio & palpatio mentis, quasi cautè & prudenter egeris, sic animum obtegendo: vel denique se aliis etiam prudentiores & cautiores credunt; vnde est illud S. Gregorij. Speciale est duplicium malum, quia dum perversa & ^{3. p. Past. Adm. 12.} duplici actione ceteros fallunt, quasi præstantius ceteris prudentes se esse gloriantur; & quia distractionem retributionis non considerant.

Soph. 1. de damnis suis miseri exultant: audiant autem quomodo super illos propheta Sophonias, vim diuinæ animaduersionis intendat, dicens: ecce dies Domini venit magnus, & horribilis dies illa, dies ira, dies tenebrarum & caliginis, dies nebula, & turbinis, dies tuba & clangoris, super omnes ciuitates munitas, & super omnes angulos excelsos. Quid enim per ciuitates munitas exprimitur, nisi suspectæ mentes, & fallaci semper defensione circumdata, quæ quoties earum culpa corripitur, veritatis ad se iacula non admittunt? Et quid per excelsos angulos, nisi duplicitas impuræ mentis intelligitur? duplex quippe semper est in angulis paries. Quid per angulos parietis nisi impura corda signantur? quæ dum veritatis simplicitatem fugiunt, ad semeptipsa quodammodo duplicitatis perversitate replicantur. Et quod est deterius, apud cogitationes suas in fastu prudentia, ex ipsa se culpa impuritatis extollunt. Dies igitur Domini. Et quæ plura il-

Iob. 19. lic habet, necnon in moralibus ad hæc verba Iob, *Ruga mea testimonium dicunt contra me.* Quid per rugas nisi duplicitas? Ruge sunt omnes Ecclesia, qui in ea dupliciter viuunt, has rugas in electis suis Ecclesia non habet, quia nescit aliud de se foris ostendere, Ephes. 5. & aliud intus habere, unde Apostolus vocat Ecclesiam non habentem maculam aut rugam.

Ne putes hæc temerè seu gratis dici, res enim grauior & verior est, quàm fortè sentias. Cogita quantum abhorreret ab eo quem scires tecum fictè & simulatè agere, à quo scires te decipi; Quàm iniquus ille esset Sacerdos, quàm impius qui tecum dolosè procederet! Tu vero si teipsum perdis, simulatè cum illo agens, an putas leuius esse crimen? an putas te minus perditum? Itane cum Medico de corporis valetudine ageres? Itane de re ciuili & temporalì cum homine confers, à quo res pendet, à quo consilium expectas vel iudicium? Nonne seriò, nonne ex animo, nonne omni prorsus modo rem tractas, quo foelicius successuram putas? Iam verò in animi tui negotio, in æternitatis causa, in re omnium negotiosissima, tu quasi joco ludes, aut quasi ludus esset, sic Sacerdotem illudere, sic te à teipso illudi? O insensate quis te fascinauit?

Gal. 3.

Ecclesi. 1. Audi hoc postremum Sapientis monitum; Ne sis incredibilis timori Domini: & ne accefferis ad illum duplici corde: ne fueris hypocrita in conspectu hominum, & non scandalizeris in labiis tuis: attende in illis ne forte cadas, & adducas animæ tuæ inhonorationem, & reuelet

& reuelet Deus absconsa tua, & in medio Synagoga elidat te, quoniam accessisti malignè ad Dominum, & cor tuum plenum est dolo, & fallacia.



S A B B A T O.

DE CONVENIENDO SACERDOTE

PRO DEBITO VSV SACRÆ COMMVNIONIS.

Immolabit agnum, ubi solet immolari hostia pro peccato, assumensque Sacerdos de sanguine hostia, qua immolata est pro delicto, ponet super extremum auriculae dextrae eius qui mundatur, & super pollices manus dextrae & pedis. Leuit. 14.

VERITAS PRACTICA.


Suam ille vestem nuptialem recusat induere, qui recusat instrui de debito Sacramenti usu.

RATIO EST, Quia suam ille vestem nuptialem recusat induere, qui recusat afferre debitam, & conuenientem sibi dispositionem ad perfectè communicandum.

Sed qui recusat instrui de debito sacramenti usu, recusat afferre lam debitam & conuenientem dispositionem.

Ergo & vestem suam nuptialem recusat induere: Quod est valde cauendum.

I. P V N C T V M.

 *UOD fiebat exterius in leprosi corpore, quando agni pro eo immolati sanguine certis in partibus tangebatur a Sacerdote, hoc longè modò nobilius & excellentius*

in animis nostris peragitur, quando ipso immaculato pascimur Agno, qui pro nobis in altari offertur. Hæc itaque manifesta fuit sacrae Communionis figura, quæ ut perfectè à nobis compleatur, non modò à Sacerdote recipimus Sacramentum, sed debitum etiam recipiendi Sacramenti usum ac convenientem unicuique modum ab eodem exquirimus. Quod quidem ita expedit à nobis fieri, ut quanti refert suam afferre vestem nuptialem ad regiam illam coenam, tanti videatur nostra interesse, plenè instrui de conveniente modo perfectè communicandi: *Suam ille alioquin vestem nuptialem recusat induere, qui recusat instrui de debito sacramenti usu.*

Ratio quæ affertur est facilis, si semel intelligatur quod præsupponit, nempe per vestem illam nuptialem de qua est mentio *Math. 22.* in Evangelica parabola, designari convenientem unicuique dispositionem ad perfectè communicandum. Sicut enim apud Iudæos non modo erat certum quoddam vestimenti genus exquisitum, quod omnes Conuiuæ tenebantur induere, sed illius vestimenti tantà erat varietas, quanta necesse erat, ut pro diuersa ætate & statura, suam vnusquisque posset vestem induere. Sic planè, ad sacrum Conuiuium non modò est quædam dispositio generalis, seu generatim necessaria omnibus, quæ in Caritate illa consistit quæ excludit omne peccatum mortale: Sed est præterea quædam particularis unicuique, non ita fortè semper & absolutè necessaria, sed tamen valde conueniens, & non tantum ad decentiam, sed ad participandum vberiore fructum ita quoque necessaria, ut sine hac, priueris illa gratiarum specie seu abundantia, quam recepisses. Atque hæc est particularis dispositio quam propriè designabat vestis nuptialis: quia ut dicebam, sicut hæc vestis commensurari debebat ætati & staturæ personarum, sic illa dispositio vocationi, statui & aliis circumstantiis debet respondere, de quibus puncto sequenti.

Hinc itaque facilis est intelligentia primæ propositionis, quæ dicitur suam ille vestem nuptialem recusare, qui recusat afferre convenientem sibi dispositionem ad perfectè communicandum: nam cum illa certa vestis nihil aliud adumbret quam particularem hanc dispositionem, nonne vnum infertur ex alio tam perspicuè, quam perspicuum est vnum in alio contineri, seu vnum & idem esse? O quanta iam inde apparet necessitas

Suam vestem nuptialem recusat qui recusat instrui, &c. 331
dispositionis huius afferendæ ! Quis sine veste nuptiali auderet
accedere ? Quis non timeret hæc audire ; *Amice quomodo huc in-*
trasti, non habens vestem nuptialem ? Quis non saltem erubescere-
ret sine sua propria & conuenienti veste ? *Non appareat confu-* Apoc. 3.
sio nuditatis tuæ.

II. PUNCTVM.

SED qui recusat instrui de debito Sacramenti usu, recusat afferre
illam particularem & conuenientem dispositionem.

Non est hic aliud debitus Sacramenti usus, quam particu-
laris vniuscuiusque dispositio, nam in hac particulari disposi-
tione afferenda consistit debitus sacramenti usus ; superest ita-
que declarandum, ita opus esse Instructione, & Instructore ad
hanc perdiscendam dispositionem, vt qui recuset instrui, recu-
set se disponere. Sic autem declaratur : Opus est instrui ab alio
si per te tutò, non possis id intelligere & satis capere : Nonne id
planum ? Atqui per te non potes id tuto & commode capere.
Hoc enim situm est in intima tui cognitione, ad quam perscru-
tandam non es satis idoneus, vt supra ex Sapiente visum est,
Ne dicas, sufficiens mihi sum, nam cum inordinatis non modò *Ecclesi. 11.*
agitemur affectibus, quæ claram nostri cognitionem obnubi-
lant, sed variis etiam moueamur spiritibus, qui nos à vero di-
gnoscedo, & recto tenendo tramite non parum turbent : opus
est planè homine qui Dono Discretionis spirituum internoscatur
bonum à malo, falsum à vero, spirituale & diuinum ab huma-
no & diabolico ; *Nolite omni spiritui credere,* inquit S. Ioannes, *1. Ioan. 4.*
sed probate spiritus si ex Deo sint.

Sicut enim pro frequentia Communionis nemo sibi tutò cre-
dat, sed standum est iudicio Sacerdotis, qui pro diuersitate
Personarum : seu Conditionum & statuum iudicet de vnoquo-
que in particulari, sic omnino de modo & usu Communican-
di. Nam aliud debet esse Incipientium modus, aliud Proficien-
tium, & aliud Perfectorum. Alius est Puerorum, aliud Iuue-
num, & aliud ætate prouectorum. Aliter accedendum tempore
tribulationis, & aliter tempore consolationis. Tam varij deni-
que possunt esse modi, quàm variæ sunt personæ ; Imò, & quàm
diuersi sunt eiusdem personæ status, in quibus omnibus modis,

& ſtatibus dignoſcendis, quia poteſt errari, ſicut in frequenti vſu, niſi diſcretione ſpirituum, & directione caueatur: idcirco nō minus quis inſtrui debet de illo modo, quā de frequentia: & qui recuſat inſtrui, recuſat afferre conuenientem ſibi diſpoſitionem, quæ in illo certo conſiſtit modo. *Hæc tibi ſcribo*, inquit
 1. Tim. 3. *Apoſtolus, vt ſcias quomodo oporteat te in domo Dei conuerſari, qua eſt Eccleſia Dei vini.*

Quot enim ſunt qui ſe ſemper incipere putant, & in via purgatiua jacentes, nihil niſi de peccatis ſoliciti, hoc vnum communicando, cogitant; cū in Charitatis, aliarumque Virtutum actibus ſe exercere deberent? Quā multi contrā citius euolant, & altiùs quā oporteret; cūque ſuis nondum ſint exuti affectibus, Deo adhærere geſtiunt, & vnitiuam perfectorum viam incedere: vnde tam multi lapſus & caſus, de quibus paſſim ſancti Patres. Tu illud ex libello de Imitatione Chriſti reuolue:
 L. 3. c. 7. *Quidam incauti propter deuotionis gratiam ſciſſos, deſtruxerunt, quia plus agere voluerunt, quā potuerunt, non penſantes ſua paritatis menſuram, ſed magis cordis affectum ſequentes, quā rationis iudicium. Et poſt pauca, qui adhuc noui ſunt, & imperiti in via Domini, niſi conſilio diſcretorum ſe regant, faciliter decipi poſſunt & elidi: Quod ſi ſuum ſentire magis ſequi, quā aliis exercitatis credere volunt, erit eis periculoſus exitus, ſi tamen retrahi à proprio conceptu non valuerint; Raro ſibi ipsis ſapientes ab aliis regi humiliter patiuntur.*

Hæc diuinus ille Author ad verbum, ex quibus planè intelligas, quā vera ſit Propoſitio de recuſante ſe inſtrui, & cū non aliter multi recuſent, quā quia ſibi ipsis ſapientes videntur, vide quā ſit timenda talis præſumptio; & quā vere Propheta, *Va qui ſapientes eſtis in oculis veſtris, & coram vobismetiſis prudentes!*
 1ſ. 5.

III. PUNCTVM.

SVAM igitur ille veſtem nuptialem recuſat induere, qui recuſat inſtrui de debito ſacramenti vſu; Nam cū illa veſtis nuptialis non in genere ſumpta, ſed in ſua ſpecie, & certā quādam menſurā, nihil ſit aliud quā proportionata vnicuique diſpoſitio, quæ requiritur ad perfectiorem ſacramenti vſum, &

quæ à Sacerdote, non à nobis est addiscenda, nisi errare velimus in re tanti momenti; quid sequitur nisi quod propositâ Veritate continetur? Cuius rara quidem est praxis, quia rari sunt, vt dictum est, qui sibi nimis non sapiant, & qui se putent egere alieno consilio: sed non propterea desinit esse Veritas, cuius consideratio multum certè valere potest ad hanc præsumptionem comprimendam, & ad coueniendum Sacerdotem de re tam vtili & necessaria.

Hi sunt paruuli & insipientes, quos ex omnibus inuitat ad se *Prou. 9.* Sapia; *Si quis est paruulus veniat ad me: & insipientibus locuta est; venite, comedite panem meum, & bibite vinum quod miscui vobis.* Hi sunt inter amicos charissimi qui inebriantur; *Comedi-* *Cant. 5.* *te, inquit, amici, & bibite: & inebriamini charissimi,* id est replemini tantâ gratiarum abundantia, vt non iam homines, non ratione humana moueamini: sed toti cœlestes, & diuini euadatis. Hoc est enim singulare beneficium sacræ Communionis, ad quam acceditur cum veste nuptiali, id est cum sibi conueniente dispositione: ita replet animum diuinis infusionibus, vt totus absorptus & inebriatus sentiatur. Amici quidem sunt qui in caritate communicant, & hi quidem comedunt & bibunt; sed qui ad caritatem addunt puriorem illum & perfectiorem modum, qui suo statui, & præsentî gratiæ conuenit, hi sunt charissimi, & præter communem Communionis fructum, tam multos alios referunt, vt vnâ communionē plus aliquando proficiant, quam alij pluribus.

O dulcissimè Domine Iesu quanta est dulcedo deuota anima tecum epulantis in conuiuio tuo. Vide libri quarti de Imitatione Christi caput vndecimum; & sic deplora tot gratiarum iacturas quas fecisti, vt ad eas reparandas nouo accendaris desiderio non aliter deinceps communicandi, quàm cum debita, & conuenienti dispositione animi, quantum cùm diuina gratia, & Directoris operâ procurare possis. *Dilata os tuum & implebit illud.* *Ps. 80.*

Vide Verbo *Communio, Eucharistia* præsertim in 3. parte.



DOMINICA IV.
POST EPIPHANIAM,
NISI SIT SEPTVAGESIMA.

DE SEDATA MARIS TEMPESTATE
IMPERIO CHRISTI.

Quid timidi estis, modicæ fidei? Matth. 8.

VERITAS PRACTICA.

Non quia mala sunt, perturbamur, in aduersis: sed
quia perturbamur, aduersa mala sunt.

RATIO EST, Quia totum aduersitatis malum, in malo est
eius usu.

Sed malus aduersitatis usus ex perturbatione potius provenit,
quàm ex malo usu, perturbatio.

Ergo non quia mala sunt, perturbamur, in aduersis: sed quia per-
turbamur, aduersa mala sunt: ac proinde magis cauendum est
perturbari in aduersis, quàm ipsa quauis subire aduersa.

I. PUNCTVM.



ASCENDENTE Iesu in nauiculam secuti sunt discipuli eius: & ecce motus magnus factus est in mari, ita ut nauicula operiretur fluctibus, ipse vero dormiebat. Et accesserunt ad eum Discipuli eius, & suscitauerunt eum, dicentes; Domine, salua nos, perimus. Et dicit eis Iesus, Quid timidi estis, modica fidei? Tunc surgens imperauit ventis & mari; & facta est tranquillitas magna. Porro homines mirati sunt dicentes, qualis est hic, quia venti, & mare obediunt ei?

Hæc hodierni Euangelij verba quæ alibi rursus considerantur sic reuolue; vt animaduertas primo, quantæ molestiarum, moles, quanti calamitatum fluctus, & procellæ nos agitent in hac vita. Deinde quàm parum constantes in his simus, licet non ignoremus nihil nisi Deo volente nobis accidere, nihilque eo præsentis & adiuuante posse obesse, si velimus, *boni emulatores esse*, sicut ait S. Petrus, id est bene vri occasione. Denique nostram animi perturbationem & impatientiam in aduersis, maius esse malum, quàm ipsa quæuis aduersa; Nam nisi perturbaremur, mala non essent; quidquid enim dicamus ad excusandas perturbationes nostras, quidquid contra sentiamus, certa est Veritas, & digna quæ sæpe recolatur, *Non quia mala sunt perturbamur in aduersis: sed quia perturbamur, aduersa mala sunt.* In 3. parte.

Ratio quæ proponitur, continet vniuersale illud principium, de quo fufius in alijs Veritatibus explanandis; Quod scilicet in creatis rebus nihil boni vel mali propriè dicendum sit, nisi bonus vel malus earum vsus: Non prosperitas, non diuitiæ, non deliciæ, non humana gloria, non quæuis alia huius vitæ comoda, verè bona sunt, nisi benè iis vtaris: sic neque paupertas, nec calumniæ, neque morbi, iacturæ aut alia quæcunque aduersa incident, censenda mala sunt, nisi tu, malè vtendo, mala facias. *Hæc omnia sanctis in bona, inquit Sapiens, sic & impijs* Ecclesiæ. 39. *& peccatoribus in mala cōuertentur.*

Vnum est verè bonum, Deus, & æterna Beatitudo, cui possidendæ creati sumus; cætera super terram sita, tam verè bona vel mala sunt, quàm nos verè ad illum nostram finem ducunt,

vel inde abducunt.

- Gen. 2. Hinc illa fatalis arbor dicta est *scientia boni & mali*, quod per eius usum primus homo didicisset, quid boni vel mali esset in rebus, prout videlicet bene vel malè homines vterentur ad finem suum. Quid sacratius illo sacro Pane quem Iudas proditor accepit à Christo Domino? Et tamen cum illum accepisset, tum
- Ioan. 13. inimicus in eum intrauit, *Non quia malum accepit*, inquit sanctus Augustinus, *sed quia bonum malè, malus accepit. NON res calumniemur*, aiebat crebrò S. Chrysostomus, *sed nos, & nostrum torporem; Neque dicamus, non sint mulieres, non sit vinum, pecunia: sed ne sit crapula, ne sit fornicatio; Non venter crapulam facit, sed negligentia: non comedit & bibit Diabolus, & cecidit; comedit & bibit Paulus, & in cælum: ascendit omnia sunt ad virtutem arma: vide Iob in diuitiis & paupertate; Et quæ fuliùs pergit; Breuius autem Apostolus, omnia munda mundis, coinquinatis autem nihil est mundum, sed inquinatae sunt eorum mens, & conscientia.*
- Tit. 1. Atque ut vno ictu oculi videas, quod longiori discursu explicari non potest; intuere cælum, & cum Ioanne Apostolo, cerne Beatos omnes ut palmas in manibus habent; quamobrem putas? nisi quia dum viuerent pugnarunt cum aduersis rebus, vicerunt & triumphant. At vero in infernum retorque oculos, & infortunatos illos vide, qui gemunt se *lassatos in via iniquitatis & perditionis, nec non ambulasse vias difficiles*, Id est, non minùs esse passos, quàm illos qui palmas habent; cur ergo hi non triumphant sicut illi? quia videlicet non sic vicerunt, non sic pugnarunt, non eodem modo aduersis vsi sunt, ac proinde quæ res aduersa vni homini gradus fuit in cælum, fuit alteri præcipitium & casus in exitium sempiternum. Adeo id verum est totum aduersitatis malum in malo eius esse usu.
- Apoc. 7. Sap. 5. Ibid.

O quantam iniuriam rebus infers, & rerum Creatori, cum de illis conquereris, quasi malæ essent & peruersæ! Quam verè potiùs de te quererentur, quod cum bonæ essent, tu male aut perperam eas vsurpando, malas fecisti; *Armabit idcirco Deus creaturam ad ultionem inimicorum.*

II. P V N C T V M.

SED malus aduersitatis, usus ex perturbatione potiùs prouenit, quàm ex malo usu, perturbatio.

Posses

Posses quidem dolere & angere quòd malè rebus utaris, atque in illo dolore non nihil perturbari: sed de hac perturbatione non agitur, quæ rara est, & quæ facile componi potest. Alia est frequentissima, quæ statim atque sentitur aut apparet aduersitas, ita commouemur & perturbamur, ut ex illa perturbatione animus in impatientiam, in murmura, in clamores, & alios inordinatos motus efferatur, unde est ille malus aduersitatis usus, de quo hic loquimur. *Quid perdis animam tuam in furore tuo?* Responde- *Iob. 18.* bis fortè quod idcirco perturberis, quia mala illa sunt quæ occurrunt, quæque aduersantur: neque aliter perturbationem concitari, quàm ex apprehensione mali, quod naturali motu timeamus, odimus, fugimus & auersamur. Sed contrà, non propterea, res mala est, quòd eam ita mente apprehendas, sapissime enim fallitur talis apprehensio, & illudit nobis: unde & timor nocturnus dicitur, *Non timebis à timore nocturno.* Id est, ut *Ps. 90.* interpretatur Cardinalis Bellarminus ex sancto Ioanne Chrysostomo, *In nocte aduersitatis non timebis ab his rebus quæ non laedunt si non timeantur: talia sunt detractiones, conuitia, contumelia quæ nocent illi à quo dicuntur, non illi in quem dicuntur, nisi ipse timendo, & eas magnificiendo, seipsum laedat.*

Deinde, esto sint mala sensibus, sit res mala naturæ corruptæ & præsentis quam agimus vitæ; si tamen prosit Deo colendo, si ad æternam iuuat beatitudinem, si fini nostro assequendo confert; an vocabis illud malum? An dicenda est mala medicina, quæ licet amara sit, sanitatem affert? An ille labor malus, quo diuitiæ comparantur? An omnia denique mala quæ sunt dura & aspera, sine quibus tamen bona alia non proueniunt? *Sic Heb. 12.* *omnis disciplina, inquit Apostolus, in presenti quidem videtur non esse gaudij, sed mæroris: postea autem fructum pacatissimum exercitatis per eam reddet Iustitiæ: propter quod remissas manus, & soluta genua erigite, & gressus rectos facite pedibus vestris, ut non claudicans quis erret, magis autem sanetur.* Quasi diceret, non est iudicium de re ferendum ex sensu, sed ex fructu quem confert ad finem nostrum; ac proinde licet res illa videatur mala sensui, proptereaque conturbemur, non est tamen reuera mala, antequam conturberis, quia nisi conturbatus esses, poterat valde tibi prodesse: cum verò te finis perturbari, & perturbatus murmuras, ac murmurando peccas, tum verè mala res illa sit; quia

hoc est verè malum, murmurare & peccare. Scito & vide quia malum & amarum est, reliquisse te Dominum Deum tuum, & non esse timorem mei, apud te, dicit Dominus.

Jer. 2.

III. PUNCTVM.

NON ergo quia mala sunt, perturbamur in aduersis: sed quia perturbamur, aduersa mala sunt. Non enim verè mala sunt, nisi quando his malè utimur, non malè utimur nisi perturbati. Nam tum amaræ voces, iræ, murmura, rixæ, blasphemix, & similia, quæ longè nos à vero bono, & nostro fine reuocant; ac proinde tam verè mala sunt, quàm bona esse poterant, si benè vti essemus: quod facile fieri poterat, si animo quieto & sedato, calicem à Domini manu accepisses. Quid enim ab illà manu potest non esse bonum? Percutit & manus eius sanabunt, quasi diceretur, si Deus vnā habet manum ut percutiat, duas habet ut sanet, id est duplicat bonum ex aduersis. Nam sic præterita eluuntur peccata; & futura præcauentur.

Job. 5.

Jer. 31.

Sic erudire castigatus, caue perturberis. Ne fomides à facie eorum, Non turbetur cor tuum neque formidet. Disce ex cunctis occurrentibus semper proficere, & benè omnibus uti. Audi Philosophum de suo Sapiente sic differentem. Sapienti non nocetur à paupertate, non à dolore, non ab aliis tempestatibus vita. Ipse semper in actu est, in effectū tunc maximus, cum illi se fortuna opposuit; Ad utrosque casus aptus est; Bonorum Rector est, malorum Victor. Sic se exercuit, ut virtutem tam in secundis quàm in aduersis exhiberet: nec materiam eius, sed ipsam intueretur. Itaque nec paupertas illum, nec dolor, nec quidquid aliud imperitos auertit, & præcipites agit, prohibet. Tu illum premi putas malis, utitur. Non ex ebore, tantum Phidias sciebat facere simulachra, faciebat ex ære: si marmor illi, si adhuc viliorē materiam obtulisses, fecisset quale ex illa fieri optimum, posset; Sic Sapiens virtutem, si licebit, in diuitiis explicabit, si minus in paupertate. Si poterit, in patria: si minus, in exilio: si poterit, imperator: si minus, miles: si poterit, integer: si minus, debilis: quamcumque fortunam acceperit, aliquid ex illa memorabile efficiet. Certi sunt domitores ferarum, qui sanis-

Ioan. 14.

Ep. 86.

Non quia mala sunt, perturbamur : sed quia pert. &c. 339

fama animalia, & ad occursum exterrentia hominem, cogant pati sub iugum, nec asperitatem excussisse contenti, usque in contubernium mitigant: Leonibus Magister manum insertat, osculatur Tigrim suus Custos, & Elephantem Aethiops iubet subsidere in genua, ambulare per funem. Sic Sapiens est artifex domandi mali: dolor, egestas, ignominia, carcer, exilium, ubique horrenda, cum ad hunc peruenire, mansueta sunt.

Quid hic dices Christiane, quid Religiosè perterrite in aduersis? Esto hæc fortè facilius scribatur de Stoico, quàm ab eo fiant; vides tamen quid ratio suadeat faciendum. At vero si rationi adiungas fidem & religionem, si diuinæ auxilia gratiæ, si sacrarum Monita scripturarum, si probata sanctorum exempla, si sexcenta quæ habemus à Christo motiua sic agendi, quid excusabis? Quid prætendes? Quid contrà oppones? *Quacumque lex loquitur*, inquit Apostolus, *iis qui in legè sunt loquitur, ut omne os* Rom. 3. *obstruatur.* Quantò sunt scilicet ad agendum & patiendum plura motiua, tantò minus est excusandi sui suffugium.

Vide in secunda parte totam Hebdomadam, infra Sexagesimam, & præcipue Feria 3. vbi hæc habetur veritas: *Quod Christus semel suis, hoc in omni semper casu tibi dicit, Non turbetur cor tuum.* Et in 3. parte Feria quarta: *Res aduersa non possent quemquam deicere, nisi se his prius vellet subicere.*

IN EADEM DOMINICA.

Domine, salua nos, perimus. Matth. 8.

VERITAS PRACTICA.

Peregrinantis in corpore animæ maius est periculum, quàm periclitantis in naui corporis.

RATIO EST, Quia ex duobus æquè periclitantibus, maius est illius periculum, cui minus attenditur, minus cauetur, minusque prospicitur.

Sed tale est animæ peregrinantis in corpore periculum: non minus

est periculum quàm corporis in naui periclitantis : & minus ei tamen attenditur & cauetur.

Ergo peregrinantis in corpore animæ maius est periculum, quàm periclitantis in naui corporis. Quod certe est diligenter attendendum, ut intelligamus quam fit nobis continuo inclamandum, DOMINE, SALVA NOS, PERIMVS.

I. P V N C T V M.

PRIMA propositio per se patet, aut si quid fusius pertractandum videretur, attingi posset quanta in mari occurrant pericula & incommoda, nempe ab ipso elemento quod per se ita æstuosum est, ut se vix vniquam contineat. Deinde à ventis vnde quaque flantibus & reslantibus : à tempestate, à malatia, à piratis, ab hostibus, à diuturnitate itineris, à molestia mansionis, victus, conuietus & sexcentarum huiusmodi difficultatum, unde Sapiens, *qui nauigant mare, enarrant pericula eius.* Antequam verò se illis exponant periculis, sic sibi ab omnibus necessariis prospiciunt, ut qui sibi non ita prospicerent, vel dum instant pericula non cauerent, vel non contenderent, nec contrà obniterentur, certissimæ se ruinæ darent : ac proinde nulla videtur restare difficultas intelligendi quod ex duobus qui mare nauigant & in nauigio simul ex æquo periclitentur, maius & certius sit illis periculum cui minus attenditur, minus prospicitur, & cauetur. *Diuisum est cor eorum, nunc interibunt.* O quantis est cor diuisum suo in spiritali negotio ! quantis o quantis imminet talis interitus !

II. P V N C T V M.

SED tale est anima peregrinantis in corpore periculum : non minus periclitatur quam corpus in naui, minus tamen ei attenditur & cauetur.

Primo quidem quanta sit humanæ vitæ & nauigationis similitudo, per se patet, & frequenter repetitur in Scripturis & Patribus. *Tamquam naus quæ pertransit fluctuantem aquam, QVASI naues poma portantes*, id est velocissime decurrentes propter

leuitatem & corruptibilitatem oneris, sic dies nostri auolant. Deinde vero quæ & quantæ sint tempestates, vel vno psalmi disce versiculo: *Non me demergat tempestas aquæ, neque absorbeat me profundum, neque urgeat super me puteus os suum.* Ps. 68.

Quia porro dum referuntur maris tempestates, dicuntur esse decem fluctus quibus impetuntur & iactantur nauigia, & quorum decimo seu decumano proxime periclitantur: non abs re fuerit, si tot distinctè connumerentur articuli, vnde tamquam à fluctibus, anima impetatur & agitetur in suo corpore, quamdiu hic peregrinatur à Domino. Quinque sunt à rebus prosperis, totidemque ab aduersis.

A PROSPERIS, primus fluctus sunt diuitiæ de quibus sic aperte Apostolus, *qui volunt diuites fieri, incidunt in tentationem, & in laqueum Diaboli, & desideria multa inutilia & nocina quæ mergunt homines in interitum & perditionem.* Secundus, deliciæ de quibus illud Moysis, *Inundationem maris quasi lac sugent.* Tertius, honores seu fauores mundi, de quibus aptè Rex Dauid: *Veni in altitudinem maris, & tempestas demersit me.* Quartus, Amici, domestici, Conciues & mos ipse humanus de quo egre- gium est illud sancti Augustini: *Væ tibi flumen moris humani! quis resistet tibi? quamdiu non siccaberis? quousque volues Eua Filios, in mare magnum & formidolosum, quod vix transcunt qui lignum conscenderint.* Cui & iungi potest illud Isaia: *Vt altitudo maris sonantis rapietur, ut turbo in tempestate.* Quintus, Temperamen- tum, seu naturalis complexio, quæ quo est gratior eo est pernicio- sior & procliuior ad peccandum, vnde illud Psaltis: *torren- tes iniquitatis conturbauerunt me.* 1. Tim. 6. Deut. 33. Ps. 68. L. I. Conf. 16. & in Psal. 36. Is. 17.

A B aduersis autem primus fluctus est, inopia de qua sic in libro Iob aptissimè, *Apprehendet eum quasi aqua inopia: opprimit eum tempestas.* Secundus, miseriæ seu dolores corporis & animi, de quibus Rex Antiochus, *In quantam, inquit, tribulationem de- ueni, in quos fluctus tristitia.* Tertius, miseriæ seu calamitates temporum, de quibus fusè sapiens: *occupatio magna & iugum graue super filios Adam: tumultus, fluctuatio, timor mortis, iracundia perseuerans, & contentio.* Quartus, iniuriæ, calumniæ, lites, & quidquid ab æmulis & aduersariis fingitur, de quibus in hoc sensu Dauid: *libera me ab iis qui oderunt me, & de profundis aquarum.* Quintus & vltimus, affectus inordinati, qui nullam 1. Mach. 6. Ecclesi. 43. Ps. 68.

in animo sinunt pacem, vnde est geminatum illud in Propheta:
 Is. 48. *Non est pax impiis, dicit Dominus. Impij quasi mare feruens quod
 quiescere non potest, & redundant fluctus eius in conuulsionem, &
 lutum: Non est pax impiis, dicit Dominus.*

Adde his quàm infirmum corpus, quàm rimosa nauis, &
 quàm facile ex sensibus tum externis tum internis, vndequa-
 Job. 37. *que subsannationem quasi aquam bibat, vt est in Scriptura; Po-
 testine dici fingiue aliquid praesentius ad periculum, & pericu-
 losius ad naufragium?*

Quam parum denique tam praesenti certoue animæ periculo
 caueatur, quis non videt? Quis se putet in tempestate & in certo
 naufragij periculo, cum se videt in diuitiis & delitiis? O quàm
 vere dictum à Sapiente de quauis anima suum nesciente nec co-
 gitante periculum: *sicut dormiens in medio mari, & quasi sopitus
 gubernator amisso clauo, & dicens, traxerunt me, & ego non sensi.*
 Numquid talis est anima tua? Numquid dormitauit praetædio
 2. Petr. 2. *rerum spiritualium? At perditio non dormitat, inquit S. Petrus.*

III. PUNCTVM.

PEREGRINANTIS igitur in corpore anima, maius est pericu-
 lum, quam periclitantis in naui corporis, licet æquale vtrisque
 foret periculum, cum tamen animæ minus provideatur quam
 corpori, longe magis periclitari dicenda est anima, de qua proin-
 de in scriptura expressè dicitur: *moriatur anima eorum in tempe-
 Job. 37. state.* Ac propterea Iob sapienter dicebat: *semper quasi tumentes
 Ib. 31. super me fluctus, timui Deum.* O si id sciperes, si sic Deum time-
 res! Dilce vel ab ipso mari & ventis qui à Christo cessare iussi,
 statim quiescunt. Qua de re in tertia parte. fusius, quæ huc
 commodè referri possint, feria tertia infra Hebdomadā nonam
 post Pentecosten, ad hæc Christi Domini Verba, dum impera-
 ret ventis, & mari: *Tace, obmutesc.* VOX illa, vox Christi est, dum
commoueris, nec tamē taces aut obmutescis; Quod sane est erubescendū.
 Concludat denique sanctus Augustinus his ad rem verbis aptis-
 Simis. *Si quid in nauicula anima nostra multis tempestatibus, pecca-
 Sermon. 181. de temp. torum fluctibus, aut per superbiam fractum, aut per auaritiam ruptum,
 aut per luxuriam resolutum esse cognoscimus, componere vel reparare
 bonis operibus festinemus. Studeamus iugiter vitiorum exhaurire sem-*

tinam. Non enim nocent peccata praterita, si non placent presentia.

Opportunum & illud esset quod supra, die 10. & 11. Ianuarij refertur: *Non contristabit Iustus quidquid ei acciderit. Et meliore rerum statu non magis gaudet Iustus quàm deteriore doluit.*

Vide & infra in hac parte Feriam 6. infra Hebdomadam quintam: *Nisi probè paratus sis ad aduersa, nec ad ipsa prospera benè paratus es.* Et Feria 2. infra Hebdomadam sextam. *Quanto minus murmuramus, aut omnino tacemus flagellati à Domino, tanto altius altissimum eius Dominium prædicamus. Quæ Veritas posset accommodari verbis Euangelij, Qualis est hic, quia venti & mare obediunt ei.*



HAC HEBDOMADE, in historia Paralitici sanati apud Capharnaum, consideratur progressus vitæ spiritualis quædam forma, per tres perfectionis acquirendæ vias. Primò in pugiatiua, Incipientes impedimenta quæque perfringunt, quibus ab incepto retardari possent. Deinde in particulari peccata, eorumque radices ac habitus deponunt.

Tum pro via illuminatiua Proficientes primum quemque motum animi, & corporis vitiosum, statim vt oritur reprimunt; & ex consequenti sic assuescunt Virtuti, vt vix vllò iam naturæ impetu aut inordinato motu agitentur, sed ad virtutis & Gratiæ ductum toti sunt facti.

Denique pro vniuiua Perfecti, vnâ Dei Voluntatem in suis omnibus spectant, vbique Deum præsentem ac diuinas eius perfectiones contemplantur, nihil nisi de eo cogitant & loquuntur, simulque alios ad eius cultum, & prædicandam gloriam prouocant & hortantur. Quæ omnia eodem ordine, ex illa deducuntur historia, binis pro vnaquaque Perfectionis via, propositis Veritatibus.

FERIA SECVNDA

DE PARALYTICO SVMMISSE

PER TEGVLAS, IN CONSPECTVM DOMINI IESV.

ET DE PRIMO VIAE PURGATIVAE GRADU
QUO IMPEDIMENTA PERFECTIONIS
QUANTOCIUS PERFRINGUNTUR.

Ecce viri portantes in lecto hominem, qui erat paralyticus, & querebant eum inferre, & ponere ante eum. Et non inuenientes qua parte illum inferrent praeter turba, ascenderunt supra tectum, & per tegulas summiserunt eum cum lecto in medium ante Iesum. Luc. 5.

VERITAS PRACTICA.

Quò longius differs, difficultatem difficilius tolles.

RATIO EST, Quia quo maior est repugnantia voluntatis & minor Gratia, eò difficilius difficultas tollitur.

Sed quò longius differs, maior est repugnantia voluntatis, & minor Gratia.

Ergo & difficultatem difficilius tolles, ac proinde perfringendum quantocius quidquid obstat.

I. PUNCTVM.

ANTA erat miraculorum Christi Domini fama, tantus diuinæ illius conuersationis splendor, tale animorum erga ipsum studium, tam multus denique populi undique confluentis concursus, ut vix pateret ad eum liber accessus. O qualis tunc foelicitas sæculi! Sed quid faciet Paralyticus, qui se lecto mouere non potest? Rogare quidem poterit, qui se portent & inferant ante eum: sed illi ipsi Viri, qui hoc pietatis officium suscipient, quâ tandem parte illum offerent, cum omnes sint interclusi aditus? At vide quàm ingeniosa

niosa sit Charitas; *Ascenderunt*, inquit Euangelista, *supra tectum*, & *per tegulas summisserunt eum cum leclo in medium*, ante Iesum. Quale spectaculum! quam pium! quam salubre! quam ipsi Domino gratum & iucundum! sic oporteret vel aliis esse auxilio, vel aliorum implorare opem ad faciliorem accessum erga Dominum promerendum. *Primum omnium quod ante diximus*, ait hîc S. Ambrosius, *vnusquisque ager petenda Precatores* L. 5. in c. *salutis debet adhibere, per quos vita nostra compago resoluta actuum.* 5. S. Lucæ. *que nostrorum clauda vestigia, verbi cælestis remedio reformentur. Sint igitur aliqui Monitores mentis, qui animum hominis, quamvis exteriori corporis debilitate torpentem ad superiora erigant, quorum rursus adminiculis & attollere, & humiliare se possit, ut facilius ante Iesum locetur, dominico videri dignus aspectu.*

Hæc ille totidem verbis quæ valde confirmant Veritates proximè superioris hebdomadæ. Verùm ad propositam modò materiam vt affigamus animum, Vide quàm admiranda Christi Domini sapientia, qui nobis progressum quendam totius perfectionis acquirendæ, in hoc vno sanati paralytici opere subiicit. Admirare quàm aptè illud quod primò narratur de reserato aditu per sublatas tegulas, representet studiosis suæ salutis & perfectionis, difficultates omnes, quæ initio multæ occurrunt, & ab inchoando retardant, statim vt occurrunt, esse abrumpendas; Quia scilicet *quò longius differes, eò difficultatem difficilius tolles.* Augebitur enim repugnantia voluntatis, & imminuetur Gratia, quæ duæ sunt difficultatum omnium tam apertæ causæ, vt quo maior erit repugnantia voluntatis, & minor Gratia, eò difficilior difficultas tollatur.

Hoc primò vniuersim esset probandum, nisi satis ipso pateret sensu; vndènam etenim maior sentitur difficultas ab vno, quàm ab alio, in quibusdam asperis aut abiectis operibus suscipiendis, nisi quia magis repugnat illius indoles, aut concupiscentia, quæ voluntatem ad se alliciens, eam etiam reluctantem & repugnantem facit? Ament illi ex æquo quod proponitur, quantumcumque sit in se asperum: Nihil tum erit difficile volentibus & amantibus: *Anima saturata*, inquit Sapiens, *calcat faenum*, & *anima esuriens etiam amarum pro dulci sumet.* Provi. 27.

Quod si tamen illius animus, qui maiorem in re aliqua difficultatem & repugnantiam sentit, abundantiori gratia reple-

retur, quàm iste alius cui res minus apparet difficilis, fortè ille
 Ps. 17. tum fortiùs & constantius difficultatem omnem absorberet, &
 Ps. 118. cum Dauide diceret, *In Deo meo transgrediar murum: & viam
 mandatorum tuorum cucurri cum dilatasti cor meum.*

At verò si è contra, debilitato magis difficultatibus animo
 diuinum etiam imminueretur auxilium, nonnè tùm difficul-
 tates viderentur auctæ? Nonne tùm pondus ponderi additum?
 Ps. 41. nonne tum ille inclamaret; *quare oblitus es mei, dum affligit me
 inimicus, dum confringuntur ossa mea?* O verè deplorandam illo-
 rum miseriam, de quibus etiam dicitur, *Et humiliatum est in labo-
 ribus cor eorum: infirmati sunt, nec fuit qui adiuuaret.*

II. PUNCTVM.

SED quò longiùs differes, maior erit repugnantia voluntatis, &
 minor gratia.

Ecclesi. 9. Crescit enim semper concupiscentia, vnde est repugnantia
 Prom. 30. voluntatis, *quasi ignis exardescit*, inquit Ecclesiasticus: *Et ille
 Job. 31. est ignis qui numquam dicit, sufficit. Ignis est usque ad perditionem
 deuorans, & omnia eradicans genimina.* Illa est olla succensa quæ
 Jer. 1. semper magis ac magis succenditur: & cui virga vigilans immi-
 2. Tim. 2. net propius. Cancer est qui numquam sistit, sed serpendo de-
 Ibid. pascitur sæuius quamcumque animi partem inuaserit. O quan-
 tã, quàm robusta, quàm efficaci tum opus esset Gratia!

Et vero, adeo non datur tam robusta & potens, quin potiùs
 dilatione repudiata, & offensa Gratia decrescit in dies crescente
 concupiscentiã, & tantò minus datur auxiliij, quantò magis
 Is. 33. esset optandum. *Va qui spernis, nonne & ipse spernèris?* Morata
 Cant. 5. sponsa pulsanti aperire Sponso, *surrexit postea vt aperiret, at
 ille declinauerat atque transierat: quasiuit & non inuenit illum. Vo-
 cauit & non respondit ei: quin etiam denudata est à custodibus, per-
 Luc. 19. cussa est & vulnerata.* O damnosam dilationem, *Auferte ab illo
 mnam*, inquit Dominus gratiæ, *quia omni habenti dabitur, &
 abundabit: ab eo autem qui non habet, & quod habet, auferetur ab
 eo.* AD HVC modicum lumen in vobis est, *ambulate dum lucem
 Ioan. 12. habetis, vt non vos tenebræ comprehendant, & qui ambulat in te-
 nebris, nescit quo vadat.* Nonne hoc est ipso lumine clarius ad
 rem exprimendam?

III. PVNCTVM.

QVO longius ergo differs, difficultatem difficilius tolles, & ne quidem fortè vnquam tolles, atque in eodem imperfectionis statu permanebis. Quin etiam deterius rues, propter allatas causas crescentis concupiscentiæ, & decrescientis gratiæ. *Angustiâ superveniente requirent pacem, & non erit*, inquit Propheta, *conturbatio super conturbationem veniet, & auditus super auditum*, Id est, denunciatio mali super malum. Vnde apertè patet meram esse illusionem & fallaciam mentis perniciosissimam, in incæptis deterreri difficultate, ac propterea differre quod velles aggredi. Quod enim expectas differendo, hoc vnum est, vt tollatur difficultas: at non tollitur differendo, imò augetur. *S. Aug. 8. Confess. 3.* Quid ergo differs propter præsentem difficultatem, quæ futura est grauior, quo magis differs? Nonne potiùs propter illam ipsam causam quæ te modò retardat, maturandum esset? Nam si modo iusta remorandi causa videtur propter aliquid quod apparet difficile: nonne iustior semper apparebit illa causa cùm illud ipsum difficile, difficilius in dies erit? *Si non Gen. 43. intercessisset dilatio, iam vice altera venissemus*, id est, non eam difficultatem pateremur, quam modò patimur, longè res faciliùs peracta esset. Sic Iudas filius Iacob ad excitandum Patrem, qui nolebat concedere Beniaminum. Sic te ipsum exacue cum diuina Gratia; iam enim diutiùs differs quò vocaris ire, ad perfectum tui contemptum *Festina, quæso te, & harenti in salo S. Hier. ep. 103. ad Paul.* *naucula funem magis praeide, quàm solue.* Tu Domine nostras rebelles ad te propitiùs compelle voluntates.



FERIA TERTIA.
DE REMISSIS PARALYTICO

PECCATIS.

ET DE RATIONABILI SOLICITVDINE
CIRCA NOSTRORVM REMISSIONEM.

Xx ij

Homo, remittuntur tibi peccata tua. Luc. 5.

VERITAS PRACTICA.

Sicut non est habenda sollicitudo anxia, & scrupulosa de peccatis remissis; ita rationabilis non est deponenda.

RATIO EST, Quia procuranda semper est, cum diuina Gratia, Moderatio quædam animi inter nimiam timiditatem seu abiectiõnem, quæ vergit in desperationem, & nimiam securitatem, quæ nos ducit in elationem.

Sed non potest melius procurari aut formari talis Moderatio, quàm si abiecta sollicitudine anxia, de peccatis remissis, retineatur rationabilis.

Ergo sicut illa est abijcienda, ita hæc retinenda: In quo tamen utrimque multi peccant.

I. PUNCTVM.

ADMIRANDVM sanè est, quòd cùm Paralyticus oblatu Domino, nec illi ipsi viri qui eum offerebant aliud viderentur petere, quàm sanitatem corporis, neque vllò modo loquerentur, aut fortè etiam nec cogitarent de salute animæ, vel remittendis peccatis: è contra Christus Dominus nihil de morbo, nihil de sanitate locutus, hoc vnum paralytico dixit: *Homo, vel vt habet alius Euangelista, fili, remittuntur tibi peccata tua.* Quia scilicet hoc primum & maximum malum est hominis, vel semel peccasse in Deum: ex quo malo culpæ, cætera omnia quæ dicuntur pœnæ, proficiscuntur: quo remanente, nihil iuuant bona quæ feceris: quo sublato, nihil nocent mala quæcumque patiaris. Sic S. Hieronymus. *Fortè, inquit, prius dimittit peccata vt ablatis causis morbi, sanitas restituatur.* Et vt ait S. Augustinus, *satis est paralytico esse hominem vt sit peccator: sic satis est esse peccatorem, vt de peccatis remittendis cum illo Dominus agat;* Non est autem dubium quin eo tempore quo remittebat peccata, dederit ei animum poenitentem

sine quo nulla sit peccatorum remissio: iam enim credebatur ille paralyticus, ut notauit S. Ioannes Chrysostomus, alioquin non se permisisset submitti per tectum.

Nunc verò, ut ad nos, atque ad institutum nostrum ista referamus, Considera hoc imprimis spectare ad eos, qui viam perfectionis ingrediuntur, & per eam incedunt, quæ purgatiua dicitur, ut de peccatis purgandis & remittendis maximè solliciti sint, ut ait Sapiens, de viro iusto seu iustitiæ & perfectionis studioso, *Cor suum tradet ad vigilandum diluculo ad Dominum qui fecit illum, aperiet os suum in oratione, & pro delictis suis deprecabitur.* Quin & pro ipsis iam confessione purgatis & remissis, ut idem expresse Sapiens: *De propitiato peccato noli esse sine metu,* *ibid. 5.* id est sine aliqua cura, & sollicitudine.

Verùm ne sit anxia & molesta scrupulis sollicitudo, sed religiosa & rationabilis, Veritate hodiernâ commonemur, atq; vnâ eademque ratione, *nec nimis anxiam esse habendam, nec rationabilem esse deponendam, demonstratur.*

Est autem Ratio euidens, nec tam multâ eget declaratione quàm consideratione, ut dignè expendatur. Cum sint videlicet duo quædam extrema, in quæ nobis procliue est & valde periculosum labi; nempe ex vna parte, nimia timiditas seu abiectio animi: ex alia verò, nimia securitas & elatio; nihil aptius quàm ut talis moderatio procuretur inter illa duo extrema vtrunque periculosissima, ut ne quis nimis se abjiciat, aut se nimis efferat & præsumat.

Quis enim non videt quanta dimanet à pusillanimitate damna? Sic paucis ea dinumerat S. Bernardus: *Sicut sanctis & electis tribulatio operatur patientiam, patientia probationem, probatio spem, spes autem non confundit: sic damnandis & reprobis tribulatio parit è contrario pusillanimitatem, pusillanimitas perturbationem, perturbatio desperationem, & illa interimit.* *Ep. 32. Rom. 5.*

Ab elatione vero & præsumptione quàm sit timendum sic idem fusiùs. *Via Daemonum præsumptio & obstinatio.* Propter præsumptionem stare non potuerunt, propter ostinationem, qui cecidit non adjiciet ut resurgat. Quàm perverso & euerso sunt corde filij hominum, quicunque sectantur vestigia Daemonum, ingrediuntur daemonum vias. Hac enim tota aduersum nos spiritualium colluctatio nequitiarum est, ut nos seducant, ut nos inducant in vias suas, ut *Serm. 31 in Psal. qui habitat.*

deducant in eis, & perducant ad destinatum finem qui paratus est eis. Fuge homo presumptionem, ne gaudeat de te inimicus tuus; Nempè in his maximè vitius gaudet, in seipso expertus quàm difficile possis ab hac tanta voragine respirare.

Deut. 5.

Iosue 1.

Pron. 4.

Ps. 142.

Nonne hæc tremenda? nonne hæc cauenda & fugienda sicut toties admonemur, *neque ad dexteram, neque ad sinistram ire?* Ac proinde, nonne nobis conquirenda & formanda est Moderatio quædam animi, quæ nos in medio statuatur, ne in alterutram partem declinemus? Tu Domine Deus iter meum dirige; *Notam fac mihi viam in qua ambulem, quia ad te leuavi animam meam. Eripe me de inimicis meis Domine ad te confugi, doce me facere voluntatem tuam.*

II. PUNCTVM.

SED quantum est ex nostra parte, non potest ista Moderatio formari aptius, quàm si abiecta solitudine anxiam de peccatis nostris, retineatur rationalis.

Pron. 3.

Sic enim ab utroque simul liberamur extremo. A primo quidem quod est timiditas vel desperatio, dum nimia & anxiosa solitudo de peccatis rejicitur. Deinde verò ab alio quod est presumptio, tuti sumus, dum rationalis solitudo retinetur: sicque fit ut in media illa via fiducialiter ambulemus, ubi pes noster non impingat, ut ait Sapiens.

In Festo
S. Mariæ
Magdal.

Quod ut melius intelligatur & in praxim reuocetur, Aduertendum est, quòd sicut nimia solitudo, & damnosa securitas inde proueniunt, quod vel sola Dei Iustitia peccatum seuerè punientis, vel sola Dei misericordia peccatores benignissimè recipientis, consideretur: sic rationalis solitudo formatur ex eo, quod iudicium seu iustitiam, & simul misericordiam Dei nobis proponamus. Hi sunt duo pedes cum pœnitente Magdalena simul osculandi, & vngendi; ut præclare & fusè S. Bernardus. *Pedes, inquit, isti sunt Misericordia & Iudicium, quorum alterum sine altero osculari, vel temeraria securitas est, vel desperatio fugienda. Quis enim Dei Misericordiam indefinenter attendens, non statim tepidioris vitæ quietem exoptet? cum enim recogitat vniuersitatis Dominum formam serui pro seruis suscipere, triginta & tribus annis operari salutem nostram in medio terra huius, capi, ligari,*

lanceari, crucifigi, & hoc totum pati pro filiis hominum, statim deceptoriam spe sibi blanditur & alludit, gaudet observari in misericordia & miserationibus, iudicium nescit, ignorat iustitiam, & puniendam estimat non puniri. Fallitur qui sic osculatur misericordiae pedem, ut pedem iudicii non attendat, qui totum de misericordia pede praesumit, hoc solum ad salutem sufficere credens, quod credit.

Rursus, cum abducit os, & iudicii pedem crebrioribus osculis intertangit, succutitur carnis animaeque substantia, & utriusque hominis statum vehementior aura percellit: Horrendum enim est incidere in manus Dei viventis, offendere, nescire Dominum, recalcitrare dominantis imperio, qui habet potestatem corpus & animam ponere in gehennam. Terribilis certe, sicut ait Apostolus, quaedam expectatio iudicii. Et quae plura habet de hoc terribili iudicio; unde concludit, Quis haec diu cogitans non statim contremiscat, & in desperationis rotetur abyssum. Non est igitur huic pedi morosius incumbendum, ne pietatis intuitum ferocia indicantis excludat. Vtrumque igitur inungat pedem animae paenitentis affectus, & nunc misericordiam amplectens, nunc iudicium deosculans, contribulati spiritus offerat holocaustum. Vide Mariam iudicii pedem fortiter attendentem, dum nobilis & lasciva mulier convivantium faciem non attendit, sed extenso corpore prouoluitur pedibus Maiestatis, doloris plena, timoris impatiens, compunctionis iaculo vulnerata. Sed & misericordiae pedem labiis impressioribus osculatur; in cuius spe, firmiter inhaeret vestigiis Christi Redemptoris, donec audiat, Remittuntur tibi peccata tua. Tum ostendit quomodo idem eius exemplo praestare possimus; ex quibus sancti Patris verbis, sicut aperte patet quid sit abjicere auxilium sollicitudinem, & retinere rationabilem, nempe non spectare solum iudicium, nec solam seorsim misericordiam, sed utrumque simul sibi proponere; sic etiam evidens est, quod si à nobis id praestetur, tunc Moderatio & temperamentum formabitur, quoderat exoptandum inter illa duo extrema vitiosa, de quibus cauendis dictum est. Neque enim tum eris pusillanimis & abiectus, quia sperabis in misericordia: neque elatus & arrogans, quia timebis iudicium. O verè rationabilem sollicitudinem! o timorem omni securitate securiorem!

III. PUNCTVM.

SICVT ergo non est habenda sollicitudo nimia seu anxia & scrupulosa de peccatis remissis, & de futura salute: sic rationabilis non est deponenda; quia non minùs timenda est elatio & præsumptio, quàm desperatio: ac proinde sicut ne desperes, fugienda est nimia illa sollicitudo de peccatis: ita ne nimis efferaris, & præsumas, retinenda est rationabilis, quæ sic sperat, vt timorem non deponat; sic timet, vt spem non abiiciat, sed vtrumque simul tam firmo & inuiolabili nexu coniungit, vt neutrum alteri prorsus præiudicet. *Qui timetis Dominum, sperate in illum.* Hoc clamant passim Scripturæ; sed eadem etiam nihil aliud resonant, quàm quod, *miserericordia eius à progenie in progenies, timentibus eum.* Nolite timere, aiebat Moyſes ad Populum; *vt enim probaret vos venit Deus, & vt terror illius esset in vobis, & non peccaretis.* Quid vero ait? Nonne sibi contradicit? nonne secum ipse pugnat! quæ sunt illa verba nisi pugnantia, & sibi contradictoria, *Nolite timere; & vt terror illius esset in vobis.* Si vetat eos tinere, cur addit, vt terror esset in illis? Nempe distinguendus duplex timor quorum vnum vetet, & alterum iubeat. Vetat quippe timorem illum anxium quo Iudæi timebant mori: lubet vero terrorem salutiferum, quo illi & nos concussi numquam peccemus, neque de salute comparata ita certi & securi simus, vt desides facti, bona deferamus opera, vel in ipsis elati operibus non reuereamur diuina iudicia. *Non sit ergo irrationabilis timor,* inquit, in Ps. 118. S. Ambrosius: *Etenim vera Sapientia à timore Dei incipit, nec est Sapientia spiritalis sine timore Dei: ita timor sine Sapientia esse non debet.*

Epistolariū
l. 6. c. 186.

Sic præclare S. Gregorius, Gregoriæ cuidam nobili fœminæ quæ optabat suorum peccatorum remissionem ipsi sancto Pontifici reuelari. *Rem,* inquit, *& difficilem, etiam & inutilem postulasti: difficilem quidem, quia indignus sum cui reuelatio fieri debeat: inutilem verò, quia secuta de peccatis tuis fieri non debes, nisi cum iam in die vitæ tuæ ultimo plangere eadem peccata minime valebis: quæ dies quousque veniat, semper suspecta, semper trepida metuere culpas debes, atque eas quotidianis fletibus lauare.* Certe Paulus Apostolus iam ad tertium cælum ascenderat, in paradysum quoque ductus

ductus fuerat, arcana verba audiuerat quæ homini loqui non liceret: ^{2. Cor. 12.}
 & tamen adhuc trepidans dicebat, castigo corpus meum, & seruituti ^{1. Cor. 9.}
 subijcio, ne forte aliis prædicans ipse reprobus efficiar, adhuc timet,
 qui iam ad cælum ducitur: & iam timere non vult qui adhuc in ter-
 ra conuersatur! Perpende, dulcissima filia, quia mater negligentia
 solet esse securitas, habere ergo in hac vita non debes securitatem per
 quam negligens reddaris: scriptum est enim, beatus vir qui semper ^{Prou. 23.}
 est pauidus. Et rursus scriptum est, seruite Domino in timore, &
 exultate ei cum tremore. In paucis ergo huius vitæ tempore, mentem
 vestram necesse est vt tremor teneat, quatenus per securitatis gau-
 dium sine fine postmodum exultet; Idemque in moralibus futili-
 simè de sanctis omnibus. Certitudinem, inquit, sibi in se pro- ^{Vide mor.}
 mittere non præsumunt, sed positi inter gaudium spei, & tentationis ^{l. 20. c. 4.}
 metum confidunt & timent; confortantur & titubant; certificantur
 & suspecti sunt.

Hoc ipsiū de se in particulari profitetur S. Bernardus in
 Canticis, sibi applicans quæ de Magdalena poenitente dixerat ^{Serm. 6.}
 de vtroque pedis osculo, vt videas nemini vnquam quantumuis
 sancto & probato deponendam esse rationabilem sollicitudi-
 nem, sicut nec retinendam anxiam & irrationabilem. Datum est,
 inquit, & mihi misero nonnunquam sedere secus pedes Domini Iesu,
 & modò hunc, modò illum tota deuotione amplecti, in quantum me
 sua benignitas dignabitur admittere. At si quando miserationis obli-
 tus, stimulante conscientia, iudicio paulo diutius inharerem: mox me-
 tu incredibili ac miserabili confusione deiectus, & tenebroso circum-
 fusus horrore hoc solum palpitans de profundis clamabam: Quis no-
 nit potestatem ira tue, & præ timore tuo iram tuam dinumerare?
 Quod si eo relicto pedem misericordiae plus tenere contingeret, tan-
 tã è contrario incuriã, & negligentia dissoluebar, vt confestim &
 oratio tepidior, & actio pigrior, & risus promptior, & sermo incau-
 tior, & omnis denique vtriusque hominis status inconstantior appare-
 ret. Proinde magistrã instructus experientia, non iudicium iam so-
 lum, aut solam misericordiam, sed misericordiam & Iudicium can- ^{Pf. 104.}
 tabo tibi Domine.

Denique quanta sit obligatio huius sanctæ sollicitudinis reti-
 nendæ, & in quo fundata sit, siue præteritum, siue futurum spe- ^{scff. 6. 2.}
 cies, audi Concilium Tridentinum contra præsumentes: Sicut
 nemo pius de Dei misericordia, de Christi merito, deque Sacramenta-

rum virtute & efficacia dubitare debet: sic quilibet, dum se ipsum suamque propriam infirmitatem, & indispositionem respicit, de sua gratia formidare & timere potest, cum nullus scire valeat certitudine fidei, cui non potest subesse falsum, se gratiam Dei esse consecutum. Et e. 13. eiusd. paulò post, diuerso capite: Veruntamen, qui se existimant stare, videant ne cadant, & cum timore ac tremore salutem suam operentur in laboribus, in vigiliis, in eleemosynis, in orationibus, & oblationibus, in ieiuniis, & castitate. Formidare enim debent scientes, quod in spem gloriæ, & nondum in gloriam renati sunt, de pugna qua superest cum carne, cum mundo, cum diabolo, in qua victores esse non possunt, nisi cum Dei gratia, Apostolo obtemperent dicenti, debitores sumus, non carni ut secundum carnem viuamus; si enim secundum carnem vixeritis, moriemini: si autem spiritu facta carnis mortificaueritis, viuetis.

Rom. 8. x. Tim. 4. H A E C etiam meditare, in his esto, in ista in illis; hoc enim faciens, & teipsum saluum facies, & eos qui te audiunt.



FERIA QVARTA.
DE COGITATIONIBVS PHARISÆO-
RVM DETECTIS A CHRISTO DOMINO.
ET DE NOSTRIS AD VIRTVTEM
PERFECTE DIRIGENDIS.

Ut quid cogitatis mala in cordibus vestris? Matth. 9.

VERITAS PRACTICA.

Nisi, quod monet Sapiens, omni custodia serues cor tuum, non omnino seruas.

Prov. 4. RATIO petitur ab eodem Sapiente, cuius est hæc sententia, Omni custodia serua cor tuum, quia ex ipso vita procedit.

Sic autem declaratur.

NISI cor tuum serues, quantum est satis ad vitam, quæ ex ipso procedit, non omnino seruas illud.

Sed nisi omni custodia serues, non seruas quantum est satis ad illam vitam.

Ergo nec omnino seruas; Quod quam sit damnosum & cauendum patet.

I. P V N C T V M.

ADERANT pluriimi è Scribis & Phariseis, cum Christus Dominus dixit paralytico, *Remittuntur tibi peccata tua*; Tum illi, vt narrant Euangelistæ, *caperunt cogitare* Matth. 9. Luc. 5. dicentes, *quis est hic qui loquitur blasphemias? quis potest dimittere peccata, nisi solus Deus? Vt cognouit autem Iesus cogitationes eorum, respondens dixit ad illos; Quid cogitatis in cordibus vestris, seu vt est apud S. Matthæum, quid cogitatis mala in cordibus vestris?* Vere etenim mala & pessima erat eorum cogitatio, quâ Christum Dominum dicebant in corde, esse blasphemum, quod peccata remitteret. Vt verò se esse Deum declaret, & verè se possit peccata dimittere, detegit cogitationes eorum, quod est proprium solius Dei, & antequam illud proferrent, quod cogitabant, illos interrogat, *Quid cogitatis? Quid cogitatis mala in cordibus vestris?* Quali diceret, Illa scio, illa video. O potentissimū reprimendis nostris cogitationibus frænum! Quis enim, si se videri à Christo cogitaret, cogitare simul vellet quæ ab eo nollet videri? *Ego Ego sum, Ego vidi; dicit Dominus.* Ier. 7. Quamobrem hîc de nostris primis cogitationibus ordinandis, & ad Virtutis exercitium dirigendis cogitemus: hoc est enim proprium Vitæ illuminatiuæ, & eorum hominum, qui peccatis perpurcati, proficere volunt in studio perfectionis.

Ad hoc autem plurimum confert Sapientis monitum, *Omni custodia serua cor tuum, quia ex ipso vita procedit*; Nemo enim dubitat esse aliquam custodiam adhibendam; sed nulla est satis, nisi omnis adhibeatur, Nisi omni custodia serues cor tuum, non omnino seruas, quia videlicet nisi illud serues quantum est satis ad vitam quæ ex ipso procedit, non omnino seruas.

Estius. in
4. Prou.

Arist. l. 2.
de parv.
anim c. 10.
& 3. c. 4.

Quæ ratio ut melius intelligatur, aduertendum, hîc cordis nomine intelligi mentem nostram, quæ est facultas cogitandi, intelligendi, & ratiocinandi: dicitur vero Cor quia sicut à corde principium est vitæ corporalis, sic à mente cum diuina Gratia principium est vitæ spiritualis; hinc enim primæ cogitationes, vnde affectus & virtutes, tum internæ, tum externæ, in quibus excernendis tota est vita, quæ spiritualis dicitur. Voluntas quidem est principium executiuum, sed Mens est principium cognitiuum quod illud antecedit, quatenus per præuiam cogitationem Mens Voluntatem dirigit, quæ nihil appetit, nisi prius cognitum ab intellectu.

Matth. 7.
& 12.
Ibid. 3.
Ibid. 12.
Ibid. 15.

Hæc est arbor quæ si bona fuerit, bonos fructus facit; si mala, malos fructus. Imò hæc est arborum radix, ad quam securis ponenda est; hic est bonus thesaurus, de quo bonus homo profert bona; hoc est denique cor de quo exeunt quæ de ore procedunt, & quæ in opus transeunt.

Iam verò sicut cor nostrum, vnde vita naturalis procedit, nisi tali diligentia custodiatur quæ necessaria est ad illam vitam conseruandam, non satis custoditur; sic planè Mens illa nostra, vnde est vita spiritualis, nisi custodiatur quantum satis est, ad hanc spirituales vitam conseruandam, non potest dici custodiri & seruari. Cum enim ob id vel maximè mens seruetur, ut sic vita conseruetur, certè nisi vita conseruetur, non satis mens seruetur. Nam quid prodest aliter conseruari, si, quemadmodum diximus, illud propter quod seruetur, non conseruatur. Sic grauitè & luculentè S. Ambrosius, in moralem sensum deriuans, quod in Genesi dicitur, diluuij tempore simul cum homine omnia esse deleta. *Sensu altiore*, inquit, *illud manifestatur, quia homo mens est, quæ est rationis capax: Principali igitur extincto, etiam sensus omnis extinguatur, eo quod nihil reliqui ad salutem supersit, cum salutis fundamentum virtus defecerit.* O virtutis defectum, à defectu seruatae mentis! quantis id gemitibus deplorandum, quod in æternum hi deplorant, qui se in inferno idcirco positos clamant, *Quod virtutis nullum signum valuerint ostendere.*

Sep. 5.

II. PUNCTVM.

SED nisi omni custodia cor tuum, siue mentem serues, non hanc seruas quantum est satis ad vitam spiritualem conseruandam.

Duobus modis intelligi potest hæc omnis custodia, vnus intensiue, alius extensiue, & vterque est tam necessarius, vt eorum alterutro desinente, vel illico desinat, aut periclitetur vita spiritualis. Nam primò quidem, si desit omnis intensiua custodia, id est tam intensa & sollicita, quàm meritò exigit Gratia, vel status animæ, vel occurrens occasio, cades actu in vitium, vel habitu in vitiosum illum statum qui tepor dicitur, *Apoc. 3.* qui vomitum Domino creat, & qui est peior frigido statu. Hinc lachrymæ, hinc gemitus: *Posuerunt me custodem in vineis, vineam meam non custodiri. Ille eris mollis & dissolutus in opere suo qui frater est opera sua dissipantis; Ille eris maledictus qui facit opus Dei frauduleriter seu negligenter; Illa eris arbor, quæ non facit fructum bonum, excidenda & in ignem mittenda; Ille eris infidelis seruus non vigilans, cuius Dominus venit quâ ille hora non putat, & diuidet eum, partemque eius ponet cum hypocritis: Ille eris denique tepidus cui dicitur, vtinam frigidus esses aut calidus; Quasi diceretur, nullus est peior tuo, status. Nihil itaque deterius vitæ spirituali, quàm ista remissa Custodia, vnde est ille status, qui est ipsâ morte deterior, quæ per frigus designatur.* *Cant. 1. Pron. 18. Jer. 4. Matth. 7. Ibid. 24. Apoc. 3.*

Deinde vero si extensiue omnis non adsit semper, & vbique Custodia, nonne illâ parte, quâ deerit Custos, patebit aditus hostibus, qui semper infirma, & incustodita loci ambiunt, vt sic facilius tibi viam sternant? Sic præclare, S. Ignatius in regulis ad spiritus dignoscendos. Solet, inquit, *aduersarius imitari aliquem belli ducem, qui obsessam arcem expugnare, atque de- In lib. exercit. pradari cupiens, exploratâ prius naturâ, & munitione loci, debiliorem partem aggreditur; Sic nimirum & ille circuit animam, & calide inquirat, quarumnam virtutum prædiis, Moralium scilicet, aut Theologicarum ipsa vel imminuta, vel destituta sit; eaque potissimum parte machinis omnibus admotis, irruit ac subuertere nos sperat, quam in omnibus minùs cateris firmatam custoditamque esse præviderit.* Sic conformiter sancti Patres, qui videri possunt in quarta parte, Feria sexta infra Hebdomadam 15. post Pentecosten,

Quanam vero illa potest in te esse pars infirmior & minus custodita? Nonne inde tibi times? aut vnde tibi tanta securitas, vt
 1s. 28. nihil timeas? An tu ex illis es illudoribus, *Qui dixerunt; percussimus fœdus cum morte, & cum inferno fecimus pactum?* quasi dicerent, licet aditus hosti pateat, non tamen irruet. Sed audiant quod responderetur: *Delebitur tale fœdus, & pactum istud non stabit.* INGREDIETUR & manum suam mittet hostis ad omnia desiderabilia eius.

III. PUNCTVM.

NISI ergo quod monet Sapiens, omni custodia serues cor tuum, non omnino seruas; Quia non conseruas vitam quæ ex ipso procedit, & quæ non conseruatâ nihil prodest cor seruare, quod simulatque deficit cum deficiente vita, sicut vita perit cum corde pereunte. Hic rursus clamare liceat, quod Propheta, *Diuisum est cor eorum, nunc interibunt.* Verè tum diuisum cor tuum, quando non ei omnis adhibetur custodia, & quando pars eius custodita, pars incustodita remanet. Vnde tam facile interit, quàm si nullâ parte custoditum esset. *Et factus est Ephraim quasi columba seducta, non habens cor,* Id est non sibi vndequaq; vigilans, & attendens, ac propterea seduci facilis. Nonne idcirco columbæ simplicitati prudentiam serpentis iungi voluit Dominus, tum ne sic facile decipiaris si prudenter aduertas ad singula; tum vt scias, in quo præcipue, & quamobrem illa prudentia & aduertentia est adhibenda? nempe ad conseruandam vitam, sicut serpens exposito corpore totum caput tegit in quo est ipsius vita. Sunt & alia quædam sacra & mystica in scripturis animalia, quæ nobis proponuntur ad hanc solertiam & indefessam vigiliam, nempe illa quæ antè & retrò, atque intus etiam plena sunt oculis. Hinc fortè Sapiens: *Ne dederis somnum oculis tuis, nec dormitent palpebra tua;* Quia scilicet non dormit hostis, & hoc vnum satagit vt nos confopiat, & soporem morti consociet, vt de Sisara dicitur. *Custodi igitur te metipsum & animam tuam sollicitè,* dicebat suis Moyses; Ad quam sollicitudinem magis acuendam, cogitandum est animæ pretium, tum ex ipsius dignitate, tum ex salutis æternæ momento ac valore, tum ex Christi Domini sanguine, quo redempta, & sic est nobis reddita, tanquam depositum quod.

sanum illi & integrum restituendum est, vnde Apostolus.
O Timothee depositum custodi. Et rursus. *Bonum depositum cu-* 1. Tim. 6;
stodi per spiritum sanctum qui habitat in nobis; quasi diceret, non 2. Tim. 1.
iussit nostro custodire spiritu, sed ipso sancto custodiendum
est, vt sic omni seruetur custodia; reus est alioquin pereuntis de-
positi depositarius, si perit ipsius culpâ.

Quid ego infelix, clamat S. Bernardus, quò me vertam? ss. Serm. 3. de
tantum thesaurum, si pretiosum depositum istud, quod sibi Christus Aduentus
sanguine proprio pretiosus indicauit, contigerit negligentius custo- Dom.
dire? Quæ plura S. Pater pergit, habentur in secunda parte, Do-
minica secunda post Pascha.

Denique si Deum rogas, vt te custodiat sicut pupillam oculi, ps. 16;
qualem oportet esse custodiam tuam, cum ipso adiungendam?
Certè si non sit omnis, non potest non esse inferior illi, quam
affers pupillæ tuæ: si autem est inferior, indignus es quem sic
Deus custodiat sicut oras, cum tu ipse perderes quod ille cu-
stodiret.

Vide in 4. parte, Feria sexta infra Hebdomadam decimam
quintam post Pentecosten.



FERIA QVINTA.

DE INTEGRA SANITATE PARALY-

TICI PORTANTIS LECTVM, A QVO

PORTABATUR.

ET DE NOSTRO PROGRESSV SPIRITVALI

QVI IN EO FIGVRATUR.

Surge, tolle lectum tuum, & vade in domum tuam.

Matth. 9.

VERITAS PRACTICA.

Tantum proficies, quantum à te deficies.


360 FERIA 4. infra Hebdomadam 4. post Epiphaniam. Surge, tolle, &c.

RATIO EST, Quia totus profectus est in accessu per virtutes ad puram Caritatem.

Sed quantum à te deficies, tantum sic accedes ad illam puram caritatem.

Ergo & tantum proficies, quantum à te deficies.

I. PUNCTVM.

 QVOD de omnibus Christi miraculis vniuersim dici potest, sic ab eo esse facta, ut se Deum manifestaret; hoc singulariter de isto sanato Paralytico considerandum est. Cum enim Pharisei affirmassent solius Dei esse, remittere peccata; tum ille, ut ostenderet se habere hanc potestatem, ac proinde se esse Deum, iubet Paralyticum surgere & ambulare. *Quid est, inquit, facilius dicere, remittuntur tibi peccata, an dicere: surge & ambula? Ut autem sciatis, quia Filius hominis habet potestatem in terra dimittendi peccata; tunc dixit Paralytico, surge, tolle lectum tuum, & vade in domum tuam.* Ex hoc patenti scilicet, & manifesto signo, quod suis ipsi cernebant oculis, qui aderant, aliud occultum & inuisibile poterant facillimè cognoscere. *Fit carnale signum, ait Beda, ut probetur spirituale. DIXI Domino: Deus meus es tu.*

Verum non hinc adoranda solum eius Diuinitas, sed & Diuinitatis tria celeberrima Attributa, Potentia, Bonitas, & Sapientia; Potentia lucet in sanitate reddita paralytico tam integrè & perfectè, ut ipse statim atque iussus est, surrexerit, & lectum lætus portarit domum, cunctis videntibus, & admirantibus. Bonitas in salute animæ restituta simul cum sanitate corporis. Sapientia denique in representatione nostri progressus spiritualis sub figura illius sanati hominis, suum lectum portantis, à quo prius portabatur. Sic enim maximè progredimur in spiritu, cum carnem seu appetitum sensualem subicimus spiritui, quem sibi ante caro subiciebat. *Sic sanatus hoc portat, ubi infirmus iacuerat, inquit S. Gregorius, & alibi: Porta lectum in quo portatus es.* Id est, carnem, in qua prius iacebas agrotus. Sanctus quoque Bernardus: *Grabatum, inquit, tollis, corpus scilicet à terrenis eleuans voluptatibus, ut iam non feratur anima concupiscentiis eius.*

23. Mor.
c. 23.
Hom. 12.
in Ezech.
De quatuor
orandi
modis.

eius, sed magis ipsa ut dignum est, regat illud, & ferat quò non vult.
Breuius denique S. Augustinus. *Non in Carnalibus gaudiis tam-*
quam in lecto requiescat anima, sed magis affectiones contineat.

L. de qq.
Euang.

Hoc est proficere & progredi in via Domini, & hæc est via
propriè Illuminatiua, quæ appetitum coercendo, in virtutibus
se se exercet, atque hinc eorum status, qui dicuntur Proficientes.
Quem ut facilius intelligas, quæ multa de hoc à multis conscri-
buntur, habes hic collecta breuiter, in hac proposita Veritate,
Tantum proficies, quantum à te deficies. Et ratio quidem iam satis
ex se plana, tum ex citatis patribus planior, hoc præsupponit
quod ait S. Thomas, sicut Incipientium status est in recessu à
peccato, ita Proficientium in virtutum exercitatione, donec uni
adhæreant Deo, quod est puræ & perfectæ Caritatis.

2. 2. 9. 24.
4. 9.

Non desinunt, inquit S. Doctor, omnes quidem proficere, & in-
ipientes, & perfecti: principalior tamen cura imminet Incipienti-
bus, ut resistent peccatis, quorum impugnationem minus sentientes,
iam quasi securius intendunt ad profectum, ex una tamen parte fa-
cientes opus, & ex alia parte habentes manum ad gladium, ut dicitur
in Esdra, de adificatoribus Ierusalem. Perfecti etiam Caritate profi-
ciunt, sed non est ad hoc principalis eorum cura, sed iam eorum stu-
dium circa hoc maximè versatur, ut Deo inhæreant. Et quamvis hoc
etiam querant Incipientes & Proficientes, tamen magis sentiunt cir-
ca alia suam sollicitudinem: Incipientes quidem de euitatione peccato-
rum, Proficientes vero de profectu virtutum.

2. Edr. 4.

Hæc ille ad verbum, ex quibus duo manifestè patent, quæ in
propositione continentur, primò profectum de quo hîc agimus
esse tendentiam & accessum ad perfectam Caritatem, prout ait
Apostolus, *finis præcepti, est Caritas de corde puro, & bonâ conscien-*
tiâ, & fide non fictâ. Deinde verò hac tendentiam & accessum
non aliter fieri quam per Virtutes, de quibus dicitur, *ascensiones*
in corde suo disposuit, ibunt de virtute in virtutem: Atque in hoc,
inquit S. Thomas, *vera Virtus simpliciter dignoscitur ab apparenti*
& falsâ, quòd illa ordinet ad principale bonum hominis; citatque
philosophum dicentem, quod Virtus est dispositio perfecti ad
optimum: quæ omnia vno verbo complexus est Apostolus, cum
dixit, *Veritatem facientes in Caritate crescamus;* quali diceret, per
veram Virtutem ascendamus ad veram Caritatem. *Has ascensio-*
nes in corde suo ponunt quidam quotidie: alij verò descensiones, in-

1. Tim. 2.

Ps. 83.

2. 2. 9. 24.

4. 7.

8. Ethic.

Phil. 4.

quit S. Hieronymus. O quanta vtrorumque differentia ! O quanta in nobis Anime , quàm manifesta descensionis signa, nec tamen aut emergimus , aut in imum labi timemus !

II. P V N C T V M.

SED quantum à te deficies , tantum accedere poteris per Virtutes ad veram Caritatem.

Quid est enim à se deficere , nisi , quod iam supra dictum est, appetitum & inclinationes naturales Rationi seu Gratiae subii- cere ? Quod quantum seriò & constanter feceris , tantum Virtu- tes exercebis , quarum exercitium in hoc vno consistit , vt ratio- nem & ordinem omnibus nostris affectionibus & actionibus po- nant. Nam cum nihil resistat Rationi aut Virtuti , quàm iste na- turalis appetitus quem coeres , dum à te deficis ; quid est quod præterea Virtutis exercitium impedire possit , & accessum ad il- lam Caritatem quò tendimus ?

Rem. 8.

1. Cor. 6.

2. Cor. 4.

Si spiritus facta carnis mortificaueritis, viuetis, inquit Apostolus, virâ illâ scilicet verè spirituali & diuinâ , quæ purè diligendo & fruendo Deo peragitur. *Nam qui adhæret Domino, unus spiritus est*: atque idcirco idem alibi, *Mors*, ait, *in nobis operatur*, Id est dum à nobis deficiamus , nobis morimur ; cum autem nobis morimur, tam apti sumus cum diuina gratia ad benè operandum , vt, quan- tum dici potest ex parte nostra , mors ipsa sit quæ in nobis ope- ratur ; Inde est operatio , quia nobis mortui sumus.

Pf. 103.

1. Reg. 2.

Num. 11.

Quod si etiam ad Diuinam Gratiam , operationes nostras, tamquam ad suum principale principium referimus , numquam melius operatur Gratia , quàm in tali morte ; quia nihil tùm illi resistit : *Auferes spiritum eorum & deficient, & in puluerem suum reuertentur* ; ait Regius psaltes ; Tum vero post : *Emittes spiritum tuum & creabuntur, & renouabis faciem terræ* ; quasi diceret, quan- do Spiritus sanctus vult maiora operari in aliquo , parat sibi viam, & facit sibi locum auferendo spiritum eius : sicque mortifi- cat & viuificat ; deducit ad inferos & reducit : pauperem facit & dirat ; humiliat, & subleuat. O Domine quàm libenter idcir- co cum Mose dicerem : *obsecro vt interficias me, & inueniam gra- tiam in oculis tuis*.

III. PUNCTVM.

TANTVM ergo proficies, quantum à te deficies. Nam sic per continuuū virtutis exercitium accedes ad illam Caritatem, in qua est Perfectio, sicut in eius accessu via est & profectus Proficientium. *Egredere de terra tua, dixit Deus Abrahamo; Tum vero post, ambula coram me, & esto perfectus.* Sen. 123 & 17. Hic est videlicet ordinatus vitæ spiritualis progressus, *exire à se ipso*, seu à deprauata sua natura, *tum ambulare per veras virtutes*, donec *quiescas in vno Deo*, siue hic in via per Inhaesionem Caritatis, siue in patria per fruitionem Visionis. Hæc est saturitas, quæ promittitur esurientibus & sitientibus iustitiam. Hic Thesaurus in agro absconditus, & Margarita pretiosa, quibus comparandis sunt omnia diuendenda. Hæc est Coena magna, & hæc regales nuptiæ ad quas inuitati, sua omnia debent relinquare. Hoc brauium quod accipit qui sic currit, vt comprehendat. Hoc est manna absconditum, quod vincenti datur: *Nemo autem vincit nisi certet, nec est aliud certamen, ad hanc victoriam comparandam, quàm nobiscum, quàm contra prauos concupiscentiæ motus: Per patientiam curramus ad propositum nobis certamen.* 1. Cor. 9. Apoc. 2. Hebr. 12.

Vide itaque ad dignoscendum profectum tuum, quantum à te defeceris, quantum ab amore excellentiæ, commoditatum, & gloriæ: hæc si adhuc menti hærent, certè tu longe es à termino, qui vix in via primum feceris gradum. O quàm verè de nobis Apostolus; *Non deficiamus, sed abdicamus occulta dedecoris.* Id est, 2. Cor. 4. non plenè nobis morimur, non stirpitis eradicamus prauas nostras cupiditates, sed tantum tegimus quod ex illis est magis probrosum & inordinatum; atque hinc fit, vt nihil proficiamus. *Hoc enim unusquisque persuasum habeat, inquit S. Ignatius, tantum se in studiis spiritualibus promoturum esse, quantum ab amore sui ipsius, & commodi proprii affectione, sese abstraxerit.* In fine secund. Hebdom. **FILI** quantum vales à te exire, tantum poteris in me transire. Non sine hanc vocem, cuius sit Authoris, vel cuius Patris ad filium? Vide quæ plura illic habentur, & statue aliquid particulare quod inhæret tenaciùs, tenaciùs expugnandum. *Agonizare pro anima tua, & vsque ad mortem certa pro iustitia.* L. 3. de Imis. Ch. c. 56. Ecclesi. 4.



FERIA SEXTA.
DE PERFECTA PARALYTICI
OBEDIENTIA.

ET DE EA QUAE DICITUR OBEDIENTIA
CHARITATIS, QUAE PERFECTAM
CUM DEO FACIT
VNIONEM.

*Et confestim consurgens coram illis, tulit lectum,
in quo iacebat, & abiit in domum suam magni-
ficans Deum. Luc. 5.*

VERITAS PRACTICA.

Est quidem certum in Charitate vnionem esse per-
fectionis: sed non est certò dicenda hæc Charitas
neque hæc vnio, nisi in obedientia quæ dicitur
Charitatis.

I. Pet. I. RATIONEM subministrat S. Petrus cuius hæc sunt verba:
Animas vestras castificantes in obedientia charita-
tis, Id est purificantes per illam obedientiam quæ à Chari-
tate proficitur, & per quam Charitas exercetur. Sic au-
tem formatur Ratio.

NVMQUAM magis est certa hæc animæ cum Deo vnio, nisi cum
anima magis est castificata ab omni amore proprio, propriaque
voluntate.

Sed anima numquam est magis castificata ab omnia propria vo-

luntate, quàm in obedientia charitatis.

Ergo nec unquam magis certa est hæc unio, nisi in tali obedientia: proindeque omni modo procuranda.

I. PUNCTVM.

AD diuinæ potentia quæ in Christo erat, vim & virtutem manifestiùs declarandam spectabat quidem, vt Paralyticus statim atque iussus est, surgeret, vidèntque omnes qui aderant, qualis ille esset Dominus, cui sic morbi obedirent. Sed quamobrem Vir ille sanatus tam citò domum repetit? cur non paulò diutiùs sistit, vel vt Benefactorem suum agnoscat, eique gratias ampliores reddat, vel vt sanitatis receptæ congratulationes, à turba illic spectante recipiat, vel vt tectum sua causa fractum, tegulâsque disiunctas reparari curet?

Admiranda certe viri obedientia! Quia non modò erat iussus è lecto surgere, sed etiam lectum tollere, & domum suam repetere: nihil prorsus eorum cogitauit, quæ ipsum poterant remorari, sed ita mente simul & corpore confirmatus & efformatus est ad obsequium Domino suo reddendum, vt sicut ægritudo imperanti Christo statim obediuerat, ita æger confestim obsequeretur: sicque illico nihil cunctatus, sublato in humeros lecto, discedit ab omnibus, & ab ipso Christo, vt domum repetat, quia sic erat iussus.

O perfectæ modum obedientia! ô singulare perfectionis Exemplar, quæ in tali obedientia demonstratur! Est quidem perfectio in vnione cum Deo, & est quidem in Charitate hæc unio perfectionis, sed neque illa unio nec illa Charitas magis aut melius exercentur, quàm in tali Obedientia, quæ hic nobis ad imitandum exhibetur. Sicut enim iste homo sanatus perfectè obediendo maiores Christo refert gratias, & magis ipsum colere, magis diligere, magisque ei adhærere testatur, quàm si ab eius latere numquam se voluisset mouere: ita planè vir obediens declaratur, ita planè obediendo demonstratur certiùs vera Charitas, vera unio, vera perfectio, quàm si hæc extra obedientiam exercerentur.

Ratio continetur in hac precipuè voce qua vtitur sanctus

Ind. 16.

L. 3. de
Imit. Chr.
c. 37.

In Ps. 2.

Petrus, *castificantes animas vestras*, Id est, ita purificantes ab omni prorsus affectu & motu, qui perfectam impedit Charitatem, sicut purificari debet anima ab omni amore sensuali, ut sit perfecte casta. Hæc est tam certa perfectæ vnionis nota, ut quò magis purificata fuerit anima, eò certius dici possit unita, quia hoc vnum impedit perfectam vnionem, quòd anima non sit plenè purgata. Nihil enim debet esse intermedium, ut sit perfecta vnio, quamdiu autem est aliquid in anima non purgatum, dici potest esse aliquid interiectum, ac proinde impediens perfectionem vnionis & vnionem perfectionis. *Quomodo dicis, quod amas me, cum animus tuus non sit mecum?* Quasi diceret, non est amor nisi sit animorum vnio, non est vero talis animorum vnio nisi animi sese amantium pari sensu & consensu conueniant. At non conueniet anima creaturæ cum animo Creatoris, nisi sit illa plenè purgata ab aliis prorsus affectibus, & quantum erit purgata, tantum conueniet, tantumque certò propterea vnietur. *Fili relinque te, & inuenies me.* Vide caput integrum, & hæc præcipue expende Verba: *Quidam primo totos se offerunt, sed postea tentatione pulsante, ad propria redeunt. Hi ad veram puri cordis libertatem & incundæ familiaritatis meæ gratiam non pertingent, nisi integra resignatione & quotidiana sui immolatione prius factâ, sine qua non stat nec stabit vnio fruitiua.*

Tamquam vas figuli conteres eos, Id est, inquit S. Augustinus, *conteres in eis terrenas cupiditates, & veteris hominis lutulenta negotia, & quidquid de peccatore limo contractum atque inolitum est.* Sicque fiet quod sequitur. *Et nunc reges intelligite. Id est, iam contritis luteis tegumentis, iam valentes regere quidquid in vobis seruile atque bestiale est.* Sic videlicet capaces estis maioris Gratiæ quæ intellectum instruat, & voluntatem accendat.

O illa in me descendat Gratia, ut sic instruar & accendar! ô me tamquam vas figuli sic Deus conterat, ut illa in me descendat Gratia.

II. PUNCTVM.

SED anima numquam est magis castificata & purgata ab omni proprio affectu, quàm in obedientia Charitatis.

Hoc intelligi potest de actu, vel de habitu, ut sit sensus: Ex

duobus Charitatis actibus, quorum vnus sit in obedientia factus, non item alius: aut ex duobus hominibus quorum alter altero frequentius, & magis ordinariè ex obedientia velit caritatem exercere; si quærat vter eorum actus, sit purior Charitatis actus, aut vter eorum omnino purius diligat Deum; tunc dici debet ille esse, qui ex Obedientia sæpius operatur; quia perfecta obedientia, qualem hic præsupponimus, est holocaustum quod-^{35. Mor. c. 12.} dam, vt ait S. Gregorius, ex scriptura, quo voluntas propria mactatur, & id omne incenditur quod animam impuram reddit eam præcipue impuritate, quæ in perfectorum operibus, & vniuersa viâ reperi potest.

Vnde quod ait Sapiens, *Vir obediens loquetur victoriam*, sic interpretantur Patres, vt, quia se ipsum obediens vincit, & se vincendo, se a seipso purificat, idcirco etiam puritate, vitâ, & excellentiâ Charitatis illos superet, qui non ita obediunt, nec se ita castificant. Atque hæc est ratio, quâ S. Thomas ostendit^{2. 2. q. 186 a. 8.} Obedientiam inter virtutes morales esse præcipuam, quod per illam videlicet, *homo contemnat quod in se habet præcipuum, nempe intellectum & voluntatem, & quo contempto purius adhæret Deo.*

Nonne propterea duplici lepræ comparatur voluntas propria, propriumque consilium, quâ si quis purgari velit, imitetur eum, inquit sanctus Bernardus, *qui non venit suam sed Patris facere voluntatem.* Tum post multa de hoc argumento sic pergit; *Audiant igitur utrique pariter, qui propriæ voluntatis, & qui proprii consilij lepra sordent; audiant quid Spiritus dicat Ecclesiis, breui vno versiculo, utramque lepram condemnans: Sapientia ait, quæ de sursum est, primum quidem pudica est, contra propriæ voluntatis impuritatem: Deinde pacifica, contra consilij proprii obstinatam rebellionem.* Audisne hæc tamquam tibi dicta.^{Serm. 3. de Resurr. Dom. Iac. 3.}

III. PUNCTVM.

ESTO igitur, in charitate sit unio perfectionis, hoc quidem certum est, sed non est certa hæc unio, nisi in obedientia Charitatis; Quia vt sit perfecta unio animæ cum Deo, debet anima esse pura ab iis quæ illam unionem impediunt: neque vnquam certior est illa unio quàm cum certius est animam sic esse puram: non est autem id certius, quàm in Obedientia, ex Charitate profecta,

368 FERIA 6. infra Hebd. 4. post Epiph. Et consurgens, &c.

vbi anima sic tota incenditur & purificatur, vt victima & holocaustum Deo gratius reputetur, quàm quæ in veteri lege offerrentur. *1. Reg. 15.* *Melior est, inquit, obedientia quam victima, & auscultare magis quam offerre adipem arietum.*

Sola quidem Obedientia sine Charitate non facit vnionem cum Deo: sola etiam Charitas sine obedientia non facit certam, quia nec ipsa Charitas certa est sine Obedientia, propter amorem proprium, seu propriam voluntatem, quæ citra obedientiam, Charitati permiscetur; Vnde restat certiorẽ & perfectiorẽ vnionem non esse nisi ex Charitate & Obedientia simul iunctis: atque adeo sicut per Charitatem Obedientia perficitur, ita Charitas per Obedientiam, veranefit & perfecta, manifestatur.

Tract. de dilig. Deo. *Qui seruat verbum eius, verè in hoc Charitas Dei perfecta est; ait dilectus discipulus, Sanctus quoque Bernardus aptissimè de hoc obedienti amore & amanti obedientia. Amat, inquit, castè & casto non grauatur obedire mandato, castificans magis cor suum, vt scriptum est, in obedientia Charitatis: amat iustè, & mandatum iustum libenter amplectitur: amor iste merito gratus, quia gratuitus, castus est quia non impenditur verbo, neque linguâ, sed opere & veritate: iustus est, quoniam qualis suscipitur, talis & redditur. Qui enim sic amat, haud secus profectò, quàm amatus est, amat querens & ipse vicissim, non quæ sua sunt, sed quæ Iesu Christi, quemadmodum ille nostra, vel potius nos, & non sua quesuit.*

Vide quæ plura hic habet de hoc argumento; Et discipe potissimum exemplo Christi Domini sic diligere obediendo, & obedire diligendo, vt omnia tua in charitate, & quantum fieri poterit, in obedientia fiant. *Ioan. 14.* *Vt cognoscat mundus quia diligo patrem, & sicut mandatum dedit mihi Pater, sic facio. Certe hoc tibi Pater mandat, vt sicut fecit Filius, sic facias.*



S A B B A T O
DE MAGNIFICATO POST
MIRACVLVM, AB OMNIBVS DEO.

ET A

Si non semper, numquam magnificas Deum. 369

ET A NOBIS SEMPER MAGNIFICANDO
IN OMNIBVS.

*Et stupor apprehendit omnes, & magnificabant
Deum; & repleti sunt timore, dicentes, quia vi-
dimus mirabilia hodie.* Luc. 5.

VERITAS PRACTICA

Si non semper, numquam magnificas Deum.

*RATIO EST, Quia numquam magnificas Deum, si de diui-
nis eius Attributis non magnificè sentis.*

*Sed si non semper magnificas, nempe in aduersis æquè ac prosperis,
non magnificè sentis de diuinis eius Attributis.*

*Ergo si non semper, numquam magnificas Deum: quamobrem
semper magnificandus.*

I. PUNCTVM.

TRIA sunt præcipuè admirati quotquot spectarunt insi-
gne illud miraculum sanati paralytici. Primum est pote-
tas summa sanantis; Secundum, facilitas sanati morbi
difficillimi; Tertium causa & motiuum patrati miraculi, nempe
vt homo ostenderet se potestatem habere remittendi peccata, &
proinde se esse Deum, cui vni hoc esse proprium Iudæi crede-
rent.

Tres item affectus admiratio illa produxit; primus est Stupor
quidam, quo omnes sensus atque animi facultates præ ingenti
admiratione detinentur, & defiguntur in obiecto illo stupendo.
Secundus est Timor ille, qui dicitur reuerentialis, quò stupefacti
ad se redeunt mirum quàm mirificè de Christo senserint, & ad
eius venerationem fuerint prouocati. Tertius denique, commu-
nis & publica Magnificentia seu glorificatio; quam passim inter
se Deo dabant, & obuiis quibusque significabant, hæc & simi-

Luc. 5.

Mat. 2.

lia crebro sermone usurpantes, *Quia vidimus mirabilia hodie;*
QUIA numquam sic vidimus.

Hoc est scilicet Exercitium Diuini Amoris & vitæ vniuiuersæ in perfectis, qui dum contemplationi Diuinarum Perfectionum & mirabilium Dei operum suauiter vacant, sic ad eum honorificandum & magnificandum excitantur, ut hoc vnum in ore habeant, BENEDICTVS DEVS, MAGNIFICETVR DOMINVS, MANIFESTETVR CHRISTVS. Quod quidem facile est & periucundum, dum sic suauiter afficiuntur in Deum, siue ob infusos pietatis sensus, siue ob prosperos rerum gestarum euentus. Sed si suauitas vertatur in amaritudinem, si prosperitas in aduersitatem: an ita semper æquali facie reddent eandem Domino magnificentiam? Id valde rarum, & verè Dauid Deo, de quouis homine. *Confitebitur tibi cum benefeceris ei*, quasi diceret, satis prouisi sunt homines ad benedicendum Deo cum Deus illis benefacit: sed si aliquando Deus ad eorum probationem desinat benefacere, desinent & illi statim Deo benedicere.

Ps. 49.

At verò audi; *Si non semper, numquam magnificas Deum.* Quod certè est mirum, & idcirco attentius expendendum. Ratio autem quæ affertur eò est solidior, quò in natiua significatione magnificandi Dei magis fundatur. Cum enim magnificare Deum, nihil aliud sit, quàm Magnitudinem eius prædicare, Bonitatem, Sapientiam, Æquitatem, Iustitiam, & alia eius Attributa seu diuinas Perfectiones, & admiranda opera decantare, extollere, & dignis efferre præconiis; Certè numquam ita magnificabis Deum, nisi de diuinis eius Attributis magnificè sentias, alioquin aliud ore diceres, & aliud corde sentires, quod longè alienum est à diuinis laudibus, & à suprema magnificentia Deo danda. *Date magnificentiam Deo nostro; MAGNIFICATE Dominum meum. MAGNIFICETVR Dominus;* & quoties sic Scriptura nos inuitat ad hoc debitum Deo persoluendum, nonne id primò imprimit animis nostris, ut magnificè de Deo sentiamus, sicut reuera, *Magnificus est in sanctitate, in iustitia & cæteris omnibus attributis* hanc enim semper rationem proponit. *Cantemus Domino, gloriosè enim magnificatus est, equum & ascensorem deiecit in mare. MAGNIFICENTIA eius discurrunt nubes. TVA est Domine Magnificentia, Potentia, & Gloria. MAGNIFICATA est usque ad cælos Mises-*

Deut. 32.

Ps. 33.

Ibid. 34.

Exodi 20.

Deut. 33.

1. Par. 29.

Ps. 56.

*ricordia eius, & usque ad nubes veritas eius. Quod cum ita re-
uera sit, nemo aliter sentire de Deo potest: aut qui aliter sentiat,
numquam is Deum magnificare poterit: aut si magnificet, non
nisi ut hypocrita, de quo bene prophetauit Isaias. Hic labiis Matth. 15.
me honorat, cor autem eius longè est à me. Velle ne hoc tibi ex- Is. 29.
probrari?*

II. PUNCTVM.

SED *si non semper magnificas Deum, id est in aduersis aequè ac
prosperis, non magnificè sentis de diuinis eius attributis.*

Quid enim sentis de diuina eius Bonitate? Magnam scilicet
& magnificandam cum relucet in prosperis: at vero cum ita
non apparet in aduersis, non esse ita magnam & magnifican-
dam! Itane verò putas sic te sentire magnificè de Dei Boni-
tate? Itane tantum dici poterit magnifica Dei Bonitas, cum
in prosperis benefacit, cum vero manum retrahet in aduersis,
non erit etiam bonus Deus! O Blasphemiam non ferendam!

De diuina vero Potentiâ, & summo eius Dominio, quid te
magnificè dicis posse sentire, si non aequè magnificas in aduer-
sis, atque in prosperis, cum in eo præcipuè sit summum & ab-
solutum Dominium, quod pro suprema sua potestate possit Deus
de vnoquoque homine ad nutum & voluntatem suam sic dispo-
nere, ut quidquid tandem aduersitatis inde homini accidat, non
possit homo dicere, *Cur ita facis?* Tu ergo qui hanc Potestatem Iob 9.
non magnificas in aduersis, quid magnificè tandem de hac diui-
na potestate sentis? quid de Iustitia? quid de Sapientia? quid de
aliis Attributis, quæ in malis inferendis non minus relucet,
quàm in bonis? quomodo magnificè de iis senties, cum non es-
sent magnifica, si tantum in bonis essent, & non in malis?

Audi S. Augustinum, *Tanta quippe est Omnipotens eius Boni-
tas, ut etiam de malis possit facere bona, siue ignoscendo, siue sanando, L. de Corr. c. 6.
siue ad utilitatem piorum coaptando, atque vertendo, siue etiam iustif-
icando vindicando: Omnia namque ista bona sunt, & Deo bono atque
omnipotenti dignissima, nec tamen sunt nisi de malis. Et rursus ali-
bi. Qui creauit omnia valde bona, & mala ex bonis oritura esse præ-
sciuit, sciuit magis ad suam potentiissimam bonitatem pertinere, etiam Idem de
corrupt. & grat.
de malis benefacere, quàm mala esse non sinere.*

*Idem in
Ps. 31.*

Hoc est magnificè sentire de Attributis ; & à contrario , qui non ea in malis ita magnificat , de his non sentit magnificè , sed malignè , impiè , iniuriosè. *Tres ille habet sententias* , inquit idem sanctus Augustinus , *aut non est Deus , sicut dixit impius , cui displicet quidquid illi accidit prater voluntatem : aut iniustus est Deus , cui ista placent , & qui hac facit : aut non gubernat Deus res humanas , nec cura est illi de omnibus ; Nonne tremis ad hæc verba ?*

III. PUNCTVM.

*Pf. 33.
Ib. 34.
Phil. 1.**in Pf. 144.*

S*I non ergo semper , numquam magnificas Deum.* Nam nisi magnificè de Deo sentias , numquam Deum magnificas ; non potes autem dici de illo sentire magnificè , si non semper & in aduersis æquè ac prosperis magnificas , quia non minus tum verè est magnificus & magnificandus , quàm in prosperis quibuscumque euentibus. *Benedicam Dominum in omni tempore : semper laus eius in ore meo. DIC ANT semper , magnificetur Dominus. SEMPER , magnificabitur Christus in corpore meo , siue per vitam , siue per mortem.* Non putabant illi videlicet se posse vnumquam , nisi semper magnificarent : tu vero secus credes ? Tu in prosperis quidem , sed in aduersis non æquè Deum laudabis ! Deplora hanc impietatem , & ut deinceps caueas , discere quod ait sanctus Augustinus. *Breue magisterium , ut semper laudes Deum , veroque corde non falso dicas , Benedicam Dominum in omni tempore. Breue mysterium est scilicet , ut noveris eum misericorditer dare , cum dat ; misericorditer auferre , cum tollit : nec te credas à Misericordia derelinqui , quæ tibi aut blanditur dando , ne deficias ; aut te corripit exultantem , ne pereas. Siue ergo in eius donis , siue in flagellis lauda eum : laus flagellantis , medicina est vulneris.*

Ibid. 6.

Sic quondam Rex ille potentissimus qui aiebat : *Nunc igitur ego Nabuchodonosor laudo , & magnifico & glorifico regem Cæli : quia omnia opera eius vera , & viæ eius iudicia , & gradientes in superbia potest humiliare : Quasi diceret , æquè in aduersis ac prosperis magnificandus est , quia æque in istis magnus est & omni dignus magnificentia.* Sic Darius eius successor decreto propterea facto , *ut in vniuerso imperio & regno , tremiscant & paueant Deum Danielis. Ipse est enim Deus vnicus , & æternus in sæcula.*



DOMINICA V.
POST EPIPHANIAM,
NISI SIT SEPTVAGESIMA.

DE ZIZANIIS IN MEDIO
TRITICI SEMINATIS, QUAE CHRISTVS
IPSE DOMINVS DECLARAVIT ESSE
MALOS HIC VIVENTES
INTER BONOS.

Cum dormirent homines, venit Inimicus, & superseminavit Zizania, in medio tritici. Matth. 13.

VERITAS PRACTICA.

Sicut non sunt amanda vitia, propter amicos homines: sic non sunt odio habendi homines, propter eorum vitia.

RATIO EST, Quia idcirco non sunt amanda vitia propter amicos homines, ne affectum nostrum preferamus Deo qui vetat vitia.

Sed si odio haberemus homines propter eorum vitia, sic affectum nostrum preferremus Deo, qui vetat illud odium.

Ergo nec sunt amanda vitia propter amicos homines, nec sunt

illi odio habendi homines, propter eorum vitia. Quod tamen in praxi est rarum.

I. PUNCTVM.

SIMILE factum est Regnum cœlorum homini, qui seminavit bonum semen in agro suo. Vide quod reliquum est parabolæ, & quam Christus ipse Dominus explicationem affert, eodem Capite, vbi hæc inter alia; Bonum semen hi sunt filij regni, Zizania autem filij sunt nequam. Hinc porro est eruta Veritas multum practica, *Vt neque sint amanda vitia propter homines vitiosos quos diligimus, neque sint odio habendi homines propter eorum vitia quæ detestamur.* Hoc enim sæpe accidit bonis, qui inter malos versantur, vt vel hos oderint, si non amant eorum vitia: vel si hos amant, non fugiant eorum vitia, sed foueant, & quodammodo colant ac ament: Quod vtrumque valde damnosum est, & ex quo cauendum propter eandem omnino rationem.

Nam quid est quod non sint amanda vitia propter amicos homines? Hoc primò est expendendum, quod sit facilius intellectu, vnde aliud patefier apertius. Quid autem illud est, nisi quod aperte verentur à Deo vitia, quæ si amarem propter homines quos amamus, tunc ipsos homines affectumque nostrum manifestè præferremus Deo, quod planè nefas est, & ipso quod amarem vitio vitiosius est aliquid, propter contemptum Dei tanto hinc expressius creaturæ posthabiti, quantò expressius propter creaturam offenderetur. *Magis honorasti filios tuos quam me!* O grauißima quæ à Deo fieri potest expostulatio!

I. Reg. 2. Hic erat oculus eruendus, hæc abscindenda manus, & pes truncandus, ne scandalo nobis essent, vt aptè ad rem nostram interpretatur S. Hieronymus. *Si quis, inquit, ita est tibi coniunctus, vt manus, pes, oculus, & est utilis atque sollicitus: scandalum autem tibi facit, & propter dissonantiam morum te pertrahit in gehennam; melius est, vt & propinquitatem eius & emolumentis carnalibus careas, quàm dum vis lucrifacere cognatos & necessarios, causam habeas ruinæ tuæ.* *II. 46.* *CVI assimilastis me, & adequastis, & comparastis me, & fecistis similem?* Expende quantis vititur verbis idem significantibus, vt rem magis exaggeret, & probrum inde resiliens magis te confundat & acuat.

II. PUNCTVM.

SED si odio haberemus homines propter eorum vitia, sic affectum nostrum preferremus Deo qui vetat illud odium.

NON oderis, inquit in Leuitico, fratrem tuum in corde tuo, id Leuit. 19. est quemlibet proximum, etiam aduersarium & inimicum. Vnde & in Exodo expresse habetur; Si occurreris boni inimici tui, Exodi. 23. aut asino erranti, reduc ad eum. Si videris asinum odientis te, iacere sub onere, non pertransibis, sed subleuabis cum eo. Quamobrem quod dixit Christus in Euangelio, audistis quia dictum est, diliges Matth. 5. proximum tuum, & odio habebis inimicum tuum: non erat hoc dictum quasi ex lege, neque hoc vllibi scriptum est, sed falso additum à Scribis & Pharisæis, qui per proximum diligendum malè intelligebant amicum, vnde & inferebant, odio habendum esse inimicum; contra quos ipse Dominus: Ego autem dico vobis, diligite inimicos vestros, benefacite his qui oderunt vos. Et Apostolus; Si esurierit inimicus, ciba illum: sitit, potum da illi. Ex Rom. 12. quibus tam manifestè patet vetari odium proximi, quàm eius vitia; cùmque illud odium, cuiuscumque personæ sit, non minus sit passio & affectio cordis, quàm amor proximi vitiosus, nonne hinc euident est quod si quem oderis propter vitia, sic affectum tuum præferas Deo, sicut si hominis amares vitia propter amicum hominem?

Sic vniuersim dictum est à Sapiente; Ne accipias personam, ut Ecclesi. 42. delinquas: Id est, ne ratione cuiusquam personæ Deum offendas, siue id fiat per excessum seu defectum, siue per amorem nimium, aut per odium, nihil refert, cùm nullo modo sit delinquendum propter personam aliquam.

Atque hinc in hodierna parabola, Paterfamilias suorum correxit impetum, qui zizania volebant ex agro euellere. Ne fortè, inquit, colligentes Zizania, eradicetis simul & triticum; sinite utraque crescere vsque ad messem: Quasi diceret, volo simul malos cum bonis viuere, Nam, ut ait sanctus Augustinus, boni, L. de qq. Euang. dum sunt infirmi, opus habent malorum commixtione, ut per eos exercentur, aut eorum comparatione inuitentur ad melius. Et rursum. Multi primò zizania sunt, postea fiunt triticum, qui nisi patienter tolerantur dum mali sunt, non fient triticum. Itemque alibi In Ps. 54.

fusus. Ne putetis gratis esse malos in hoc mundo, & nihil boni de illis agere Deum. Omnis malus aut ideo viuit vt corrigatur, aut ideo viuit vt per illum bonus exerceatur: vtinam ergo qui nos modo exercent, conuertantur, & nobiscum exerceantur: tamen quamdiu ita sunt vt exerceant nos, non eos oderimus: quia in eo quod malus est quis eorum, vtrum vsque in finem perseueraturus sit, ignoramus; & plerumque cum tibi videris odisse inimicum, fratrem odisti, & nescis.

Lmc. 6.

Nec dicas, id tibi esse nimis graue & onerosum; Nam in tuum etiam commodum lex illa lata est. Sicut enim vetaris odisse alios, ita & alij prohibentur, ne te oderint. Quid dulcius quàm ab omnibus diligere? quid grauius quam vel apud vnum in odio esse! & hoc tibi bonum procuratur. Si neminem oderis, nemini eris odiosus; Quàm enim mensurà mensus fueris, eadem & remetietur tibi. O nos iniquos & iniustos, qui nullum nostri odium non iniustum credimus, & nullum nostrum odium non iustum reputamus!

III. PUNCTVM.

Prov. 23.

SICVT ergo non sunt amanda hominum vitia, propter amicos homines: sic non sunt odio habendi homines, propter eorum vitia: quia ex utroque Deus perinde offenditur, qui proximi odium non minùs prohibet, quàm vitiosam eius amicitiam. Præbe, inquit, fili mi, cor tuum mihi, & oculi tui vias meas custodiant, id est, sic omnino mihi volo à te cor præberi tuum, vt iam tuum non sit; neque illo prorsus utaris ad amorem vel odium cuiuscumque alterius personæ vel creaturæ, nisi prout voluero. Itaque si tibi dixerò, Volo diligas proximum, sed non ita vt eius vitia diligas; sic omnino est diligendus, nec aliter: Volo vt oderis proximi vitia, sed ita, vt proximus non sit habendus odio; sic prorsus odium est exercendum, neque ultra ad personam effundendum, quia cor nostrum non nostrum, sed Dei est, quo neque plus neque minus ad amorem vel odium vti possumus, quàm si res aliena esset, quæ inuito rationabiliter Domino non est usurpanda. Tolle quod tuum est & vade. Aut non licet mihi quod volo, facere?

Matth. 20.

Ps. 118.

Quod si audias Dauidem dicentem, Iniquos odio habui; Audi & eundem

& eundem se explicantem; *Perfecto odio oderam illos*, id est, li- *Ps. 138.*
cito, & bene composito, non odiendo personam sed vitia; sic
enim licet & oportet eos odisse, imo & patrem ac matrem &
quoscumque alios, qui se salutis nostræ opponerent, ut est in *Matth. 10.*
Euangelio. Sed an tuum ita sit perfectum odium diligenter ex-
pende; Multi enim hîc decipiuntur, qui zelum putant, & bene *Luc. 14.*
compositum in improbos odium, cum tamen merum sit vitium.
Rectè enim Sapiens: *Abscondunt odium labia mendacia*, id est, *Prov. 10.*
obtegunt & pio quodam motiuo prætexit, ut nullum appareat
odium vel non vitiosum; Et falluntur, mentiuntur, merum est
odium: quidquid ore dicant, ita in corde est.

Sic amor vitij in amicis non sæpe putatur vitium, quia nolles
fortè idem omnino perpetrare, nolles sic iurare, sic detrahere, sic
mentiri: sed quia Vitioso nimis arrides, non satis eum arguis &
prohibes, tibi eius imputatur vitium, & eadem te poena manet.
Digni sunt morte, inquit Apostolus, *non solum qui ea faciunt, sed* *Rom. 1.*
qui consentiunt facientibus; Vnde & idem: *Nolite communicare ope-* *Ephes. 5.*
ribus infructuosis tenebrarum, magis autem redarguite. Hoc est ama-
re vitium, si non odisti ut debes; nec odisti ut debes, si non ar-
guis, quantum potes iuxta illud Scripturæ: *Argue eum, ne habeas* *Leuit. 19.*
super illo peccatum. Sic planè hoc est odisse proximum, si non amas
ut debes: non amas autem ut debes, si debita Charitati negas of-
ficia. Vide quæ in particulari, & quantum in his deficias, ac sus-
pira cum Dauide; *Delicta quis intelligit? ab occultis meis mundame,* *Ps. 18.*
& ab alienis parce seruo tuo. Si mei non fuerint dominati, tunc im-
maculatus ero, & emundabor à delicto maximo. Tremenda certè
verba.

AD EADEM EVANGELII VERBA.

Cum dormirent homines, venit inimicus. Matth. 13.

Contra excusantes imprudentiam seu defectum aduer-
tentia.

VERITAS PRACTICA.

Ne putes te benè semper excusatum, cum dicis : Non putabam.

RATIO declaratur fusius in tertia parte, feria tertia, infra hebdomadam Octauam post Pentecosten.

Cum autem creuisset herba, & fructum fecisset tunc apparuerunt & Zizania.

Contra eos qui vel condemnant malos quibuscum uiuunt, vel eos imitantur.

VERITAS PRACTICA.

Nec propter alios à bono te excusabis : nec quemquam alium propter te accusabis.

HABETVR fuse declarata in tertia parte, Feria secunda, infra hebdomadam decimam quartam post Pentecosten.

Accedentes autem serui Patrisfamilias dixerunt ei: Domine nonne bonum semen seminasti in agro tuo? unde ergo habet zizania.

Contra imperfectiones & negligentias nostris bonis operibus intermixtas.

VERITAS PRACTICA.

Maledictus qui facit opus Dei negligenter, seu fraudulenter.

Vide in quarta parte Feriam secundam, & sequentes infra hebdomadam vigesimam septimam post Pentecosten.

Videri etiam possunt quæ hac proximè sequenti hebdomada referuntur, de beneficio vocationis contra ingratos, seu contra se male gerentes in officio.

Inimicus homo hoc fecit.

VERITAS PRACTICA.

Si Tentatorem permiseris ingredi, non se permittet egredi. Facilius ejicitur quàm excluditur.

In secunda parte, Dominica prima Quadragesimæ.

DE EODEM, ALIA VERITAS.

Quod monet Sapiens : Eris eruditus in omnibus, aut eris contra dæmonem rudis in omnibus.

In quarta parte, FERIA sexta infra hebdomadam decimam quintam.

DE EODEM, ALIA VERITAS.

Qui non obseruat furem, obseruatur à fure & capitur.

In quarta parte, FERIA tertia & sequentibus infra hebdomadam vigesimam octauam.

Servi autem dixerunt ei : vis imus & colligimus ea?

Et ait, Non : ne forte colligentes zizania, eradiceis simul cum eis & triticum.

Contra zelum indiscretum.

VERITAS PRACTICA.

Scientia sine zelo, arma sine milite : zelus sine scientia, miles sine armis.

In secunda parte, FERIA secunda infra hebdomadam Quinquagesime.

DE EODEM, ALIA VERITAS.

Non in Commotione Dominus, & non in igne Dominus.

In quarta parte, Sabbato infra hebdomadam decimam sextam.



HAC HEBDOMADE, occurrit Consideranda Vocatio Sancti Matthæi Apostoli, ex cuius historia sex eruuntur Veritates in singulos dies proponendæ, quæ spectant ad singularem vniuscuiusque vocationis statum, ut in eo suæ salutis & perfectioni commode vacet; Quod est maximopere intelligendum.

FERIA SECUNDA.
DE SANCTI MATTHÆI, NO-
STRÆQUE VOCATIONE, IN QUA EST
SALVTIS NOSTRÆ SVMMA.

Cum transiret inde Iesus, vidit hominem sedentem in telonio, Matthæum nomine, & ait illi, sequere me: & surgens sequutus est eum. Matth. 9.

VERITAS PRACTICA.

Salutis animæ nulla est certior salutis certitudo, quàm in certo vocationis gradu attingendo.

RATIO EST, Quia nulla est certior salutis certitudo, quàm in mediis ad eam comparandam à Deo ordinatis fideliter observandis.

Sed nullibi media illa fidelius observantur, quàm in certo vocationis gradu attingendo.

Ergo salutis animæ nulla est certior certitudo quam in illo certo gradu. Sic proinde quanta est nobis cura certificandæ salutis animæ, tanta esse debet huius certi gradus attingendi.

I. PUNCTVM.

QUAM sit admirabilis, quàm eximia, & prope singularis Vocatio sancti Matthæi, tu attentius expende ex omnibus circumstantiis. Vir erat additissimus lucro seu pecuniis vndequaque congerendis, & ex illo genere hominum qui Publicani dicebantur, erantque odiosi omnibus, & præsertim Iudæis. Quid Christo Domino, cum tali Viro: aut quid isti viro cum Christo Domino? Quàm parùm idoneus Euangelio videbatur! Quàm multi alij censerentur aptiores! *Sed Domini est assumptio & vocatio nostra. VOCAT ea quæ non sunt, vt ea quæ sunt destruat, vt non gloriatur omnis caro in conspectu eius.* *Ps. 88. 1. Cor. I.*

Hunc ergo Iesus vidit hominem sedentem in telonio, & vocatum ad se sequendum, tantâ virtute pertraxit, vt illico surgens sequutus eum fuerit: Et paulo post annumeratus inter duodecim Apostolos, ac primus etiam Euangelista factus est. O bonitatem & potentiam vocantis Christi! O docilitatem & fœlicitatem vocati Apostoli!

Sic nos omnes variis modis ad se Christus vocat, sed non sic omnes vocantes audiunt & sequuntur. *Vocavi & renuistis: extendi manum meam, & non fuit qui aspiceret,* quò scilicet directè & sin-

gulariter eum vocabam, quò extendebam manum meam, vt demonstrarem statum vitæ destinatæ, & certum in eo viuendi gradum & modum, quo mihi deseruiret & suæ salutis consuleret. Pauci sunt omnino qui eum vitæ degendæ statum, quem Christus vellet, sequantur: & ex illis paucis paucissimi & rarissimi, qui in eo statu præfixum sibi gradum attendant, & teneant: & tamen in eo pertingendo summa est salutis nostræ, summum periculum si defecerimus, summa expectatio, & certior certitudo si eò peruenerimus, aut peruenire contendamus.

Hæc est Veritas modò expendenda, quæ quanti momenti sit, iam satis patet & patebit clariùs ex allata ratione, quæ sic habet. Nulla est certior salutis certitudo, quàm in illis mediis fideliter obseruandis, quæ Deus vnicuique ordinauit ad eam comparandam. *Notandum illud vnicuique*, quia videlicet præter illa communia quæ dantur omnibus, sunt Gratia quædam singulares, & particularia dona quæ à Deo vnicuique conferuntur in quocumque sit vitæ statu, vt pertingat ad illum singularem gloriæ gradum, cui est prædestinatus. Certum est enim quod ait Apostolus, *Sicut est alia claritas solis, alia claritas lune, & alia claritas stellarum; sicut etiam stella differt à stella in claritate*, sic & beati omnes in cœlo sunt diuersa beatitudinis gloria differentes; *Vnusquisque*, inquit, *in suo ordine*. Et quia gratia est semen gloriæ, & apta præparatio ad gradum beatitudinis cuique destinatum, idcirco debet ipsa gratia & quæ illam comitantur Salutis media esse particularia & singularia, vt sicut in cœlo per gloriam vnusquisque habet suum ordinem; ita in terra suum habeat per gratiam, vt sint omnia proportionata & sibi correspondentia. Sic apertè idem Apostolus: *Vnusquisque proprium domum habet ex Deo, alius quidem sic, alius verò sic*. Et sanctus Leo, *habent singuli vocatorum ordinem suum*.

Quibus ita declaratis, quid euidentius, quàm quod habet propositio, nullam posse haberi certitudinem salutis comparandæ certiore, quàm si certis illis mediis, & particularibus gratiis nobis ordinatis fideliter stemus, & constanter inhæreamus, vt neque plus vmquam, aut minùs attentemus, sed hoc vnum quod velit Deus, velimus, & quod nolit nolimus. Hoc est illum sequi, hoc est illi adhærere, hoc est posse dicere quod de se Iob affirmabat; *vestigia eius secutus est pes meus: viam eius cu-*

1. Cor. 15.

Ibid.

1. Cor. 7.
Sec. 6. in
Nat. Dom.

Ibid.

stodini, & non declinaui ex ea; à mandatis labiorum eius non recessi, & in sinu meo abscondi verba oris eius. Quo quid certius? quid securius? Ut è contra, si quis inde deflectat: *va his qui dereliquerunt vias rectas, & diuerterunt in vias prauas. Et quid faciem cum inspicere cœperit Dominus? Quidquid damni, quidquid periculi accidat, hoc vnum respondetur: Numquid non istud factum est tibi, quia dereliquisti Dominum Deum tuum eo tempore quo ducebat te per viam?* Expende illud & applica tibi hoc Te singulare. Eccle. 2.
Ier. 2.

II. PUNCTVM.

SED nullibi media illa fidelius obseruantur, quam in certo vocationis gradu attingendo.

Dicitur certus Vocationis gradus, Munus quoddam particulare seu officium & ministerium ad quod quis aptus & applicatus est in suo vocationis statu; *Sic in Apostolico statu diuersi sunt gradus Petri & Pauli, alius est gradus Andrea, alius Iacobi & Ioannis, vt præclare sanctus Gregorius Nazianzenus, vbi post multa de hac diuersitate in rebus maioris momenti, tum etiam in minoribus sic reperiri demonstrat. Reliqua, inquit, moderatio, ordinisque disciplina quanta? aliud Petrus interrogat, aliud Philippus, aliud Iudas, alius Thomas, aliud alius quispiam. Neque autem idem omnes, aut omnia vnus, sed vicissim ac sigillatim.* Sic sanctus Augustinus explicans fufius quod refert Apostolus de diuerso membrorum officio in toto corpore. *Videtur, inquit, quid faciat anima in corpore, omnia membra vegetat; per oculos videt, per aures audit, per nares olfacit, per linguam loquitur, per manus operatur, per pedes ambulat, omnibus simul adest membris vt vinant, vitam dat omnibus, officia singulis. Non audit oculus, non videt auris, non videt lingua, nec loquitur auris & oculus: officia diuersa sunt. Sic est Ecclesia Dei, in aliis hoc, in aliis illud, singuli propria operantur.* Orat. 26.
1. Cor. 12.
Ser. 186.
de temp.

Ex quibus sancti Patris verbis non modò constat, quid sit certus singulorum gradus, nempe illud proprium & particulare quod habent singuli vt operentur: sed ex his etiam euidenter patet, quid sit attingi certum illum gradum, quando quis scilicet rectè & laudabiliter suo illo proprio munere fungitur. Vnde Apostolus: *Dicite Archippo: Vide ministerium quod accepisti.* Coloss. 4.

382 FERIA 2. infra Hebd. 5. post Epiph. Iesus vidit, &c.
pisti in Domino, ut illud impleas.

Iam verò quod in illo attingendo gradu seu adimplendo ministerio, tam fideliter obseruentur illa salutis nostræ media de quibus dictum est, ut nullibi fidelius ac certiùs teneantur, patet ex eo quòd inclusa sint & intexta quodammodo illi certo gradui, adeo ut prope vnum & idem esse videantur ista duo, *Tenere proprium salutis medium*; &, *Rectè defungi suo munere*: cum vnum in alio includatur; diuersa tamen sunt, cum possis habere illa media, certumque illum gradum obtinere in quo te exerceas; nec tamen te in illo exerceas, aut nisi perfunctiorè & negligenter, sicque non attingas gradum, nec media rite obserues.

Atque idcirco expressè dicitur, media illa obseruari non in gradu simpliciter, sed in gradu attingendo, id est in fidei eius administratione, quod est vocationi propriæ respondere, quod toties ab Apostolo commendatur: *Videte vocationem vestram.*
I. Cor. 2.
Ibid. 7. *VNICVIQUE sicut diuinit Dominus: vnumquemque sicut vocauit Deus, ita ambulet, & sicut in omnibus Ecclesiis doceo; VNVSQVISQUE in qua vocatione vocatus est, in ea permaneat: Ac* rursus etiam paulo post & particulariùs. *Vnusquisque in quo vocatus est, in hoc maneat apud Deum.* Quasi diceret, in hoc vno præ cæteris peragendo constanter hæreat, quia cum ad illud præcipue sit à Deo vocatus, nihil aliud potest esse tam certum, in quo secundum Deum se occupet, quàm in illo certo Vocationis suæ gradu. Non enim vocat & deserit, sed quo ipse particulariter & determinatè vocat, illic particulares & determinatas affigit gratias, auxilia & media quibus qui vocatur, tam certò saluetur, si fideliter & constanter iis vtatur, quàm certò periclitatur de salute, si dum aliud agit hoc prætermittit.

Hoc vnum denique quod in vinculis positus, quod postremum, quod summum omnium suis inculcat Apostolus; *Obsecro vos, ego vinctus in Domino, ut dignè ambuletis vocatione, qua vocati estis, cum omni humilitate mansuetudine & patientia.* Quod & sanctus Basilius egregiè: *Quia Deo, inquit, se optat inuari, is numquam deserat quod se addecet officium suum; qui autem hoc facit, diuino auxilio numquam destituitur, Id est, illo diuino auxilio, quo quis particulatim indiget ad salutem, quod tam certò coniunctum est cum officio rectè administrato, quàm quis*
certo

Salutis animæ certior certitudo in certo Vocationis gradu. 385
certo illud rectè administrabit. Expende singula cum affectu.

III. PUNCTVM.

SALVTIS ergo anima nulla est certior certitudo, quàm in certo Vocationis gradu attingendo: quia nullibi certiùs obseruantur certa media, quæ cuique Deus ad salutem comparandam ordinauit; neque ad salutem tutior & securior vlla esse via potest, quàm si hæc salutis media diligenter obserues; *Et retrib et mihi* ps. 17. *Dominus secundum iustitiam meam.* Securè loquitur Dauid, quia scilicet, *custodiri vias Domini*, per quas ille me ducebat. Tùm quod omnibus ad hunc finem proffit, sic paulo pòst Deo confite-
tur; *Cum Sancto, Sanctus eris, & cum electo electus eris, & cum per- uerso peruerteris.* Quasi diceret talem se præstat Deus homini-
bus, quales & ipsi se Deo. Si fideles sint suæ vocationi, suo mu-
neri, suo ritè defungendo ministerio, sic erit Deus ipsis fidelis; Sin contra se peruertant, & aliud quàm ab ipsis vellet Deus, quantumuis pium & sanctum videretur, ipsi velint: Deum no-
lentem & repugnantem sentient.

Quod & præclare sanctus Bernardus confirmat ad illa verba Rom. 8. Apostoli, *Quos prædestinauit, hos & vocauit; quos vocauit, hos & iustificauit, & glorificauit;* Ibi enim obseruans Vocationem poni velut medium pontem, quò transitur à Prædestinatione ad Iu-
stificationem & Glorificationem, id est, ad salutem; sic pergit; Serm. 7. in Ps. qui habitat. *Hæc via bona, nihil super eius sine timendum, non tibi sint huius via suspecta nouissima, perge securus, tantò vinidius, quantò certiùs ea iam propinquare videntur, nempe TENES MEDIA, quomodo non nouissima propinquarent?*

Quanti vero sit periculi ab hac tantisper viâ declinare, sic præ-
clare sanctus Gregorius ad illa verba libri Iob, *Quis posuit men- suras eius si nosti, vel quis tetendit super eam lineam?* Iob. 28. L. 28. mor. c. 11. CVM miro inquit, consilio Author & dispositor noster huic illa largitur, quæ alij negat: alij hæc denegat, quæ isti largitur; mensuras sibi positas egredi nititur, quisquis posse plusquàm acceperit, conatur. In præcipitia pedem porrigit; qui mensurarum suarum limitem non attendit; & plerumque amittit & quod poterat, qui audacter ea, ad quæ pertin- gere non valet, arripere festinat. Nam & membrorum nostrorum tunc benè ministeriis vtimur, cum sua eis officia distincte seruamus.

Videri possunt quæ antè fusiùs, & pòst aptissimè prosequitur, unde ad praxim maximè permoueri debes cum Gratia Spiritus, ad officium qualecumque tuum religiosiùs obeundum. Sic enim vtilitas inde emanans proponitur, vt si desis, detrimenta certissima, & horrenda sequantur pericùla. Contentus esto tuâ sorte, caue vltra quàm velit Deus, assurgas. *Altiora te ne quæseris, & fortiora te ne scrutatus fueris: sed quæ præcepit tibi Deus, illa cogita semper, & in pluribus operibus eius ne fueris curiosus.* Quid ad te de illo, & illo. *Si illum volo manere, donec veniam: quid ad te, tu me sequere.* Tu officium tuum cura & exequere. Ne sis ex illis de quibus dicitur: Sat recte faciunt omnia, præter illud quod debent facere.

Ecclesi. 3.

Ioan. 21.

Vide Dominicam secundam Aduentus.



FERIA TERTIA.

DE GRATITVDINE ANIMI

PRO BENEFICIO VOCATIONIS.

Et fecit ei conuiuium magnum Levi, in domo sua.
Luc. 5.

VERITAS PRACTICA.

Gratitudo animi nulla formari potest digna beneficio vocationis, nisi se animus dignè conformet vocationi.

RATIO EST, Quia nulla digna formari potest animi gratitudo pro quouis accepto beneficio, si non est gratus & acceptus Benefactori animus.

Sed nisi animus recolentis beneficium Vocationis, se dignè conformet vocationi, non est Deo Benefactori suo gratus & acceptus.

Gratitudo animi digna Vocationis beneficio, si se animus, &c. 387
Ergo nec ab eo vlla formari potest animi gratitudo digna beneficio
Vocationis, nisi se animus dignè conformet Vocationi; Quod-
quidem tam est necessarium, quàm necesse omnino est, nos non
esse ingratos Deo.

L. PUNCTVM.

SVNT quidem omnes Gratia & diuina Beneficia grato
animo recolenda; sed Beneficium vocationis quod alia
omnia continet, præcipuam meretur gratitudinem. *Be-^{Ephes. 1.}*
nedictus Deus & Pater Domini nostri Iesu Christi, qui benedixit nos
in omni benedictione spirituali, in cælestibus in Christo: sicut elegit
nos in ipso, ante mundi constitutionem, ut essemus sancti & immacu-
lati in conspectu eius in charitate.

Sic itaque sanctus Matthæus, quî & aliò nomine Leui dice-
batur, gratum se exhibere voluit Christo Domino, à quo vo-
catus fuerat ad se sequendum, dum antequam renuntiaret om-
nibus suis, magnificum domi conuiuium iussit apparari, quò
palam testaretur non modò ipsi Domino, sed & omnibus suis
Conciuiibus, & præcipuè Publicanis, quos idcirco ad prandium
inuitauit, se beneficij maximi loco ducere, sic omnibus reli-
ctis pauperem Christum sequi.

Sed longè gratiorem se ipse præbuit, cùm se dignum Apo-
stolum & dignum vocatione sua se præstitit; In hoc enim po-
sita est vera Gratitudo, vt beneficio rectè vtaris ad mentem &
intentionem Benefactoris; Quod adeo verum est in re præsentî
quam tractamus, vt quidquid aliud dicatur aut fiat ad gratitu-
dinem, *Gratitudo animi nulla formari possit digna beneficio voca-*
tionis, nisi se animus dignè conformet vocationi. Hæc veritas præ-
cedentem valde confirmabit, & disponet ad sequentem. Ra-
tio autem est facilis, quantum præcipuè spectat ad hanc pri-
mam eius partem qua dicitur nullam esse animi gratitudinem
pro accepto beneficio, nisi animus recolentis beneficium sit
Benefactori gratus & acceptus.

Nam si non est gratus eius animus, quomodo is erit gratus?
Nonne hæc inter se ita pugnant, sicut esse gratum & ingratum?
quomodo vero poterit ingratus gratitudinem exhibere? *Num. Iacobi 3.*

ibid. quid fons de eodem foramine emanat dulcem & amaram aquam? inquit sanctus Iacobus. Posset quidem esse ficta & simulata quædam gratitudo, sed hæc non esset animi, qualem hic volumus; Vt sit autem animi gratitudo, debet omnino animus esse gratus, nã ipse est animus qui exhibetur, cū gratitudo animi exhibetur; vnde si non esset gratus animus, tam verè nulla esset gratitudo animi, quàm si nulla omnino esset gratitudo. Numquid potest Fratres mei, ait idem Apostolus, ficus vnas facere, aut vitis ficus? sic neque falsa dulcem potest facere aquam: Quasi diceret; Numquid infensus & ingratus animus potest facere gratitudinem? Et sicut si amara dulci misceretur aqua, dulcem ipsam, amaram faceret: ita si quid non gratum gratitudini misceatur, totum ingratum faciet.

II. PUNCTVM.

SED nisi animus recolentis beneficium vocationis, se dignè conformet vocationi, non est Deo benefactori suo gratus & acceptus.

Mal. 1. Cū enim id vnum maximè velit Deus, vt conformiter vocationi nostræ viuamus, quisquis se non conformat suæ, nonne tantum à Dei voluntate se diiungit, quantum à sua vocatione se distrahit? Qui sic autem se diiungit à Dei voluntate, quomodo possit ei esse gratus & acceptus? Non est mihi voluntas in vobis, dicit Dominus exercituum, & munus non suscipiam de manu vestra.

Is. 1. Deinde vero cum per propriâ vocationis officia nos Deus vellet regere, talēque à nobis gloriæ gradum exigeret, qualem ipse ordinarat in illo particulari ministerio, & non alium quantumuis sublimiorem: si quis hac relictâ viuendi viâ, suoque deserto cursu & ordine, sibi quem fingit alium, mauult incedere, numquid Deo potest esse gratus & acceptus? Cū veniretis ante conspectum meum, quis quasiuit hac de manibus vestris? VAE filij desertores, dicit Dominus, vt faceretis consilium & non ex me: & ordiremini telam, & non per spiritum meum.

ib. 30.

Denique cū diuinæ gratiæ subministrarentur abundantissimè ad vocationis debitum rite persoluendum, non ita vero ad aliud quod vltro suscipitur, quomodo is esse acceptus poterit, qui tot neglexit gratias? Quomodo is esse gratus qui sine gratia

sefe ad opus ingerit? *Non mittebam prophetas, & ipsi currebant,* ^{Ier. 23.}
non loquebar ad eos, & ipsi prophetabant. Hinc aptè sanctus Ba- ^{In Caput.}
 filius: *Inter ea quæ odio prosequitur Dominus, unum hoc est, se-* ^{1. 15.}
gne & iners otium, seu cessatio ab his quæ nos ex officio attinet facere.
 Vnde sanctus Gregorius Nazianzenus; *Quid Pastoris munus tibi* ^{Orat. 26.}
arrogas, si uis sis? Quid Caput efficeris, cum pes sis? Quid exerci-
tum ducere aggredieris, cum in militum ordinem adscriptus sis?
 Quasi diceret, hoc planè inordinatum est, hoc ingratum Deo
 & inuisum: quasi possis tibi aliquid melius, quàm quod ordi-
 nauit Deus: aut quasi peius reputes quod est tibi melius ordina-
 tum! Itane de Deo sentire velles?

III. PUNCTVM.

GRATITVDO animi nulla igitur formari potest digna beneficio
 vocationis, nisi se animus dignè conformet vocationi; Quia hic
 animus alioquin nō potest esse Deo gratus; & ab animo minimè
 grato non magis exhiberi potest Gratitudo, quàm ab ingrato;
 cū nō minùs inter se pugnent, in hac materia, non esse gratum
 Deo, propter neglectam vocationem, atque esse ingratum. Si-
 cut enim qui fideliter vocationi respondet, satis se gratum
 Deo præstat, etiamsi nullas agat illi gratias, quia hoc maximè
 intendit Deus & expectat ab vnoquoque, *ut quemadmodum vo-*
catus est, ita & ambulet: sic planè qui non ita constanter am-
 bulat, quidquid in gratiarum actionem proferat, non potest
 esse gratiofus, non potest esse gratus, non potest non esse ingra-
 tus; quia non reddit quod præcipuè debet, & quod imprimis
 exigitur. *Et nunc Israel,* post accepta scilicet tot beneficia quæ ^{Deut. 10.}
 commemorata sunt, *quid Dominus Deus tuus petit à te, nisi ut*
timeas Dominum tuum, & ambules in viis eius, & diligas eum? Quasi
 diceret, in hoc te mihi gratum exhibebis, si ambules in viis
 meis: aut certè si ab eis deslectas, tūm me tibi offensum, & te
 mihi tūm ingratum existima. *Filios enutriui & exaltavi, ipsi au-* ^{Is. 1.}
tem spreuerunt me! Cognouit bos possessorem suum, & asinus præ-
sape Domini sui: Israel autem me non cognouit, & populus meus non
intellexit!

Certè non deerant illis psalmi & sacrificia, quibus laudarent
 Deum, sed quasi nihil hæc apud Deum essent, non desinunt esse

Ibid.

ingrati, quia non reddunt quod ab illis maximè Deus exigebat. *Quò mihi multitudinem victimarum uestrarum, dicit Dominus? plenus sum.*

Ps. 33.

Ps. 56.

2. Reg. 12.

Is. 24.

In Ps. 148.

In Ps. 34.

In Ps. 146.

In Ps. 148.

Atque ipse psalmorum Regius Scriptor, quàm multis gratitudinem suam Deo indicarat? Quàm sæpe illud Eucharisticum ingeminarat: *Benedicam Dominum in omni tempore: Deum qui benefecit mihi.* Et tamen non aliter quàm ut ingratus, quàm ut benefactorum immemor à Propheta Nathan arguitur, quia uidelicet declinauerat à viis Domini, Deo erat infensus & odiosus, nec tum psalmi eius tantam gratitudinem Deo exhibebant, quantum ipse peccato suo protulerat ingratitudinem. Nihil æquè placebat Deo in Dauide ante peccatum, quàm eius fidelitas in omnibus obseruandis à Domino sibi constitutis. Hæc omni psalmorum cantu suauior Diuinas celebrabat laudes: atque ita dum peccato violata est illa fidelitas, quasi tacuisse visus est Dauid à Diuinis laudibus celebrandis. *Cessauit gaudium tympanorum, quieuit sonitus latantium, conticuit dulcedo citharæ.*

Sic dicuntur omnes creaturæ benedicere Domino, quod, ut ait sanctus Hieronymus, *à suo officio & seruitio non recedant; seruitium ipsorum, laus Dei est;* Sic ergo erit & tuum; *Quidquid egeris bene age, & laudasti Deum,* ait sanctus Augustinus; Et rursum. *Lingua tua ad horam laudat, vita tua semper laudet. Cum voce cantaueris, silebis aliquando, vitæ sic lauda ut nunquam sileas.* Itemque alibi fusiùs, & expressiùs. *Laudate totis votis, & totis vobis, id est non solum lingua, & vox uestra laudet Deum, sed & conscientia uestra, vita uestra, facta uestra. Tunc desinis laudare Deum quando à Iustitia, ET AB EO QVOD ILLI PLACET, DECLINAS;* nam si à bona vita nunquam declinas, lingua tua vacet; vita tua clamat, & aures Dei ad cor tuum. *Quomodo enim aures nostra ad voces, sic aures Dei ad cogitationes.*

Nonne te foelicem crederes, si de Deo semper cogitare, si Deum semper laudare posses? Cogita semper quæ tui sunt officij, & quæ cogitaueris semper exequere, sic fiet ut Deum semper cogites, & ipsum laudes. Quàm miser ille contrà, qui cum posset, & deberet diuinis vacare laudibus, alia omnia lubens volensque cogitaret! Tu ille miser es si tuo desis officio. Non est distractio mentis damnosior, quàm sic à suo munere distrahi & auerti.

Vide in 2. parte, FERIA tertia infra octauam Ascensionis.



FERIA QVARTA.
DE PERFECTA MORTIFICATIONE
SECUNDVM PROPRIAM CVIVSQVE
VOCATIONEM.

*Quare cum publicanis & peccatoribus manducatis
& bibitis?*

*Quare Discipuli Ioannis ieiunant frequenter, &
obsecrationes faciunt similiter & pharizæorum;
tui edunt & bibunt? Luc. 5.*

VERITAS PRACTICA.

Non est minùs perfectæ mortificationis, bene uti rebus, quàm omnino non uti.

RATIO EST, quia tùm perfectæ mortificatio censerì debet, cum appetitus perfectè subiectus est rationi, & ratio Deo.

Sed bene rebus utendo secundùm propriam cuiusque vocationem, non minùs perfectè appetitus subijcitur rationi, & ratio Deo, quàm non viendo.

Ergo non est minùs perfectæ mortificationis, bene uti rebus, quam omnino non uti; ac proinde cum non possis omnino non uti rebus curandus est bonus earum usus.

I. PUNCTVM.

SCRIBÆ & Pharizæi qui vel inuitati, vel sua sponte conuenerant ad conuiuium à S. Matthæo celebratum, murmurant contra Dominum, eiusque discipulos, quòd

non modò conuersentur cum publicanis, & peccatoribus, sed cum ipsis etiam manducant & bibant, nec se vino aut escis omnino abstineant, sicut discipuli Ioannis & Pharizæorum, qui toti erant in ieiuniis & obsecrationibus.

Erat sanè quod mirarentur homines, Deum etiam incarnatum & hominem factum, sic inter homines voluisse viuere, ut cum ipsis etiam conuiuere & manducaret: sed non erat quod propterea murmurarent, quasi illud vitæ genus minùs esset perfectum, aut minus perfectæ mortificationis & virtutis. Audiemus sequenti meditatione, quid illis Dominus responderit; interim verò consideremus, quàm verum illud sit, & ad praxim vniuscuiusque vocationis appositum: *Non minùs esse perfectæ mortificationis, bonæ uti rebus, sicut Christus & eius discipuli bene utebantur, quàm omnino non uti cum Phariseis.*

Ratio petitur à Definitione perfectæ Mortificationis, quæ, communi omnium qui de ea scripserunt Patrum consensu, sic esse declaratur, cum appetitus perfectè subiectus est rationi, & ratio Deo. *Id quod est in homine præcipuum, inquit S. Augustinus, imperet cæteris quæ sunt nobis bestiisque communia: atque id ipsum quod excellit in homine, id est, Mens & Ratio Potiori subijciatur, quæ est ipsa Veritas, vnigenitus Filius Dei. Neque enim imperare inferioribus potest, nisi superiori se ipse subijciat.* Sic sanctus Prosper: *Dominetur vitis ratio, subijciatur corpus animo, animus Deo; & impleta est tota hominis perfectio.* Sanctus quoque Leo: *Si mens rectori suo subdita terrena voluptatis incitamenta calcauerit, ordinatissimum tenebit Ratio principatum: quia tunc est vera pax & vera libertas hominis, quando & caro animo iudice regitur, & animus Deo præside gubernatur.* Itemque rursus: *Emundantes nos ab omni inquinamento carnis & spiritus, ut castigatis colluctationibus quæ sunt inter utramque substantiam, animus quem sub Dei gubernaculis constitutum, corporis decet esse Rectorem, dominationis suæ obtineat dignitatem.* Denique sanctus Papa Gregorius paucis hæc omnia contrahens. *Cum vel mentem Deo, inquit, vel carnem menti subiugamus.*

Ex quibus sanctorum Patrum testimoniis, quàm facile est intelligere quæ sit perfecta mortificatio, tam facile est nosse vtrum in te perfecta sit. Inquire tantisper & ingemisce quam longè sis non ab hoc sensu forte speculatiuo, sed practico: non ita verè subijciens

Ex l. de Ser.
Dom. in
Montec. 2.

In senten-
tiis.

Ser. 1. in
quadr.

Serm 4.

L. 6. Mor.
c. 16.

subjiciens Rationi & Gratia tuos sensus, sicut verè sentis cum illis Patribus esse subdendos.

II. PUNCTVM.

SED bene rebus utendo secundum propriam cuiusque vocationem, non minùs perfectè appetitus subieitur rationi, & ratio Deo, quàm non utendo.

Cur enim non utendo fit ista duplex subiectio, nisi quia cum naturaliter appetitus propenderet in vsum rei, retinetur ista propensio Ratione, & Ratio discit à Deo, seu à Gratia, quantum retinere debeat; vnde sanctus Petrus: *In scientia*, inquit, *ministra* ^{2. Pet. 1.} *te abstinentiam*, id est, discretè, & rationabiliter secundum Deum, prout scitis in Domino. Sic planè in bono rei vfu qui fit tantum intuitu vocationis, cum ex naturali concupiscentiæ motu pars illa quæ dicitur sensualis seu appetitus, appeteret rem usurpare alio prorsus modo & fine, quàm velit Ratio; Ratio cum Gratia cohibet hanc concupiscentiam, & à propria Vocatione tamquam ab Interprete diuinæ legis & voluntatis, nouit quantum cohibeat. Sic monet Sapiens: *Vtere quasi homo frugi his quæ tibi* ^{Ecclesi. 32.} *apponuntur*. Sic utebatur Apostolus dicens, *Ego didici in quibus sum, sufficiens esse, scio & humiliari, scio & abundare, ubique &* ^{Phil. 4.} *in omnibus institutus sum, & satiari, & esurire, & abundare, & penuriam pati*: Quali diceret, perinde me habeo in vfu rerum ac non vfu; nam dum rebus vtor, sic vtor ex ratione & gratia, vt tum non minùs sim subiectus Deo, quàm si non vterer. Itane tu qui tam facile conquereris, si quid in vfu rerum pateris?

III. PUNCTVM.

NO N est ergo minùs perfecta mortificationis, bene uti rebus, quàm omnino non uti: Quando scilicet sic exigit propriæ vocationis ratio, quia tum bene rebus utendo non minùs perfectè, quàm non utendo, appetitus subieitur rationi, & ratio Deo, in qua duplici subiectione consistit tota perfectio. *Quicumque* ^{Phil. 3.} *ergo perfecti sumus, hoc sentiamus*, inquit Apostolus; vel vt perfecti simus hoc sentiamus, sicut enim addit, paulo post: *Idem sapiamus, & in eadem permaneamus regula: Imitatores mei estote, fratres,*

& obseruate eos qui ita ambulant, sicut habetis formam nostram. Atque ut videas de re nostra esse sermonem, sic pergit: Multi enim ambulant, quos saepe dicebam nobis, nunc autem & flens dico, inimicos crucis Christi, quorum finis interitus, quorum Deus venter est, & gloria in confusione ipsorum, qui terrena sapiunt. Id est, multi sunt qui non seruant formam nostram in vsu rerum, quia scilicet non iis vtuntur ex præscripto Rationis & Gratiae, sed potius ex deprauato concupiscentiae motu, quod certè est deplorandum; Nam illis non interdicitur vsus, sed tantum inordinatus; sicque si vellent ordinatè rebus vti, sicut formam præscripti omnibus, non modò non peccarent in vsu rerum, nec deficerent à perfectione Christiana, quin potius inde proficerent. Omnia munda mundis; sed malum est homini qui per offendiculum manducat.

*Tit. 1.
Rom. 14.*

*L. de moribus Eccles.
c. 21.*

*3. Doct.
Christ. 12.*

Nonne & hoc in te est deplorandum, qui iam toties de his monitus, non nisi ex affectu deprauato res vsurpas: nec, quid in vsu rerum vocatio exigat, sed quid affectus, attendis? Non est hæc apostolica viuendi forma tradita, non est illa vitæ regula de qua iam supra sanctus Augustinus: *Habet vir temperans in rebus huius vitæ regulam utroque Testamento firmatam, ut eorum nihil diligat, nihil per se appetendum putet; sed ad vitæ huius, atque officiorum necessitatem quantum satis est vsurpet VTENTIS MODESTIA, NON AMANTIS AFFECTV.* Itémque alibi: *In omnibus talibus non vsus rerum, sed vtentis libido in culpa est.* Hæc autem libido sic coerceri potest & debet, ut deinceps non aliter nec alio fine rebus vllis vtaris, quàm prout vocatio aut officium exigit vel permittet.

*L. 3. de
Imit. Ch.
c. 26.*

Non me vincant Deus meus, non me vincant caro & sanguis: non me decipiat mundus, non me supplantet diabolus. Ecce cibus, potus, vestis & cætera vtenilia, ad corporis sustentaculum pertinentia feruenti spiritui sunt onerosa; tribue talibus fomentis temperatè vti, non desiderio nimio implicari. Vide quæ hic plura sanctus habet Author: Nec tam mirare quàm perfectè dicat, quàm quòd tam imperfectè facias quod perfectè dictum, & quod omnino faciendum esse, agnoscis.



FERIA QUINTA.
DE BONO SENSIVVM SEV
SENSVALIVM VSV, EX PROPRIA
CVIVSQUE VOCATIONE.

Et ait illis Iesus : numquid possunt filij sponsi lugere, quamdiu cum illis est sponsus? Matth. 9.

VERITAS PRACTICA.

Si quid interdum sensibus licitè indulgetur, non ut sensuale est, sed ut est licitum, accipiendum est.

RATIO EST, *Quia non sunt licita illicitè assumenda.*

Sed si ex his quæ interdum sensibus à vocatione propria indulgentur, aliquid sumeretur ut est sensuale, licita illicitè assumerentur.

Ergo non ut sensuale est, sed ut est licitum accipiendum est; sicque purificabitur usus sensuum, seu sensualium à propria cuiusque vocatione: Quod est ad praxim valde opportunum.

I. PUNCTVM.

RESPONDENS Christus Dominus Pharizæis murmurantibus de communi modo viuendi, quem ipse agebat, & suis permittebat discipulis; *Numquid possunt, inquit, filij sponsi lugere, quamdiu cum illis est sponsus! Dicebantur filij sponsi propriè Iuvenes illi, qui sponso tamquam sodales olim adhibebantur in nuptiis, ut est in libro Iudicum de Sam- Iud. 14. sone: Metaphoricè vero seu translaticè dicuntur Apostoli esse filij sponsi, quia sunt comites ipsius Christi, qui sponsus ab*
D d d ij

Ioan. 5.

ab ipso Ioanne Baptista dictus est; *Qui habet sponsam*, inquit. *sponsus est*: Ad quod Ioannis dictum respiciens Dominus, hac comparatione sponsi usus est, tum ob discipulos ipsius Ioannis qui praesentes aderant, & quaestionem cum pharizæis proposuerant, tum ut faciliorem redderet rationem, cur suis permittebat usum vitæ, communem ceteris, & non illum austerum ac strictum, qualem ipsi Pharizæi profitebantur: Nempe quod sicut tempore nuptiarum aliquid indulgetur conciliandis inter se animis, sic ipse modò suis indulgeret; quasi ipse modò suas nuptias celebraret, & quasi diceret, ut interpretatur S. Ioannes Chrysostomus, gaudij tempore non sic introducenda tristitia. Rectèque observat idem sanctus Pater, Christum Dominum sic indicare, non esse gulæ quod fiebat à discipulis, sed dispensationis cuiusdam: Unde statim addidit Dominus, quòd suo tempore dum ablatus illis fuerit sponsus, ieiunarent.

Sic porro fit inter homines etiam religiosos & spirituales, ut nonnulla indulgentius, iustas ob causas, permittantur in una vocatione, quæ non in alia; aut vno interdum tempore, quæ non alio concederentur. Quid tum vero in tali usu sensuum seu sensualium? Numquid gulæ, numquid libidini & concupiscentiæ concedi debet, quod licitè curando corpori, & animis remittendis concedi potest? Vide ne hoc tibi persuaderi patiaris, & audi Veritatem propositam, *Ut si quid interdum sensibus licitè indulgetur à sua cuique vocatione; non ut sensuale est, sed ut est licitum, purè accipiat, & sincerè usurpetur.*

*Deut. 16.
Sap. 16.**Iac. 4.*

Ratio quæ affertur tam plana est & facilis apprehensivæ, quam fortè difficilis appetitivæ facultati. Quid enim clarius ad intelligentiam, quàm quòd licita non sunt illicitè assumenda? Id est, servari debet modus & finis, aliæque circumstantiæ sic necessariae, ut si desint in usu rei licitæ, iam non licitè res usurpetur, iam non sit licita; quia non aliter licet, nisi servatis servandis, quæ si minimè observentur, tum quod est licitum degeneret in illicitum. *Iustè quod iustum est persequeris*, ait Scriptura; Et rursum: *Qui enim custodierint iusta iustè, iustificabuntur.* Denique in usu rerum omnium quæ de se mala non sunt, ut pecunia, cibi, vestes, yndenam peccari potest, nisi quia licita illicitè usurpantur, id est, aliter quàm usurpari debeant? *Ut in concupiscentiis vestris insumatis*, ait sanctus Iacobus: hoc nempe est, quod in licitis est

Si quid sensibus licitè indulgetur, non ut sensuale est, &c. 397

illicitum, hoc est quod arguitur, hoc est quod non licet; & hoc est tamen quod magis appetis!

II. PUNCTVM.

SED si quid ex his quæ interdum sensibus à vocatione propria indulgentur, sumeretur ut est sensuale, licita illicitè assumerentur.

Sic enim sumptum sumeretur propter voluptatem & concupiscentiam, quæ est radix malorum omnium, inquit Apostolus, *1. Tim. 6.* quam & peccatum vocat, quod in se habitat; non quod in se, seu *Rom. 7.* in habitu, & prout in nobis tantum est, sit peccatum: sed quod in actu sit causa peccati, ut quidquid humano actu ex ipsa inordinatè sit, peccatum sit & illicitum. Et alibi postquam egit de punitis, & prostratis in deserto, Israelitis: *Hæc autem*, inquit, *in 1. Cor. 10.* figura facta sunt nostri, ut non simus concupiscentes malorum, sicut & illi concupierunt. At certè quod illi concupierunt, non erat in se malum, sed tantum delectabile & sensuale, quod quia non alio sine quam voluptatis desiderarunt, & postquam illud acceperunt à Deo, non ut acceptum, sed ut sibi delectabile & ut sensuale vsurparunt, idcirco peccarunt & puniri sunt, quia sic licita illicitè assumpserunt. Et concupierunt concupiscentiam in deserto, *Ps. 105.* id est hoc vnum concupierunt, ut concupiscentiæ satisfacerent, quod cum afferatur tamquam illatæ causæ pœnæ, quis non videt esse illicitum?

Quod quidem dilucidè declaratur à S. Augustino in Confessionibus: *Non ego*, inquit, *immunditiam obsonij timeo, sed immunditiam cupiditatis: scio Noë omne carnis genus, quod cibo esset vsui, manducare permissum: Heliam cibo carnis refectum: Ioannem mirabili abstinentia præditum, animalibus, hoc est locustis in escam cedentibus non fuisse pollutum: & scio Esau lenticula concupiscentia deceptum, & David propter aquæ desiderium à se ipso reprehensum: & Regem nostrum non de carne, sed de pane esse tentatum, ideoque, & populus in eremo, non quia carnes desiderauit, sed quia escæ desiderio aduersus Dominum murmurauit, meruit improbari. In his ergo tentationibus positus, certo quotidie aduersus concupiscentiam manducandi & bibendi, Et quæ plura prosequitur, ubi aduerte, quod ait populum non fuisse improbatum quod carnes desiderauerit, sic intelligendum esse quasi diceret, si desiderio tantum*

398 FERIA 5. infra Hebd. 5. post Epiph. Numquid possunt, &c.

naturali & non voluntariè inordinato desiderasset, non peccasset. Quod autem escas inordinatè desiderauerit, patet ex murmure quod propterea concitauit.

Ibid.

Quale vero esset hoc certamen quod se certare S. Augustinus, sic paulò antè descripserat, dicens: *Et cum salus sit causa edendi & bibendi, adiungit se tamquam pedissequa, periculosa incunditas: & plerumq; praire conatur, ut eius causâ fiat, quod salutis causâ me facere vel dico, vel volo; Nec idem modus utriusque est, nam quod salutis satis est, delectationi parum est, & saepe incertum fit, utrum adhuc necessaria corporis cura subsidium petat, an voluptuaria cupiditatis fallacia ministerium suppetat. Ad hoc incertum hilarescit infelix anima, & in eo praparat excusationis patrocinium, gaudens non apparere, quid satis sit moderationi valetudinis, ut obtentu salutis obumbret negotium voluptatis. His tentationibus quotidie conor resistere, & inuoco dexteram tuam ad salutem meam.*

Ecclesi. 23.

Ex quibus & aliis quæ addit, satis euidentis est quantum ille timeret ne propter cupiditatem aliquid sumeret; non modo ne excederet, sed ne etiam quod necessarium erat ad vitam, propter voluptatem vllam acciperet; Quæ certè voluptas, in ordinario & mediocri victu si est timenda, ut illicita: quantò magis in extraordinario, de quo hîc loquimur, & de quo euitando Sapiens sic orabat Deum: *Aufer à me ventris concupiscentias, & animo irreuerenti & infrunito ne tradas me.*

III. PUNCTVM.

Prov. 13.

Serm de
ebrietate.

SI quid igitur aliquando sensibus licitè indulgetur: non ut sensuale, sed ut est licitum accipiendum est; Quia talis sensualitas, quæ est manifesta concupiscentiæ inordinatio, manifestè est illicita, & non sunt licita illicite assumenda. Sicut enim apertè intemperans ille esset, qui plus æquo comederet aut biberet, sic planè is qui ex sola cupiditate, & non ex puriori motiuo vellet naturæ satisfacere. Hæc est enim intemperantiæ species, non minus illicita, quàm alia: vnde Apostolus post comeestationes & ebrietates exagitatâs, addit, *Et carnis curam non feceritis in desideriis.* Quod adeo verum est ut in hac maxime vitij parte, totum penè vitium ponant sancti Patres. *Gula vitium,* inquit S. Basilius, *non in escarum copia, naturæ suæ vim exercere nouit,*

Si quid sensibus licite indulgetur, non ut sensuale est, &c. 399

sed in voluptate atque gustatu, licet mediocri admodum utare. Et sanctus Augustinus: In omnibus huiusmodi rebus, non ex earum rerum natura quibus utimur, sed ex causa utendi, & modo appetendi, vel probandum est, vel improbandum quod facimus. Sanctus denique Gregorius in moralibus: Antiquus hostis quia non cibum sed cibi concupiscentiam esse causam damnationis intelligit, primum sibi hominem non carne sed poma subdidit, & secundum non carne sed pane tentavit.

Quia tamen in lautioribus cibis concupiscentia magis excitatur, idcirco tum præcipue inuigilandum est, ne præcedat, nec propterea comedatur, quia delectat, nec quia sensuale est quod permittitur, vsurpetur; sed purè quia permittitur. Possunt quidem alij occurrere probati fines, sed hic vnus instar omnium ceteros comprehendit, & in praxi ad memoriam procliuius est. Dominus nobis prandium misit, verè pius verè misericors. Sic sanctus Paulus Eremita cum sancto Antonio. Sic vide ut deinceps sentias; Mundemus nos ab omni inquinamento carnis, & spiritus, persicientes sanctificationem in timore Domini. SIC Iusti epulantur & exultant in conspectu Domini: Contrà qui Deum à se & à sua mensa excludunt: Hi sunt, inquit S. Iudas, in epulis suis macula, conuiuantes sue timore, semetipsos pascentes. Hæc postrema Verba valde expendenda; tum quia grauius aliquid indicant quàm putetur; tum quia tibi forte id indicant ut prospicias. Statue cultrum in gutture tuo.

Vide suprâ in Aduentu, Dominicam quartam, & alibi, verbo Temperantia.



FERIA SEXTA.

DE PRÆPARATIONE ANIMI

AD QUÆLIBET ASPERA IN VOCATIONE

FERENDA.

Venient autem dies, cum ablati ab eis fuerit spon-

400 FERIA 6. infra Hebd. 5. post Epiph. Venient dies, &c.
sus, tunc ieiunabunt in illis diebus. Luc. 5.

VERITAS PRACTICA.

Nisi probè paratus sis ad aduersa, nec ad ipsa prospera
benè paratus es.

*RATIO EST, Quia nisi probè paratus sis ad aduersa, signum
est, te nimis affici prosperis.*

Sed nimis affici prosperis, non est ad ipsa benè paratum esse.

*Ergo nisi probè paratus sis ad aduersa, nec ab ipsa prospera benè
paratus es.*

I. PUNCTVM.



QUOD Christus Dominus de Apostolis suis dixit, *venient
dies, cum ablati ab eis fuerint sponsus, tunc ieiunabunt in
illis diebus*, non modò Pharizæos & alios murmurantes
de communi eorum vitâ, compescuit, affirmando futurum suo
tempore, vt ipsi ieiuniis, orationibus, & aliis piis animi corpo-
risque exercitationibus addicerentur; sed & ipsos Apostolos si-
mul monitos fecit, vt se ad illud tempus paratos exhiberent, nec
commodis rebus ita se præsentè vterentur, quin se absente in-
commodis & aduersis æque vellent exerceri. Quæ certè admo-
nitio non eò spectabat solum, vt ad futura illa quæ passuri erant
aduersa, confirmarentur: sed ad ipsa læta & prospera, quibus
modò ex indulgentia quadam utebantur, temperatè vsurpanda
multum valebat. Neque enim prosperis benè vsurpandis aptus
est animus, nisi & aduersis fortiter tolerandis aptetur: *Et nisi probè
paratus sis ad aduersa, nec ad ipsa prospera bene paratus es.*

Quod Pronunciatum quàm sit ad praxim vtile, satis patet;
Quàm sit verò verum; vt ad praxim facilius descendatur, Ratio
quæ affertur, brevis & facilis, sic declarat.

Nisi probe paratus sis ad aduersa toleranda, manifestum est
signum, te nimis affici & detineri prosperis. Quid est enim quod
non sit ad aspera paratus animus, nisi quia illa times & refugis?
Vnde

Vnde vero illa times & refugis, nisi quia nimis amas commoda & mollia, quibus te cariturū & contrariis affligendum vides? Quid quid enim dicas te facilius cariturum commodis, quā incommoda subiturum, nec te ita prosperis affici, quā aduersis premi: hoc gratis dicitur, nec quidquam ordinariē auersamur, nisi quantum afficimur ad id, quod illi est oppositum. Nam vt luculentē docet S. Thomas post S. Augustinum, ex amore prodeunt ceteræ ^{1. 2. q. 29.} omnes passionēs, atque imprimis odium & auersio seu fuga rei ^{4. 2.} cuiuslibet, quia, vt ipse ait, *Amor consistit in quadam conuenientia* ^{14. Cuius} *amantis ad amatum: odium vero in quadam repugnantia vel dissonantia; oportet autem in quolibet prius considerare quid ei conueniat, quā quid ei repugnet. Per hoc enim aliquod est repugnans alteri, quia est corruptiuum, vel impeditiuum eius quod est conueniens; unde necesse est quod amor sit prior odio, & quod nihil odio habeatur nisi hoc quod contrariatur conuenienti quod amatur.* Quod autem ^{Dei c. 7.} ^{Ibid. 4. 2.} odium sit magis sensibile, quā amor, id prouenit ex natura sensus, seu ex modo sensationis humanæ, de qua longius esset dicere; sed nihil obstat, quin amore posterius sit odium, nihilque sit quod oderis & auerseris, nisi quantum illud ames, cuius priuatio dolorem, metum, & odium, ceterasque naturales in te concitat affectiones.

Vide afflictos & perturbatos illos, de quibus sacra passim Scriptura; Saulem, Achabū, Amanum, Antiochum, & similes angore & metu cruciatos, quid est quod ita cruciantur, nisi quod sua spe excidant, suis priuentur optatis, & vt scripturæ verbis vtar, *quia non factum est eis, sicut cogitabant?* Sic planē tu, si sic times aduersa, vt ad ea non sis paratus, nimis amas prospera; si sic times paupertatem, vt eius metu nimis angaris, nimis tua diligis: si contemptum tui, si morbos si mortem, & alia vitæ incommoda sic abhorres, vt ne eorum quidem cogitationem velis suscipere, quā te ad illa præpares, nimis honorem appetis, nimis sanitatem amas & vitam. *Vae vobis, quia diligitis primas Cathedras, & salutationes in foro,* hinc prima mali labes, quia nimis diligitis. ^{1. Macch. 6.} ^{Luc. 11.}

II. PUNCTVM.

SED nimis affici prosperis, non est ad ipsa benè paratum esse. Agitur enim de præparatione seu dispositione animi, qua

Ecc

cum virtute & merito apud Deum prospera vsurpentur, primo quidem ne nos nimis attollant & inflent; tum vt Deum benefactorem in his laudemus & amemus; sicut præparatur animus ad aduersa, ne his contingentibus nimis deprimatur, seque nimis abiiciat, sed potius ad Deum sese attollat. Iam verò quis non videt nimiam ad prospera propensionem, non efficere illam animi dispositionem, quæ cum virtute coniuncta sit?

Oporteret quippe in honore tremere ne subrepat superbia, ne se insinuet ambitio, vanitas, cæteræque virtutis pestes: Amor autem honoris, contrà potius exultantes facit, & securos; *Nunc autem exultatis in superbiis vestris: omnis exultatio talis maligna est.*

Oporteret in diuitiis, de bonis cogitare operibus, & de larga in egenos profusione: At diuitiarum amor animum potius occupat ad opes conseruandas, vel augendas: *vbi enim est thesaurus tuus, ibi est & cor tuum.* In deliciis vero quantâ continentia, quantâ modestiâ esset opus? At deliciarum amor quàm contrà veriùs profusos amatores in eas faciat, testantur hæ apud Sapientem illorum voces: *Venite & fruamur bonis quæ sunt, & utamur creatura, tamquam in iuuentute celeriter.*

Sicque apparet euidenter quàm longè sit ab illa dispositione animi, quæ necessaria est ad virtutem in prosperis, nimius prosperitatis affectus, cum inde virtus omnis pereat, & vitium potius ac perditio illa sequatur, de qua Sapiens: *Auersio paruulorum interficiet eos, & prosperitas stultorum perdet illos.*

III. PUNCTVM.

NISI ergo probè paratus sis ad aduersa, nec ad ipsa prospera bene paratus es; quia illud ipsum quod te impedit, ne sis ad illa paratus, te imparatum facit ad hæc, nempe nimius ad commoditates & prospera quæque affectus. Ille est qui aduersitates nimis horret, ille est qui prosperitates nimis amat; sicque ad neutrum bene paratus es, cum ad vtrumque tamen præsto & paratum, ex æquo, te esse oporteret, & cum Dauide dicere: *Paratum cor meum Deus, paratum cor meum.* Et cum Apostolo: *A dextris, & à sinistris, per gloriam & ignobilitatem, per infamiam, & bonam famam.*

Quid speras alioquin? quid intendis? quid tandem de te sta-

Nisi probe paratus sis ad aduersa, nec ad ipsa prospera, &c. 403

tuendum putas? *Quid faciam tibi Ephraim? quid faciam tibi Iuda?* Si diuitias, si honorem, si prosperum aliquem successum immifero, statim emolliris, insolescis, in tuum naturale bonum, & commodum vertis; Sin verò te aduersis prenam, illico frangeris, despondes, murmuras, & in Medicum surgis. Quid fiet tandem illi viro, qui nec prosperis bene vti potest nec aduersis? Nonne est velut lignum aridum, velut lignum vitis præcisum, quod nullis agricolarum vsibus prodest, nullis fabrilibus operibus deputatur? *Fili hominis, quid fiet de ligno vitis?* Grauis S. Auguſt.
fane expositio, grauis sermo Domini apud Ezechielem contra eum, qui se suâ culpâ sic ineptum reddit ad omnia. Nihil illi superest nisi ignis, nisi combustio, id est ex hac etiam vita calamitosum aliquod poenæ genus, vnde ineptior & miserior reddatur: sic enim loquitur: *Etiam cum esset integrum, non erat aptum ad opus, quanto magis cum illud ignis deuorauerit & combusserit, nihil ex eo fiet operis!* Ezech. 15.

Est etiam apud Cassianum egregius de hoc argumento locus, vbi hæc inter alia præclare ad rem nostram: *Omnia aduersa viro insipienti. Nec enim prosperis rebus proficit, nec emendatur aduersis; Eiusdem namque virtutis est, tristitia fortiter tolerare, cuius etiam secunda moderari; & eum qui in vno eorum superatur, neutrum sufferre certissimum est.* Tum verò vt simus ambidextri, & quomodo possimus esse, sicut ille Aoth in libro Iudicum fuisse describitur, qui vtrâque manu utebatur pro dextera, fusè declarat: *Si videlicet ea qua prospera sunt, dextraque censentur, & ea qua aduersa sunt ac sinistra dicuntur, bono rectoque vsu ad partem fecerimus dexteram peruenire; vt quacunque fuerint illata, fiant nobis secundum Apostolum, arma Iustitiæ; Et in fine concludens: Erimus igitur ambidextri, quando nos quoque rerum presentium copia vel inopia non mutarit; Et nec illa nos ad voluptates noxiæ remissionis impulerit, nec ista ad desperationem attraxerit & querelam; sed similiter Deo gratias in utroque referentes, parem fructum de secundis aduersisque capiamus, qualem se verus ille ambidexter Doctor gentium fuisse testatur dicens: Ego enim didici in quibus sum sufficiens esse, scio & humiliari, scio & abundare, ubique & in omnibus institutus sum, & saturari & esurire, & abundare & penuriam pati, omnia possum in eo qui me confortat.* 6. Coll. 6.
9. & 10.
Iud. 3.

Si sic posses, nonne velles? sed vnde ille potuit & voluit, nisi

Ecc ij

404 *Sabbato infra Hebd. 5. post Epiph. Nemo commissuram, &c.*
 à Gratia, quæ se modo tibi offert? vide ne negligas; Vide quæ
 Dominus cum Iobo differit de præparato ad bellum equo:
Exultat audacter, in occursum pergit armatis, contemnit pau-
rem, nec cedit gladio. Et quæ plura ibi leguntur, quæ vt sunt à
 sancto Gregorio exposita, videri possunt in secunda parte, Feria
 sexta infra Hebdomadam Sexagesimæ: & Feria 4. infra Hebdo-
 madam 2. Quadragesimæ: Et vide Sabbato ante Dominicam
 Palmarum.



S A B B A T O.

DE TVRITATE ET EXCELLENTIA

CHRISTIANÆ RELIGIONIS IN QVOCVM- QVE VIVENDI STATV.

*Dicebat autem & similitudinem ad illos, quia ne-
 mo commissuram à nouo vestimento immittit in
 vestimentum vetus; alioquin & nouum rumpit,
 & veteri non conuenit commissura à nouo. Luc. 5.*

VERITAS PRACTICA.

Sicut à veteri lege, sic à veteri homine, vnicuique Chri-
 stiano est abstinendum.

*RATIO EST, Quia idcirco à veteri lege abstinemus, quia
 per Christianam Religionem lex illa est antiquata.
 Sed eâdem lege Christiana, vetus homo est abiuratus.
 Ergo pariter abstinendum.*

I. P V N C T V M.

DE perfectione viuendi quæstio & sermo erat Christo Domino cum Pharizæis; iamque illis ostenderat nihil obesse perfectioni suorum, si stricte illud vitæ genus nondum susciperent, quod essent aliquando sectaturi. Nunc verò pergens declarat eis duplici similitudine, non nisi prudenter fieri, quod tempus aliquod interponatur, ut interim capatiores & fortiores fiant discipuli ad capeffendam eam perfectionem, quam professuri sint. Sicut enim, inquit, nemo prudenter à vestimento nouo partem seu frustum tollat, ut veteri resarciendo insuat, quia sic nouum periret vestimentum, nec vetus aptè resarciretur: Et sicut in vtres veteres vinum nouum non infunditur, ne musti efferuescentis violentiâ dirumpantur vtres; sic neque imperfectis & infirmis, quales sunt adhuc mei discipuli grauiam illam perfectioris vitæ præcepta, seu exercitia sunt imponenda, ne cum sint impares illis ferendis, onus excutiant; sed paulatim formandi sunt & roborandi, quia illa etiam perfectio, ad quam eos ego destino, tam sublimis est & excellens, ut mihi prius sint suauiter disponendi & præparandi, quam illi eam aggrediantur. Quanta est enim distantia rei nouæ pretiosæ, & excellentis, à ^{1. 2. 7. 96.} veteri deficiente & caduca, tanta est legis nouæ à me instituen- ^{a. 2. ad 2.} dæ, ab illa quæ vobis Iudæis est tradita; ac proinde sicut veteribus non sunt noua permiscenda, sic neque legi Mosaicæ lex Euangelica, nec veteri homini nouus homo coniungendus, sed ^{Hebr. 8.} expectandum donec antiquetur & senescat, quod est prope in- ^{Apo. 21} teritum, ut sic noua faciam omnia.

Sic sancti Patres hæc Christi Domini verba interpretantur, Sanctus quidem Hieronymus, *vestimentum*, inquit, *vetus*, & *vtres veteres*, *Scriba & Pharizæi*; *Vestimentum & vinum nouum præcepta Euangelica*; Sanctus quoque Ambrosius; *Non sunt actus noui & veteris hominis miscendi*. Breuius interlinearis: *Repugnat noua vita veteri*; Quæ interpretatio non modò de Apostolis & perfectis viris intelligenda est, sed vniuersim de tota Religione Christiana, seu de singulis quibuscumque statibus & personis, licet in diuerso perfectionis gradu, ad omnes tamen spectat, om-

406 Sabbato infra Hebd. 5. post Epiph. Nemo commissurâ, &c.

nibus generatim proponitur: *Quod sicut à veteri lege, sic à veteri homine, unicuique est abstinendum in suo statu.*

Quæ quidem Veritas & ad excellentiam Christianæ religionis demonstrandam, & ad communem quamdam perfectionis praxim declarandam, plurimum facit.

Ratio autem Veritatis propositæ tam manifesta est & aperta ex sacris Scripturis, ut sit fide magis opus, quam discursu. Nam vnâ prorsus eademque lege, lex vetus, & vetus homo proscripta sunt & antiquata, unde si de vno credis, credas necesse est de alio, aut de utroque dubitabis.

Quid est enim quod modo Circumcisio, Purificatio, aliæque ceremoniæ, & sacrificia Iudæorum non vsurpantur, nisi quod nouâ lege Christianâ, cuius erant vmbra & figuræ, ut toties monet Apostolus, abrogentur? Neque enim de se mala erant; absit cogitare, cum à Deo fuerint ordinata & præscripta; sed ideo tantum erant bona, quia præscripta & ordinata; unde cum iam non ordinentur, imò cum iam sint vetita & prohibita, non vsurpantur, atque idcirco non vsurpantur, quia nunc à noua lege proscripta sunt. *Ecce ego Paulus dico vobis, quoniam si circumcidamini, Christus vobis nihil proderit. Euacuati estis à Christo, qui in lege iustificamini, à gratia excidistis: NAM in Christo Iesu neque Circumcisio aliquid valet, neque præputium, sed fides quæ per Caritatem operatur. VOS in libertatem vocati estis, ab illa scilicet veteri lege, quæ erat seruorum, & seruitutem seruiebat durissimam. Nonne hoc credis? nonne Iudaismum detestaris? nonne illum tam alienum à Christiano putas, ut qui vel tantillum iudaizaret, non omnino esset Christianus? Gratias tibi Christe Iesu, cui debemus hoc, quod credimus, & quod profiteamur.*

II. PUNCTVM.

SED eadem ipsâ lege Christianâ, vetus homo est proscriptus & abiuratus.

Hoc attentius est considerandum, & primò expende quid sit vetus homo, nempe inclinatio naturæ nostræ corruptæ ad bonum sensuale, ad honores, ad commoda, & delectationem sensuum; vno verbo Concupiscentia est deprauata, quam à veteri homine, id est, Adamo nascentes accepimus. *Peccante primo ho-*

mine, inquit sanctus Augustinus, vitium pro natura inoleuit.

In Iam.

Secundò aduerte, quod tamen si habitualis illa concupiscentia radix est malorum omnium, propriè tamen malum eius, de quo hic agitur, non est nisi in actu voluntario, quando scilicet motum inordinatum volentes sequimur: atque adeo, hoc est propriè quod in Propositione dicitur esse proscriptum lege Christianà, ne scilicet illum naturæ corruptæ motum sequamur. Hoc est quod ait Apostolus, *veterem hominem nostrum simul cum Christi* Rom. 6: *sto crucifixum esse, ut destruat corpus peccati, & ultra non seruiamus peccato.* Sicut enim crucifixus ita ligatus est vt se mouere non possit motu naturali: Ita quilibet Christianus lege Christi sic obligatus est, vt se mouere non debeat motu quouis inordinato naturæ deprauatæ. Hoc est quod idem ait, *nos mortuos esse cum Christo, simulque cum illo resurgentes viuere Deo*; quia perinde debemus abstinere motibus vitæ sensualis, ac si omnino essemus mortui. Talis autem mors vitæ est, vitæ spiritualis, vitæ diuina, vnde tandem concludit. *Non ergo regnet peccatum in vestro mortali corpore, vt obediatis concupiscentiis eius: sed neque exhibeatis membra vestra, arma iniquitatis peccato, sed exhibete vos Deo, tamquam ex mortuis viuentes, & membra vestra arma iustitiæ Deo.* Quod & alibi expressius; *Qui sunt Christi, carnem suam crucifixerunt cum vitiis & concupiscentiis.* Gal. 5:

Tertiò denique Considera, quàm verè & certò, eadem lege Christiana veterur hic verus homo, quàm lex ipsa vetus prohibetur; Non potest autem euidentius id demonstrari, quam quod iisdem planè verbis eodémque sensu Apostolus indiscriminatim de vtroque loquitur, & vtrumque simul se exuisse asserit, cum se vnum exuisse dicit; Nec aliter scimus Apostolum mundo & carni non viuere, quàm quibus verbis scimus, illum legi Iudaicæ mortuum esse. Ad vtrumque enim hæc & similia quæ passim habet in epistolis, referuntur. *Ego per legem, legi mortuus sum,* Gal. 2: *vt Deo viuam. Christo confixus sum cruci; Vno autem iam non ego, viuit verò in me Christus.* Et post multa ibidem in hunc sensum relata: *Mihi autem absit gloriari, nisi in cruce Domini nostri Iesu* Ibid. 6: *Christi, per quem mihi mundus crucifixus est, & ego mundo. In Christo enim Iesu, neque circumcisio aliquid valet, neque præputium, sed noua creatura; Et quicumque hanc regulam sequuti fuerint, pax super illos, & misericordia, & super Israel Dei. De cetero nemo mihi mole-*

stus sit, ego enim stigmata Domini Iesu in corpore meo porto.

Phil. 3.

Itemque alibi luculentè. Quæ mihi fuerunt lucra, hæc arbitratus sum propter Christum detrimenta; verumtamen existimo omnia detrimentum esse propter eminentem scientiam Iesu Christi Domini mei, propter quem omnia detrimentum feci, & arbitror ut stercorea, ut Christum lucrificam.

Quid putas Apostolum his velle verbis? Quomodo hæc interpretaris? Vide antecedentia & consequentia, consule quos volueris Patres, antiquos atque novos Interpretes, & unâ omnium voce disces hæc Apostoli verba, tam de lege veteri, quàm de veteri homine in proprio & literali, ut vocant, sensu esse intelligenda, quia utrumque scilicet vnum & idem est; nec aliter intelligitur quemquam esse Christi seu Christianum, quàm si utrumque exuerit, & legem & hominem veterem: utrique mortuus sit, utroque sit liberatus, & pro utroque vnum sibi esse Christum profiteatur. Nam quod de se ait Apostolus, hoc de omnibus ita esse oportere planè affirmat: *Quicumque in Christo baptisati estis, Christum induistis; Non est Iudæus, neque Græcus, non est servus neque liber, non est masculus, neque femina. Omnes enim vos vnum estis in Christo Iesu.*

Gal. 3.

O Christianam nobilitatem! O quis mente comprehendat, quid sit Christum induisse! quid cum Ipso vnum esse!

III. P V N C T V M.

SICUT ergo à veteri lege, sic à veteri homine, unicuique Christiano est abstinendum; Cum par utriusque simul eadem lege novâ, quæ dicitur Gratia & Libertatis sit abrogatio & condemnatio: Idcirco enim dicitur Lex Gratia, quia reuera ex se gratiam continet atque offert, quâ non minùs homo iste vetus exuatur, quàm lex ipsa Mosaica deferatur; ac proinde etiam longè maior est obligatio ex lege illa gratia veterem hominem exuendi, & omnis reprimendæ concupiscentiæ, quàm esset ex lege scripta, quæ licet vetaret concupiscentiam & omne peccatum inde procedens, non tamen conferebat gratiam quam lex nova confert ad hunc effectum: *Lex, inquit, per Moysen data est, Gratia & Veritas per Iesum Christum facta est.* Quod sanctus Augustinus sic exponit: *Non erat ista gratia in veteri testamento, lex enim*

Joan. 1.

enim minabatur non opitulabatur, iubebat non sanabat, languorem ostendebat non auferbat, sed preparabat medico venturo cum Gratia & veritate. Sic & interlinearis, verè ab eo accepimus, quia lex non tollit mala, sed ostendit & reos convincit ut humilient se medico, nempe ut se sanandos illi præstent, & præscriptis utantur ad salutem consiliis & mandatis.

Atque hoc ipsum est quod profitemur in Baptismo nos velle; Hoc est quod ibi dicitur Christum induere & novum hominem, id est profiteri se velle vivere non secundum carnem, sed secundum spiritum illum Gratia, quem tunc accipimus; Vnde nihil restat quàm id exequi quod professi sumus. Quod ut fidelius à nobis fiat & constantius observetur: Proponitur hinc obligatio, quàm sic tenemur omnes cum Divina gratia, quæ se propterea nobis offert, ad cauendos inordinatos concupiscentiæ motus, sicut ad ipsum Iudaismum execrandum. Si enim vtrumque est nobis perinde vetitum, cur non vtrumque perinde caueamus? Si de vtroque perinde cauendo dedimus fidem & spon- sionem in baptismo, cur vnum planè nolumus, & non perinde aliud? Si nolles Circumcisionem, an velles Purificationem, aut aliam ceremoniam, quàm se Iudæi expiabant? Si nolles Sacrificium expiationis facere, quo illi faciebant modo, an velles eorum holocausta? Sacrificare nolles omnino, sed cur porrò nolles; nisi quia ex æquo illa omniâ simul perinde sunt vetita? At si ergo non minùs est vetitus ille prauus concupiscentiæ motus, quo te impelli sentis in peccatum, cur non ita refugis? ita execraris?

Dices fortè, non esse tam graue peccatum, consentire concupiscentiæ, quàm Iudaismo. Sit ita sane, sed an propterea licet consentire concupiscentiæ? an putas leuiora peccata non minùs esse vetita, & fugienda, quia sunt leuiora? Facilius est illa quidem incurrere, sed non propterea liberior concessa est incurrendi facultas: imò quo propensio maior est & euidentius periculum, eo maior est adhibenda cautio ut euitetur, nec minor illa cautio esse deberet, quàm si de grauiori peccato, si de fide, si de Iudaismo ageretur. Multa quidem contrà opponet mundus, multa sensus deprauatus & inueterata consuetudo; Verum ipsa est praua concupiscentia, quæ nos sic fascinat, & infatuat, vnde hoc ipsum quod Iudæis Apostolus, nobis est

410 Sabbato infra Hebd. 5. post Epiph. Nemo commissuram, &c.

Gal. 3.

applicandum: O insensati, quis vos fascinavit non obedire veritati, ante quorum oculos IESVS CHRISTVS præsriptus est, in vobis crucifixus! En videtis ipsum Iesum velut proscriptum, vt in vobis proscribat veterem hominem; & eum reuocatis, quem proscrit; neque vos mouet ista Christi Iesu, pendentis & Crucifixi species! Perge vltius in hoc affectu.





DOMINICA VI.
POST EPIPHANIAM,
NISI SIT SEPTVAGESIMA.

PARABOLÆ GRANI SINAPIS
ET FERMENTI, QUIBVS VERITATES
EVANGELICÆ DESIGNANTVR.

*Simile est regnum cælorum grano sinapis, quod acci-
piens homo seminavit in agro suo, quod minimum
quidem est omnibus seminibus, cum autem cre-
uerit, maius est omnibus oleribus, & fit arbor.*

*Simile est regnum cælorum fermento, quod acceptum
mulier abscondit in farina satis tribus, donec fer-
mentatum est totum. Matth. 13.*

VERITAS PRACTICA.

Quò tibi veritates Euangelicæ minùs dignæ apparent
quæ considerentur, hoc ipso magis sunt conside-
randa.

RATIO EST, Quia quò minus dignæ apparent Veritates Euan-
gelicæ quæ considerentur, eo maior indicatur deprauatio tui

Iudicij vel voluntatis.

Sed quò maior est talis deprauatio, hoc ipso tibi Veritates illæ sunt magis consideranda.

Ergo & quò etiam minùs dignæ apparent quæ considerentur: Ac proinde statuendum est aliquid certius de attendenda earum Consideratione, qui est scopus vtriusque parabola in hodierno Euangelio propositæ.

I. PUNCTVM.

REGNUM Cælorum, quod grano sinapis & fermento comparatur, prædicatio Euangelij est, & notitia scripturarum, quæ ducit ad vitam, & de qua dicitur ad Iudeos: *Auferetur à vobis regnum Dei, & dabitur genti facienti fructus eius.* Sic sanctus Hieronymus, & alij passim Interpretes.

Hanc verò prædicationem Euangelij, & notitiam Scripturarum nos hîc breuiùs contrahimus in hæc Duo verba, *VERITATES EVANGELICAE*, quales sunt præsertim Illæ quæ habentur Sermone Domini in monte habito: *Beati pauperes spiritu. Beati mites, beati qui lugent, qui patiuntur propter Iustitiam,* & quæ similes supra sensum naturalem & humana Iudicia recensentur.

Sunt illæ scilicet Veritates velut granum sinapis aut fermentum, quæ res in se cum sint exigua, in magnas tamen euadunt, & miros producant effectus. Sic planè nihil vilius aut abiecius humanis apparet sensibus, quàm illæ Propositiones seu Veritates Evangelicæ; quæ si tamen attentius considerentur, si credantur firmitus, & in praxim reuocentur constantius, admirabiles in animis nostris producant fructus. Ne vnquam igitur deterrearis primo earum aspectu ab ea consideratione & æstimatione, quam merentur, *Imò quo tibi minùs apparent dignæ quæ considerentur, hoc ipso magis consideranda sunt.*

Nam vt habet allata ratio, quo minùs dignæ tibi apparent quæ considerentur, hoc ipso magis indicatur esse deprauatum tuum iudicium, vel voluntas. Cur sic enim minùs dignæ appa-

rent, nisi quia tu aliter sentis de rebus quas continent, & aliter afficeris circa id quod persuadent? Dicunt scilicet beatos pauperes, & miseros diuites: Tu qui contra sentis, miseros esse pauperes, & beatos diuites; statim reluctaris animo, & auerteris ab illis considerandis, & æstimandis, tamquam à falsis & inanibus, aut quæ omnem superent fidem. At nonne hoc indicat magnam deprauationem tui iudicii & voluntatis, ut quæ in Euangelio continentur, quæ ab ipsa Veritate & Sapientiâ pronunciantur, quæ ab vniuersa recipiuntur Ecclesia, tu homunculus nescio quis statim atque de his audis, contrarium feras iudicium; & veritatem ipsam aut falsitatis condemnes, aut minus dignam iudices, de quâ melius intelligendâ inquiras attentius & cognoscas! O intolerandam hominis audaciam! O salutarem Christi, quondam loquentis admonitionem: *Nolite Ioan. 8. iudicare secundum faciem, sed iustum iudicium iudicate.* Hinc nempe deprauatio iudicii, quando ex facie tantum seu apparentia iudicatur, sicut tu iudicas; hoc est enim iudicare secundum carnem, secundum concupiscentiam, secundum sensus naturales & humanos, qui ab obiectis lenocinantibus quàm facile corrumpuntur, tam facile & ipsi corrumpunt iudicium animi & voluntatem. *Vos secundum carnem iudicatis, SPECIES decepit te, Ibid. & concupiscentia subuertit cor tuum. Dan. 13.*

II. PUNCTVM.

SED quo maior est talis deprauatio, hoc ipso veritates Euangelicæ sunt tibi magis consideranda.

Neque enim velles in hac prauitate iudicii perstare obstinatus & contumax: satis quippe intelligis quale illud animæ & salutis detrimentum foret, si non nisi deprauato iudicio de tantis rebus sentires. Nam cum ex nostro iudicio nostri promanent affectus, ex affectibus componantur actiones, & ex nostris actionibus tota vita dependeat, tota inde à Christo iudice iudicetur; quid sequeretur ex tali tuo iudicio deprauato, nisi deprauata vita? & ex tali vita quid, nisi pessima mors, & horrendum iudicium?

Hinc ergo emergere necesse est, & tam aperto malo remedium inquirendum. Non est autem aliud præsentius cum di-

Luc. 19.

uina gratia, quàm vt has ipsas veritates attentius consideres expensis omnibus circumstantiis, quæ illas spectant, & quæ si diligenter expendantur, illas indubitatas ostendunt & certissimas. *Quia si cognouisses & tu*, inquiebat flendo Christus Dominus; *nunc autem abscondita sunt ab oculis tuis*; Quasi diceret, si serio mecum considerares, quæ tibi mala ventura sunt, profectò tu ea declinares, tu aliter de rebus iudicares & loquereris; Nunc verò cum nolis aduertere, nec te etiam malis eripies indesequentibus.

Deut. 32.

Jer. 12.

Hebr. 12.

In nocte
Nat. Dom.

Job. 21.

Sic olim Moyses: *Gens absque consilio est, & sine prudentia, uti nam saperent & intelligerent, ac nouissima prouiderent*. Sic Propheta Ieremias: *Desolatione desolata est omnis terra, quia nullus est qui recogitet corde*. Expendendum illud *recogitet*, & applicandum nostro argumento: nempe non semel cogitet, non vt primò apparet, non vt ex prima iudicatur specie seu apparentiâ; sed recogitet, id est reducat iterum ad suam mentem; Cogitet Quis Veritates Illas Euangelicas pronuntiârit! Quàm sancti, quàm omni fide digni sint qui illas recipiant! quam è contra impij & infidi qui se illis opponant! Sic Apostolus, *Recogitate eum*: Iterumque expendite, Quis ille sit qui loquatur, verbo & exemplo, quod vobis proponitur. Si enim recogitetis illum esse Christum, illum esse Deum, illum esse Veritatem infallibilem, qui nec falli potest nec fallere, quomodo non acquiescetis? Quomodo non magis illi crederis quàm mundo, quàm carnî, quàm Dæmoni qui sunt illi tantum oppositi? *Aut enim iste fallitur aut mundus errat, sed diuinam falli impossibile est sapientiam*. Quæ supra fufius ex S. Bernardo tractata sunt, hic obiter vero vt videas, quod si attentè Veritates Euangelicæ perpenderentur; deprauatum de his iudicium corrigeretur, atque idcirco etiam vt corrigatur, sic attentius esse perpenderendas.

At tu fortè minus eas expendis, ne cogaris corrigere deprauatum iudicium tuum & affectum, adeo foues & diligis hanc deprauatam mentem tuam! Sed nonne hoc est ex illis esse qui dixerunt Deo: *Recede à nobis, & scientiam viarum tuarum nolumus. Quis est omnipotens vt seruiamus ei? & quid nobis prodest si orauerimus illum?* Nemo quidem sic loquitur: sed quicumque Deum sibi loquentem in scripturis non vult audire, sic loqui dicitur.

III. PUNCTVM.

QVO tibi ergo Veritates Evangelica minus digna apparent quæ considerentur, hoc ipso magis consideranda sunt: Quia non nisi ex deprauatione Iudicij & affectus, minus dignæ apparent quæ considerentur; & non nisi ex maiori & attentiori earum Veritatum consideratione, deprauatio illa corrigi potest. Quamobrem quàm necesse est vt hæc corrigatur, tam necessaria omnino est illa maior attentio, & attentior earum consideratio. *Attendite popule meus legem meam, inclinate aurem vestram in verba oris mei. Aperiam in parabolis os meum, loquar propositiones ab initio.* Idcirco, vt ait Euangelista, *in parabolis Christus loquebatur ad turbas, & sine parabolis non loquebatur eis:* vt dum minus Ipse intelligeretur, magis acuerentur animi Auditorum ad eum intelligendum, magis ipsi inquirerent, perscrutarentur & omni modo inuestigarent, sicut & ipse admonebat, *Qui habet aures audiendi, audiat; & qui legit intelligat.* Ps. 77.
Matth. 13.
Ibid. 24.

Idcirco etiam Parabola & similitudo grani sinapis & fermenti assumitur, quia vt habet glossa interlinearis de sinapi, *quanto plus teritur, tanto plus redolet:* & fermentum non nisi multa manuum agitatione & operâ fermentatur: quæ sunt aperta Symbole nostræ mentis agitandæ, & multum versandæ circa illas Veritates, quæ non nisi diligenter, & attentè perpensæ, capiuntur.

Trahitur sapientia de oculis, inquit beatus Iob; sed quomodo trahitur nisi frequenti meditatione, desiderijs ardentibus, & incensis suspirijs? Nulla via facilior ad intelligentiam rerum diuinarum & spiritualium, sicut ille se expertum profitetur qui dicebat, *Super omnes docentes me intellexi, quia testimonia tua meditatio mea est.* Quod si laborem in meditando times, cogita illud esse pretium quo veritas emitur, iuxta illud sapientis; *Veritem eme, & noli vendere Sapientiam.* Nonne res tam pretiosa tali digna est pretio? Adde, quòd si semel Veritatum illarum intelligentiam & amorem tibi comparaueris, nullus supererit in virtutum praxi labor, nulla molestia, sed omnia tranquille fluent. Hoc tibi pollicentem audi Dominum Deum tuum, & vide quid illi respondeas: *Hæc dicit Dominus Redemptor tuus, Is. 48.* Iob 25.
Ps. 118.
Pr. 23.

416 Dominica 5. post Epiph. Parabola grani sinapis & fermenti.

sanctus Israel, ego Dominus Deus tuus; docens te utilia, gubernans te in via qua ambulas. Utinam attendisses mandata mea, facta fuisset quasi flumen pax tua, & iustitia tua sicut gurgis maris.

HVIC affinis est illa Veritas quæ supra in hac parte, Feria sexta infra hebdomadam 2. post Epiphaniam declarata est:

Si quid nos reuocat à doctrina Christi, vel ob id maximè recipienda est.

QVIA de Consideratione Veritatum opportunus hîc sermo est, opportuna hîc etiam esse posset illa Veritas quæ supra refertur 29. Decembris.

Sicut discursum nostri intellectus statim sequi debet affectus voluntatis: Ita & affectum effectus, seu exequutio.

QVOD magis in doctrina Christi refugimus, illud magis esset quærendum: seu, quod idem est, quod magis esset quærendum in doctrina Christi magis illud refugimus, quia nostri nobis placent morbi, neque his sanari volumus: vnde satis hîc apta & apposita proponi potest Veritas quæ habetur Feria 3. sequentis huius hebdomadæ:

Quod grauius in te est malum, hoc minus vis curari.

CVM in minimis rebus Euangelica includantur Mysteria, certe rerum minimarum cura nobis commendatur, quò refertur possunt hæ Veritates:

In paruis, maior est serui Dei fidelitas.

Habetur infra, Feria sexta huius sequentis hebdomadæ.

Cura rerum minimarum rem procurat omnium maximam.

Declaratur.

Veritates Evangelicae tanto magis considerande, &c. 417
Declaratur Sabbato infra hebdomadam quartam post Pentecosten, in
3. parte.

Nec magna bene, si parua malè.

In eadem 3. parte, Feria 5. infra hebdomadam octauam, ubi ha duæ
ipsa parabola de grano sinapis & fermenti exponuntur.

DE Humilitate generosa & magnifica, quæ his parabolis ob-
uelatur.

Hæc est maximè laudabilis Humilitas, quæ sic laudes
fugit, vt laudanda non omittat.

Nullus est diues, Humili quantumuis paupere, ma-
gnificentior.

Habentur amba consequenter in eadem 3. parte, Feria tertia &
quarta, infra hebdomadam duodecimam.

Quæ de Humilitate plures alibi: Vide verbo Humilitas, & in 4.
parte, Dominicam 16.



HAC HEBDOMADE, Myſteria quæ occurrunt
conſideranda, continent ſex Chriſti Domini Titulos,
ſeu Qualitates conſideratione digniſſimas, in totidem
dies.

FERIA SECUNDA DE PRIMO DOMINI IN TEMPLVM

INGRESSV, VNDE EIECIT VENDENTES,

ET VBI OSTENDIT SE SVMMVM

DOMINVM.

QVAE EST PRIMA EIVS CONSIDERANDA

QUALITAS.

418 FERIA 2. infra Hebd. 6. post Epiph. Cum fecisset, &c.
Cum fecisset quasi flagellum de funiculis, omnes eiecit de templo: & dixit, auferte ista hinc. Ioan. 2.

VERITAS PRACTICA.

Quanto minùs murmuramus, aut omninò tacemus, flagellati à Domino, tantò altiùs altissimum eius Dominium prædicamus.

RATIO EST, Quia quantò nos perfectiùs diuino Dominio subijcimus, tanto illud altiùs prædicamus.

Sed quanto minùs murmuramus, aut omnino tacemus, flagellati à Domino, tunc perfectiùs nos diuino Dominio subijcimus.

Ergo & tunc tanto illud altiùs prædicamus. Quod certè est commendandum.

I. PUNCTVM.

NONDVM in primariam Palestinæ Ciuitatem ingressus erat Dominus, ex quo cæpit inter homines conuersari, & palam omnibus prædicare; sed se in Galilæa continuerat, vbi quæcumque hætenus considerata sunt, gesta leguntur. Nunc autem, cum propè esset Pascha Iudaorum, inquit Ioan. 2. Euangelista, ascendit Iesus Ierosolymam, & inuenit in templo vendentes oues & boues, & columbas, & nummularios sedentes; & cum fecisset quasi flagellum de funiculis, omnes eiecit de templo, oues quoque & boues, & Nummulariorum effudit as, & mensas subuertit, & his qui columbas vendebant, dixit; auferte ista hinc, & nolite facere domum patris mei, domum negotiationis.

Expende singula, & mirare Potentiam, quam primo hoc ingressu Iudæis voluit manifestare. Maior hîc demonstrata est potentia, inquit Origenes, quàm in miraculo mutationis aquæ in vinum: illic enim inanimata subsistit materia, hîc vero hominum domantur ingenia. Et sanctus Hieronymus: Mihi inter omnia Domini signa, hoc videtur mirabilius, quòd homo tantopere contemptibilis illo tem-

pore: Scribis & Pharizæis contrà ſauientibus, vno flagello tantam potuit eiicere multitudinem. Igneum quiddam & ſydereum radiabat ex oculis, & Diuinitatis maiestas lucebat in facie, quando ſcilicet ſic volebat indicare ſuum Dominium & ſuam exercere Potentiam. Nunc verò licet abſens corpore, ſic ſæpe nobiſcum agit, ſic ſuum nobis manifeſtat Dominium, ſic flagellum de funiculis vanitatum, vt Propheta loquitur, ipſe facit, & eiiciens de templo cordis noſtri mundana & profana, *Auferte*, inquit, *iſta hinc*. Tum verò ad corpus ſeu externa bona, & quidquid noſtrum eſt ſe extendens, ſæpe euerit & effundit, quod male ſtruxeramus. Sic ſanctus Auguſtinus: *Prorſus ad Deum tuum, refer flagellum tuum*. Quomodo refers? quomodo ſuffers? an illum agnoſcis Dominum? an de ſummo eius Dominio ſentis & loqueris, vt ſentire par eſt? Agnoſce ex Veritate propoſita & declaranda: *Quanto enim minus murmuramus, aut omnino tacemus flagellati à Domino, tanto altius altiſſimum eius Dominium prædicamus*. If. 5.

Sic porro declaratur: Quanto perfectius Diuino nos Dominio ſubiicimus, tanto illud altius prædicamus. Tres quippe modi ſunt, quibus de Deo, diuinisſque eius Attributis quid ſentiamus, expromere poſſumus. Primus, cùm de his verba facimus, & quantum in nobis eſt dignè & magnificè coram loquimur. *Beatus, & ſolus potens, REX Regum, & Dominus Dominantium*. 1. Tim. 6.
Apoc. 17.
& 19. Secundus, cùm ipſi nos ad Deum affectum noſtrum promimus: *Domine, Domine, Rex omnipotens, in ditione enim tua cuncta ſunt poſita, & non eſt qui poſſit reſiſtere tue voluntati: Dominus omnium eſ, nec eſt qui reſiſtat maiestati tue*. Mardocheus.
Eſther 13. Tertius denique, cùm reipſa nos diuino eius Dominio ſubiicimus, tunc opere magis loquimur, quàm vllis verbis, in hac potiſſimum materia, vbi ſatis facile eſt dicere, Domine, Domine; ſed quando difficultas occurrat in colendo eius Dominio ſeu facienda voluntate, tunc reuera indicatur, quis illum agnoſcat Dominum, & quantò tùm perfectius, quis ſe Diuinæ illius Voluntati & Potestate ſubmittit, tunc altius prædicat, quàm ſit altum & ſummum eius Dominium, cui non poſſit reſiſtere, licet velit; & cui nolit reſiſtere, licet poſſit. *Seruus meus es tu, Iſrael, quia in te gloriabor*; If. 49. Quando me ſcilicet verè Dominum tuum agnoſces: Tunc enim eſt gloria Domini, quando verè agnoſcitur Dominus; Et certè magna eſt etiam ſerui gloria, ſic Dominum poſſe agnoſcere,

Ps. 105. ut inde gloriatur: *Ut confiteamur Nomini sancto tuo, & gloriemur in laude tua.*

II. PUNCTVM.

SED quanto minus murmuramus, aut omnino tacemus flagellati à Domino, tunc perfectius nos diuino eius Dominio subijcimus.

Tres sunt etiam modi, quibus hæc subiectio à tribus hominum generibus in aduersitate redditur. Primò, cum qui aduersis premuntur, dolent vehementer, & nonnihil murmurant; sed Deum tamen reuerentur, nec irrumpunt in illas blasphemias, & grauiorum murmurum voces, quas effundunt hi, qui nullo Dei timore coercentur. *Neque murmuraueritis, sicut quidam eorum murmurauerunt, & ab exterminatore perierunt:* inquit Apostolus loquens de Israelitis, quorum murmur fuit grauissimum, à quo qui se temperarit in aduersis, dicetur se subicere Deo, licet alioquin de suis ille aduersis grauiter doleat.

Secundò, cum in aduersis positi non murmurant quidem de Deo, quem Bonum & Iustum norunt, sicque se illi subiiciunt: sed dolentes de aduersitate, dolorem suum exprimunt & exprimendo augent, vel leuiunt aliquando narratione suæ miseriæ: *Hu hu me fili mi! ut quid te misimus peregrinari, lumen oculorum nostrorum, baculum senectutis nostræ!* Sic pluribus absentiam filij sui Tobias, flebat Mater.

Tertiò denique cum neque murmure, neque fletu, nec vlla vocis acerbitate mouemur in aduersis, sed vel omnino tacentes, si qui rebelles animi motus insurgant, silentio reprimimus, vel si quid loquimur, non nisi ad reprimendos alios nobis grauius indolentes loquimur: sicut Tobias pater coniugem suam admonerat: *Tace, & noli turbari, sanus est filius noster, satis fidelis est vir ille, cum quo misimus eum.* Tunc perfecta ista subiectio, tunc perfectius nos diuino Dominio subijcimus, quia sic anima & corpore atque adeo nobis totis nos illi submittimus: sic intellectum, voluntatem, & omnes affectus circa illa bona, quorum iacturam facimus, vnâ linguæ continentiam, Deo consecramus: Nam, ut ait sanctus Iacobus, *lingua constituitur in membris nostris.* Id est, sic loquimur pro vnaquaque parte corporis, aut animi nostri, quasi pars illa linguata esset, quasi lingua illic esset, quæ

ius illius partis, si forte læditur, tueatur. Quamobrem si lingua ^{Ibid.} contineatur, cæteræ omnes partes continentur. Potens est ille vir continens linguæ suæ, *etiam frano circumducere totum corpus*, ait idem sanctus Apostolus. Sicque patet quàm perfectè & integrè, dum filemus in aduersis, nos diuinæ subiicimus potestati. *Obmutui & non aperui os meum, quoniam tu fecisti.* Itane silendo ^{Ps 38.} loqueris? Itane loquendo files?

III. P V N C T V M.

QUANTO igitur minus murmuramus, aut omnino tacemus flagellati à Domino, tanto altius altissimum eius Dominium prædicamus; quia sic perfectiùs nos illi subiicimus, sicque subiecti, tacentes magis loquimur, quàm si non ita subiecti, longos de Diuino Dominio sermones haberemus. *Vide vt fileas*: Hoc im- ^{Is. 7.} primis dictum à Propheta, Regi afflictissimo, quod si seruaret, futurum certò erat, vt afflictione quantocyus liber euaderet. Hoc etiam euidenter demonstratur in beato illo Iobo, qui cum multa de Deo sanè piè & sapienter; ac nonnulla de se cum amicis suis egisset, ab ipso tamen Deo tam seuerè est admonitus, vt poenituerit loquutum esse: *Inspicenter, inquit, loquutus sum, &* ^{Iob 42.} *qua ultramodum excederent scientiam meam; Idcirco ipse me reprehendo, & ago poenitentiam in fauilla & cinere.*

Denique quid illustrius ad veritatis Confirmationem, quàm quod in Apocalypsi cuiusdam in aduersis tacenti dicitur: *Quoniam* ^{Apo. 43.} *seruasti verbum patientiæ meæ, & ego seruabo te ab hora tentationis, qua ventura est in orbem vniuersum, tentare habitantes in terra.* Tentatio illa fuit ingens persecutio sub Trajano, in qua multi fideles defecerunt à fide; neque hic forte fuisset constantior, nisi singulari Dei protectione seruatus esset; hanc vero meruit protectionem suâ patientiâ, & patientiam testatus est suo silentio; O silentium omni linguâ disertius!

Vide quàm grauitè & quàm sæpe contrà pecces; *Hæc dicit* ^{Exodi 10.} *Dominus Deus; Vsq; quò non vis subijci mihi?* Si verò numquam certiùs te illi subiicies, quàm si flagellatus taces, vsquequo murmurabis? vsquequo non filebis? An doles te à Deo patre in filium recipi? *At flagellat omnem filium quem recipit,* inquit Apo- ^{Hebr. 12.} stolus; Rursùmque alibi: *Omnia facite sine murmurationibus, &*

422 FERIA 3. infra Hebd. 6. post Epiph. Colloquium, &c.

Phil. 2. *hasitationibus ut sitis sine querela, & simplices filij Dei. Quasi diceret: hæc est certa nota, si flagellatus non murmuraueris. Quasi*
2. Pet. 1. *filij obedientia, non configurati prioribus ignorantia vestra desideris.*



FERIA TERTIA.
DE COLLOQVIO NICODEMI
CVM DOMINO IESV, QVI SE TVM VERE
MAGISTRVM OSTENDIT.

Rabbi, scimus quia à Deo venisti, Magister.
Ioan. 3.

VERITAS PRACTICA.

Qui non renuntiat omnibus, non potest esse Christi Discipulus.

RATIO hæc est inter alias, quòd oportet Christi discipulum esse docilem & tractabilem, siue ut docentem Magistrum audiat, siue ut auditis credat, seu denique ut quod credit exequatur.

Sed nisi discipulus renuntiet omnibus, non erit ita docilis.

Ergo nec erit etiam Christi discipulus: Quamobrem acceptanda renuntiatio, quæ proponitur, aut renuntiandum Christo Magistro.

I. P V N C T V M

REMANSIT in vrbe Ierosolyma, Christus Dominus per dies festos Paschæ, ibique tum pluribus editis miraculis, multos è Iudæis ad se conuertit, quos inter Nobis

Qui non renuntiat omnibus, non potest esse Christi discipulus. 423

lissimus ille est, de quo sic Euangelista sanctus Ioannes: *Erat autem homo, ex Phariſeis, Nicodemus nomine, princeps Iudaorum: hic venit ad Iesum nocte, & dixit ei; Rabbi, ſcimus quia à Deo venisti, magister, nemo enim potest hæc signa facere quæ tu facis, nisi fuerit Deus cum eo.*

Tum vero multis ei respondit Dominus Iesus, quæ videri possunt, quibus ita permotus est Nicodemus, vt se deinceps discipulum eius palam professus fuerit, & constanter pro eo contra Iudæos steterit, atque etiam Apostolis in fugam lapsis, audacter ipse cum Arimathæano Iosepho, corpus Domini Crucifixi de cruce deposuerit, & aromatibus conditum sepelierit. Ioan. 7.
Ibid. 19

Admiranda quidem huius discipuli docilitas, qui tam facilem se præstiterit suo Magistro, sed magis admiranda Magistri dignitas, autoritas, sapientia, bonitas & potentia, qui tam breui tempore tales formet discipulos. Tu tamen anime, qui hoc Magistro gaudes, vnde tam parum proficis? Fortè id defectu Veritatis propositæ, cui quantum tibi necesse esset, non te satis conformas. Vniuersalis enim est & fixa Magistri sententia, *Quidam omnis qui non renuntiat omnibus quæ possidet, non potest eius esse discipulus.* Ipse est diuinus Magister, ipsa est Veritas, quæ hoc Effatum protulit; quando nulla succurreret didici ratio, sufficit sic dictum esse vt credatur: sufficit sic imperatum esse vt impleatur. Neque verò desunt rationes, quæ id demonstrant; Atque hæc inter alias videtur expendenda; Quod oportet Christi discipulum esse docilem & tractabilem, siue vt doctorem quietè audiat, siue vt auditis non reluctanter credat, siue vt quæ credit & quæ opere complenda sunt, constanter impleat. Quæ cum de omnibus discipulis erga quemuis magistrum dici possint, tum de Christi discipulis vel maxime, quod quæ suis Christus proponit, tam sublimia sunt, & supra omnem intelligendi facultatem; vt nisi discipulus sit valde docilis, numquam dicenti credat; *Durus est hic sermo, & quis potest eum audire?* dicebant illi indociles. Adde quod, etsi audiretur, & quantum est ex parte intellectus, crederetur: durus tamen ita est sermo voluntati, vt ne repugnet dictis, docilitas tam sit necessaria, quam facilis est alioquin voluntatis repugnantia. *Et non vultis venire ad me, vt vitam habeatis!* Iorn. 6.
Ioan. 5.

Atque hinc Prophetæ, hanc præcipue docilitatem, vel futu-

If 54.
Ioan. 6.

ram prædixerunt, vel vt necessariam denuntiarunt, vnde ipse Dominus & Magister: *Est, inquit, scriptum in Prophetis, & erunt omnes docibiles Dei*; non quod omnes futuri sint tales, sed quod omnes qui velint eius esse discipuli, tales vt sint necesse sit; Numquid vis eius discipulus fieri? Numquid vis fieri, quod ita necesse est fieri, vt nisi fiat, non sis Christi discipulus?

II. P V N C T V M.

SED nisi quis renuntiet omnibus, non erit Christo docilis.

Nam primò quidem non erit docilis circa hoc primum documentum, quo iubetur à Christo renuntiare omnibus. Deinde verò si se indocilem ita præstet, vt iubenti Magistro renuntiare omnibus, non renuntiet; sed sibi reseruet aliquid vel effectum vel affectum, profectò circa hoc etiam quod reseruat erit indocilis, quando quid in particulari iubebitur quod illud spectet. Nam quamdiu erit inordinatus rei affectus, tamdiu erit indocilitas voluntatis, quæ non patietur tangi quod nimis diligit; Atque hæc indocilitas tam dura erit & pertinax, vt intellectum ad se pertrahat, & indocilem reddat ad credendum, quod alioquin facile crederet, si à peruersa voluntate non peruerteretur.

Ioan. 3.

Hoc videlicet est, quod Magister noster Nicodemum docebat dicens; *hoc est iudicium, quia lux venit in mundum, & dilexerunt homines magis tenebras, quàm lucem, erant enim eorum mala opera; omnis enim qui malè agit, odit lucem, & non venit ad lucem, vt non arguantur opera eius*. Id est, quando quis ita affectus est circa obiectum aliquod peccati, vt affectum nolit deponere: non vult cognoscere ibi esse peccatum, ne hac cognitione cogatur affectum deponere, sicque voluntas indocilis impedit intellectum, ne se docilem præstet: ac proinde nulla est docilitas animi, nisi voluntas renuntiet vel his affectibus quibus detinetur, vel his mundanis rebus, quæ tales affectus excitant & nutriunt.

Lud. 8.

Ecclesi. 32.

Hæ sunt fatales spinæ, quæ suffocant verbum Dei, ne fructum ferat: hæc sunt zizania seminata in medio tritici. Hæc est via ruinæ & via laboriosa cui non est credendum ex cōsilio Sapientis, vt non offendas in lapides, & ne ponas animæ tuæ scandalum, id est, obstacula & impedimenta fidei ac salutis.

Non

Non credes Euangelio, non credes dicenti Christo, si quid dixerit contra id quod ita diligis, & ita possides, ut ei renuntiare nolis. Testis ille adolescens, qui affixus bonis suis non credidit se reperturum thesaurum in coelo si terrena despiceret. Testes illi qui Dominum contra diuitias disputantem deridebant, qui scilicet erant auari, ut expresse refert Euangelista. Omnes illi Luc. 16; denique testes, quibus exprobrabat, *Quomodo vos potestis credere, qui gloriam ab inuicem accipitis, & gloriam qua à Deo solo est non quaritis?* Ioan. 5.

Sicut ait de stulto Sapiens; *Non recipit stultus verba prudentiae.* Pr. 13; *nisi dixeris ea qua versantur in corde suo*: Ita planè de omni inordinato affectu; Vix aliud persuaderi potest quàm quod diligitur. Præoccupata Mens est quæ vix ulli locum relinquat rationi & fidei. Nauis est anchora & funibus alligata certo cuidam loco, unde se mouere non potest, quocumque aspirante vento. Non est hoc esse tractabilem, non est hoc esse docilem, Væ nobis si tales habuissimus Apostolos.

III. PUNCTVM.

QUI non ergo renuntiat omnibus, non potest esse Christi Discipulus, Quia non potest esse docilis, qualem oportet esse Christi discipulum: Vnde pridem Isaias, *Quem docebit scientiam, & quem intelligere faciet auditum?* Is. 28. *Ablactatos à lacte, auulsos ab ubribus.* Hi nempe sunt dociles qui sunt à suis abstracti cupiditatibus, qui nulla re interna vel externa detinentur quin audiant & sequantur docentem Christum, qui propterea suis dicebat: *Si vos manseritis in sermone meo, verè discipuli mei eritis.* Ioan. 8. *& cognoscetis veritatem, & veritas liberabit uas.* Quasi diceret, multi se dicunt discipulos meos, aut tales apparent, qui verè non sunt. Nam hi verè sunt discipuli, qui cum audierint sermonem meum, se ita dociles reddunt, ut ei credant & acquiescant, quia sic à me audierunt, licet non capiant, licet non intelligant, hoc vnum sciunt, quod Christus hoc dixerit & imperarit, & satis illis est ad obsequendum. Tum verò illi post cognoscent veritatem quam non intellexerant, antequam crederent: & cognita veritas ita confirmabit eos in fide & charitate, ut planè liberet intellectum non modò ab omni errore contrario, & voluntatem

426 FERIA 3. infra Hebd. 6. post Epiph. Colloquium Nicomedi, &c.

ab omni affectu opposito ; sed etiam ab aduersariis , & his inimicis qui contrà solent eos impugnare. Vide in 2. parte , FERIA 2. infra Hebdomadam 4. post Pascha, ubi hæc proponitur Veritas: Non est prius intelligendum vt credas , sed primo credendum est , vt post intelligas.

17. 50. Egregia verò est huius perfectæ docilitatis & renuntiationis forma in Propheta qui de se ait , aut de Christo in persona sua. *Dominus meus aperuit mihi aurem , ego autem non contradico , retrorsum non abiij , corpus meum dedi percutientibus , & genas meas velentibus : faciem meam non auerti ab increpantibus , & conspuentibus in me : Dominus Deus auxiliator meus , ideo non sum confusus : Ideo posui faciem meam vt petram durissimam , & scio quoniam non confundar ; Iuxta est qui iustificat me , quis contradicet mihi ? stemus simul , quis est aduersarius meus ? accedat ad me , ecce Dominus Deus auxiliator meus , quis est qui condemnet me ?*

In his enim tria sunt , quæ rem omnem conficiant. Primum est docilitas intellectus ; *Ego autem non contradico*. Deinde voluntatis in rebus difficillimis , & ubi apparet manifesta renuntiatio rerum carissimarum. *Corpus meum dedi percutientibus*. Denique si quid contrà intellectui & voluntati opponatur , hoc vnum responderi debet , quia sic Dominus verbo & exemplo & auxilio , quo vno duce fretus nihil expauescat. Quid enim opponi possit contra verum Christi discipulum , quod non ipsi Christo posset opponi ? At quid Christo possit opponi , quod non verus eius discipulus velit profiteri ? *Non est discipulus super Magistrum , nec seruus super Dominum suum , sufficit discipulo , vt sit sicut Magister eius , & seruo sicut Dominus eius*. Velleſne supra esse ? Ergo aut infra , aut sicut ille : sicut ille suis omnibus renuntiavit ; sic te oportet tuis , ne sit supra Magistrum Discipulus.



FERIA QVARTA.

DE ACCVSATIS A PHARISÆIS, APOSTOLIS , QVOS CHRISTVS DOMINVS

Qui nimis humana timet iudicia, non satis reueretur, &c. 427.

VT SUPREMVSVS IVDEX ABSOLVIT,

ET ACCVSANTES

CONDEMNAT.

Ecce quid faciunt discipuli tui Sabbatis, quod non licet. Marc. 2.

VERITAS PRACTICA.

Qui nimis humana timet iudicia, non satis reueretur Diuina.

RATIO EST, Quia qui nimis humana timet iudicia, hoc timore sepius permouetur ad omittendum vel committendum aliquid contra Deum.

Sed quisquis ita permouetur contra Deum, non reueretur diuina Iudicia.

Ergo neque ille qui nimis humana timet. Et tamen quanti sunt in hoc nimio & peruerso timore?

I. P V N C T V M.

IN id vnum videbantur intenti Pharisei, vt modò accusarent Magistrum apud discipulos: modò discipulos apud Magistrum: *Quare cum publicanis & peccatoribus Math. 9. manducat Magister vester?* Sic paulò autè audiuius eos de Magistro conquerentes. Nunc verò cum fortè discipuli Sabbato per sata, siue per segetes iter haberent, & famem euulsis manu spicis solarentur: *Ecce, inquiunt, discipuli tui faciunt quod non licet.* At Dominus factorum omnium & dictorum Cognitor ac supremus Iudex, latâ sententiâ declarat innocentes discipulos: Et accusatos absoluens, condemnat Phariseos accusantes. *Sic Act. 10. ipse est constitutus à Deo Iudex viuorum & mortuorum. SIC ipse est 15. 33. Dominus Iudex noster, Legifer noster, Rex noster, Sic ipse denique de se ipso: Pater omne iudicium dedit Filio, vt honorificent Ioan. 5.*

Hhh ij

428 FERIA 4. infra Hebdomadam 6. post Epiphaniam. Ecce quid faciunt, &c.
omnes Filium, sicut honorificant patrem.

Honorem illi exhibe ut Iudici, agnosce quam perfecte possideat omnes Iudicis partes seu qualitates; Iurisdictionem, Scientiam, Aequitatem & alias. O summe Iudex, quis de his dubitet? Et tamen anime quam parum reueremur eius iudicia! *Certe quæ nimis humana timet, non satis reueretur diuina.* Et aperte sentimus, quantum humana timeamus.

Inordinatus utrimque timor, & quâ parte deficit, & quâ excedit. Ad suum itaque medium ut reuocetur, expende quid sit quod quæ nimis humana timet iudicia, non satis reueretur diuina. Nempe hoc habet humanus timor, ut ne incidat in hominum iudicia, multa committat vel omittat contra diuinas leges. Sunt enim hæc diuinæ leges vel positivæ omnes, vel negativæ, id est vel aliquid præcipiunt faciendum, vel prohibent ne quid fiat. In utroque autem sæpe aliter sentiunt & iudicant homines, ac diuinæ ferunt leges: sæpe homines damnant, quod probat & præcipit Deus; sæpe etiam id est gratius hominibus, quod odiosum est Deo: *Non enim cogitationes meæ, cogitationes vestrae: neque via vestra, via mea, dicit Dominus.* Atque hinc fit, ut qui nimis humana timet iudicia, omittat illud quod præcipit Deus, vel committat quo prohibet, ne humano videlicet damnetur iudicio. *Dilexerunt, inquit, gloriam hominum magis, quam gloriam Dei;* Id est, maluerunt placere hominibus, aut magis timuerunt illis displicere, quam Deo. Vnde licet crederent Christo, non audebant tamen propter Pharizæos confiteri, *ut è Synagoga non ejicerentur;* O peruersum timorem! *Timidis & incredulis pars illorum erit in stagno ardenti igne.*

II. PUNCTVM.

SED quisquis ita mouetur contra Deum, ut vel omittat quod præcipit, vel committat quod prohibet, non satis reueretur diuina iudicia.

Imò nec omnino reueretur, cum aperte peccet in Deum, & ideo tantum peccet, ut placeat vel ne displiceat hominibus. Tum enim duo simul concurrunt, quæ diuinam offensionem augent, vel plurimum. Primum est culpa, quæ vel omissione

Qui nimis humana timet iudicia, non satis reueretur, &c. 429

vel commissione contrahitur. Alterum est causa culpæ, nempe hominum maior metus & cultus, quàm Dei, quod postremum per se solū valde iniuriosum est Deo. *Quid est homo, inquit Sapiēs, Ecclesi. 18. & quæ est gratia illius? Et quid est bonum aut quid nequam illius?* Quasi diceret, quid sperandum boni, aut timendum mali ab homine, quod non magis à Deo speretur vel timeatur? Vnde si quis spe aliqua boni, vel timore mali prætulit hominem Deo, Deum valde offendit, à quo longè alia speranda essent bona, vel timenda mala. *De ore tuo te iudico serue nequam: hoc illi di-* Luc. 19.
uinus dicet Iudex, nempe qui timore mali permoueris, quare non magis timuisti malum, quod à me tibi grauius imminebat, quàm ab illo quem mihi prætulisti?

Atque hinc sententia damnationis, quæ iam prolata est, *Duplicate dupliciā secundum opera eius: in poculo quo miscuit, miscete illi duplum.* Id est, augete illi duplo poenam pro illo peccato, quod timore hominum fecit, duplicetur poena damni, duplicetur poena sensus & omnia duplicentur, quia nimis timuit timendo homines, & non satis timuit non timendo Deum. Apoc. 18.

Satinne hæc graua & pauenda, vt agnoscas quàm grauius se offensum propterea demonstret Deus, quod humano metu offendatur?

III. PUNCTVM.

QVI nimis igitur humana timet iudicia, non satis reueretur diuina; Cum ex humano illo metu multa peccet in Deum, quæ tanto certè grauiora sunt, quanto Deus magis erat timendus, quàm homo cui præfertur. *Dico vobis amicis meis ne terreamini* Luc. 12.
ab his qui occidunt corpus, & post hæc non habent amplius quid faciant: ostendam autem vobis quem timeatis, timete eum qui postquam occiderit, habet potestatem mittere in gehennam: ita dico vobis hunc timete.

Sic timebat ille qui ab amicis importunè sollicitatus, vt contra religionem humanis se tantisper accommodaret iudiciis; *Et si, inquit, in presenti tempore supplicii hominum eripiar, sed Eleazarus* 2. M. 1. 6.
manum omnipotentis nec viuus nec defunctus effugiam. Sic de aliis Martyribus S. Ambrosius explicans illud Dauidis, *Principes per-* Ps. 118.
secuti sunt me gratis, & à verbis tuis trepidauit cor meum. PONE,

430 FERIA 4. infra Hebdom. 6. post Epiph. Ecce quid, &c.

inquit, martyrem inter pericula constitutum, cum inde immanitas bestiarum ad incutiendum tremorem infremat, aliunde stridor can-
dentium laminarum & flamma fornacis ardentis exastuet: ex parte
alia personent tractus grauium catenarum, hinc carnifex cruentus as-
stat. Pone inquam circumspectantem omnia plena suppliciis, deinde
cogitantem mandata diuina, illum ignem perpetuum, illud sine fine in-
cendium perfidorum, illam pœna recrudescentis arumnam; trepidare
corde, ne dum presentibus cedat, perpetuis se dedat exitiis; pertur-
bari animo, dum futuri iudicij romphæam illam terribilem, quadam
conspetus specie contuetur.

Hoc est scilicet remedium inordinati timoris humani, diu-
num sibi grauiorem proponere; Neque id verò tantum, cum
de fide agitur, sed in quolibet peccati casu, qui frequentissimus
Prois. 29. est timenti nimis homines, iuxta illud Sapientis; *Qui timet ho-*
I. Cor. 4. *minem, cito corruet.* Ah quoties sic corruisti? Expende; Sic porro
Apostolus se contrà muniebat: *mihi pro minimo est ut à vobis iu-*
Gal. 1. *dicar, aut ab humano die, sed neque meipsum iudico: qui autem iu-*
I. Thess. 2. *dicat me, Dominus est; Et alibi. An quero hominibus placere? si*
adhuc hominibus placerem, Christi seruus non essem. Rursusque
idem, *Ita loquimur non quasi hominibus placentes, sed Deo qui pro-*
bat corda nostra.

Omnino vide libri tertij de Imit. Chr. caput tricesimum sex-
Pf. 118. tum. Et frequenter ora cum Dauide: *iudica iudicium meum,*
& redime me.



FERIA QVINTA.
DE SANITATE RESTITVTA
OMNIBVS AD CHRISTVM ACCEDENTIBVS,
QVI SE MEDICVM ANIMARVM
AEQVE AC CORPORVM FECIT.

Multos enim sanabat, itaut irruerent in eum, ut

Quod grauius in te est malum, minùs vis sanari. 431
eum tangerent, quotquot habebant plagas.
Marci 3.

VERITAS PRACTICA.

Frustra multiplicas medicamina, sanitas non erit tibi; Ier. 46.

Quod grauius in te est malum, hoc minùs vis sanari.

RATIO postrema partis quæ sola difficultatem habet, hæc est inter alias, quia quod grauius in te malum est, quòdque maximè Medicus tuus Christus sanare vult, est affectio quædam vehementior.

Sed illa est, quam minus vis sanari, & in qua curanda magis ei resistis.

Ergo & quod grauius in te est malum, hoc minùs vis sanari; ac proinde illud Ieremiæ facile sequitur: frustra multiplicas medicamina; sanitas non erit tibi. Quod certè est expauescendum.

I. PUNCTVM.

FREQUENTISSIMA est & penè quotidiana representatio sanitatis restitutæ à Christo Domino variis agris, & malè habentibus quocumque genere morbi: Verùm hic apparent tria, quæ considerationem nostram præcipuè figant & detineant in hac materia. Primum est quod *Matth. 12.*
cùm Dominus ingressus esset Synagogam die Sabbati, ibique *Marc. 3.*
homo esset habens manum aridam, obseruabant Dominum aduersarij, si Sabbatis curaret, vt accusarent illum. Tùm verò *Luc. 6.*
Iesus hominem in medium venire iussit, & vt luculentior esset sanitatis restitutio, coram omnibus eum sanat, docètque omnes, adeo nihil esse, quod arguatur si sanandis morbis operetur die festo, vt vel maximè tam pium & religiosum opus tum sit

patrandum. Quo sanè dicto & facto si vnquam alias, Medicum sese professus est, & hanc beneficentiæ suæ exercitationem quanti æstimaret, planè indicauit.

Secundum verò quod aduertat; cùm nihilominus Pharizæi non desinerent murmurare, infrendere, & grauius aliquid meditari contra Dominum Iesum; ne fortè propterea retardarentur Infirmi ab eo conueniendo, secessit inde in commodiorem locum, quò statim omnes malè habentes confluxerunt & sanati sunt. Tertium denique, tanta erat sanitatis recipiendæ facilitas, vt si vel leuiter eum tangerent, illico corpore curarentur & animo. O potentiam medici! ô bonitatem! quid est ergo anima mea, cur nondum sanati sumus, qui tam frequenter ad illum ipsum medicum accedimus, & tam multa medicamina sumimus? Audi & contremisce: *Quod grauius in te est malum, hoc minus vis sanari.* Frustra multiplicas medicamina, frustra medicum consulis, quia quem vellet magis sanare morbum, tu contra reniteris, atque in hoc sanando morbo, magis ei resistis.

Quod sanè si verum est, vides quàm sit luctuosum & tremendum: Quam verò id sit verum, aperta est ratio; Quia quod grauius in nobis est malum, est affectio quædam vehementior circa quoduis obiectum, siue sit complacentiæ, siue displicentiæ & auersionis, siue in vanitatem alliciat, siue in voluptatem, aut in terrenas commoditates, siue in amicitiam personarum, siue in odium; quæcumque tandem sit illa vehementior animi affectio, tu ipse videris, illa est grauius animi malum, quia magis damnoſa est, magis intrinseca est, magis cognita, magis voluntaria, magis occupat animum, magis intellectum obstruit, magis voluntatem acuit ad crebriores, & vehementiores actus producidos, magis memoriam replet, & cæteras omnes animi operationes in se transformat. *Transierunt in affectum cordis*: hæc est prauitas cordis, hæc est propria concupiscentia, iuxta quam ambulare dicuntur, qui ambulant in interitum suum; hoc est peccatum ad mortem, de quo sanctus Ioannes, & de quo ipse Dominus: In peccato vestro moriemini, nisi scilicet opportunum adhibeatis remedium.

146. 1.

2. Pet. 3.

1. Ioan. 5.

Ioan. 8.

Ac propterea facile est cogitare, quàm prima & præcipua hæc sit cura Medici animarum Iesu, circa hoc grauius malum. Siue enim suam gloriam respiciat in curatione animæ, siue ipsius animæ

animæ bonum; certè vtriusque interest, vt quod est grauius primò curetur. Nam, vt ait Sapiens, *languor prolixus grauat medicum: Breuem languorem præcidit medicus*, Id est, peritus in hac arte, in hoc ostendit peritiam suam, si præcidat morbum: præcidit autem, cum ad radicem & grauitatem mali quamprimùm se applicat. Vnde licet minores quidam morbi augeantur, si tamen curetur grauior, tum curari & sanari infirmus dicitur. Sic planè in morbis animi, sic præciduntur, quando quod est in infirmo grauius primò curatur, sicque etiam permittuntur minora quædam mala, vt grauiora sanentur; Quod expressè sanctus Thomas post sanctum Augustinum, refert de peccato immunditiæ ad remedium latentis superbix; quæ vix alioquin curetur. Numquid is forte est grauior morbus tuus? Numquid à superbia vel voluptate, plaga tua damnosior? *Vide vias tuas in conualle; scito quid feceris, cursor leuis explicans alas suas.*

Ecclesi 10.

2.2. q.162.

a.6. ad 3.

Ier. 21.

II. PUNCTVM.

SED illa est affectio, ille est morbus, quem minus vis sanari, & in quo curando magis resistis Christo.

Nam illa ipsa ratio seu causa, quâ fit vt affectio illa sit in te vehementior, facit etiam vt in ea curanda magis resistas. Quænam est enim illa causa, nisi natura deprauata, seu inclinatio naturalis & temperamentum proprium, quo in illud connaturale obiectum magis moueris, quàm in aliud? Atqui illa ipsa est naturalis inclinatio, quæ sese opponit remediis, & quò est naturaliter vehementior, eo vehementiùs sese opponit. Quod est enim magis naturale & proprium, tam alte infixum est & insitum in ipso animo, vt vix deponi possit; vix suadetur esse malum, vix aduertitur quoties in illud peccetur; vix creditur fieri posse etiam cum gratia, vt inde animus auertatur; adeo placet illud obiectum, vel oppositum displicet, vt statim ex proposita specie, affectio moueatur in amorem vel odium, vnde ceteræ passionis excitantur, quibus ita implicatur animus, vt vix locus supersit Gratix & libertati ad recipiendam sanitatem.

Cum sanare vellem Israel, reuelata est iniquitas Ephraim, & malitia Samaria, quia operati sunt mendacium, & fur ingressus est spoliatus, latrunculus foris.

os 7.

Tria ista, *Israel, Ephraim & Samaria*, pro eodem à Propheta ponuntur: & sensus est, tunc apparere iniquitatem & malitiam peccatoris, cum sanatur à Deo: quia cum sanare vellet Deus quod in ipso grauius est, in hoc ipso magis ei resistit, quod est propriè, & verè esse malum seu iniquum & peccatorem grauissimum. Deinde verò quia peccator petit à Deo sanitatem, & nonnulla etiam sibi facere videtur ad hunc finem, quia tamen non facit quæ vellet Deus, idcirco operatur mendacium, mendax est & simulatus in sua illa prætenta voluntate sanitatis. Denique fur est intus, & latrunculus foris, id est naturalis inclinatio, & obiectum connaturale, quæ duo simul tam aptè inter se conueniunt, & colligantur, vt expugnent & spolient omnem gratiam, & remedia quæuis excludant.

Et certè quid efficacius Superbo, quam humiliatio? quid Indeuoto aptius quam Oratio? quid Gulofo, quid Auaro quàm temperantia & liberalitas? At propone sua vnique remedia, nonne tum illi excandescunt, nonne in Medicum efferentur? quia scilicet nihil minùs volunt, quàm quod inclinationi naturali magis repugnat, cum tamen nihil sit aptius ad illam curandam, quàm quod ipsi repugnat. Nonne hinc euidenter patet, illum esse morbum, quem minùs sanari volumus, & in quo curando magis Christo resistimus? Numquid te miserum crederes, si te Christus desereret! At tu si Christum curantem deseris, numquid times te deserendum?

III. PUNCTVM.

QUOD grauius igitur in te est malum, & in quo curando maxime Christus elaborat, hoc minùs sanari vis. Quia illa tua est auctio naturalis vehementior cui sanandæ opposita remedia magis conueniunt, & illa sunt quæ minùs libenter recipis. *Cælestis medicus*, inquit S. Gregorius Papa, *singulis quibusque vitiis obuiantia adhibet medicamenta. Nam sicut arte medicina calida frigidis, frigida calidis curantur: ita Dominus noster contraria opposuit medicamenta peccatis, vt lubricis continentiam, tenacibus largitatem, iracundis mansuetudinem, elatis præciperet humilitatem.*

Pateretur quidem lubricus se humiliari, & elatus continentiam fortè non recusaret: sed lubrico persanando necessaria

est continentia; & elato humilitas; alioquin neuter sanabitur. Et quamdiu quisque, quod sibi est necessarium ad sanitatem reculabit, non potest dici velle sanari, quantoque acrius id recusabit, tanto dicetur verius sanari nolle. Quaecumque porro alia sibi conquirat remedia, frustra conquirat, frustra multiplicat; *sanitas non erit ei*, quia non est sanitas nisi per remedia opportuna; cum vero non sint opportuna nisi quæ sunt opposita morbo, frustra conquirat alia.

Hæc dicit Dominus; insanabilis fractura tua, pessima plaga tua, Ier. 30. curationum utilitas non est tibi, quid clamas super contritione tua? insanabilis est dolor tuus: Non quidem Deo, si vterere remediis quæ tibi offert, sed tibi est insanabilis, qui hæc fugiendo remedia, putas te posse curari aliis; Itane ageres in ægritudine corporis? Itane tibi corpus, plusquam anima; terra plusquam coelum; & tempus plusquam æternitas? Hæc reuolue attentius: & in tua infirmitate ne despicias teipsum, sed ora Dominum, & Eccles. 38. ipse curabit te. Auerte à delicto, & dirige manus, & ab omni delicto munda cor tuum. Hæc si dicuntur à Scriptura pro sanitate Serm. 64. corporis, quanto magis pro salute animæ? Si tanta cura agitur, de verbis Dom. ut aliquando plus viuatur, inquit sanctus Augustinus, quomodo agendum est, ut semper viuatur?

Vide in 3. parte, Feria quinta infra hebdomadam nonam.



FERIA SEXTA.

DE PRODVCTO AB EVANGELISTA,

PROPHETÆ TESTIMONIO, IN QVO

DOMINVS ELECTVS DEI

SERVVS DECLARATVR.

Ecce puer meus quem elegi, dilectus meus in quo benè complacuit anima mea. Matth. 12.

Ecce seruus meus suscipiam eum, electus meus,

436 FERIA 6. infra Hebd. 6. post Epiph. Ecce puer meus, &c.
complacuit sibi in illo anima mea. Is. 42.

VERITAS PRACTICA.

In paruis, maior est serui Dei fidelitas.

*RATIO EST, Quia tunc maior videtur esse serui fidelitas,
quando is constantius, & purius Domini sui rationes respicit,
& non suas.*

Sed in paruis præcipue rebus hæc præstat seruus Dei.

*Ergo in paruis maior est serui Dei fidelitas: quæ proinde præstanda
est ut debetur.*

I. PUNCTVM.

CONSPIRANTIBVS contra Iesum Pharizæis, secessit aliò Dominus, & secuti sunt eum multi, quos omnes curauit, ut supra visum est. His verò enarratis addit Euangelista; Et præcepit eis, ne manifestum eum facerent, ut adimpleretur quod dictum est per Isaiam Prophetam dicentem: Ecce puer meus, quem elegi dilectus meus, in quo benè complacuit anima mea, ponam spiritum meum super eum, & Iudicium gentibus nuntiabit: non contendet, neque clamabit, neque audiet aliquis in plateis vocem eius: arundinem quassatam non confringet, & linum fumigans non extinguet, donec eiiciat ad victoriam iudicium; & in nomine eius gentes sperabunt.

In quo quidem Prophetæ testimonio cum multa consideratione dignissima; tum illud præsertim, quod Dominus electus Dei Puer seu Seruus declaratur in rebus valde exiguis. Quid est enim illud, secessisse aliò, nec se manifestari velle, ut propterea fuerit adimpletum, quod Propheta prædixerat, futurum eum electum Dei seruum? Reuera quidem adimpleuit, quod prædictum fuit, non contendit, non clamauit, non resistit repugnantibus sibi Pharizæis, cessit temporis, cessit inuidiæ, nihil contrà retulit. Sed adeone magnum est & Diuinum non contendere, non clamare, non audiri, ut propterea Dominus sin-

gulariter ELECTVS DEI SERVVS appelletur? Sic planè est; *In parvis maior est serui Dei fidelitas.* Quod de Christo iam patet ex illo testimonio: de nobis autem hac ratione declaratur.

In confesso est apud omnes, quod in eo potissimum consistat serui fidelitas, si constanter & purè Domini sui rationes respiciat & non suas; atque adeo quo is constantius & purius sic se geret erga Dominum suum, eo fidelior seruus & carior semper habebitur.

Duo hæc indiuisim requiruntur, constantia & puritas. Constantia quidem, quia longè aliud est per plures annos integritatem suam probasse, quàm per aliquot dies aut menses. Longè aliud est in multis aut quotidianis negotiis, quàm in vno aut altero: longè aliud denique semper fuisse integrum, quàm aliquoties. Sic se Iacob Socero suo Labano probabat: *Viginti annis fui tecum: oues tue & caprae steriles non fuerunt, arietes gregis tui non comedi, nec captum à bestia ostendi tibi, ego damnum omne reddebam, quidquid furto peribat, à me exigebas, die noctuque, assu urebar & gelu, fugiebátque somnus ab oculis meis, sicque per viginti annos in domo tua tibi seruiui.* Hoc est esse constantem, hoc est esse fidelem ex hac parte. Gen. 31.

Iam verò ex alia, Puritas æquè attenditur, quando scilicet seruus non tam mandata respicit, quàm ipsum mandantem. Nam in mandatis spectari potest commoditas, vel incommoditas, honor vel ignominia, facilitas vel difficultas; Qui verò suis commodis aut incommodis permouetur, longè abest ab illa fidelitate serui, qui solas Domini rationes respicit nullà sui habita ratione; nec tam ille seruit Domino suo quàm suis commodis. Esto id omne exequatur, quod mandat Dominus, quia tamen dum in mandato respicit facilitatem & honorem, atque id propterea libentius exequitur, quàm si difficile esset aut probrosum; certè multum detrahit de integritate fidelis serui, præsertim apud Deum, qui animum potius respicit, quo res fiunt, quàm res ipsas. Sic sanctus Hieronymus ad Celentiam: *Prudentissimus est, inquit, qui non tam considerat, quod iussu est, quàm illum qui iusserit, nec quantitatem imperij, sed imperantis cogitat dignitatem.* Ep. 10. In imperante, Deum; in imperio autem sese homo attendit, Qualis vero distantia est Dei & hominis, tale est eius serui disci-

438 FERIA 6. infra Hebd. 6. post Epiph. Ecce puer meus, &c.
men qui pure Deum respicit, & eius qui non ita Deum spectat
in omnibus.

II. PUNCTVM.

SED in paruis præcipuè rebus hoc præstat seruus Dei, id est manife-
stius se ostendit constantem & se purè respicere Mandantem po-
tius, quàm mandata.

Nam primò de constantia, cum frequentius occurrant parua
quàm magna, certè in paruis etiam facilius est se constantem
probare, quàm in magnis; Esto enim occurrant aliquando ma-
gna, in quibus sis fidelis; at cum dictum sit, non ex vno aut al-
tero casu fidelitatem probari, sed ex multis; quis non videt
multa illa quotidie in paruis tantùm rebus euenire, vbi se pro-
babilem seruus exhibeat?

Deinde verò de Puritate quâ Imperans potius respicitur,
quàm imperium, apertè patet in paruis rebus, vbi nihil adeo
spectandum cernitur, quod animum pelliciat ad sui considera-
tionem, sicut in magnis. Neque enim illic magnus prouentus
aut iactura magna: non inde vllum decus, aut aliqua grauis in-
iuria: vnde si quis parua & quotidiana illa constanter & quâ po-
test sollicitudine ac diligentia perficiat, profectò indicabit se
vnum Imperantem purè respicere, se vni Deo intendere, se illi
vni adhærere, & cum Dauide posse dicere; *Quid enim mihi est in
cælo, & à te quid volui super terram? defecit caro mea & cor meum,
Deus cordis mei, & pars mea Deus in æternum.* ALII sibi partes fa-
ciant de rebus humanis, inquit sanctus Augustinus, clamet populus
Dei, PARS MEA DEVS MEVS. Non ad tempus pars mea, sed
pars mea Deus in sæcula.

III. PUNCTVM.

IN paruis maior est igitur serui Dei fidelitas, quàm in magnis; Quia
in illis maior constantia & puritas cultus Dei spectatur, in qui-
bus tota consistit fidelitas. *Euge serue bone & fidelis, quia super
pauca fuisti fidelis, super multa te constituam.* Non commemorat
Dominus, quæ magna seruus egerit, quia vbi agitur de compe-
sanda fidelitate serui, declarandum sibi dumtaxat id videtur, in

quo est sita illa fidelitas, vt alij serui doceantur & excitentur ad illam exercendam.

Sic rursum alibi Dominus: *Qui fidelis est in minimo, & in ma-* Luc. 16.
iori fidelis est, & qui in modico iniquus est, & in maiori iniquus est;
 Quasi apertè diceret, non à magnis, sed à paruis rebus dignoscitur fidelitas serui, quia sæpe contingit, vt qui in magnis fidelis est, non sit in paruis; vix autem sit vt qui in paruis sit fidelis, non sit in magnis. Et sic primi hominis tentata est fidelitas in re exigua, qualis est pomi esus. Sic primi Iudæorum regis in mora & expectatione Samuelis per vnam aut alteram horam. Sic I. Reg. 13.
 plura suppetere aliorum exempla, quibus Domini sententia confirmetur, sed ipse Dominus in se ipso suisque rebus gestis longè id euidentius manifestat, quàm in alijs. Cum enim vellet indicare, quàm se constanter & accuratè fidelem exhiberet in obseruanda lege, peribit, inquit, potiùs cœlum & terra, quin omnia fiant vsque ad vnum Iota vel vnum apicem. Cùmque ex Math. 5.
 veteri testamento referuntur in nouo, quæ ab eo erant obseruanda, referri ea præcipuè voluit quæ spectabant res minimas, vt cùm vectus asino Ierosolymam ingrederetur; cùm in cruce Zacch. 9.
 potaretur felle & aceto; cùm eius vestimenta diuiderentur; cùm Ps. 21.
 hæc inquam & similia referantur ab Euangelistis, quæ in diuinis Ps. 68.
 eius factis non sunt præcipua, præcipuè tamen additur, vt adim- Math. 23.
 pleretur quod dictum est per Prophetas, Quasi magna voce diceretur, aduertendum id in primis esse quàm Christus Dominus fidelis fuerit in his minimis, vt sic fidelitatem eius imitemur.

Quin & ipse Deus Optimus Maximus, *Qui appendit tribus di-* Is. 40.
gitis molem terra, id est, tribus his Attributis vniuersum regit mundum, Sapientiâ Bonitate & Potentiâ, nonne hæc in minimis magis elucere facit, quàm in magnis? Nonne magis miran- Math. 10.
 dum, quod omnes capitis nostri capillos habeat numeratos, & ad folium arboris decidens aduertat animum, quàm quod ho- Cant. 4.
 mines regat & Angelos? Nonne ad Bonitatem suam maximè declarandam sic Sponsus sponsæ loquitur: *Vulnerasti cor meum*
soror mea sponsa, vulnerasti cor meum in vno oculorum tuorum, &
in vno crine colli tui? Quid minutius vno crine? Nonne ad Potentiam denique manifestandam illud diui Augustini valet dictum: *Deus creat minima corpore, acuta sensu animantia vt maiori*
attentione stupeamus agilitatem muscæ volantis, quàm magnitudi-

440 FERIA 6. infra Hebd. 6. post Epiph. Ecce puer meus, &c.

L. 3. de Ge-
nesi ad lit.
c. 14.

*nem Iumentis gradientis : ampliùsque miremur opera formicarum,
quàm onera Camelorum.*

Si sic Deus magnum se nobis probare voluit in parvis rebus,
quanto illi nos magis in istis, nos qui tam parvi sumus. Si
quid magnum peteret, excusare posses tuam parvitatem, nunc
verò cum parva petat, quid excusabis? Dices fortè illa esse
indigna Deo, sed putasne tua maiora, digna esse Deo, nisi ea
Deus acceptare dignaretur? Nunc verò cum parva non modò
libens acceptet, sed te totum ex parvis metiatur, atque ex fidelitate
tua iudicium de te ferat: quid est quod illa non reddas? *Qui
timet Deum, nihil negligit.* Expende quæ illa sint quæ negligas,
quantumque sit arguenda talis negligentia, in re tam facili simul
& tam pretiosa.

Eccle. 7.

Vide in 3. parte, Sabbato infra hebdomadam quartam.



S A B B A T O.

AD HÆC S. IOANNIS BAPTISTÆ
VERBA, DE CHRISTO DOMINO.

Qui habet sponsam, sponsus est. Ioan. 3.

VERITAS PRACTICA.

Hæc sponsæ fides est, Vt sicut neminem præter Spon-
sum velit diligere, Ita velit à nullo diligi.

RATIO EST, Quòd idcirco neminem præter Sponsum velit
sponsa diligere, ut sic sponsa tota sit sponso, prout exigunt le-
ges spiritualis matrimonij.

Sed nisi sponsa vellet à nullo diligi, non sic esset tota sponso, ut
esse debet.

Ergo hæc sponsæ fides est, ut sicut neminem præter sponsum ve-
lit diligere,

Sicut neminem præter sponsum sponsa velit diligere, &c. 441
lit diligere, ita velit à nullo diligi. Quod tamen valde ra-
rum est, ac proinde diligentius procurandum.

I. PUNCTVM.

AD hæc circiter tempora reuocandum est, quod sanctus
Euangelista refert de Christo Domino baptizante in Iu- *Ioan. 3.*
dæa, quod cum discipuli sancti Ioannis Baptiste animad-
uerterent, adierunt Magistrum suum, & dixerunt ei; *Rabbi,*
Qui erat tecum trans Iordanem, cui tu testimonium perhibuisti;
ecce hic baptizat, & omnes veniunt ad eum: Respondit Ioannes &
dixit; Non potest homo accipere quidquam, nisi fuerit ei datum de cæ-
lo, ipsi vos mihi testimonium perhibetis quod dixerim, non sum ego
Christus, sed quia missus sum ante illum. Qui habet sponfam spon-
sus est, amicus autem sponsi, qui stat & audit eum, gaudio gaudet
propter vocem sponsi, hoc ergo gaudium meum impletum est: Illum
oportet crescere, me autem minui. Qui desursum venit, super om-
nes est.

Videri possunt quæ plura sequuntur in textu, & ex singu-
lis fructus est decerpendus, qui cuique proprius sit. Ad omnes
autem maxime spectat, quod Christus SPONSVS dicitur,
sponsus quidem Ecclesiæ vniuersalis, atque in particulari cu-
iusque animæ, quam sibi in sacramentis despondet, & propriam
facit, iuxta illud Prophetæ; *Sponsabo te mihi in fide;* quo nomine *Osce 2.*
non tantum intelligitur fides, quæ dicitur Theologica, sed hu-
mana illa fides seu fidelitas, quæ solet inter coniuges dari &
seruari.

Ac de fide Sponsi Iesu non est dubium, quin se arctius obli-
get ad diligendam & fouendam illam animam, quam sibi spon-
sam facit. Neque item dubitari potest quin seruet fidem suam.
Ille fidelis permanet, inquit Apostolus, negare seipsum non potest. 2. Tim. 2.
De fide autem animæ quanta incertitudo, quanta pericula! de
hac propterea magis est cogitandum. *Hæc porro sponsa fides est*
seu fidelitas præstanda sponso, ut sicut neminem præter sponsum ve-
lit diligere, ita velit à nullo diligi.

Maior difficultas quoad intellectum & voluntatem videtur
esse, quod sponsa velit à nullo diligi; atque idcirco ut id aper-
tius declaretur, sic formatur Veritas & conficitur eius ratio, ut

constet parem & eandem esse obligationem ex lege spiritualis huius coniugij, siue ut nullum sponsa diligat præter Sponsum, siue ut à nullo alio velit ipsa diligi.

Quid est enim quod sponsa præter sponsum neminem diligat, nisi quod ratione desponsationis nouo quodam iure sic tota est Sponsi, ut se totaliter & totâ se ipsâ illum diligat, nihil ut supersit dilectionis ad alium, nisi prout Sponsus permittet & ordinabit? Sic expressè dictum: *Dilectus meus mihi, & ego illi. EGO dilecto meo, & ad me conuersio eius.* Hoc est ita proprium & essentiale huic coniugio, ut in hac mutua donatione totius dilectionis, maximè situm & stabilitum esse coniugium videatur. Sic propterea sponsus sibi sponsam despondisse dicitur, cum seipsum totum pro ea dedit, ut sic etiam intelligeret anima, tunc se illi tradituram in sponsam, cum se totam illi daret.

Cant. 2. 7. Vnde Apostolus: *Viri diligite uxores vestras, sicut Christus dilexit Ecclesiam, & seipsum tradidit pro ea, ut illam sanctificaret, mundans lauacro aquæ in verbo vitæ, ut exhiberet ipse sibi gloriosam Ecclesiam non habentem maculam, aut rugam, aut aliquid huiusmodi, sed ut sit sancta & immaculata.*

Et certè si inter Coniuges talis debet esse donatio alterius ad alterum, ut iam non sint duo, sed vnum: quod non tantum de corpore, sed de corde seu dilectione intelligendum est, adeo ut nulla sit par dilectio sicut coniugum, nec parentes ipsi sint tam impensè diligendi, ut expresse docet sanctus Thomas; proptereaque dictum sit: *Relinquet homo patrem & matrem, & adhærebit uxori suæ, & erunt duo in carne vna;* Quanto id magis requiritur inter Christum & animam, non modò ratione dignitatis Christi, sed ipsius Coniugij spiritualis, cuius figura & representatio quædam est carnale coniugium, & humana inter Coniuges dilectio & sociatio? Nam in re figurata plus semper inest, quàm in figura. O quàm præclare virgo & Martyr Agnes; *Hæc sponsi iniuria est, expectare placituram.* Rectène hoc intelligis? rectène ita sentis?

2. 2. q. 26. a. 11.
Gen. 2.
Matth. 19.

II. PUNCTVM.

SED nisi sponsa velit à nullo diligi, non sic erit tota Sponso, ut esse debet.

Temperari debet hæc propositio, sicut & præcedens, inter duo extrema dilectionis, vt nec condemnetur ordinata dilectio inter homines, de qua nullomodo hîc agitur: nec inordinata illa tantum condemnetur quæ valde vitiosa est, & rara inter spirituales viros: sed alia quædam minus inordinata intelligatur affectio quæ nimis frequens est viris etiam spiritualibus, nondum tamen plenè mortificatis, quâ scilicet volumus diligere, æstimari, magnificari, aut saltem nolumus negligi & contemni, atque ita sæpè angamur & sollicitemur animo, nûm bene alij de nobis sentiant, nullo alio ad id inquirendum permoti motiuo, nisi amoris proprii & naturalis illius inclinationis, quâ vnusquisque seipsum nimis diligit. Hoc est quod sponsa Christi non inquit, hoc est quod non laborat & cogitat, hic est denique sensus quo dicitur nisi sponsa velit à nullo diligi, non sic erit tota Sponso vt esse debet; Nam sic volendo diligi ab alijs, nimis inordinatè se diligit, Et hæc inordinata sui dilectio, diuidit illam à totalitate, seu à tota seipsa quam debet sponso, sicque aliena est à dilectione sponsi, sicut inordinatus amor alterius. Cur enim vetatur dilectio alterius, nisi quia sic diuideretur quæ indiuisa esse debet, sponsi dilectio, & per hanc diuisionem tantum detraheretur de toto quod illi debetur, quantum alteri concederetur? Vnde si anima similiter per amorem sui ipsius, se ab amore sponsi diuidat, cur non æque vetetur iste sui amor, atque amor alterius?

Quod eo quidem magis verum est, quòd amor sui ipsius sit fundamentum, & radix amoris alterius, qui cum inordinatè amatur, vt supponimus, non amatur nisi amore concupiscentiæ, id est, amore proprio, & amore sui ipsius: Vnde à fortiori videretur hic amor proprius magis cauendus. *Volo vos*, inquit *1. Cor. 7.* *Apostolus, sine solitudine esse; qui sine uxore est, sollicitus est qua Domini sunt, quomodo placeat Deo. Qui autem cum uxore est, sollicitus est, qua sunt mundi, quomodo placeat uxori, & diuisus est. Expende illud, & diuisus est, quasi diceretur; En malum alieni amoris quod amantem sollicitet, & his sollicitationibus ac curis diuidat ab vnico illo obiecto, quod amari debet & in quo cetera sunt amanda. Vnde manifestè patet, quòd vndecumque importuna illa sollicitudo proueniat, æque damnosa est, cum hoc vno sit damnosa, quòd animum sollicitet & diuidat. At verò si*

velis amari, nonne sic eris sollicitus an ameris ut vis, an plus te alius diligatur, an præ illo contemnaris? Nonne hoc aliquando sensisti? nonne hoc timuisti? nonne, sic in amore Christi diuinus fuisti? *Matth. 12.* *Omnis domus diuisa contra se, non stabit, dicit Dominus.*

III. PUNCTVM.

HAEC est igitur sponsa fides, & præstanda Sponso fidelitas, ut sicut neminem præter sponsum velit diligere, sic velit à nullo diligi: Quia quod in hac desponsatione primum ac penè vnicum est, ut Sponsa tota sit Sponso, sicut Sponsus totus est sponsæ, perinde vno violatur atque alio. Neque enim aliter violatur, quàm quod totalis dilectio diuidatur aut minuatur: diuiditur autem æquè ex illo amore sui, quo anima vult ab alio diligi, atque ex illo amore, quo alium diligit. Nam æquè occupatur, æquè secum sollicitatur & angitur an ametur, atque si amet. *Iac. 4.* *Adulteri, nescitis quia amicitia huius mundi inimica est Dei? Quicumque ergo voluerit amicus esse sæculi huius, inimicus Dei constituitur: Vide ut adulterium vocetur ista inordinata mundi amicitia, quia scilicet sic fides data Sponso violatur; Non est autem mundi amicitia, velle tantum diligere, sed etiam velle diligi, imò in hoc præcipuè mundus diligitur, ut à mundo diligamur, hoc est quod præsertim præterit concupiscentia. Sicut verò non esset alienum ab amore diuino, si sic à mundo diligaris ut non rependas mundanam dilectionem, sic planè si diligis mundum, aut si à mundo vis diligi, tam pugnat cum amore diuino, cum amore sponsæ ad sponsum, quàm repugnat integritati cordis, seu integre & totali dilectioni, quam sponsa debet sponso.*

Ioan. 15. *Si mundus vos odit, scitote quia me priorem vobis odio habuit; si de mundo fuissetis, mundus quod suum erat, diligeret: quia verò de mundo non estis, sed ego elegi vos de mundo, propterea odit vos mundus: Quasi diceret, hoc idem est vos meos esse totos, atque in odio mundi esse, quia vnum sæpe ex alio sequitur. Et tamen tu vis illa coniungere: Et Christi simul esse & mundi! Vide quàm longè sis à Charitate, quæ vellet Christum ab omnibus & omnino diligi. Cùm enim ab aliquo vis singulariter diligi, tùm Cor illius à quo vis diligi, subtrahis Christo Domino, sicut tuum subtrahitur, quando aliquem diligis præter Christum. Erubescere de*

hac perfidia, & sine te moueri his Sponsi tui vocibus: Tu forni- ^{1er. 3.}
cata es cum amatoribus multis, tamen reuertere ad me, dicit Domi-
nus; Et ego suscipiam te: Reuertere auersatrix Israel, ait Dominus, &
non auertam faciem meam à vobis: verumtamen scito iniquitatem
tuam, quia in Dominum Deum tuum prauaricata es, & dispersisti
vias tuas alienis. Vide caput octauum libri secundi de Imitatio-
ne Christi: Vbi hæc ad verbum, Numquam cupias singulariter lau-
dari vel amari, quia hoc solius Dei est qui similem sibi non habet. Nec
velis quod aliquis in corde suo tecum occupetur, neque tu cum alicu-
ius occuperis amore: SED SIT IESVS IN TE, ET IN
OMNI BONO HOMINE.

FINIS PRIMÆ PARTIS, IN VITAM
DOMINI IESV.





VERITATES PRACTICÆ.

AD DIES FESTOS SANCTORVM
QVI INCIDVNT IN HANC
PRIMAM PARTEM.

IN FESTO SANCTI ANDREÆ Die 30.
Novemb.
APOSTOLI.

AD HÆC EIVS VERBA:

O Bona Crux.

VERITAS PRACTICA.

Crux non esset bona, nisi bonum esset, Cruciari.

SENSVS Veritatis duplex est: primus, Crux non esset bona, nisi censeretur, & reputaretur bonum cruciari, quando cruciatus bono fine, & modo sumitur. Secundus, non esset Crux bona, nisi sic fieret bonum cruciari, aut nisi bonus esset cruciatus per bonum finem & modum quo debet sumi.

RATIO autem pro utroque sensu est, quod non est Crux bona nisi in bono suo effectu.

Sed non esset bonus eius effectus, nisi esset bonum cruciari, quo sensu dictum est.

448 Die 30. Nouembris, de sancto Andrea. O bona crux.

Ergo neque crux esset bona, nisi bonum esset cruciari; Et tamen quam multi hoc esse bonum negant qui bonam crucem prædicant!

I. PUNCTVM.



Ioan. I.

Epiph.

Heret. 51.

Ioan. 12.

MVLTA sunt quidem, quæ S. Andream multum commendent. Primò enim primus ex omnibus Apostolis sequutus est Christum Dominum, atque etiam ante ipsum Apostolorum Principem Petrum, quem ipse adduxit ad Iesum. *Occursus* *Andrea primus contigit, cum minor esset Petrus tempore ætatis*, inquit Epiphanius. Deinde verò tanti erat apud Christum meriti, vt cum Gentiles desiderio videndi Domini ad Philippum accessissent; Philippus Andream prius adierit, cum quo simul Dominum conueniret. Denique tam insignis fuit eius modestia, & humilitas, vt cum talis tantusque vir esset, numquam indignè tulerit, sibi præferri fratrem suum Petrum, minorem ætate, & occurso Christi, vt dictum est.

Verum quæ duæ res, verè magnos & sanctos efficiunt, *MVLTA AGERE, ET MVLTA PATI*, hæ duæ sunt quæ hunc sanctum Apostolum præcipuè & insigniter admirabilem faciunt. Dùm enim in Scythia, in Epiro, in Thracia, atque in Achaia disseminando Euangelio labores suos gloriosissimè poneret, tanto patiendi desiderio flagrabat, quantum indicant hæ præclaræ voces, quibus ad mortem ductus, mortis suæ trophæum est alloquutus: *O bona Crux, quæ decorem ex membris Domini suscepisti, diu desiderata, sollicitè amata, & iam concupiscenti animo preparata, securus & gaudens venio ad te, ita & tu exultans suscipias me discipulum eius, qui pependit in te.*

In Vigilia
S. Andr.

VIDETIS, ait S. Bernardus, quia non se capit præ magnitudine gaudij! Ita inquit, *ET TV EXULTANS*. Ergone tanta est exultatio, vt exultet & ipsa Crux?

Ex quibus & aliis pro animi deuotione expensis, illud ad fructum & praxim præcipuè colligendum est, quàm verè bona Crux sit dicenda, aut potius, *Quàm verè nulla crux bona sit, nisi sit bonum Cruciari*, quo sensu declaratum est.

Sic autem demonstratur, quia non est Crux bona nisi in bono suo effectu. Quid est enim per sese Crux, si ab ea bonum tollas effectum? Quid est nisi lignum & infame mortis instrumentum, quod in scripturis dicitur, *Maledictum, & Maledictus omnis G. d. 3. qui pendet in ligno?* Nonne propterea Christus affixus est cruci, tamquam supplicio ad omnem cruciatum, vel ad omnem infamiam, quod excogitari possit, extremo? Quid est autem, quod postea crucem illam bonam & omni colendam cultu dicimus, nisi ex bono quem inde Christus produxit effectu? O quantas illi debemus gratias, *qui ut nos de maledicto redimeret, ibidem factus est pro nobis maledictum!*

II. PUNCTVM.

SED non esset bonus crucis effectus, nisi esset bonum cruciari, hoc sensu, ut dum bono fine & modo cruciamur, sic cruciari sit laudabile & gloriosum; neque etiam aliter sit laudabile, nisi bono fine & conuenienti modo cruciemur.

Tam multi quidem sunt Crucis effectus, quanti sunt & ipsius Christi Domini Mortis, quam in cruce perferre voluit; sed illi omnes parum profunt ad salutem & perfectionem, nisi hunc afferant fructum ut reputetur bonum & gloriosum cruciari, quando scilicet cruciatus bono fine & modo assumitur. Nam hic est veluti finis & scopus, quod alij effectus referuntur, ut ex Cruce videlicet, seu ex Christo pendente in cruce discamus sic cum Eo pati, sicque **BONVM ET GLORIOSVM ESSE PATI**, pro Dei gloria & pro æterna salute, sicut Christus propterea in cruce passus est.

Decorem certè & dignitatem ex Christi membris sancta Crux retulit, ut dicebat sanctus Andreas; Sed quem effectum habet ille decor, & illa dignitas, nisi ut cum eodem Apostolo crucem amemus, & bonum esse in cruce pati & mori credamus? Neque profecto aliter decorem & dignitatem ex membris Christi, Crux retulit, nisi quia Christus crucem suo sacro sacrauit corpore, quod cruci affigi voluit? At nonne simul sacros fecit cruciatus, quos non minus in cruce pertulit, quàm ipsam crucem? Dicam ampliùs, quod si propter quod vnumquodque tale est, & illud magis; certè videtur Cruciatu sacratior esse

factus à Christo Domino, quàm ipsa sacra Crux, quod non-
nisi propter cruciatum Christus crucem ascenderit, neque crux
aliter nostra est salus, quàm quod in ea Christus sit cruciatus,
adeout ipse Christi Cruciatu, sit primò nostra salus, tum
deinde ab illo Crux communicationem nominis & fructus hau-
riat. *Hoc enim sentite in vobis*, inquit Apostolus, *quod & in*
Christo Iesu! Quis sensus Christi patientis? an talis tuus?

L. 2. de
Mori. Ma-
nich. c. 13. QVOD verò non sit aliter bonum cruciari nisi ex bono fine, &
bono modo, id est nisi patienter cruciatum feramus, id apertius
est, quam vt probetur fusiùs. De fine quidem sic egregiè S. Au-
gustinus contra Manichæos, qui se multis affligebant modis.
Quaro à vobis quo fine faciatis? tum post multa de boni finis ha-
bendi necessitate; *De Catilina*, inquit, *memoria proditum est, quod*
frigus, sitim, famem ferre poterat: hæc erant illi spurco sacrilegòque
etiam cum Apostolis nostris communia: unde ergo discernitur Parri-
cida iste ab Apostolis nostris, nisi fine illo quem diuersissimum seque-
batur?

Sap. 5. De modo autem sic liceat dicere; Cùm in inferno damnati
clament se, *lassatos fuisse in via iniquitatis & perditionis; & ambu-*
lasse vias difficiles, vndenam hi discernuntur à Beatis, qui la-
bore suo beatitudinem consequuti sunt, nisi ex diuerso quo la-
borarunt modo? Neque alià est differentia vitij & virtutis, seu
patientiæ & impatientiæ, meriti & demeriti, quàm ex fine & mo-
do patiendi. Nonne poenam eandem vterque Latro cruci affixus
cum Christo tolerabat? At nonne eiusdem poenæ exitus longè
fuit diuersus? unde vero illa diuersitas, nisi ex diuerso patiendi
modo? Quis denique fuerit diuersus ille patiendi modus, con-
sidera, & vtri similior existas in poenis tuis.

III. PUNCTVM.

CRUX ergo non esset bona nisi bonum esset cruciari, quo sensu &
qua ratione consideratum est ab effectu crucis, qui totus eò re-
cidit, vt de poenis præclare sentiamus, & eas fortiter tolere-
mus; aut cerrè nullus sit nobis crucis fructus; Nec crucem illi
bonam verè prædicare possunt, qui bonum negent cruciari. Hi
nempe sunt *Inimici crucis Christi*, quos deflet Apostolus, qui

licet crucem laudent, vituperant tamen cruciatus, nec quidquam libenter patiuntur, *quorum finis interitus, quorum Deus venter est Phil. 3. & gloria in confusione ipsorum, qui terrena sapiunt.*

Hic te ipsum nosce, hic te proba, teque interroga, quid sentis de Ligno Crucis? Sanctumne putas ac colendum? sed quid sentis de aduerso casu? Itane sanctum ac bonum dices, sicut ipsum crucis lignum? Itane cum sancto Andrea: O bona crux! Sic planè sentiendum ac dicendum esset: sed quia longè est alius sensus tuus, sed quia nonnisi doles & murmuras in aduersis, quasi mala sint & non bona; hoc habeto, nisi resipiscas, te non aliter verè posse de ipso crucis ligno dicere, bonam esse crucem, quia videlicet bonitas crucis in hoc est, vt bonam aduersitatem credas: quam nisi bonam esse credideris, bonam esse crucem negas. O quanta est necessitas tolerandi cuiuslibet aduersi casus! quanta est scilicet sacræ colendæ Crucis!

Vide in festis Inventionis & Exaltationis sanctæ Crucis, Itemque in 2. parte infra Hebdomadam Passionis: Vbi plures de Cruce proponuntur Veritates.



DE S. FRANCISCO XAVERIO

Die 2.
Decembris.

SOCIET. IESV, INDIARVM APOSTOLO.

AD HÆC EIVS VERBA, CVM AGERETVR
DE BONIS SENSILIBVS ABSTINENDIS:

Satis est Domine, satis est.

Et cùm de malis sustinendis:

Amplius, Amplius.

*Signa Apostolatus mei facta sunt super vos, in omni
patientia. 2. Cor. 12.*

VERITAS PRACTICA.

Hæc sunt Apostolatus & perfectioris vitæ duo signa certiora, velle abstinere libenter ab omnibus bonis: & omnia mala sustinere.

RATIO EST, Quia certiora perfectionis, & Apostolatus signa sunt in omni patientia.

Atqui hæc est omnis patientia, velle abstinere ab omnibus bonis, & omnia mala sustinere.

Ergo & hæc sunt Apostolatus, & perfectioris vitæ duo signa certiora, quæ in sancto Francisco Xauerio eminent luculentissimè, & quæ nobis, nostro in statu proponuntur imitanda.

I. PUNCTVM.

IAM multa sunt in sancto Francisco quæ ad omnis sanctitatis & perfectionis exempla considerentur, vt nisi quibusdam terminis contineantur, considerari fructuosè non possint. Continentur autem aptissimè hoc sacro Apostoli nomine, quod non tantùm duodecim illis electis à Domino conuenit, sed & pluribus aliis communicatur. *Salutate*, inquit Apostolus, *Andronicum & Iuniam, qui sunt nobiles in Apostolis.* Quotquot enim se strenuè impendebant in proximorum salutem, hi Apostoli aut Apostolici viri dicebantur. Sed quia tamen non omnes paribus animis in hoc sancto desudabant opere, quicumque non sincerè Christum annuntiabant, vocabantur *Pseudo-Apostoli, operarij subdoli, transfigurantes se in Apostolos Christi*, vt ait sanctus Paulus.

Rom. 16.

Phil. 1.

2. Cor. 2.

Apoc. 2.

Ac propterea, vt veri à falsis disgnoscerentur, erant certa signa, quibus quodammodo probarentur & tentarentur, vnde illa commendatio Episcopi Ephesini in Apocalypsi: *Scio opera tua, & laborem & patientiam tuam, & quia non potes sustinere malos, & tentasti eos qui se dicunt Apostolos, & non sunt: & inuenisti eos mendaces.*

Quanam porro illa erant signa certiora? Hæc videlicet duo, quæ ex sancto Xauario, in Veritatem propositam deriuantur: *Libenter abstinere ab omnibus bonis sensibilibus; & omnia mala sustinere propter Euangelium, propter electos, propter salutem proximi*: Quæ certè consideratio non minùs erit utilis consideranti, quàm gloriosa sancto Indiarum Apostolo, cuius inde Apostolatus gloria manifestè elucescit.

Ratio autem deducitur ex S. Paulo, qui pro se dicere apud Corinthios cum cogeretur, *signa, inquit, Apostolatus mei facta sunt super vos, in omni patientia*: quasi diceret, probatus sum omnibus modis qui patientiam exercent, & quibus solent probari veri Apostoli. Iam enim præmiserat quod fusè describit, *in laboribus plurimis, in carceribus abundantius, in plagis supra modum, in mortibus frequenter, in labore & ærumna, in fame & siti, in frigore & nuditate*; Quibus copiosè declaratis, sic concludit; *Nihil minus fui ab iis, qui sunt supra modum Apostoli, tamen si nihil sum, signa tamen Apostolatus mei facta sunt super vos in omni patientia, in signis & prodigiis & virtutibus.*

Signa quidem seu miracula iungebantur patientiæ, sed ut optimè notat S. Ioannes Chrysostomus: *Non signa mirabiles Apostolos effecerunt: multi enim qui demones eiciebant, quia peccatores erant, nihil tale fecerunt, sed puniti sunt: Quid est igitur, quod eos magnos ostendit? pecuniarum contemptus, gloriæ despectus, ab omnibus vite huius negotiis ereptio: quæ si non habuissent, etiam si mortuos suscitassent, non solum nullos inuissent, sed etiam seductores existimati fuissent.* O quàm multi falluntur, qui prætextu iuuandi proximi nolunt aliquid pati, cum nihil æquè faciat ad iuuandum proximum, quàm patientia.

Hom. 46.
in Matth.

II. PUNCTVM.

SED in his duobus actibus omnis patientia continetur, *libenter abstinere ab omnibus bonis sensibilibus; & mala omnia sustinere, sicut libenter abstinnit & sustinnit S. Franciscus Xauius.*

Nam cum omnis patientia versetur circa ea, quæ sunt carni aut animo contraria, nihil autem sit contrarium, quàm vel priuari bonis, quæ naturaliter apperimus: vel sustinere mala, quæ refugimus: profecto hinc manifestè sequitur, quòd omnis pa-

Luc. 9.

tientia in his duobus actibus continetur, quos Christus Dominus, celeberrimâ suâ illâ sententiâ complexus est, quâ se sequentes monet, *Qui vult post me venire, abneget semetipsum, & tollat crucem suam quotidie.* Est enim abnegare se ipsum, abstinere bonis sensibilibus: & est tollere crucem, sustinere mala, sicut alibi fusius exponetur.

De vita
Contempt.
ca. 20.

Sic S. Prosper agens de fortitudine seu patientiâ; *Quasi vir- tus, inquit, esset, fortiter etiam talibus blandimentis repugnaret, nec acquiesceret mollibus, quæ adiuuante Domino dura quæque vel aspera superasset.*

Quàm eximius autem fuerit S. Franciscus in his duobus actibus, patet ex duobus illis dictis, quæ primo huius Considerationis aditu proponuntur; & ex illius factis totâ vitâ sequentibus. Cum enim abundaret coelestibus deliciis & gaudiis, *satis est Domine*, inquebat, *satis est.* Quasi diceret; oportet me istis etiam abstinere bonis spiritualibus, ne quid sit boni sensibilis, quod me tantisper detineat ab indefesso labore iuuandi proximi, & quo me non libenter priuem ad illius salutem. Cum verò illi obicerentur pericula & incendia & mortes, & quidquid horrorem potest incutere: *Amplius*, aiebat, *amplius*: adeo sitiens erat laborum, ut quidquid pateretur, sitim patiendi acueret potius, quàm expleret, aut quam robur animi quoquo modo reunderet.

Atque hæc vniuersim dicuntur de duobus illis primariis Patientiæ seu Fortitudinis actibus: Nam qui vellet particulatim de his ipsis edoceri, quàm eximius in utroque fuerit sanctus Franciscus, oporteret primum eorum Caput quod in abstinendo ponitur, sua in membra partiri, quæ spectant Abstinentiam circa triplex genus boni sensibilis quod est *honoris, commoditatum, & voluptatis.* Oporteret contemplari quanta fuerit eius Humilitas quæ honores spernit, quanta Paupertas quæ commoditates negligit, quanta Mortificatio quæ voluptates abhorret. Oporteret denique reuolnere quid de tribus illis Virtutibus, eodem ordine recensitis, colligatur in ea Relatione quæ de rebus ab eo gestis iuridice est instituta, cum de Illo in Sanctorum numerum referendo, ageretur. Illic enim ad amissim sic reuocata sunt omnia, nihil ut prorsus in medium adducatur, quod non suis Authenticis & probatissimis, quantum quidem accurate fieri potuit, nitatur testimoniis.

Sic porro de illius Humilitate paucis perstringitur: Humilitatis dono, Sanctitatis fundamento, amplissimè dotatum fuisse ostenditur, cum in interna & externa mirifice excelluerit. Ac primò, demissimè de seipso sentiebat, se vilissimum omnium, & peccatorem maximum reputabat, omnibus inferiorem se esse affirmabat, & nihil erat tam vile & abiectum quo se dignum non putaret: nihil honorificum quo se indignum non indicaret: itaut nulli praeesse vellet, sed omnibus subesse cuperet, omnesque propterea ut superiores reuereretur.

Secundò eandem probauit Humilitatem, honorifica quaque penitus spernendo, ad suas laudes non secus ac alij ad probra erubescens. Si quid esset unde laus ipsi aliqua posset peruenire, ut in faciendis miraculis, studiosè id factis & verbis celabat, & sociorum, aliorumque meritis & intercessionibus adscribebat.

Authoritatem amplissimam Legati Apostolici qua instructus in Indiam missus, fuerat non solum non iactauit, sed data opera texit, quasi gladium in vagina, adeo ut per decem annos, nemo illum Nuncium Apostolicum scierit prater Episcopum Goanum, nec nisi semel, ultimo quasi remedio, ad Dei Gloriam procurrandam, ea potestate usus est, re prius cum Episcopo Goano communicata, & illius permissa arbitrio.

Eadem Humilitas ostenditur, ex propria sui abiectiōe: nam Christum imitatus cum diues esset, omnium egenus fieri voluit, & dum lautè ex suo posset, ex alieno, precario victitare maluit: abiectissimo vestitu semper usus. Patet etiam ex quotidianis exercitiis & actionibus quibus sollicitam operam praestitit, tam in Indica navigatione quàm in domibus Hospitalium India, viliora quaque ministeria, ut iam dictum est, hilariter & sponte eligendo. Ex humili reuerentia ostenditur quàm semper veneratus est Episcopos, Sacerdotes, & Superiores quoscunque, adeo ut cum Beato Ignatio suo Superiori scriberet, non nisi genibus flexis scriberet, reuerentiae causa. Multaque sunt alia ex quibus planissimè colligitur, Christi vestigia Xauerium fuisse sequutum, qui de se dixit: MITIS SVM, ET HUMILIS CORDE.

TVM verò de Paupertate consequenter: Paupertatem Euangelicam quam vouit, perfectissimè ab illo seruata fuisse demonstrat ratio vita quam semper seruauit in victu, vestitu, suppellectili, itineribus, habitatione. Victus namque fuit parcissimè, non eo solum ut corpus affligeret, sed etiam ut Voto Paupertatis satisfacere, utque ve-

rum pauperem ageret, quodcumque sibi ab aliis ultro ministrabatur, & ea quæ solitus erat ipse per se mendicare, aliis pauperibus distribuebat, contentus ipse quolibet vili cibo, & pane obui, ut latius dicemus, dum de pœnitentia agetur. In vestitu verò, non minus tenax Paupertatis apparuit: erat enim plerumque attritus, resartus, & asumentis intersectus, in summa optimarum vestium copia, quæ certatim illi ab omnibus offerebantur. In supellectili præterea, eius Paupertas valde resplenduit; eius in cubiculo nihil aliud elucebat nisi ipsa Paupertas, nudi namque erant parietes, lectulus potius ad arcendum somnum aptus quàm ad conciliandum, utpote sine culcitra, sine lodicibus, vilibus tantum stragulis duro cernicali adiuncto; & præter ista, non aliud quidpiam erat in cubiculo quàm pauci libri sibi vel aliis necessarij.

In itineribus conficiendis, quæ tam longa, tam multa, tam difficilia fuere, tot longinquis peregrinationibus in ultimas terras susceptis, studium Paupertatis suum maximè probauit, nullo alio vectore quàm baculo pro equo & vehiculo usus est: pedes semper incedendo, & non rarò sine calceis, sine alio tegumento plantarum: Viaticum non in pera & sacculo, sed in Dei benignitate, & aliena pietate repositum habebat: nullum secum ferre solitus, nisi ubi per deserta & inuia loca esset incedendum: & tunc nil aliud parabat quàm cibum castrensem & castigatissimum, & in toto longo ac impedito itinere Meacensi, assa tantum victitauit oriza, nec viatoria vestes luculentiores erant quàm cibus, adeo pannosus se in viam dabat, ut aliquando pueris ridiculo esset. E Lusitania in Indiam soluens precario semper in navi victitauit, nec ab illo instituto precibus Regij Pratoris, vllatenus abduci passus est. Idem institutum in navigationibus reliquis seruauit: numquam aliò diuertere solebat quàm in Publicas domos Hospitalium, ut quemadmodum precario vesceretur, ita mendicatò hospitaretur. Hoc in Italia, hoc in Lusitania, hoc in India semper præstitit.

DENIQUE de mortificatione & Pœnitentia, quod est postremum è tribus Abstinendi generibus, sic eodem contextu pergitur: Mortificationis studium, & opera Pœnitentia in eo tales fuisse constat, quales ad insignem & excellentem requiruntur Sanctitatem. Primo, eximia fuit in eo abstinencia cibi, cum non solum carnis & vini, sed etiam panis triticeï usum procul à se abdicauerit. In priuata domo, & quoties apud alios non vesceretur, de industria insulsis & vilibus

& vilibus utebatur cibus, ac parcissimè.

Secundo, manifestè colligitur ex maceratione carnis: corpus enim frequentissimè flagellis cadebat, quandoque aneo filo contextis, quæ etiam ferreis punctis & stellulis de industria exasperabat, itaut sanguinem copiose profunderet. Somno nonnisi brevissimo corpus recreabat, incommode vel humi, vel fune nautico iacens, vel lectulo vilibus stragulis, ut supra dictum est, parato; reliquum noctis orationi & contemplationi dabat, vel agrotis visendis. Quin extra solitum suum, longe plura & maiora pœnitentiæ opera exercebat; sæpius namque per plures dies, ab omni cibo abstinuit, & aliquando à Dominica Passionis, usque ad Sabbatum Majoris Hebdomadæ, sæpe per biduum vel triduum, quandoque per quatuor totos dies, præsertim in principio sua Conversionis; quando etiam, ut doloris sensu magis cruciaretur, funiculis sibi adeo arctè coxendices & lacertos constrinxit, ut cum plures dies eo in cruciatu iter agendo perseverasset, animo repente destitutus præ doloris magnitudine, in media via conciderit, vinculis in carnem tam altè depresso, ut medici vulnus insanabile indicauerint, actumque de eius vita esset, nisi miraculosè vincula rupta fuissent, sine ope artis humanæ.

SIC itaque quod primum Patientiæ caput spectabat, in abstinentia bonorum sensibilium, patet evidenter quàm fuerit suis omnibus numeris absolutum, in sancto Francisco Xaverio: unde restat, ut quid de Altero quod est in forti malorum omnium tolerantia constitutum, in eadem Relatione referatur, audiamus. Sic porro habet, cohærenter ad præcedentia. **FORTITUDINE, MAGNANIMITATE & PATIENTIA** in laboribus tolerandis, & superandis heroicè & insigniter à Deo dotatus fuit. Mundum vicit sui ipsius abnegatione, Christum sequutus, honores & dignitates sibi oblatas spreuit constanter: vitam religiosam vilem & pauperem elegit, & fortiter retinuit: eluxitque sæpe eius animi fortitudo, quod plagis & pustulis Pauperum mendicorum lavatis, aquam ipsam qua illas abluerat non semel biberit.

Nec solum tam gloriosa de seipso victoria eius emicuit inuictus animus, sed etiam in agrediendis rebus arduis propter Dei amorem, & in superandis difficultatibus, longinquas regiones ac Prouincias adiit, vitæ spreto periculo, nec barbarum & efferrum in hospites Incolarum ingenium timuit ad Christianam mansuetudinem inuitare, à quibus

sibi mortem paratam esse audiebat. Ab anno millesimo quingentesimo quadragesimo primo quo in Indiam nauigauit, usque ad annum millesimum quingentesimum quinquagesimum secundum quo diem clausit extremum, multas diuersarum nationum & linguarum Prouincias prædicandi Euangelij causa peragrauit, contractis etiam ob assiduos labores morbis grauissimis; sæpius naufragium passus est, æstus, frigoris, nuditatis, vigiliarum, sitis, famis incommoda diutissime sustinuit: nudis pedibus inter uepres & sentes longissima itinera perfecit: contumeliis, probris, irrisoribus, & omnis generis illusionibus, & iniuriis appetitus, verbera insuper, lapidationes ac sputa passus, omnia semper non solum æquo animo sed sibi plaudente, illius verè discipulus qui Apostolis dixit: CVM VOS ODERINT HOMINES ET CVM SEPARAVERINT VOS, ET EXPROBRAVERINT, ET EIECERINT NOMEN VESTRVM TAM QVAM MALVM PROPTER FILIVM HOMINIS, GAUDETE, ET EXVLTATE. Deoque propterea in omnibus gratias hilari & humilis agebat, & pro illusoribus ac persecutoribus deprecabatur.

Quæ quidem omnia confirmantur ex iis quæ de ipsius Charitate in Deum, & proximum iam paulò antè ibi fuerant memorata, his verbis sane obseruandis: Ostenditur eadem Charitas per extinctionem timoris in subeundis periculis, & arduis operibus aggrediendis, amore Dei: nam perfecta Charitas foras mittit timorem. Ille verò tantum absuit à timore ut propter Deum non timuerit naufragium, peregrinationes per inuia & deserta loca non formidauerit: nec feros Ethnicorum mores expauerit, quamuis ab omnibus, vno consensu, exitium ei imminere denuntiaretur. Nec minus elucet eius eximia in Deum Charitas ex contemptu rerum humanarum & mortis, qui in tota huius serui Dei vita ita elucet, ut verè cum Apostolo posset dicere, QVIS NOS SEPARABIT A CHARITATE CHRISTI? TRIBVLATIO, AN ANGVSTIA, AN FAMES, AN NVDITAS, AN PERICVLVM, &c. IN HIS OMNIBVS SVPERAMVS PROPTER EVM QVI DILIGIT NOS.

Hæc sunt expressa verba Relationis factæ in Consistorio, coram summo Pontifice, à Cardinale Montensi, ex quibus tam manifestè Thesis simul & Hypothesis declarantur, ut quàm apertum est in abstinendo & sustinendo propter salutem proximi, contineri omnem patientiam Apostolicam, tam apertè liqueat sanctum Franciscum Xauerium in vtroque simul excel-

fuisset. O quales nos saltem pro salute nostra deceret esse; cum Ille tantum laborauerit pro salute aliena!

III. P V N C T V M.

SIUE igitur vniuersum spectemus Veritatem propositam, certa manet & constans; *Hac esse Apostolatus & perfectioris vitæ duo signa certiora, VELLE ABSTINERE LIBENTER AB OMNIBVS BONIS: ET OMNIA MALA SVSTINERE*, quia in his duobus omnis perficitur Patientia, Patientia autem, inquit sanctus Iacobus, *omne opus perfectum habet*. Siue particulatim illam Veritatem consideremus in Apostolico nostro Viro, non minus certa est & rata fixaque Veritas, hæc eius esse Apostolatus & perfectissimæ vitæ signa notissima: Vnde in ipso primo memoratæ Relationis vestibulo, postquam productus est ille de Apostolis psalmi decimi octavi versiculus: *In omnem terram exiit sonus eorum: & in fines orbis terra verba eorum*: Tum sic pergit sacer Relator: *Hos inter, seruus Dei Franciscus Xauerium ita eluxit, ut in eo Diuini oraculi pars illa impleta esse videatur: Et in fines orbis terra verba eorum*. Diuino enim beneficio segregatus in Euangelium Dei quâ immensa patent Oceani littera, ad Orientem solem deduxit sonum Apostolorum, & in fines orbis terra, verba eorum. Nam ut taceam Indos, Brachmanas & Malabares ad quos aliqua Euangelij fama olim emanauit, & multorum seculorum atatibus oblitterata, Xauerij predicatione reuixit: Ipse primus Parauis, Malais, Iais, Acenis, Mindanais, Molucensibus ac Iaponibus Apostolico sane spiritu & virtute, Euangelica lucis fulgorem induxit, & salutem annuntiauit: *Vltra quas Prouincias ad Orientem solem nihil reliquum orbis terrarum habet*.

Et nonnullis interiectis: Hoc nomen Apostoli, Apostolicis factis primum in Lusitania obtinuit, deinde in India, Iaponia, Sina & reliquis Orientis Prouinciis conseruauit. Communi enim omnium consensu non nisi Apostolus nominatur, meritoque tam honorifica appellatione dignus censetur qui Apostolico sanè spiritu in tot Prouinciis Euangelium pradicauit, ita Domino cooperante, & sermonem serui sui confirmante sequentibus signis, ut multa centena hominum milia doctrina & miraculis, Apostolorum miraculis simillimis, ab idolorum seruitute ad veram libertatem filiorum Dei traduxerit, in fide

instituerit, & propria manu baptizauerit, inter quos Reges ac Principes non pauci numerantur. Quod Apostoli nomen ab hominibus seruo suo tributum insigni miraculo Deus confirmasse videtur, cum illi non solum miraculorum sed etiam linguarum dona concesserit, quibus olim Apostolos Ierosolymis ad predicationem Euangelij armauit.

De quo Linguarum dono sic paulò post Idem expressius: Diuersarum namque gentium linguis, quas non didicerat cum eas Euangelij causa adiret, ita eleganter & expeditè loquebatur, ac sibi natus & educatus esset: & contigit non raro ut eum Concionantem diuersarum nationum homines suà quisque linguà planè & politè loquentem audierit, id quod pro maximo miraculo ab ea gente habitum non solum auxit venerationem Xauij, sed multos etiam ad fidem conuertit: Voluit enim Deus qui illum ad Predicationem Euangelij in illis Prouinciis segregarat, ut sicut in ceteris Apostolicum spiritum acceperat, sic etiam dono linguarum Apostolis similis esset: & ut non solum spiritus feruore eximio, sed etiam variis linguis magnalia Dei ubique loqueretur.

Ac demum in ea oratione quæ fuit habita coram eodem Summo Pontifice, & quæ Relationi subiungitur, sic Orator paucis omnia contrahendo: Nec contentus, inquit, tot ubique locorum terras, tot maria docendis populis perlustrasse, tot insulas, Prouincias, regna Deo peperisse, à capite rem exorsus in Sinas expeditionem adornat, atque emenso iterum Oceano in Sancianum insulam, Sinis proximam defertur, Sinarum claustra seuerissimis quamquam legibus, custodiisque firmata tentaturus, ubi derelictus simul ab Interprete, simul ab hospite, morbo correptus, deserta in insula, in humili iugurio, in magna rerum omnium inopia, hoc vnum agerrimè ferens se iuuandorum hominum aditu prohiberi; cæterum Dei desiderio videndi, supra modum incensus, annos natus quinquaginta quinque decennio post suum in Indiam aduentu, quarto ante Ignatij obitum anno, sanctissime moritur: Indiarum Apostoli nomen consecutus, non tam aliorum predictionibus, aut Lusitanorum, Indorumque consensu populorum, quàm propriis virtutibus, quibus se Apostolorum ad vitam conformauit, ac donis atque miraculis, quibus ad Apostolorum gloriam extulit illum Deus, adeo ut toto Oriente, non alio nomine quam Sanctus atque Apostolus appellaretur ab omnibus, etiam ab Ethnicis, qui ad eius sepulchrum accedere venerabundi, eiusque opem implorare conseruerunt.

Verum ad nos redeamus, & quantam vnusquisque partem in hac Apostoli dignitate consequitur, seu quantum quisque à sanctis & Apostolicis viris in suum velit deriuare profectum, tantum imitari conetur hunc verè sanctum & Apostolicum Virum, non in linguarum aut miraculorum dono, sed in abstinendo & sustinendo. Tota vitæ Christianæ disciplina duobus hisce constat capitibus, *Abstine & sustine*: Abstine à sensibilibus bonis: Sustine mala opposita. Quia videlicet illa sunt duo tantum, quæ nos retardent, aut boni sensibilis cupiditas, aut mali metus. Nonne hoc experiris, si quid boni operis est exequendum! Nonne inde est quidquid omittis boni, vel quidquid committis mali? Vísne hoc etiam scire apertius? audi sanctum Augustinum: *Omnia peccata duæ res faciunt in homine, Cupiditas, & Timor; Cogitate, discutite, interrogate corda vestra, perscrutamini conscientias, videte vtrum possint esse peccata, nisi aut cupiendo aut timendo. Proponitur tibi premium vt pecces, id est, quod te delectet, facis propter quod cupis: Sed fortè non induceris donis; terreris minis; facies propter quod times. Si cupiditas non valuit, fortè timor valebit. Porro autem si de Scripturis contra cupiditatem venit tibi in mentem, quid prodest homini si totum lucretur mundum, animæ vero suum detrimentum patiat! veniat etiam contra timorem in mentem: Noli te timere eos qui occidunt corpus, animam autem non possunt occidere. Ex quibus vides quanti reuerat abstinere & sustinere, cum inde vel virtutes vniuersæ, vel peccata omnia enascantur.* In Ps 79.

Sic Idem S. Augustinus de Christo Domino: *Omnia quæ habere cupientes non rectè vivebamus, carendo vitia fecit: omnia quæ vitare cupientes à studio deniabamus veritatis, perpetiundo deiecit: Non enim vllum peccatum committi potest, nisi dum appetuntur ea quæ ille contempsit, aut fugiuntur ea quæ ille sustinuit.* L.I. de vera Rel. c. 16

Quid magis oppositum Christo, quid magis indignum est Apostolico viro, quid magis alienum à sectatoribus Apostolorum, quàm sectari quod fugit Christus, aut fugere quod est sectatus? Hæc tu ipse fugies & illa ipse sectaberis, nisi omni studio & contentione abstineas, & sustineas.



Die 6.
Decembr.

IN FESTO S. NICOLAI EPISCOPI ET CONFESSORIS.

Domine, quinque talenta tradidisti mihi, ecce alia quinque superlucratus sum. Ait illi Dominus eius; Euge serue bone & fidelis, quia super pauca fuisti fidelis, super multa te constituam. Matth. 25.

VERITAS PRACTICA.

Numquam melius sibi prouidet fidelis Dei seruus, quàm si nihil sibi retinens, totum se Domino, suaque omnia consecret.

RATIO EST, Quia dum Dei seruus nihil sibi retinet, diuinam ad se prouocat Benignitatem.

Sed non melius sibi prouidet, quàm sic prouocando ad se diuinam Benignitatem.

Ergo nunquam melius sibi prouidet fidelis Dei seruus, quàm si nihil sibi retinens, totum se Domino suaque omnia consecrat.

*Quod paucis his verbis sanctus Hieronymus clarè complexus est: Optimus dispensator est, qui sibi nihil re-
seruat.*

I. PUNCTVM.

NAMETSI hoc Euangelium de quinque talentis, commune est omnibus Confessoribus, Episcopis feu Pontificibus: peculiari tamen ratione referri potest ad sanctum Nicolaum, cuius quinque talenta quæ accepit à Domino, sigillatim memorari possunt; quinque item quæ superlu-

cratus est : ac postremo quinque , quibus insuper à Domino ad nostrum subsidium liberaliter & magnificè est insignitus. Habentur illa fusiùs in meditatione , de eo edita , vnde hæc breuiter referuntur.

Primò quidem , de quinque talentis acceptis , Primum fuit , bona indoles seu natiua propensio in bonum , poterátque illud Sapientis vsurpare , *puer. eram ingeniosus, & sortitus sum animam Sap. 8. bonam.* Secundum fuit , cor docile & tractabile , vt à quibus regendus esset , facillimè regeretur. Tertium , auersio & fuga prauimalorum consortij. Quartum , perfacile ad scientias comparandas ingenium. Quintum , facundia naturalis & ingenita , vt posset vere dicere , *Dominus dedit mihi linguam eruditam , vt Is. 50. sciam sustentare eum qui lassus est verbo.*

Deinde verò quinque alia quæ superlucratus est talenta , hæc recensentur. Primum , applicatio bonæ indolis ad omne genus bonorum operum , ad orationem , ad ieiunium & eleemosynam , in quibus piis exercendis operibus insignis fuit à pueritia. Secundò , docilitatem suam non modo puer exercebat erga superiores , sed vir factus & creatus Episcopus sese aliis Episcopis summittebat , vt penè nihil ageret , nisi ex consilio duorum aut trium , quos sibi propterea elegerat consulendos. Tertio , quam improborum fugam & auersionem iam à primis annis vehementem senserat , sic in dies expertus est vehementiorem , vt ab Episcopatu in desertum migrare cogitaret , atque etiam demigrasset , nisi voce diuina retentus audiuiisset se posse saluari in medio nationis prauæ. Quartò , facilitate ingenij ad scientias , scientiã sacrarum scripturarum , scientiam sanctorum & salutis , scientiam animæ , sibi cumulatè comparauit. Quinto , facundiam naturalem , exercitatione frequenti tam potentem & efficacem reddidit , vt non minùs valeret in dissuadendis erroribus contra Fidem , quàm in persuadendis Christianæ Religionis veritatibus.

Postremò denique , quæ à Domino præter Beatitudinem , & Gloriam essentialem sit munera consecutus , & gratias in humanum genus conferendas , tanto in numero celebrantur , vt S. Bernardus affirmet post memoriam Virginis singularis , nulum esse qui memoretur dulciùs , aut inuocetur frequentius ; Ex his tamen recensentur quinque fauores præcipui. Primus , ste-

*Serm. de
S. Nicolao.*

rii partum impetrare. Secundus, captiuos captiuitate liberare. Tertius, tempestates maris sedare. Quartus, balsamum è corpore, ad omnem morbum curandum profundere. Quintus, desperatos peccatores ab ipsis inferorum ereptos faucibus, ad meliorem vitam reuocare.

Hæc sunt & multa alia, supra quæ constitutus est fidelis Christi seruus, sanctus Nicolaus, qui cum neglectis suis priuatis rationibus vni Domino seruiendo vacaret, sua magis promouit, quàm si suis solum intendisset. Hinc orta est Veritas, quæ modo expendenda proponitur, Vt in quocumque vitæ genere quis versetur, *numquam melius sibi provideat, quàm si nihil sibi retinens, nullâ sui ratione habitâ, totum se Domino suaque omnia dedat & consecret.*

Ratio est perspicua, quia cum Dei seruus, sic Deo seruit totus, vt nihil planè sibi reseruet, diuinam in se prouocat benignitatem. Deus est quidè diues in omnes, etiam antequam quid mereatur, imò etiam postquam demerentur, sed in eos præcipuè diuitias Bonitatis suæ explicare, qui sint in se liberales & munifici, nemo dubitare potest, quin dubitet de Dei Bonitate & æquitate. Nam si tu qui hæc meditaris aut legis, nolles tibi exprobrari hominem aliquem suis stipendiis tibi seruientem egestate opprimi, cum posses eum sustentare: quid putas de Bonitate Dei ad tuam comparata? Itane te bonum credes, vt quod humanæ est bonitatis nolis omittere; Et non credes Deum ita esse bonum? Oporteret illum aut nescire, aut non posse, aut non velle adesse homini, sic sibi seruienti. Vtrum ex his dices? Non duo prima; nam illi detrahare scientiam & potentiam, nimis capitale est & blasphemum. Vnde restat tertium, quod nolit. At vide quàm sit istud longè capitalius cum magis directè pugnet contra Bonitatem Dei, cuius proprius actus est velle bonum. *Si vos cum sitis mali, nostis bona data dare filiis vestris, quanto magis pater vester.*

II. II.

II. P V N C T V M.

SED non melius sibi providere potest Dei seruus, quàm sic prouocando diuinam Benignitatem. Vnde enim habet homo, vt bene sibi providere possit? nempè ex his tribus: primò quòd naturaliter

raliter benè sibi velit, deinde quòd sciat quid sit sibi vtile; ac postremo quòd id possit. Qui foeliciores sunt in his tribus, hi foelicius & melius sibi suisque rebus prouident. At quantumcumque foelices in his & periti possint esse homines, quis dubitet Deum longè in omnibus eminentiorem esse? An nescis ipsum tibi melius bene velle, quàm tu tibi; An ignoras ipsum melius nosse quid tibi sit vtile, quàm tu id noscas; Ipsum denique quàm tu possis, melius posse. Vnde planè sequitur, vt quanto Deus homine est melior, sapientior & potentior, tanto melius homini prouideatur à Deo, quàm ab homine; ac proinde cum hanc ille habeat Diuinam Prouidentiam, qui sibi diuinam procurauit benignitatem; quis non videt non posse aliter melius sibi prouideri? *Conuertimini & videbitis*, inquit Propheta, *quid sit inter iustum & impium; & inter seruientem Deo, & non seruientem ei.* Matth. 3

III. PUNCTVM.

SIC est igitur, vt habet Veritas: Numquam melius sibi prouidet Dei seruus, quàm si nihil sibi retinens totum se suaque omnia Deo dedat & consecret. Sic enim diuinam benignitatem & prouidentiam sibi conciliat, quæ tanto est aptior nostris rebus feliciter procurandis, quo Deus maior est homine. *Omnem sollicitudinem vestram projicientes in eum, quoniam ipsi cura est de vobis*, inquit S. Petrus, cui conformiter Apostolus: *Scio cui credidi*, & certus sum, quia potens est depositum meum seruare in illum diem: quasi diceret, quod est valde obseruandum; non hîc expecto tales eius prouidentiae & fidelitatis effectus, vt nihil eorum quæ ad hanc præsentem vitam spectant, deesse possit; cum & ipsa præsens vita sit tandem desitura: Sed hoc scio, & certus sum, quòd quidquid boni vel mali accidat, hoc totum rectè ordinet & prouideat in illum Diem qui numquam desiturus est, & ad quem nisi omnia nostra dirigantur, non possunt dici feliciter succedere, aut bene prouisa esse. *Quid enim proficit homo, si lucretur vniuersum mundum, se autem ipsum perdat, & detrimentum sui faciat?* Hæc est itaque vna rei nostræ felicitas, si felicitati æternæ coaptamur & disponimur. Quod cum maximè & indubitatè prouideat diuina Benignitas illis potissimum, qui sibi fi-

dunt & totos tradunt: certè hi sunt qui sibi maximè prouident, dum nihil sibi referuant, vt toti illius sint, qui hoc vnum expectat, vt eos tamquam suos in suam ipse felicitatem rectà ducat,

Matth. 25.

& introducat. *Intra in gaudium Domini tui: O quale gaudium! qualis introitus! quid non propterea dandum esset, si emi posset?*

Sermon.

64. de ver.

his Dom.

Et tamen vanale est, inquit S. Augustinus, eme si vis, non multum exastues de re magna propter pretij magnitudinem: tantum valet, quantum habes. Noli querere quid habeas, sed qualis sis; res ista tanti valet, quantum es tu! Te da & habebis illam. Hoc est nihil tibi de te referua in Christi seruitio, & habebis Christum, qui vera Via est ad æternam illam Vitam.





IN FESTO

CONCEPTIONIS
B. Mariæ Virginis.

*Die 8.
Decembris*

Tota pulchra es amica mea, & macula non est in te.

Cant. 4.

VERITAS PRACTICA.

Conceptio sine macula non potest verè coli cum macula.

VEL SIC

Præuaricatorem esse oportet, qui Conceptionem sine macula, colat cum macula.

SENSVS est, quòd quisquis aliquam in se agnoscit peccati seu depravati affectus maculam, quam non velit deponere, non potest verè colere Conceptionem Beatissimæ Virginis, sicut hodie colenda proponitur sine ulla peccati macula: aut si hanc colat cum macula, præuaricator sit reputandus, iuxta illud Davidis, Præuaricantes reputavi omnes peccatores Ps. n. 3.
terræ.

RATIO EST, quia præuaricator is dicitur qui contra id agit quod profitetur.

Sed qui colendo Conceptionem sine macula, non vult deponere

Nnn ij

quam in se agnoscit maculam, contra id agit quod profitetur.
 Ergo eum præuaricatorem esse oportet; aut ne tam infami se inficiat
 nomine, deponat maculam quisquis conceptam sine macula
 velit colere Beatam Virginem.

I. P V N C T V M.



QUOD piè creditur, & quod colendum hodiè pro-
 ponitur de Conceptione Beatissimæ Virginis, sic
 breuiter habe & contemplare. Illo ipso primo in-
 stanti quo creata eius anima infundenda erat for-
 mato corpori, in vtero Beatæ Annæ matris, atque
 ut cæteræ animæ in originale peccatum iam iam lapsura erat;
 præuenit Deus hunc lethalem lapsum, & Gratiâ sanctificante
 quæ cum tali peccato repugnat, ita illam animam præmuniuit,
 ut sancta simul ac concepta fuerit; vnde eius Conceptio dicitur
 immaculata, id est absque vlla profus peccati macula; vnde
 illi hæc ex Canticis, & Sacris Psalmis ab Ecclesia concinuntur:
 Cant. 4. Tota pulchra es amica mea, & macula non est in te; QVAM pulchræ
 Ibid. 6. sunt gressus tui in calceamentis, filia principis; Id est in ipso primo
 exortu. Sanctificauit tabernaculum suum altissimus: Deus in medio
 Ps. 45. eius non commouebitur: adinuabit eam Deus mane diluculo. Venite
 & videte opera Domini quæ posuit prodigia super terram: auferens
 bella vsque ad finem terra: Arcum conteret & confringet arma, Id est
 nulla erit repugnantia carnis cum spiritu, quandoquidem nul-
 lum est peccatum, quod est origo & fomes talis repugnantia;
 lib. de Em- Qua est ista terra, inquit Richardus Victorinus, de qua bella omnia
 manuelc. auferuntur, nisi illa de qua Idem Propheta, veritas de terra orta est;
 Cateris sanctis præcipitur ut in mortali eorum corpore peccatum non
 regnet, soli virgini singulariter datur, ut mortale corpus eius pecca-
 tum non inhabitet.

His & similibus aliis cogitationibus & affectibus immacu-
 latum hunc Beatissimæ Virginis Ortum saluta, venerare, &
 omni pietatis officio prosequere. Et vero id digne & verè num-
 quam facies, nisi quam noris in te peccati maculam hodie stu-
 deas eluere, & omnino deponere. Neque enim Conceptio sine
 macula potest verè coli cum macula. Præuaricantes sunt qui

dem omnes peccatores, sed hi tales maximè reputandi, qui cum voluntariâ peccati maculâ, immaculatam Sanctissimæ Virginis Conceptionem se colere profitentur.

Ratio quæ affertur est facilis, dum semel benè intelligatur quid sit præuaricari, seu esse præuaricatorem; Id autem Scriptura satis apertè declarat, cum ait: *Noli præuaricari in amicum*, Ecclesi. 7. Id est noli quidquam committere, quo videaris non esse eius amicus, cuius te tamen amicum profiteris. Et alibi: *Interpre-* 1f. 43.
tes tui præuaricati sunt in me, id est, cum præ se ferrent explicare legem, aliter interpretati sunt ac explicanda erat: vel, iuis ipsis operibus destruxerunt, quod astruebant interpretando legem, cum aliter viuerent, quàm viuendum ex lege scirent. Sic Gal. 2.
aptè Apostolus: *Si quæ detruxi, iterum hac edifico, præuaricatorem me constituo*. Ex quibus manifestè patet præuaricatorem eum dici, qui aliud agit, & aliud profitetur. Quod est valde probrosum. *Deprehenderis & detegeris Christiane*, inquit sanctus De Symbolo ad Catec.
Augustinus, *quando aliud agis, & aliud profiteris*.

II. PUNCTVM.

SED qui colendo Conceptionem sine macula, non vult deponere quam in se agnoscit peccati maculam, contra id agit quod profitetur, seu aliud agit, & aliud profitetur.

Quid est enim colere Conceptionem sine macula, quàm profiteri, & præ se ferre quod esse sine macula, sit tam magnum, tam laudabile, tamque diuinum, vt æstimetur à nobis religiosè colendum & celebrandum? Et certè ita est, nulla par dignitas, nullæ diuitiæ, nullus honor aut gloria, nullum denique creatum bonum potest venire in comparisonem immaculatæ animæ. Nam si de sapientia sic Sapiens loquitur; *præposui illam re-* Sap. 7.
gnis & sedibus, & diuitias nihil esse duxi in comparatione illius: nec comparavi illi lapidem pretiosum, quoniam omne aurum in comparatione illius, arena est exigua, & tamquam lutum æstimabitur argentum in conspectu illius: Quantò id magis verum de Gratia, cuius minimus gradus tanto supra sapientiam & omnia creata bona præminet, quanto ipsa sapientia cæteris præstat bonis.

Sic apertè Ecclesiasticus: *Quàm magnus, inquit, qui inuenit* Ecclesi. 25.
sapientiam & scientiam, sed non est super timentem Dominum. Ti-

mor Dei se super omnia superposuit; Quasi diceret, quidquid magni & admirandi cogites de homine, nisi voluntaria culpâ vacet, quantum quidem per Dei gratiam vacare potest, non est ille vir tantus, quantus est timens Deum, qui se illo timore vel à contrahendi peccati macula continet, vel contractam quam citò potest deponit, quia puritas vitæ præstat omnibus æstimationis; quantumcumque sint illa pretiosa. Omnis ponderatio, ait Idem, non est digna continentis animæ.

Ibid. 26.

Atque hanc integerrimam vitæ puritatem tanti æstimabat sapientissima Virgo, ut ipsi Maternitati diuinæ non dubitaret eam præponere: unde si optio illi data fuisset eligendi, aut maternitatem Dei cum peccato originali, vel cum alia demum peccati macula; aut immaculatam puritatem sine maternitate Dei; maluisset pura esse sine Dei maternitate, quam mater esse sine tali puritate. Quod ex eius responsione ad Angelum, facile est colligere, *quomodo fiet istud quoniam virum non cognosco?*

Enc. I.

Matth. 12.

Enc. II.

Nec erat alius Filij eius, Domini nostri sensus, cum diceret nuntianti matrem adesse; *Qua est mater mea, & qui sunt fratres mei?* Vel cum inclamanti, *beatus venter qui te portauit, & ubera quæ suxisti*, responderet, *quin imò, beati qui audiunt verbum Dei & custodiunt illud.* Nam sic indicabat, ut interpretatur S. Augustinus, & alij, *beatior em esse virginem, & digniori titulo suam esse matrem, quòd sancta esset, quam quod præcisè sua mater esset: Nec materna, inquit, propinquitas Maria profuisset, nisi felicius Christum corde, quam carne gestaasset.*

L. de sancta Virg. c. I.

Hoc est igitur quod profitemur hodie, cum Beatissimæ Virginis Conceptionem sine macula colimus; hoc est quod in ea colitur, *purum scilicet, & immaculatum esse*, quod est certè colendum. Itane vero id colis qui quam in te agnoscis peccati maculam, non vis deponere?

Hoc quidem profiteris, sed nonne aliud agis & aliud profiteris? Cur enim peccati maculam retines; nisi aliquid in peccato tibi placeat, & quod probatum velles ab omnibus? At verò si est aliquid quod in peccato placere & probari possit, quid est quod esse absque peccato sit ita laudabile, sicut laudatur hodie in immaculata Virgine, & sicut tu ipse celebrandum profiteris?

Si de originis peccato duntaxat ageretur, si de aliquo veniali,

quo vix vllus eximitur: tolerari res posset; sed cum voluntarium ipse peccatum admittas, & admissum retineas, & approbes, atque etiam ab aliis approbatum velles, ne illud deponere cogereris; hoc est profecto tam aliud & tam diuersum ab eo, quod hodie profiteris in laudata Virgine, quam peccatum & non peccatum. Tu bonum & beatum profiteris in sancta Virgine, absque peccato esse; tibi autem esse in peccato bonum & beatum censes, quandoquidem in eo non remaneres, nisi tibi bonum esset. Quid illud tandem est, nisi aliud dicere & agere, atque aliud profiteri? Sunt quidem aliqua bona quæ probentur in vno magis, quam in alio: sed peccatum in nullo probari potest. Diuitias & honores vnus cum laude contemnet, quas alius merito retinere potest; At solum est peccatum, quod nemo iure retineat, & quod nemo verè improbet, si tantillum in se probet. *Nimis odito execrationem*, Id est, quantum *Ecclesi. 17.* cumque tibi videaris eam odisse, maiori etiam habenda est odio.

III. P V N C T V M.

P*RÆVARICATOREM* igitur eum esse oportet, qui *Conceptionem sine macula colat, cum voluntaria macula.* Quia in colendo talem Conceptionem videtur eam maculam detestari, quam tamen dum in se admittit aut retinet, adeo non detestatur, vt amet & approbet, sicque aliud agit, & aliud profiteretur, quod est seipsum negare, & præuaticatorem constituere; atque in offensam Dei non leuem incurrere. Vnde ipse per Prophetam. *Ponam, inquit, faciem meam in eos, eò quod præuaticatores extiterint.* *Ex. 15.* Sic enim videtur augeri peccatum ex mente simulata & ex duplici corde, quod apparet in probando simul & improbando peccato. Vnde & rectè Sapiens: *Anima præuaticatorum iniqua.* *Pr. 13.* Nam sic iniquè agit & contra Deum, & contra seipsam. Neque valet quod dicas te non amare peccatum, cum rem ipsam ames cui annexum est peccatum. Neque etiam excusat, quod longè sit alia nostri ratio & Beatæ Virginis, à qua omnem culpam remoueri dignitas eius exigit: à nobis autem nostra conditio non ita postulat. Id enim falsum est de grauioribus & voluntariis illis culpis quas fouemus, & quas sic debemus, quantum

Iac. 1.

1f. 46.

cum gratia possumus, deuitare, vt nihil putemus magis nostrum, quàm, *Immaculatos nos custodire ab hoc sæculo.*

Pr. 8.

Ecclesi. 24.

MEMENTOTE istud & confundamini: Redite prauaricatores ad cor: Nempe vt hæc cogitet & recogitet coram Deo, & Beatissima Virgine, cui quantum vitæ Puritas placet, tam displiceat Impuritas necesse est. Effunde quas voles preces; adorna quo velis munere, sacras eius imagines & sacras eius ades: Erumpe in eius laudes quantumuis eximias, nihil agis ad eius cultum, nisi puritatem vitæ quam maximè colit, & quâ maximè se colendam indicat, studiosius confecteris. *Nunc ergo filij audite me, beati qui custodiunt vias meas.* **BALSAMVM** non mixtum odor meus: & flores mei, fructus honoris & honestatis. *Transite ad me omnes, qui concupiscitis me, & à generationibus meis implemini.* Id est, Immaculatæ meæ Conceptioni vos conformate.

IN EADEM DIE,

AD ILLVD APOCALYPSIS 21.

Non intrabit in eam aliquod coinquinatum.

I. PUNCTVM.

Iphes. 5.

PRIMO id dicitur de coelesti Ciuitate seu Beatitudine, in quam certum est nihil nisi purum & sanctum intrare: vbi maximè adimpletur quod ait Apostolus de Christo Domino, *Qui seipsum tradidit pro Ecclesia vt illam sanctificaret, vt exhiberet ipse sibi gloriosam Ecclesiam non habentem maculam, aut rugam, aut aliquid huiusmodi, sed vt sit sancta & immaculata.*

Ps. 45.

Ps. 9.

DEINDE vero id accommodatur Beatissimæ Virgini quæ est *Ciuitas Dei de qua gloriosa dicta sunt: Et semper dici debent, vt est in Psalmo: Et in quam non intrabit aliquod coinquinatum siue originale siue actuale. Quæretur peccatum illius, & non inuenietur.*

DENIQUE de Eadem etiam modò id dici potest, quo sensu dicimus, intrare in animum alicuius, id est, sibi beneuolum & gratiosum

gratiosum facere : *Sicque non intrabit in eam aliquod coinquinatum*, perinde est ac dicere , nullus coinquinatus eo vitio quo præcipuè inquinatur animus , nimirum Impudicus , Impurus , Immundus , & quisquis huiusmodi est affectu & habitu, nullus intrabit in animum eius , quidquid faciat vt sibi eam beneuolam & gratiosam reddat , nihil faciet , nisi mutet mentem , & impurus esse desinat. Quod vt plenius ad praxim expendatur sic est concepta.

VERITAS PRACTICA.

Aut puritatem Beatissimæ Virginis neget Impurus, aut concedat se abnegatum à tam pura Virgine.

RATIO EST, Quia qui neget tantam esse puritatem Virginis Matris, quanta est ipsa in se puritas; negabit eius puritatem.

Sed si porrò concedat talem eius puritatem, necesse est vt concedat se à tali puritate, siue à tam pura Virgine abnegatum.

Ergo aut puritatem Beatissimæ Virginis Impurus neget, aut concedat se abnegatum à tali Virgine; quorum alterutro negato vel concesso quid detestabilius? quid damnabilius?

PRIMA propositio non potest aliter declarari quam exponendo talem fuisse puritatem Beatissimæ Virginis Matris, qualis ipsa in se potest esse puritas, id est, quanta potest cogitari maxima, id est, quanta ipsa esset pura creata Puritas si re ipsa subsisteret. Sic enim expressè Ecclesia, dum sanctam & immaculatam laudat Virginem : *Sancta, inquit, & immaculata Virginitas quibus te laudibus efferam nescio. Sic decens, erat,* inquit sanctus Anselmus, *vt ea puritate qua maior sub Deo nequit* L. de Conceptu Virg. c. 18. *intelligi, Virgo illa niteret.* Et S. Ambrosius : *Sit vobis tamquam in* L. 2. de Virg. *immagine descripta Virginitas, vitæque Mariæ, de qua velut in speculo* L. 2. de Virg. *refulget species castitatis, & forma virtutis.* Sic denique quidquid ad extollendam puritatem Scriptura vel in figuris obuolutum, vel in personis repræsētatum, vel in verbis expressum habet, hoc :

Serm. de
Assumpt.
Virg.

totum sancti Patres ad sanctissimæ Virginis referunt puritatem, neque dum tamen satis eam extulisse putant; Vnde est illud egregiè dictum à Sophronio; *Quidquid est mentis humana si adhiberetur, non posset cogitare quàm esset illa, indefinenter affixa Deo, ut in ea nihil esset mundanus quod violaret affectus.* Vides itaque quam sit verè dictum quod Impurus negaret puritatem Virginis, qui talem ei puritatem denegaret.

II. PUNCTVM.

SED si porrò Impurius talem ei concedit puritatem, contemplare quam non minus sit certum, quod simul necesse est ut concedat se à tam pura Virgine abnegandum & repellendum, aut iam esse abnegatum & repulsum.

2. Cor. 15.

Quod enim faceret Puritas, hoc pura Virgo faciat necessum est, si ipsa est puritas, cum seipsam negare non possit, neque à se ipsa degenerare aut tantillum desciscere. Quid autem faceret Puritas cum Impuro? Alterutrū profecto è duobus; aut ab eo perdatur, aut illum perdat. *Neque enim, ut ait Apostolus, corruptio incorruptelam possidebit.* Non est vlla virtus tam sui tenax, & magis indiuisa quam pura Puritas. Aut pura esse desinet si quid impurum sibi accedere patiatur, aut si pura consistat, numquam illud patietur.

Patietur Humilitas assidere sibi superbum; Feret mansuetudo iracundum; Portabit inuidum Charitas; Intemperantem Temperantia sustinebit; Suum denique vnaquæque Virtus oppositum utcumque tolerabit; sola est Puritas quæ simul cum impuro non potest tuta quiescere, non potest quieta subsistere. *Discede à me pabulum mortis, quia iam ab alio Amatore prauenta sum.* Solo Impuri aspectu sic in sancta mouebatur Agnete Puritas, ut quamquam atate, Virgo infirma esset, virtute tamen tam robusta & constans erat, ut auderet sic loqui, sic contendere, sic certare, & vincere.

Sap. 4.

Non est pro aliis virtutibus tale institutum certamen quale pro Castimonia, *Qua, ut ait Sapiens, in perpetuum coronata triumphat, incoinquinatum certaminum premium vincens.* Id est, sic decertans, ut non modo se inquinari non patiatur, sed neque inquinatum sibi accedere; perdat potius cuncta, quàm vel le-

uiter attrectetur. Dabit in Iosepho pallium; Dabit in alio linguam contra impurum, conspuendam; In alio dabit oculos eruendos potius quam maculandos: Et in magno Ioanne dabit caput, Caput illud Sanctissimum, ne dicatur vidisse impuritatem, & tacuisse. Nam si herba quædam, si nonnullæ gemmæ, si apes cum impuro ita pugnant ut simul non possint quiescere, quid ipsa faciet Puritas? quid ingenitus à natura rationali Pudor, vel infusus à gratia?

HINC tam seuera Pauli contra Corinthios animaduersio, quod vel vnum impurum in sua secum ciuitate paterentur: *Et I. Cor. 5.* *vos inflati estis, & non magis luctum habuistis, ut tollatur de medio vestrum qui hoc opus fecit?* Non eos arguit quod impuri essent, quod impuritati consentirent, aut quoquo inde modo ad se contraherent; sed hoc vnum quod illum apud se sinerent viuere qui non purè & sanctè viueret, non quod in eodem habitarent cubiculo, non quod in eadem domo, non quod in eadem vicinia; sed quod eum tantum in eadem Ciuitate, licet amplissima paterentur, nec inde illum expellerent, nihil ut habere possent cum illo commercij, non tantum vsu, non tantum victu, nec tantum colloquio, sed nec accessu nec visu. *Auferte, inquit, malum ex vobis.* *ibid.* *bis* *ipsis.* Sic nempe Puritas impurum abnegat, & à se abjicit.

III. P V N C T V M.

AUT ergo puritatem Beatissimæ Virginis Impurus neget, aut concedat se à tali puritate abnegandum. Nam si neget eam ipsam esse Puritatem, negabit esse puritatem Virginis matris: aut si talem illi concedat puritatem, concedat etiam necesse est, ut in ipsum Virgo exerceat quidquid Puritas exerceret, si sola per se ageret. Quid autem Puritas exerceret, nisi quod sibi tam intimum & connaturale est, ut puritas non esset, nisi oppositam impuritatem penitus abhorreret, *Quæ enim participatio iustitiæ cum iniquitate, aut quæ societas luci ad tenebras?* *2. Cor. 6.* Nulla certe, Sed tamen aliqua fieret potius lucis & tenebrarum confociatio, quàm puritatis & impuritatis. Hoc est quod ipsa Virgo purissima cuidam Adolescenti non satis casto, quondam indicauit, dum sibi preces fundenti dapes exquisitas obtulit in vase lutofo & sordido comedendas. Exhorruit scilicet Adolescens; At illa, inquit,

fic tu mihi horrorem infers cum preces alioquin pias tu immundus & impurus offers. *Qui creauit me, requieuit in tabernaculo meo.*
Ecclef. 24. & dixit mihi: in Iacob inhabita. Non in Esau, non in fornicatore & profano Esau, vt declaratur fusius in Festo Annuntiationis.

Hoc ergo cogitet quisquis impurus accedit, purissimam Virginem oraturus, cogitet se ad ipsam Puritatem accedere, se puritati velle communicare, nec velle tamen impuritatem deponere: quod est puritatem ita offendere, vt non possit ad se accedentem non exhorrescere. *Lauamini mundi estote, auferite malum cogitationum vestrarum ab oculis meis, & venite.* Alioquin, *scitote intelligentes quod omnis fornicator, aut immundus non habet hereditatem in regno Christi;* ac proinde etiam tamquam exhæres à Regina matre, & tamquã à Sara Ismael, domo & aspectu eiectus est, depulsus est, & abnegatus. At quò tandem fugiet, offensa Virgine? sublatũ est omne prorsus effugium. Vide & recale memorandã Sanctorum Patrum sententiam: *Sicut omnis ab illa conspectus impossibile est vt pereat, sic ab illa despectus necesse est vt intereat.* Cumque illud totum damnum ex vna Impuritate nascatur, quis sanæ mentis & de sua salute tam parum sollicitus, vt non potius serio cogitet de mundando corde, quam se tot damnis abiciat, tamque certis periculis? Sic dicuntur *desperantes* qui semetipsos tradiderunt impudicitie, quia reuera nihil desperatius, nihil deploratius. *Salua animam tuam, festina, & saluare ibi.*

SIC FORTE ETIAM BREVIUS POSSET CONCIPI VERITAS.

Nemo amans impuritatis, amat Beatam Virginem.

RATIO à priori est, quod nemo eum amare dicendus est cui non timet displicere, sua culpa quam posset tollere.

Sed amans impuritatis non timet displicere Beatæ Virgini suã illã culpã grauissimã quam posset tollere. Ergo non amat Beatam Virginem, quidquid sibi fingat.

RATIO à posteriori est, quod nemo sit amans Beatæ Virginis qui ab ea non ametur. Sed amans impuritatis, non amatur à Beata Virgine. Ergo nec eius amans est: & nescit quid sit eam amare, vel amari ab illa.

EGO, inquit, diligentes me diligo, in viis Iustitiæ ambulo, in ^{Prov. 8.} medio semitarum Iudicii, ut ditem diligentes me, & thesauros eorum repleam. Hoc est videlicet eam diligere, In iisdem Iustitiæ viis in quibus ambulat, ambulare. Et hoc est ab ea diligi, ab ea copiose ditari, & repleti bonis coelestibus. At certe amans impuritatis non is est qui sic amet & ametur.

ALIA VERITAS PRACTICA.

Quam in se amat Beata Virgo puritatem, in nobis amat:
Et quam in se odit impuritatem, in nobis odit.

RATIO est, quia quam in se amat puritatem, aut quam in se odit impuritatem, idcirco sic amat & sic odit, quia sic placet Deo: & quidquid Deo placet, ut vel amet, vel oderit, sic illa semper amat & odit. Atqui hoc etiam Deo placet ut quam in se amat puritatem, in nobis amet, & quam in se odit impuritatem, in nobis oderit. Ergo illa quod in seipsa, hoc in nobis amat & odit. Non eodem quidem in gradu puritatem amat in nobis atque in se, quia non idem gradus saltem positivus in nobis, Deo placet, sicut in illa; sed quam videt placere Deo in nobis puritatem, certe sic illa vellet & sic amat, sicut suo modo suam amat. Quidquid sit autem de positivo puritatis gradu, cum certum sit de negativo nullum Impuritatis actum & gradum voluntarium placere Deo in nobis, sic profecto illa omnem impuritatem in nobis odit, & tam vehementer odit quam in se odit, & quam videt placere Deo, ut in nobis oderit & detestetur.

Iam vero quale est illud odium quo in se impuritatem odit? aut quale est illud quod de nobis in Deo videt! cogita, recogita vehementer, ut sentias in te quod ipsa de te sentit: *Quasi libanus Ecclesi. 24.*
non incisus vaporavi habitationem meam.

AD ILLA CANTICORVM VERBA:

Sicut lilium inter spinas, sic Amica mea inter filias.

Cant. 2.

VERITAS PRACTICA.

Quod sis tamquam spina natus, potest quidem Beata Virgo compati: Sed quod modo tamquam spina viuas inter lilia, non potest pati.

SENSVS infra commodius declarabitur.

RATIO quoad postremam partem quæ sola probatione indiget, hæc est, quod Beata Virgo non sic potest lubens volensque pati seu ferre tuas culpas, quin eas improbet & omni modo infestetur.

Sed quod modo, tamquam spina viuas inter lilia, tua vnus culpa est.

Ergo id illa non potest pati.

P R I M I S explicandum est quomodo in sua Conceptione Beatissima Virgo fuerit, sicut Lilium inter spinas; id est quâ differentia lilium à spinis differt, sic Beata Virgo à reliquis hominibus. Triplex autem notari potest differentia.

Ephes. 2.

Prima, quod lilium sit aspectu pulchrum & iucundum, spinæ autem deformes strigosæ & nullo modo gratæ. Sic Beata Virgo dum est concepta in Gratia, tota gratiosa, tota pulchra, & sine macula fuit in oculis Dei. Cateri vero infantes dum in peccato concipiuntur, & manent, filij sunt iræ, sunt inquinati culpa quam vocant originali, & nullo modo grati.

2. Cor. 12.

Rom. 7.

Deinde lilium læue est, politum & suaue tactu: Spinæ vero asperæ, aculeatæ & vix tractabiles. Sic Beata Virgo tota suauius est sine vlllo carnis stimulo, sine vlllo peccati fomite; Cateri autem cum Apostolo ingemiscunt & dicunt, *Datus est mihi stimulus carnis meæ. VIDEO aliam legem in membris meis repugnantem legi mentis meæ.*

Denique lilium expansis in coelum foliis sursum erigitur, & recto consistit situ: Spinæ autem deorsum repunt & in terram totæ incuruantur. Sic immaculata Virgo nulli humanæ obno-

ria corruptelæ, non in terra figit suas curas & cogitationes, sed in coelum, coelestesque motus tanta facilitate fertur cum sua Gratia, quanta nos inde auocamur. O verè lilium inter spinas, ô vere pulchra & suavis & electa inter omnes, sine te tangi nostris miseriis, moueat te miseranda nostra condicio. Compatietur illa quidem nostris humanis & naturalibus miseriis, quibus ex aliena potius culpa subiaceamus quam nostrâ, sed quod nostra culpa sumus miseri, non hoc prouocat coelestem misericordiam, sed iram excitat.

Iudith. 8.

HOC est quod continet proposita Veritas, hoc est tamquam spinam nasci, nasci cum illis defectibus qui discernunt spinas à lilio; Et quod quidem ita sis natus, tibi compatitur: Sed quod modò tamquam spina viuas inter lilia, modò cum possis in Christo tuis resistere naturalibus concupiscentiis, sic tamen illis cedas, quasi non esset Christus: tua est culpa, tua est malitia. Quod autem sic tua culpa fit, non potest æquis Virgo videre oculis, non potest æquo pati animo, cum præsertim inter Eos viuas qui velut lilia, coelesti puritate nitent, & quid possis cum Gratia, suo te doceat exemplo, suo comitetur præsidio.

O quantum tu te ipse disiungis à Virgine! Hæc facta est lilium inter spinas; & tu inter lilia, te vltro spinam facis! *flo. Ecclesi. 39.*
rete flores quasi lilium, & date odorem, & frondete in gratiam.

AD HÆC PSALMI TRIGESIMI TERTII VERBA:

Venite filij, audite me, timorem Domini docebo vos.

VERITAS PRACTICA.

PVERIS MAXIME COMMENDANDA.

Quem docet Virgo timorem Domini, tantò meliùs concipitur, quantò meliùs edocetur immaculata Eius Conceptio.

RATIO EST, Quia quem docet Virgo timorem Domini, tanto

melius concipitur, quantò exemplum eius quo illum timorem docet, est efficacius.

Sed quantò melius edocetur immaculata eius Conceptio, tanto est efficacius eius exemplum quo illum timorem docet.

Ergo & quem docet Virgo timorem Domini, tantò melius concipitur, quantò melius edocetur immaculata eius Conceptio; At proinde diligenter audienda est, ut doceamur in praxi sanctum illum timorem Domini.

I. PUNCTVM.

NULLA est ætas, nulla Condicio, nullusue hominum status in quo Timor Domini non sit valdè commendandus, atque etiam valde necessarius, nam *qui sine timore est, non poterit iustificari; Et si non in timore Domini tenueris te instanter, citò subuerteret domus tua.* Tamen hic affectus pueros, & eos qui incipiunt vacare suæ salutì vel maxime decet & iuvat, vnde dicitur *Initium sapientia, Timor Domini, & ipsa Sapientia præsertim monet: fili, accedens ad seruitutem Dei; sta in iustitia & timore.* Quamobrem licet omnes Christiani dicantur & sint filij Beatissimæ Virginis Matris, possintque reuera his compellari vocibus: *Venite filij, audite me: tamen hi filij propriè sunt Pueri vel Iuniores in cultu Domini, quos optima Parens diligenter instruit, & quod primum docet est timor Domini. Venite timorem Domini, docebo vos,* hic est scholarum & sodalitatum finis præcipuus, vt discatur ille S. Timor qui tãto supra scientiã & quaslibet artes excellit, quantò ipsa scientia & humana quæuis sapientia præstant cæteris caducis bonis. Iam enim audiuiſti Sapientem ita nobis denuntiantem: *Quàm magnus qui inuenit sapientiam & scientiam, sed non est super timentem Dominum. Timor Dei super omnia se superposuit. Beatus homo cui donatum est habere timorem Dei: qui tenet illum, cui assimilabitur?*

Cum autem multa sint vnde hic sanctus timor hauriri possit, tum ex Beata Virgine, *quæ est Mater pulchræ dilectionis & timoris, & agnitionis & sanctæ spei.* Mirum certe quod illa simul esse possit mater spei, & timoris: aut si forte diuersæ hæ affectiones

actiones diuersis represententur mysteriis, quomodo in Conceptione timor exhiberi potest, vbi potius apparet esse spes & gaudium totius humani generis? Hoc est modo exponendum & audienda imprimis proposita Veritas quæ sic coniungit affectum timoris cum mysterio Conceptionis, vt non possit melius concipi sanctus ille timor, quàm intelligendo quàm sit illa pura & immaculata Virginalis Conceptio: nec vtilius explicari possit hæc singularis puritas, quàm vt discatur ille timor, quæ Virgo docet suæ vitæ puritate. Cum sint porrò variæ diuersæque timoris species, delibari possent ex singulis aliqua, vnde ad illum tãdem deueniatur qui ad praxim est maxime opportunus, ad versiculi sensum præsertim accommodatus, atq; ad fructum imprimis vberimus, quo videlicet sic timetur & colitur Dominus, vt ab omni specie mala caueamus, sitque illa *scientia religiositas qua custodiet & iustificabit cor: incunditatem ac gaudium dabit*, vt ait Sapiens, id est, religiosa Conscientia & *secura mens qua est quasi inge conuiuium*. *Prou. 15*
Hic est sanctorum timor seu timor qui facit sanctos, nam cum sanctitas sit vitæ puritas, neque alio suauiori simul ac efficaciori modo promoueatur illa puritas quam sancto & casto timore Domini, vere hic est sanctorum timor de quo dicitur, *Time* *Pf. 33*
Domini omnes sancti eius; Et misericordia eius à progenie in progenies timentibus eum. *Luc. 1.*

Vox quidem vniuersalis est, Timor seu timere, suo complexu continens quidquid ad cultum & seruitutem Dei spectat, sed huius cultus & seruitutis pars prima cum sit cauere prorsus omni peccato, atque eius anfas, occasiones & ipsam umbram fugere: *Nam qui amat periculum, in illo peribit*: merito pro hac cautela & fuga Timor singulariter usurpatur, dicunturque vna hac voce præcipui Cultores Dei, *Viri timorati, seu timentes Deum & pauidi*. *BEATVS homo qui semper est pauidus, qui verò mentis* *Prou. 23*
est dura, corruet in malum.

Atque hac in religionis parte tam insignis & eximia fuit, Beatissima Virgo Deipara, vt cum triennis adhuc esset, secesserit in templum Domini, longè à sæcularibus disiuncta negotiis & commerciis, *Vbi necesse est*, inquit S. Leo, *de mundano pul-* *Serm. 4. ad*
uere etiam religiosa corda fordescere: vel cum inde deducta est vt *Quadr.*
sponso traderetur: Sola in penetralibus, ait S. Ambrosius, *quam* *Lib. 2. in*
nemo virorum viderit, solus Angelus repererit, sola sine comite, sola *Lucam.*

sine teste, ne quo degenerate deprauaretur affatu, ab Angelo salutatur. Eam ob causam si foras ex Charitate prodeundum fuit, si visitanda cognata Elizabeth, nonnisi cum festinatione perget, vnde idem sanctus Doctor: Discite Virgines non circumcurfare per alienas ades, non demorari in plateis, non aliquos in publico miscere sermones. Maria in domo sera, festina in publico, mansit apud cognatam suam tribus mensibus.

Sed cur non pluribus mansit? cur non eo potissimum tempore quo erat paritura foetum Elizabeth? quo plus illi auxiliij delatura Virgo videbatur? Quia nempe ad insperatum sterilis partum futurus erat nimius vicinorum concursus, nimis effusa turbæ, nimis apertus loquendi aditus, vnde tum sanctus timor recessum consuluit, & maluit Virgo Sanctissimâ, dum hæc humana fugeret confortia, seruandi exemplum timoris Domini nobis dare, quàm si remaneret diutius, audaciores redderet posteros qui audirent illam in mediis constitisse turbis. Vide quæ de hoc exemplo fusius in Aduentu, quarta hebdomada pertractantur: Vbi non leuiter expendendum quod refertur illam reuelasse sanctæ Brigittæ, quàm tota esset in hoc sancto timore Domini, vnde id profecto patebit quod in prima propositione præmittitur, tanto melius concipi timorem illum quem suo nos exemplo docet, quanto eius exemplum est efficacius & luculentius. Idcirco enim ne ignoraretur, palàm facere voluit & verbis tam expressis quàm sunt ista quæ retulit: *Timens vehementissimè ne os loqueretur, ne auris, ne oculi viderent delectabilia, timida quoque sui in silentio, & multum anxia.* Neque id semel tantum, aut in aliquo forte periculosiori loco; sed vbique & semper, cùm ipsa vltro præueniret loca & tempora, vbi metus non pateretur illam consistere. Nonne hoc est timere? nonne hoc est timoris exemplum dare? nonne hoc est exemplo suo nos docere?

L. I. Renel.
c. 10.

II. PUNCTVM.

SED quanto melius edocetur immaculata eius Conceptio, tantò est efficacius eius exemplum, quo illum timorem docet.

Nam tantò est efficacius eius exemplum, quantò liquebit apertius non sic illi timendum fuisse sicut nobis: Quod enim alij timeant homines in peccandi periculis, certe est quod timeant

quia sunt homines vasa portantes lutea, quæ tam facile est solui & perire, quam procliuè est concupiscentiæ, vel bonis lenocinantibus demulceri: vel malis terrentibus cedere, & in peccatum trahi; Beatissima verò Virgo non sic erat lutosa & fragilis, vt timeret solui & peccare; vnde quod timeret, mirum est magis, & magis efficax ad timorem docendum.

Nunc autem, vndenam habes, vndenam hauris, vndenam liquet, quod illa non esset peccatis obnoxia, sicut cæteri homines? Nonne ex eius præsertim immaculata Conceptione? Nonne quò melius intelligitur & creditur hæc eius singularis prærogatiua, liquidius etiam patet, quam longe fuerit ab illa causa & radice malorum omnium quæ est humana cupiditas, & inde actus ac habitus efformati? Qui enim dicit immaculatam Conceptionem, dicit nullum peccatum originis, nullum peccati fomitem, nullam prorsus malam concupiscentiam, nullam cadendi procliuitatem, nullam peccandi aptitudinem, ac proinde nullam prorsus timendi causam. Quæ tametsi ex aliis eius donis & gratiis quibus præuenta fuit, possunt quoquo modo intelligi, non ita tamen aperte & dilucidè, sicut ex immaculato quem dicimus eius ortu: nam ipsa tùm mali radix est præcisa, imo ne radix quidem vlla permixta est, sed quo instanti est orta beata illius anima, hoc ipso infusa est gratia quæ dicitur Sanctificans, & lethali peccato qualis est originalis macula, plane repugnans vt supra dictum est: *Sanctificauit tabernaculum suum Altissimus, Deus Ps. 45. in medio eius non commouebitur, Adiunabit eam Deus manè diluculo.*

Vnde quantò melius hæc eius immaculata Conceptio iam docetur & creditur, tantò magis apparet nullam fuisse causam cur timeret in peccati periculis, vbi tamen cùm valde timuerit: certe hinc simul apparet eius exemplum, quo nos timore suo timere docet, esse expressius & efficacius ad eum finem quem intendit. *Columna cæli contremiscunt & pauent ad nutum eius; Quid nos humunculi? Quid facient tabula si tremunt columnæ? aut quo modo virgulta immobilia stabunt, si huius pauoris turbine etiam cedri quatuntur?* Sic apte sanctus Gregorius.

III. PUNCTVM.

QUÆM docet igitur Virgo timorem Domini, tantò melius concipitur, quantò melius edocetur immaculata eius Conceptio,

quia tanto melius timor concipitur, quanto exemplum Beatæ Virginis quo nos illum timorem docet, est efficacius: est autem tanto efficacius quanto apparet manifestius illi non ita fuisse timendum à peccato: nullibi vero id apparet euidentius quam in eius immaculata Conceptione, ex qua fortis facta est illa Mulier quæ non timeret domui suæ à frigoribus niuis: omnes enim domestici sensus eius, siue interni siue externi, vestiti sunt duplicibus, id est, duplici gratia, qua euitaret omne malum, & faceret omne bonum.

Quare ergo sic timuit sicut timebat? Nempe id videbat ita ordinatum esse ab Illo cui debebat acceptam gratiam immaculatæ suæ Conceptionis: se videbat ita exemptam miseriis quibus subiaceamus, vt malum quidem culpæ deuitaret, non poenæ: videbat quidem se Dei gratia numquam peccaturam, licet in mediis peccandi periculis & occasionibus versaretur, sed simul etiam videbat hanc esse Dei voluntatem, vt vel illa fugeret pericula, vel si non posset fugere, sic in illis timeret sicut si reuera peccare posset.

Sic Christus ipse Dominus qui vt Apostoli verbis vtar, sanctus erat, innocens, impollutus, segregatus à peccatoribus & excelsior cœlis factus, sicque nullo prorsus modo peccatum posset incurrere; vitabat tamen illa quæ sunt nobis peccandi pericula, quales sunt mundani honores, humanæ laudes, sæcularis pompa, & similia peccatorum fomenta: nec Petro sibi blandius colloquenti dubitabat respondere; *Vade post me Satana, scandalum es mihi*; quasi timeret à Tentatore, quasi timeret de aliquo culpæ casu. Non quod reuera iudicaret inde sibi timendum esse, sed quod ita se vellet gerere, vt suo nos efformaret exemplo; sicut cum circumcidi, cum baptizati, cum tentari voluit, & turbari, cum in horto mœrere, tristari, pauere, & similes humanos affectus induit, tunc *nostro pauore trepidabat*, inquit S. Leo: vel vt ait S. Augustinus, *nos in se transtulit, nos in te suscepit*, Id est, id in se effecit quod in nobis futurum aut à nobis faciendum demonstrabat.

Sic cum Apostolus diceret *se carnalem esse, se venundatum sub peccato, se non intelligere quod operaretur*, non id in propria persona dicere, sed in nostra, multi Patres affirmant; quod & ipse Apostolus in alio loco significat euidentius cum ait post multa

de se abiectè dicta, *hac autem fratres, transfiguravi in me & Apollo, propter vos, ut in nobis discatis ne supra quàm scriptum est, unus aduersus alterum infletur pro alio. Quis enim te discernit? quid autem habes quod non accepisti, si autem accepisti, quid gloriaris?* Quasi diceret, si nos qui longe plures, & sublimiores gratias accepimus, ita parùm gloriamur, ut etiam abiectissimè de nobis sentiamus, quantò magis vos inanem illam qua mouemini, cauere debetis gloriam? quantò magis demissè de vobis loquendum est & sentiendum?

Sic plane Virgo Sanctissima, sic vnumquemque nostrum quem videret liberius circumspèctantem, colloquentem, & agitantem quæ in peccatum possent impellere, commoneret & diceret: Ego illud non essem ausa respicere: Ego mihi timuisssem ab illo loco, & viro. Non putassem mihi licere tam familiariter cum his & illis conuersari.

Tu qui proiectus es ad omnem audaciam, tu qui nihil horum times, quali sat tutus & munitus sis contra quoslibet casus, quid illi responderes! an te securiorem putas Beata Virgine? an illi timendum erat, Deo sic volente: tibi vero nil esse quod timeas, licet hunc ipsum Deum, quem volebat à Virgine, velit à te timorè?

An rectè illa & sapienter timebat? responde. Cur porro ita rectè & sapienter nisi quia sic ordinarat Deus, ut timeret & fugeret quasi peccatorum illecebras; licet nulla timoris aut fugæ subesset ratio? Tu vero qui in peccatis natus es totus, tu cuius concupiscentia velut ignis exardescit, tu qui bibis subsannationem quasi aquam, tu te in ipsas peccandi proiicies vias, nec timebis à scandalo? hoc est, *aduersus Deum manum suam tendere, Iob 15. & contra omnipotentem roborari. Hoc est currere aduersus eum erecto collo, & pingui ceruice armari: ut est in libro Iob.*

Quà fronte audebis Virginem inuocare, tibi ut adsit in periculis, qui sponte quæris pericula? O quàm ille sapientius qui dicebat: *pepigi pedus cum oculis meis, ut ne cogitarem quidem de Virgine. Iob 31.*

Quam enim partem haberet in me Deus desuper! Id est, quomodo alioquin simul cum Deo conuenirem in salute mea? sicut enim nihil possem nisi me adiuuaret: ita nec proderit eius auxilium nisi de meo id conferam quod vult à me conferri. Nunc ergo filij audite me, Beati qui custodiunt vias meas. Audite disciplinam, & estote sapientes, & nolite abjicere eam. VENITE filij, audite me, ti-

Prov. 14. *morem Domini docebo vos. SAPIENS timet & declinat à malo: stultus transilit & confidit.* Hic est timor quem docet, hic est timor quem qui discunt, se veros eius filios probant: qui vero nolunt discere, sese ab illa subtrahunt, & subtractionis dicuntur filij in perditionem.

Hebr. 10.

AD HÆC VERBA, PROVERBIORVM OCTAVO.

Nondum erant abyssi, & ego iam concepta eram.

VERITAS PRACTICA.

Periculum in mora.

SENSVS & Ratio est, quòd dum quis moratur & differt B. Virginem colere, formantur in eius animo quadam abyssi vitiorum.

Sed dum hæc formantur abyssi in eius animo, periculum est ne umquam fructuosè B. Virginem colat.

Ergo periculum in mora, quâ quis videlicet moratur colere B. Virginem: Ac proinde maturandus in pueris eius cultus: ut de illis possit dicere: NONDVM ERANT ABYSSI, ET EGO IAM CONCEPTA ERAM.

I. PUNCTVM.

SICVT triplex Conceptio Beatæ Virginis observari potest, ita & triplex genus abyssorum, ante quod sit concepta, secundum triplicem Scripturæ sensum, literalem, allegoricum, & moralem.

Prima Conceptio est in mente Dei, qui ab æterno illam ordinavit, ut esset Mater filij, & iis exornavit animi corporisque dotibus, quales exigeret tanta Maternitas, seu tantæ Matris Dignitas & Eminentia. Tum vero nondum erant abyssi, & iam concepta erat, hoc est literati sensu, nondum erat illa pars maris quæ

abyssus dicitur, id est, aquarum tanta congeries, ut quanta illa sit, indagari non possit. Cum autem ab æterno esset illa prima Conceptio, non est mirum si abyssos præcesserit, quæ suo tantum tempore formatae sunt cum reliquis mundi partibus. Abyssorum tamen meminit præ multis aliis, quod velut abyssus quædam Gratiarum & meritorum fuerit illa Virginalis Maternitas, ad quam primo concepta seu præuisa & ordinata dicitur.

Secunda Conceptio, quæ singulariter hac solenni die memoratur, est primus eius ortus in utero sanctæ Annæ coniugis Beati Ioachimi, de quibus separatim sunt institutæ cōsiderationes & Veritates Practicæ. *Tunc nondum erant abyssi & iam concepta erat:* Id est allegoricè, peccatum originale, & consequentes inordinati motus, ac poenæ spirituales, quæ velut abyssi quædam inundant super vniuersam humanā naturam: & à primo Conceptionis seu Creationis animæ momento, quo peccati huius macula contrahitur, per errores doloresq; diuersos, ut ait S. Augustinus, trahimur ad extremum usque supplicium. At nondum istæ erant abyssi, quando concepta est Immaculata Virgo, quia concepta est in Sanctificante Gratia, sicut supra declaratur: Nec postquam Concepta est, irruerunt illæ abyssi, quia omni prorsus peccato & peccati fomite libera exitit: unde sicut ait sanctus Hieronymus in hac Euangelij Verba de Maria & Iosepho, *antequam conuenirent*: Non sequitur quod postea conuenierint; sic cum dicitur, nondum erant abyssi & iam concepta erat; non sequitur quod abyssi postea fuerint.

Tertia denique Conceptio est, cum in mentibus nostris sic formatur Beata Virgo, ut illi nos secundum Deum, totos dedamus & consecremus, velut Parēti optimæ, velut Dominae colentissimæ, velut Duci salutis certissimæ, velut stellæ maris, aut syderi nauigationis nostræ tutissimo: sic in nobis dicitur inhabitare iuxta illud, *qui creauit me, requieuit in tabernaculo meo, & dixit* *Ecclesiæ, 24.* *nisi, in Iacob inhabita.* Quo in genere Conceptionis tunc Beata Virgo moraliter dicet: *nōdum erat abyssi, & ego iam concepta eram,* quando videlicet à pueris vel puris quorumlibet mentibus sic concipietur ut nondum innatæ cupiditates in prauos creuerint habitus, nondum naturales affectus transierint in desideria illa nociua quæ velut abyssi magnæ mergunt homines in interitum *1. Tim. 6.* & perditionem. Hoc est quod gratulabunda prædicat in octauo

illo prouerbiorum capite, vnde Thematis Verba desumpta sunt: Caput illud est velut nobile Canticum, quo insignite magnificat Gratias diuinitus sibi collatas, quas inter, illa est singularis & eximia, quod sibi deditos ad æternam salutem prouehat, Eò enim reliquæ referuntur partes: vnde concludit, *qui me inuenit, inueniet vitam, & hauriet salutem à Domino*. Quia verò multi se putabunt eam inuenisse, qui tamen inde vitam non inueniant, nec salutem hauserint: sese his verbis explicat, & reddit ipsa quodammodo rationem cur illi potius quam alij salutem sunt consequuti, cum omnes eius sodales & filij crederentur; *Nondum, inquit, erant abyssi, & iam in iis qui salui sunt, concepta eram*. Nondum erant prauus affectus & habitus, nondum inueterati peruersi mores, quando me inceperunt colere, & idcirco fructuosè præ cæteris, me coluerunt, operæ suæ fructum retulerunt, *Qui manè vigilant ad me, inuenient me*, id est, qui mature, qui in primis annis.

Pr. 8.

Alioquin certè PERICVLVM IN MORA: Tanti refert quantocyus sese illius obsequio mancipare, quanti refert hunc æternum referre fructum, vt per illam saluemur.

Hæc est omnibus quidem valde salubris Veritas, sed maxime Pueris exponenda; quibus per ætatem magis licet maturare cultum Beatissimæ Virginis.

Sic autem exponi facile potest ex iam dictis, vt primo explicatè describatur quod ait S. Augustinus, paulatim in animis nostris formari vitiosos habitus, qui hoc sensu dicuntur abyssi, quod sicut abyssus quis inuolutus vix emergat, & certò pereat; ita qui forte in istos inciderit deprauatos habitus, vix inde possit exurgere.

L. 3. Confess. c. 5.

Quippe ex voluntate peruersa, facta est libido: & dum seruitur libidini, facta est consuetudo: & dum consuetudini non resistitur,

Ps. 41.

facta est necessitas. SIC abyssus abyssum inuocat; sicut vnda impellitur vnda. Et verò Deus etiam dicitur has abyssos facere quia per-

Ezech. 26.

mittit à nobis fieri, vnde est illud Prophetæ: Cum adduxero super te abyssum, & operuerint te aqua multa.

Quod autem asseritur in hac prima propositione tunc formari abyssum, dum quis moratur diutius B. Virginem colere, perinde est ac si diceretur, sic prauos illos contrahi habitus, per liberiolem ætatis licentiam, qualis est eorum plerumque qui suæ minùs vacant salutì, nec illa opportuna captant media, qualis est par-

est par-

est parthenica Sodalitas, aut similis quædam colendæ Virginis Institutio. Tunc illi pedetentium eò profundi peccatorum tendunt, quod maxime verebatur Dauid: *Non me demergat tempestas aquæ, neque absorbeat me profundum, neque urgeat super me puteus os suum.* Quò sane spectat illud Sapientis ad patrem de Ecclesi. 30: cura filij, monitum: *Curua cervicem eius in iuventute, & tunde latera eius, dum infans est, ne fortè induretur & non credat tibi, & erit tibi dolor anima. Doce filium tuum & operare in illo, ne in turpitudinem illius ostendas:* Id est, ne alioquin sis particeps & velut causa turpioris vitæ quam aget nisi sic mature curuetur & tundatur. O quàm multi iam fortè miserandum in hunc statum devenerunt!

II. PUNCTVM.

SED dùm hæ formantur abyssi in cuiusquam animo, periculum est ne umquam fructuosè colat Beatam Virginem.

Primo quidem nisi puritate colatur, vix colitur, vt iam supra est demonstratum. At in illa vitiorum abyssu, quæ puritas? *Abyssus dicit, non est in me;* liceat hoc usurpare de Puritate, quod Iob. 28. Iobus de Sapientia. Deinde verò quando cupiditates ita robustæ sunt vt resistent Gratiis, nonne periculum, est in illa resistentia? Quid proderit ad salutem tuam, Virginis Cultus, nisi conferat gratias: quid vero proderit illas conferre, nisi recipias? *Stetit vnda fluens, congregata sunt abyssi in medio mari.* Exod. 15.

Denique, licet Gratia reciperentur ad tempus, & nonnullis quibusdā diebus, viderentur illi resipiscere, tamen ipsa mole deprauatæ consuetudinis sic opprimuntur vt statim recidant. *Ascendunt vsque ad cælos, & descendunt vsque ad abyssos: anima eorum in malis tabescebat, turbati sunt & moti sunt sicut ebrius, & omnis sapientia eorum deuorata est.* Nonne hoc periculosum? nonne hoc damnosum? nonne hoc nimis frequens?

III. PUNCTVM.

ERGO periculum in hac mora: periculum ne abyssi vitiorum formentur: periculum ne illis formatis contemnatur Virginis Cultus: periculum ne in illo contemptu deseraris à gratia:

Exodi 15. periculum ne in illa desertione pereas, ac tandem illud sequatur: *abyssi cooperuerunt eos, descenderunt in profundum quasi lapis.*

Quamobrem, ne differas non modo te adiungere illius Cultui & famulatu, sed in illo etiam cultu & famulatu, ne moreris id discere quod est in eo præcipuum & salubrius: Ne moreris id velle amplecti quod didiceris: ne moreris id exequi quod amplexus fueris: aut certe quia quod est præcipuum & salubrius, negatiuè potius, ut aiunt, quam positiuè perfinitur, *non demorceris in errore impiorum*, in illo scilicet errore quo fouetur impietas. *Usquequò morabuntur in te cogitationes noxiae?* **FERTILIS** fuit Moab ab adolescentia sua, & requieuit in sæcibus suis: nec transfusus est de vase in vas, & in transmigrationem non abiit: idcirco permansit gustus eius in eo, & odor eius non est immutabilis. Diuina plane verba, quibus denuntiatur quanti referat in sequentes annos, pietati se tradere vel negare, iam inde à primis annis. Quod sanctus Hieronymus sic paucis reddidit: *difficiliter eraditur quod rudes animi perbiberunt. Lanarum conchyliis quis in pristinum candorem reuocet? Recens testadiu & saporem retinet, & odorem quo primum imbuta est.*

Prov. 9. Ac denique vox illa Sapientiæ, vox est Virginis Matris: Si quis est paruulus, veniat ad me, & insipientibus locuta est: *venite, comedite panem meum, & bibite vinum quod miscui vobis. Relinquitte infantiam, & viuite, & ambulate per vias prudentiæ, quas scilicet eos docebit qui se disciplinæ suæ crediderint, cuius hoc est primum caput, ne vocati morentur venire, quia periculum in tali mora.*



Die 21.
Decembr.

IN FESTO S. THOMÆ APOSTOLI.

Affer manum tuam, & mitte in latus meum: & noli esse incredulus, sed fidelis. Ioan. 20.

VERITAS PRACTICA.

Ex vulnere remedium.

SENSVS potest esse duplex: Primus, quòd ex vulnere Christi, remedium cuiuslibet mali spiritualis educi possit, sicut sanctus Thomas incredulitatem ibi deposuit: & sicut in 2. parte, Dominica prima post Pascha, fusius declaratur.

Alius vero qui magis hic consideratur, sensus est, quòd sicut idem sanctus Apostolus ex incredulo factus est valde fidelis, ita ex suo quilibet emergens vitio, cum diuina gratia in virtute opposita fit prastantior, quàm si tali vitio non fuisset addictus; sicque fiat ex morbo sanitas firmior, & ex vulnere salubrius remedium.

RATIO cur id ita fiat cum diuina gratia, hæc est inter alias, quòd virtus qualibet tunc prastantiùs exercetur, quando quis diligentius cauet, ne in vitium illi contrarium ruat.

Sed qui ex suo verè resurgat vitio, diligentius cauet ne in illud incidat.

Ergo & virtutem oppositam tali vitio, prastantiùs exercebit; ac proinde remedium trahet ex vulnere; Quod quàm sit opportunum & vtile, sicut euidentis est: ita diligenter in praxim vt aduocetur, curandum est.

I. PUNCTVM.

AD MIRANDVS certè hic Apostolus, siue cùm à fide recedit, siue cùm ad eam regreditur. Sicut insignis fuit eius incredulitas, ita & insignis fides seu fidelitas. Incredulitas eò vsque processit, vt Resurrectionem Christi Domini nuntiantibus Apostolis omnibus, planè negarit fidem, neque se vnquam crediturum affirmarit, nisi ipse videret fixuram clauorum, & mitteret digitum suum in locum clauorum, & manum

suam in latus eius: quasi ipse Dominum obligare vellet ad hunc manifestandi sui modum; aut alioquin non crederet. Qualis, audacia! Atque in ea incredulitate dies octo continuos perduravit, nec fortè vmquam resipuisset, nisi Dominus diuina suā bonitate permotus, octauo post Resurrectionem die, rursus conuenisset Apostolos, vbi tum erat Thomas.

En ergo iterum huius vnus gratia; venit Iesus ianuis clausis; & dixit; pax vobis. Deinde dicit Thomæ: *infer digitum tuum huc, & vide manus meas; & asser manum tuam: & mitte in latus meum, & noli esse incredulus sed fidelis.* Respondit Thomas, & dixit ei, *Dominus meus, & Deus meus.* Tunc videlicet firmissimè credidit, & confessus est aliud, quàm quod vidit. Tangebatur hominem, inquit sanctus Augustinus, & Deum confitebatur. Aptissimè verò Theophilactus: *Qui prius fuerat infidelis, post lateris tactum, optimum se Theologum ostendit, duplicem Naturam & vnā hypostasim Christi, edisserens; dicens enim, Dominum, naturam humanam; dicens Deum, diuinam confessus est, in vno & eodem.* In qua fidei professione, retinenda & prædicanda tam constans & firmus fuit, vt præ aliis omnibus eius exemplum nobis proponatur: *O quàm bonus & suavis est Domine spiritus tuus, in omnibus; ideoque eos qui exerrant partibus corripis, & de quibus peccant, admones, & alloqueris: vt relictā malitiā credant in te, Domine.*

Sap. 12.

Rom. 5.

Pr. 25.

Ibid. 4.

Eph. 6.

Sic proficiendum ex culpis & vitiis nostris; sic ex lapsu resurgendum, & currendum vehementius: sic denique, *Ex Vulnere remedium*, quando scilicet cum Diuina gratia, quæ saepe *superabundat vbi abundauit delictum*, quisquis è suo velit emergere vitio, tum in Virtute opposita se præstantiorem efficiet. Ratio est valde considerata; Tunc enim eo præstantior est omnis Virtus, quantò minus habet de vitio sibi contrario; sicut maius est frigus, quò minus habet permixti caloris, & illud aurum & argentum est purius, quod est magis ab omni alia defæcatum materia: Vnde Sapiens, *Aufer rubiginem de argento, & egredietur vas purissimum.* At vero ne quid subrepat vitij, quid magis opportunum ex parte nostra, quàm si omni custodiā cor nostrum obseruetur, demusque operam, vt, quod monet Apostolus, *induamus nos armaturam Dei, vt possimus stare aduersus insidias diaboli, vt possimus resistere in die malo, vigilantes in omni instantia?* Irane tu accinctus? irane vigilas? Nonne hoc tuis toties insufurrat aure-

bus; *Esto vigilans, & confirma cetera, quæ moritura erant. Non Apoc. 3: enim inuenio opera tua plena coram Deo meo?*

II. PUNCTVM.

SED qui ex suo verè resurgat vitio, diligentius cauet ne in illud incidat.

Hæc est enim certior veræ emendationis nota, vnde Sapiens. *Ecclesi. 17. Conuertere ad Dominum & relinque peccata tua, precare ante faciem Domini, & minue offendicula. Reuertere ad Dominum & auertere ab iniustitia tua; & nimis odito execrationem.*

Sic omnes passim Patres, & Doctores in hac diligentiori cautela bonam Pœnitentiæ seu Resipiscentiæ partem ponunt. *Age- 6. Institur. re pœnitentiam, inquit Lactantius, nihil aliud est, quàm profiteri & 13. & 24. affirmare se ulterius non peccaturum.* Itémque alibi quod supra paucis attingitur: *Is enim quem facti sui pœnitet, errorem suum intelligit, ideòque græci melius & significantius μετανοειν dicunt, quàm nos possumus resipiscentiam dicere. Resipiscit enim ac mentem suam quasi ab insania recipit, quem errati piget, castigatque se ipsum dementiæ, & confirmat animum suum ad rectius viuendum, tum illud ipsum maximè cauet, ne rursus in eosdem laqueos inducatur.*

Sanctus quoque Gregorius in hoc argumento multus est, *primò quidem in moralibus, distincte & particulatim ostendit quo- L. 2. Mor. c. 36. & 37. modo vnumquodque Spiritus sancti donum ex sui decremento crescat, & sapientia vnde quasi amittitur, inde certius possidetur. Tum vniuerlim, quantum ex suis defectibus boni proficiant, Mira, inquit, nobiscum dispensatione agitur, ut mens nostra culpa nonnumquam pulsatione feriat. Nam esse se magnarum virium homo crederet, si nullum vquam earundem virium defectum, intra mentis arcana sentiret. Sed dum tentatione irruente quatitur, & quasi ultra quam sufficit fatigatur, ei contra hostis sui insidias munimen humilitatis ostenditur, & vnde se pertimescit enerviter cadere, inde accipit fortiter stare. Tentatus autem non solum vires à quo accipiat discit, sed quanta eas vigilantia seruet, intelligit. Sæpe enim quem tentationis certamen superare non valuit, sua deterius securitas strauit. Nam dum lassum se quisque in otio remittit, dissolutam mentem corruptori prostituit; Et quæ plura ibi prosequi- 3. p. Admo. tur. In Pastoralis vero, Admonitionem bene longam ad illos qui 31.*

admissa plangunt, nec tamen deferunt, ex variis scripturæ locis
 Rom. 34. contextit. In Evangelicis autem homiliis sic etiam dilucidius:
*Nonnunquam hi qui se aliqua illicita egisse meminerunt, ex ipso suo
 dolore compuncti, inardescunt in amorem Dei, seseque magnis in vir-
 tutibus exercent: cuncta difficilia sancti certaminis appetunt, omnia
 mundi derelinquunt, honores fugiunt, acceptis contumeliis latantur,
 flagrant desiderio, ad cælestem patriam anhelant, & quia se errasse à
 Deo, considerant, damna præcedentia lucris sequentibus recompensant.*
 O certe foelicem culpam quæ sic expiatur, ut expiatus animus
 sit cautior ad euitandas alias, & promptior ad omne opus
 bonum.

III. PUNCTVM.

SIC ergo unusquisque virtutem oppositam suo vitio unde emergit,
 præstantius exercebit, atque ex vulnere sic remedium conficiet,
 dum illud ipsum vitium eò cauebit cautiùs, quo se alias minùs
 continuit, aut quo suæ magis pœnitet incontinentiæ. Sic fiunt
 Rom. 6. arma Iustitiæ Deo, quæ fuerunt arma iniquitatis peccato. ET sicut
 fuit sensus noster ut erraremus à Deo, sic, decies tantum, iterum
 Bac. 4. conuertentes requiramus cum.

Sic per ipsa vitia & passionem nostras affectu & profectu ascen-
 dendum sæpe monet S. Augustinus: Si utique unusquisque no-
 strum subdere eas sibi studeat, ac super eas stare consuescat; ex ipsis
 sibi gradum construit, quo possit ad superiora conscendere. Elenabunt
 nos, si fuerint infra nos; de vitiis nostris schalam nobis facimus, si vi-
 tia ipsa calcamus.

O quale incrementum nostri profectus spiritalis, cum non
 modò ex bonis quæ agimus, sed ex ipsis etiam malis perpetratis
 fructum possimus carpere & profectum. Nec illud viri sancti
 monitum hic omittendum: Enimvero illi maxime præ aliis in vir-
 tutibus proficiunt, qui ea quæ sibi magis gravia & contraria sunt, vi-
 rilius vincere nituntur. Nam ibi homo plus proficit, & gratiam me-
 retur ampliorem, ubi magis seipsum vincit, & in spiritu mortificat;
 Sed non omnes habent æquè multum ad vincendum & moriendum: di-
 ligens tamen emulatur, valentior erit ad proficiendum, etiam si plures
 babeat passionem, quàm alius bene morigeratus, minùs tamen feruens
 ad virtutes.

Huc denique multi transferunt monitum illud Sapientis: *Si ^{Ecc. 4.} spiritus potestatem habentis ascenderit super te, locum tuum ne dimiseris: quia Curatio faciet cessare peccata maxima.* Id est, si grauiore aliqua tentatione vel Damonis vel Concupiscētiæ percellaris, ne desperes propterea, nec quidquam putes tibi deperire, si modò tibi attendas & inuigiles: nam tantum abest, vt inde pecces grauius, quin potius grauiora inde cessent peccata, propter illam vigilantium diuino munitam subsidio. O numquam satis agnitum & laudatum bonum Deum, qui dum bona quæ nobis confert in malum transuertimus, mala sua conuertit in nostrum bonum.

Quàm plurimæ sunt aliæ Veritatēs quæ in hanc aliunde diem transferri possint. Nos hîc eas modò ascribimus, vt vnusquisque videat quàm sic commodè passim possit excerpere quas legendo annotarit affines argumento quod tractat, si minus forte singulis in diebus essent à nobis obseruatæ.

Quo magis Christo subijcitur, eò magis erigimur.

In 2. parte, Feria 3. infra hebdomadam Quinquagesimæ.

In plagis sanitas.

Dominica 1. post Pascha.

Quantò est de peccato maior tristitia, tantò est peccatori maius gaudium de fontibus Saluatoris.

In eadem Dom. ad hæc verba: Haurietis aquas in gaudio de fontibus Saluatoris.

Videri etiam potest Feria 3. infra hebdomadam 3. post Pascha.

Læsi amoris ira quo est suauior, eò est potentior.

Feria 6. infra hebdomadam 3. Quadragesimæ de sancto Petro respecto à Domino, & conuerso.

In dubio certius est & rationi conformius, aliorum se rationi conformare quàm propriæ.

Sabbato infra hebdomadam 2. post Pascha.

Non prius intelligendum vt credas, sed primò credendum est, vt post intelligas.

Feria 2. infra hebdomadam 4. post Pascha.

Quasi peccatum ariolandi est, repugnare: & quasi scetus Idololatriæ, nolle acquiescere.

Sabbato infra hebdomadam 4. post Pascha.

Qui sensu suo priuato saniores se aliis putat, sano se priuat sensu.

Feria 5. infra Octauam Ascensionis.

Reuocanti hominem Deo ab errore viæ suæ non obsequi, peius est quàm primò vocantem ne erraret, non sequi.

In eadem 2. parte, in fine, vbi de variis statibus, quarta Consideratione.

Maioris est animi se diuinæ Fidei supponere, quàm se illi opponere.

In 3. parte, Feria 2. infra hebdomadam 6. post Pentecosten.

Numquam illustrius se manifestat Christus, quàm dum animæ peccatricis illustrat Conscientiam: & peccatum latens ibi manifestat.

In eadem parte, Feria 4. infra hebdomadam vndecimam.

Nullus est Christianus qui non credat Christum esse Deum, & vix est vllus Christianus qui hoc verè credat.

In eadem 3. parte, In festo Transfigurationis Domini.

Nisi diligenter aduertas, ore facta confessio, factis à te negatur.

In 4. parte, Feria 2. infra hebdomadam 15. post Pentecosten.
Videri etiam potest alia eiusdem Feria.



IN FESTO CONVERSIONIS SANCTI PAULI APOSTOLI.

Die 27.
Iamarij.

Domine quid me vis facere? Actuum 9.

VERITAS PRACTICA.

Sicut frequenter dicendum cum Dauide, *Dixi nunc
capi*: sic simul cum Apostolo, *Domine quid me vis
facere.*

*RATIO EST, Quia idcirco frequenter dicendum cum Dauide,
Dixi nunc capi, ad renouandum animum, qui alioquin
inueterasceret.*

*Sed nihil aptius ad illam animi renouationem, quàm quod dicit
Apostolus; Domine quid me vis facere.*

*Ergo sicut frequenter cum Dauide, sic cum Apostolo sentiendum
& dicendum.*

P V N C T V M.

SINGVLAREM prorsus & planè admirandam huius *Act. 9. &*
sancti Apostoli Conuersionem, quæ fusè describitur in *22.*
actis Apostolorum, & de qua satis est ampla vernacula *Gal. 1.*
meditatio, breuissimè continent & complectuntur pauca illa
verba, quæ prima ipse protulit Christo Domino se vocanti.
DOMINE QUID ME VIS FACERE. *Hac plane fra-* *In Conuers.*
tres, inquit sanctus Bernardus, perfecta Conuersionis est forma. O *S. Pauli.*

R r r

verbum breue, ſed plenum, ſed viuum, ſed efficax, ſed dignum
 omni acceptione! Iam illi quidem conuerſi erant, & profeſſi, qui-
 bus ſic S. Abbas loquitur: ſed quia frequenter inſtituenda eſt Re-
 nouatio animi, quæ eſt altera veluti conuerſio, ſicut ipſe Apo-
 ſtolus de die in diem ſe renouari dicit, Idcirco vnicuique etiam
 Religioſo proponi merito debet, hæc formula conuerſionis, vt
 2. Cor. 4. quoties animum renouare velit, & dicere cum Dauide, *Dixi,
 nunc capi*, ſic toties cum Apoſtolo dicat: *Domine quid me vis fa-
 cere*; quia ſic reuera de nouo incipit, ſic renouatur ſi ſit verè in-
 differens & paratus ad quamlibet Dei voluntatem: neque aliter
 verè renouatur.

Quàm frequenter verò talis inſtauranda Renouatio, quantum-
 que valeat ad illam rectè formandam, recta verborum Apoſtoli
 & ſincera uſurpatio, ſic declaratur.

Humana natura ſuo corruptionis pondere numquã ceſſat ad
 ima prolabi & deficere, niſi crebris & frequentibus inſtauretur
 adiuuentis. Hæc autem prolapſio & defectio, nihil eſt aliud
 quàm augeri concupiſcentiam, & ſic præualere contra ſpiritum,
 vt quò illa eſt vehementior, hic ſit infirmior. Inter adiuu-
 mēta por-
 rò quibus deficiens inſtauratur natura, vel proficiens retardatur
 concupiſcentia, potentiffimum illud eſt, quod dicitur Renouatio
 animi, quæ directè opponitur veteri & corrupto, ſecundum de-
 ſideria erroris, homini, qui ſe ſuæque in omnibus quærit: hunc
 enim hominem imprimis exuit, & deponit cum actibus ſuis, ac
 nouum induit eum qui renouatur in agnitionem ſecundum imaginem
 eius, qui creauit illum; Vt nihil iam quod caro blanditur libeat,
 nihil quod carnalem vitam trucidat, ſpiritus perhorreſcat, quemad-
 modum ait S. Gregorius. Itémque alibi eleganter; *Vetuſta vita
 protinus uſus mutatur, vt anima ſuperno ſpiritu aſſata, & in ſummis
 appetat quæ contempſerat, & contemnat in infimis quæ appetebat.*
 Ephes. 4.
 Coloff. 3.
 Hom. II.
 in Euang.
 27. Mor.
 13.

Hoc eſt verè renouari, & hoc eſt tam crebro & frequēter uſur-
 pandum, quàm frequens & quotidiana eſt naturæ ſenefcentis
 prolapſio, quæ non aliter aptius cum diuina gratia reparatur.
 Vnde illud toties in ſcripturis: *Renouamini ſpiritu mentis veſtræ;*
 Rom. 6.
 Ephes. 4.
 22. Mor. 2. & aptiſſimè S. Gregorius: *Nescit mens per torporem veteraſcere,
 quæ ſtudet per deſiderium ſemper inchoare.* Hinc Pſalmiſta qui ad
 perfectionis iam culmen peruenerat, quaſi inchoans dicebat, *dixi nunc
 capi, quia videlicet ſi ceſſare ab inchoatis bonis nolumus, valde neceſſe*

est ut inchoare nos quotidie credamus. An illud verè agnoscis quàm sit necessarium? An defectum tuum sentis? an de remedio cogitas? Vno verbo, vel deficiis, vel proficis; neque in medio stare potes: Vtrum verò è duobus?

II. PUNCTVM.

SED nihil aptius ad illam animi renouationem, quam quod dicit Apostolus, Domine, quid me vis facere?

Sic enim non minùs efficaciter, quàm breuiter totum illud conficitur, quo constare Renouationem, dicebatur: nempe sic vetus homo exiuitur, atque induitur nouus, dùm sic indifferens & paratus est animus, vt nullâ prorsus habita ratione appetitus, velit vnum aut nolit, quod Deus ordinârit. Sic perfectè impletur quod ab Apostolo tam vehementer commendatur, vt exhibitis, inquit, corpora vestra, hostiam viuentem, sanctam, Deo placentem, rationabile obsequium vestrum, & nolite conformari huic saeculo, sed Reformamini in nouitate sensus vestri, vt probetis quæ sit voluntas Dei bona, beneplacens, & perfecta. Dico enim vobis, per gratiam quæ data est mihi, omnibus qui sunt inter vos, non plus sapere, quàm oportet sapere, sed sapere ad sobrietatem: Et unicuique sicut Deus diuisit mensuram fidei, sicut enim in vno corpore multa membra habemus, omnia autem membra non eundem actum habent: ita multi vnum corpus sumus in Christo, singuli autem alter alterius membra. Quasi diceret, in hoc apparebit vos huic saeculo non conformari, sed potiùs verè reformari & renouari, si voluntatem Dei quærat; quæ quidem Dei voluntas tam studiosè semper quærenda est, vt licet illa nobis appareat, tamen vltra inquirendum & probandum sit, vtrum aliquid aliud velit à nobis, vel in substantiæ rei agendæ, vel in modo, vel in fine, vt non tantum faciamus quid velit, sed quomodo velit & quam obrem velit; atque ita sicut non debemus esse contenti quacumque Dei voluntate bona, sed etiam beneplacentem, & perfectam adimplere par est, si quam talem nobis demonstret: sic planè si vnâ solam notam faciat, illa vna sola satis esse nobis debet, quia nec magis nec minùs, quam purè velit Deus, volendum est: Cùm in hoc vno sita sit tota nostra perfectio, licet illud quod nobis ordinat, non esset in se perfectissimum; quatenus tamen sic nobis est ordina-

tum, cenſeri debet noſtra perfectio, ſicut perfectio manus eſt tangere, non videre, licet videre ſit aliquid perfectius aut nobilius quàm tangere.

Quidquid itaque aliud cogitari poſſet ad perfectam animi renouationem, vix eſſe poſſet aptius, quàm hoc Apoſtoli dictum, *Quid me vis facere*, cum ſi quid præter diuinam voluntatem cogitur, nihil aptum animæ, nihil perfectioni congruum cogitur. Hinc idem Apoſtolus tam ſæpe ſolicitéque ſuis; *Non ceſſamus*, inquit, *pro vobis orantes & poſtulantes, vt impleamini agnitione voluntatis eius, vt ambuletis dignè Deo per omnia placentes.* Et paulo poſt: *Semper ſolicitus pro vobis in orationibus; vt ſtetis perfecti & pleni in omni voluntate Dei*, quaſi dicat, nihil in animo ſupereſſe debet, quod non repleatur Dei voluntate, & nulla Dei voluntas deſit oportet, quæ non totum occupet animum. O verè tum diues animus ſi tali repletur bono, quo dum repletus fuerit, in vno cuncta poſſidet.

III. PUNCTVM.

SICVT ergo frequenter dicendum cum Dauide, *DIXI NUNC SCAEPI*, ſic ſimul cum Apoſtolo, *DOMINE QUID ME VIS FACERE*; Quia illud vtrumque ad animi renouationem perfectè inſtituendam eſt ita neceſſarium, vt ſicut non eſt renouatio, niſi veteris hominis exſpoliatio, ita nec vlla eſt exſpoliatio, niſi diuinæ voluntatis perfectæ ſuccedat effectio. *Quarite Dominum, & confirmamini: quarite faciem eius ſemper.* Quid eſt quarere Dominum niſi eius voluntatem? Quid eſt confirmari niſi confortari, reſtaurari, renouari? Quid rurſum quarere faciem eius, niſi ſic eius præſentem habere voluntatem, quaſi ipſe adeſſet, & iuberet vel vetaret prout vellet. Quid denique, ſemper quærenda illa facies niſi quod vni voluntati diuinæ ſic alia ſuccedat & alia, vt nunquam abſit eius voluntas in noſtro quouis opere? nec tam ſpectemus quid in ſe ſit quod agimus, quàm Dei faciem & voluntatem qua moueamur ad agendum. Atque in hoc tam conſtantes ſimus, vt nullo inde tædio, nullo ſaſtidio deficiamus. *Ac per hoc*, inquit ſanctus Auguſtinus, *qui diligitur, etiam præſens quaritur, dum charitate perpetua ne fiat abſens, optatur: proinde quem quiſque diligit, etiam cum cum videt,*

sine fastidio semper vult esse presentem, hoc est, semper querit eum esse presentem. Et nimirum hoc est; Querite faciem eius semper, ut non huic inquisitioni qua significatur amor, finem praestet inuentio, sed amore crescente inquisitio crescat inuenti.

Sic ipse Plaltes regius, & in ipsius persona Christus Dominus. *In capite libri scriptum est de me, ut faciam Deus voluntatem tuam;* ^{Pf. 39.} *tunc dixi, ecce venio ut faciam Deus voluntatem tuam.* Continuo ^{Hebr. 10.} non acquieuit carni & sanguini sanctus Apostolus, id est, statim ^{Gal. 1.} atque vocatus est, sic à se ipso defecit in vnam Dei voluntatem perfecte semper adimplendam, ut hoc vnum curaret. *Dum modo,* inquit, *consummem cursum meum, & ministerium verbi quod ac-* ^{Act. 20.} *cepi à Domino Iesu: nihil præterea vereor, nihil desidero. Hoc est verè esse vas electionis in manu Domini, hoc est verè esse Apo-* *stolum, verè vinctum Christi Iesu.*

Vide quàm longè sis ab hoc ardenti studio diuinæ voluntatis: iterumque vide quantum illud in nobis optaret Apostolus, ita ^{Heb. 12.} scribens & sua omnia concludens Scripta: *Deus pacis qui eduxit de mortuis pastorem magnum ouium in sanguine testamenti æterni, D. N. Iesum Christum, aptet vos in omni bono, ut faciatis eius voluntatem: faciens in vobis quod placeat coram se per Iesum Christum, cui est gloria per secula seculorum. Amen.*





IN F E S T O

Die 2.
Februar.PVRIFICATIONIS
B. MARIAE VIRGINIS.VIDE SV P R A I N H A C P R I M A P A R T E,
DIEM OCTAVAM ET NONAM IANVARII.

QUOD præcipue considerandum in hoc Mysterio proponi debet, est illustre Exemplum Beatissimæ Virginis in seruanda difficili lege quâ minimè tenebatur. Cuius exempli vis & efficacia vâ fructuosius communicetur, animaduertendum est, tria esse præcipua Excusationum capita, quas solent prætereundere homines, vt se à seruandis legibus & præceptis eximant.

Primum est Qualitas seu Conditio, cuiuscumque sit rationis & modi. Plus enim sibi licere putant Viri in epulis & immunditiis, quàm mulieres. Minus se peccare putant Milites blasphemando quàm Artifices. Mentiri Mercatores vix sibi esse illicitum putant. Ieiunia imperata quî commodius seruare possent Viri primarij, minus ea seruant; tantâque libertate se ab his & similibus quibusdam præceptis immunes faciunt, quasi nulla religione præcepti tenerentur, quasi id omne licite possent quod per vires & facultates possunt, & quasi dicerent, *sit fortitudo nostra, lex Iustitia.*

Sap. 4.

Alij, quod est secundum caput, non suam Dignitatem vel Conditionem ita spectant, quàm rei agenda qualitatem seu speciem, si tale est videlicet præceptum vt in eo adimplendo iactura timeatur vel honoris, vel pecuniæ, vel commoditatis cuiuslibet, tunc pro ea quam sentiunt animi repugnantis difficultate, affir-

mabunt se id non posse, & sibi tam facile credent non posse quam difficile sentiunt velle id facere. *Nequaquam valemus ascendere. LEO est feris, in medio platearum occidendus sum.*

Num. 13.

Prou. 22.

Tertio denique, Nonnulla temporis concedenda esse quæ semper usurpare nollent, contendunt alij; quod etsi non negetur in iis quæ non sunt mala aut verita, volunt tamen sibi concedi generatim in omnibus, *Non praterat nos, flos temporis. NON habent radicem in se: sed temporales sunt.*

Sap. 2.
Marci 4.

NON ita vero Sanctissima Dei Mater, non ita se purgat, fugiendo purgationis legem, non ita se excusat secumue dispensat, quamuis id licite posset pro illo triplici capite quod enarratum est. Primò quidem ratione suæ Dignitatis cum esset Virgo Mater tam facile poterat se à lege redimere quàm aperte legebatur in ipso legis decreto, solam eam obligari mulierem quæ suscepto semine masculum peperisset. Deinde autem si ratio difficultatis spectanda esset, nihil profecto poterat pudicæ Virginis grauius & molestius cogitari, quàm apparere immundam, & quasi vnam de cæteris mulieribus sistere se Sacerdoti, vt pro ipsa oraret, sicque mundaretur. O pudendum castissimæ frontis pondus! ô ponderosam Virginei vultus pudorem!

Leuit. 12.

Denique quid dicitur de Infante? Quid cogitabitur? An illum esse agnosceret Simeon cæterique fideles quem ex Virgine nasciturum Propheta dixerat, si se mater tamquam immundam purgat? Certe videri potuisset cedendum esse temporis, nec committendum, vt pro lege seruanda Legislator deferatur.

Sed nihil horum valuit apud obseruantissimam Virginem; Obediet Virgo legi mulierum; obediet in re omnium sibi grauissima; obediet omni tempore. Sicque omnibus data est in Exemplum, vt nemo sua in Dignitate, aut in rei asperitate, vel licentia temporis possit sibi blandiri & indulgere; vnde & ipsa sub nomine Sapientiæ: *Nunc ergo filij audite me: Beati qui custodiunt vias meas. Audite disciplinam, & estote Sapientes, & nolite abjicere eam.*

Prou. 3.

Quamobrem vt conformiter huic Exemplo, caueant omnes ab illis quas prætendunt excusationibus: ac mandatis Diuinis & Ecclesiasticis religiosius inhæreant: Tres indicantur Veritates Practicæ contra triplex excusationum genus, vel simul, vel seorsim, sibi aut aliis proponendæ.

PRIMA VERITAS PRACTICA.

CONTRA EXCVSATIONES, A DIGNITATE
VEL CONDITIONE PERSONÆ, PETITAS.

Indignum sua Dignitate se ipse profert, qui Dignitate suam Legi præfert.

RATIO EST, Quia indignum sua Dignitate & Conditione se ipse profert qui palàm abutitur sua Dignitate, seu auctoritate & potestate, ad roborandam Prouitatem. Quid clariùs? Sed qui Dignitatem suam legi præfert, palàm abutitur sua Dignitate, seu auctoritate, & potestate, ad roborandam Prouitatem.



VM enim vt supponimus, non seruet legem aliquam cui astringitur, nec aliud excuset quam quod sibi videtur non illa teneri lege, propter suam dignitatem, aut vitæ degendæ licentiam; profecto & dignitatem suam præfert legi, & palàm abutitur sua dignitate ad roborandam improbitatem. Nam improbitas est quod non seruet legem, & abusus dignitatis est quod ipsius prætextu non illam seruet: quasi propterea præficeret aliis vt & ipsi legi præficeret! Deinde vero etiam roboratur improbitas, quando insigniorum exemplo virorum fulcitur; neque inferiores ita sibi persuadent esse veritum, quod à suis vident Superioribus non obseruatum. Adde quod nec ipsi Præsides, seu Religiosi seu Laici tanta libertate audent legum infractores coercere quas ipsi violant, sicque impunitas viget, & impunitate roboratur impietas. Atque hinc Sapiens hoc vno vel maxime consulit omnibus vt altiores non appetant Dignitatum gradus, ne scilicet liberius ipsi peccent, aut alienis implicentur peccatis dum illa non cohibent. *Noli, inquit, querere à Domino ducatum, neque à Rege cathedram honoris. Non te iustifices ante Deum, quoniam agnitor cordis ipse est: & penes regem noli videri Sapiens. Noli querere fieri Iudex, nisi valeas virtute irrumperere iniquitates, ne forte extimescas faciem Potentis, & ponas scandalum in equitate tua. Non pecces in multitudinem ciuitatis, nec te immitas.*

*immittas in populum : neque alliges duplicia peccata , nec enim in uno
eris immunis.*

*Ergo indignum sua Dignitate se ipse profert qui Dignitatem suam
legi præfert , Quia sic manifeste abutitur Authoritate & Digni-
tate sua : unde ipsa Sapientia tam grauitè & horrendè in pri-
marios illos viros inuehitur , vt nihil Eius verbis ad propositæ ^{Sap. 6.}
Veritatis confirmationem addi queat. Audite ergo reges & in-
telligite , Discite Indices finium terræ. Præbete aures vos qui conti-
netis multitudines , & placetis vobis in turbis nationum , quoniam data
est à Domino potestas vobis , & virtus ab Altissimo , qui interrogabit
opera vestra & cogitationes scrutabitur , quoniam cum essetis mini-
stri regni illius , non rectè indicastis , nec custodistis legem Iustitiæ , ne-
que secundum voluntatem Dei ambulastis. Horrendè & cito appare-
bit vobis : quoniam iudicium durissimum his qui præsumunt , fiet. Exi-
guo enim conceditur misericordia , potentes autem potenter tormenta
patientur. Non enim subtrahet personam cuiusquam Deus , aut ve-
rebitur magnitudinem cuiusquam : quoniam pusillum & magnum ipse
fecit , & equaliter cura est illi de omnibus. FORTIORIBVS autem
fortior instat cruciatio.*

Vide & Ezechielis caput tricesimum quartum.

SECUNDA VERITAS.

CONTRA EXCVSANTES ALIQUID DIFFICILIUS.

Qui à lege excludit aliquid , excludit à se totam legem.

RATIO est , quia ille excludit à se totam legem qui legis seruanda
motiuum & finem excludit.

*Sed qui à lege excludit aliquid quod non seruet , hic legis seruanda
motiuum & finem excludit.*

*Ergo & excludit à se totam legem. Id est , non modo non seruat
illud quod excludit , sed neque alia quæ videtur obseruare. Nam
etsi illa quantum ad materiam seu rei substantiam seruet , quia
tamen non seruat ex motiuo & fine quo sunt seruanda , non di-
citur ea magis obseruare coram Deo , quam qui faceret aliquid
tantum quia sibi placet. Sic nempe ille qui quod est difficilius*

non facit, sed tantum quod est facilius, neque hoc facilius aliter facit quam quia est facile, & quàm quia placet facere quod est facile, non autem quod difficile. Quod certe non est facere propter motuum legis seruandæ, quod est Diuinum Dominium seu Diuina Iubentis Autoritas, cui tenemur obedire in omnibus, & tanto magis in difficilioribus quanto magis in illis nostra constaret subiectio, quæ vix apparet in aliis faciliioribus. *Si Math. 5. enim diligitis eos qui vos diligunt, quam mercedem habebitis? nonne & Publicani hoc faciunt? Et si salutaueritis fratres vestros tantum, quid amplius facitis? Nonne & Ethnici hoc faciunt? Quasi diceret, cum sint ista facillima, non fiunt ex motiuo supernaturali sed naturali, ac proinde non habent eam vim quam habere debet virtus Christiana cuius merces est regnum Cœlorum.*

Sicut de Fide diuina dicitur, quod qui non credit vni articulo propter motuum fidei, perdit omnino Diuinam fidem, nec vlli credit articulo propter Deum: sic plane sanctus Iacobus de obseruandis à lege: *Iac. 2. Quicumque totam legem seruauerit, offendat autem in vno, factus est omnium reus. Qui enim dixit, Non mœchaberis, dixit, & non occides. Quod si non mœchaberis, occides autem, factus es transgressor legis.* Quasi diceret, nihil tibi prodest seruasse aliud, cum istud transgrediendo factus sis reus legis violatæ: Quo certe Apostoli loco nihil apertius ad Veritatis euentiam. Sunt quidem eius loci diuersæ Authorum interpretationes: Sunt qui explicent de Charitate per vnius præcepti violationem perditam, & cuius perditione quidquid aliud feceris, tibi perit. Sunt qui de vniuersa lege sic intelligant vt lex vel iustitia legis sit quasi vna corona, vna vestis, vna cyclos aurea, circumdans & ornans totum hominem: quæ tota violatur, si vel vnâ ex ea partem demas aut vires: sicut in musica, corrumpitur tota harmonia si vel vna vox dissonet vel absit: nam sic tollitur eius integritas, species & decor: Ita Tirinus & Cornelius. Sed omnium sapientissimè Menochius qui ad cæteras hanc addit quam declarauimus expositionem, *Quia, inquit, qui in vno peccat, Iubentis Autoritatem contemnit, quæ in omnibus præceptis motuum nobis esse debet ad illa seruanda.* Quo in sensu est alia Veritas huic conformis, Feria quarta infra hebdomadam quartam post Pascha in secunda parte.

TERTIA VERITAS.

CONTRA EOS QUI CVLPAM REFERVNT
TEMPORI.

Qui culpam refert tēpori, pœnæ tempus non aufert.

SENSVS & Ratio est, quia qui culpa reus est, pœna cum sit & reus, pœna aliquando subeunda tempus non aufert, suo tēpore punietur. Neque enim est vlla culpa quam non sequatur pœna. Verebar omnia opera mea, inquit Iob, sciens quod non parceres delinquenti. Iob. 9. DELINQVENTI Dominus nequaquam parcit, inquit ibi sanctus Gregorius, quia delictum sine ultione non deserit. Aut enim ipse hoc homo in se pœnitens punit, aut hoc Deus cum homine vindicans percutit. Nequaquam igitur peccato parcitur, quia nullatenus sine vindicta laxatur.

Sed qui culpam refert tempori, culpa reus est, & quidem duplici, aut certe grauioris quàm si solum peccasset & peccati excusationem à tempore non repeteret. Sic enim irridet Deum, quasi non omni tempore colendus esset, quasi Deus daret tempus peccandi, quasi tū non esset sanctus vt peccatum non odisse posset, Propter quid irritauit impius Deum? Dixit enim in corde suo, Ps. 9. non requireret. En quo maxime irritatur Deus cū culpa sic refertur tempori, quā nulla tū esset culpa.

Ergo is qui culpam refert tempori, pœna tempus non aufert. Valde is errat & decipitur; tantum enim abest vt impune tū peccet, quā duplo grauius puniatur; & quod peccarit, & quod peccato tempus ascripserit. Duplicate duplicia secundum Apoc. 18. opera eius; miscete illi duplum?

Vide in secunda parte Dominicam Quinquagesimæ.

TRES ALIÆ VERITATES PRACTICÆ
DE PURIFICANDIS AFFECTIBVS.

PRIMA VERITAS PRACTICA.

Qui se hodie non purificat, se magis inquinat.

Scilicet ij.

RATIO est quia ille se magis inquinat qui fictè & simulate aliquid quem religionis actum exercet. Sed qui se hodie non purificat, fictè & simulate exercet illum religionis actum quo benedicti gestantur Cerei. Ergo & se magis inquinat, si non se ante purificet. Vnde profecto agnoscitur quanta sit hodie necessitas purificandi affectus nostri: & quàm apte sanctus Iacobus dixerit: *Purificate corda, duplices animo.*

Prima propositio nihil habet difficile quod exponatur fufius; Nam sese is manifeste magis inquinat qui peccato peccatum addit: tum vero quisque peccatum peccato addit quando in Dei cultu & seruitio fingit se esse qui non est, fingit se humilem qui est superbus, vel obedientem qui est contumax, vel vno verbo, subditum Christo qui Christo in multis resistit; hoc est enim agere Hypocritam & Dolosum quem abominatur Dominus. *Va vobis hypocrite quia similes estis sepulchris dealbatis, quæ à foris parent hominibus speciosa, intus vero plena sunt ossibus Mortuorum, & omni spurcitia.*

SED qui se hodie non purificat, fictè & simulate exercet illum religionis actum quo benedicti gestantur Cerei.

Hæc secunda propositio non ita quidem videtur clara, & fufius declaranda esset quàm hic tractetur, sed ex his paucis facile cætera colliguntur. Primo indicandum quis sit ille actus religionis si bene exerceatur, nempe est professio quædam publica qua testamur coram Deo & hominibus, Christum Dominum esse verum illud Lumen quod dixit Simeon ad reuelationem Gentium, & gloriam Israelitici populi: Nos per eius gratiam & per Evangelij communicationem illo esse lumine sic illustratos vt quod Christus dixit fideliter credamus, & pro ea fidelitate parati simus mori ac deficere, sicut cera deficit à facie ignis, & toti velimus consumi & impendi in illius obsequium, *qui nos de tenebris vocauit in admirabile lumen suum.* Ac proinde Ecclesia dum cæcos benedicit, sic Deum inuocat in hunc finem; *quæ extrinsecus annua tribuis deuotione venerari, interius assequi gratia tua luce concede: vt purgato mentis oculo ea cernere possimus quæ tibi sunt placita.*

Sic itaque si affecti essemus interius, sicut exterius profiteamur, insignis esset Religionis actus, quia sic, vt dictum est, profiteamur nos totos velle esse Christi, sicut agnoscimus nos illius esse totos; quod maxime proprium est Christianæ Religionis. *O Do-*

mine quia ego seruus tuus : ego seruus tuus & filius ancilla tua. Dirupisti vincula mea, tibi sacrificabo hostiam laudis.

Quod si è contra interius, quædam sint in animis nostris quæ huic externæ Professioni repugnent & aduersentur, si quidam forte sint, vt reuera multi sunt, deprauatî affectus qui nos à Christi cultu & obsequio tam longe auocent quam virtus & vitium longe disiuncta sunt; nonne fictè & simulate à nobis ille actus religionis exercebitur? Nonne falso dicemus nos esse Christi, cum verè illius non simus? Nonne erimus illi duplices animo, quos sanctus Iacobus alloquitur, nisi quod etiam impe-
Iac. 4.
rat, corda nostra purificemus? Quid est enim esse duplicem animo, nisi fictum & simulatum coram Deo, Sicut ait Sapiens; *Ne*
Ecclesi. 1.
accesseris ad eum duplici corde; Quando scilicet interiora cordis non respondent exterioribus, quando vt ait David, *labia dolosa*
Ps. 11.
in corde & corde locuti sunt: Quando, vt describit Propheta, *facti*
sunt quasi arcus dolosus, qui nempe non rectà tendit in scopum, *Osee 7.*
sed emissam sagittam in emittentem retorquet potius quam in locum destinatum. Sic enim aperte sanctus Augustinus, iam suprà semel auditus, ac iterum, *Deprehenderis & detegeris Chri-*
Tract. de
Symb. ad
Cathech.
stiane, quando aliud agis & aliud profiteris, Id est, in eo agnosceris verus aut fictus Christianus, quando cæteræ actiones non respondent Professioni Christianæ quam præ te fers: quando profiteris te esse Christi seruum, neotamen Christo seruis: quando fateris te probe nosse quid illi debeas, nec tamen reddis quod debes, non defectu potestatis, sed affectu voluntatis opposito, quem nisi purificaueris, te fictum & simulatum facit eo tempore quo sincerius & veriùs esset procedendum, nempe in sacro Religionis actu.

QVAMOBREM Veritas quæ de maiori hodie contrahendo cordis inquinamento proponitur, nisi cor ipsum purificetur, euidenter patet. Nam qui sic fictè & simulate agit, se manifeste inquinat, cum illa cordis duplicitas sit noua cordis impuritas: atque ita necessario ex his duobus alterutrum hodie nobis est eligendum quod sanctus Ioannes futurum dixit; *Qui nocet no-*
Apoc. 22.
ceat adhuc: & qui in sordibus est, sordescat adhuc: & qui iustus est,
iustificetur adhuc: & sanctus sanctificetur adhuc. Nempe qui ritè, qui sincerè, qui puro mentis affectu religiosæ debitum seruitutis exoluere sit paratus, quemadmodum præ se fert hodie in hac an-

nua Cereorum celebritate, Sanctus ille est qui sanctificatur adhuc; Qui vero impuros & deprauatos gerit affectus, hic in sordibus est, & sordescet adhuc.

Quæ certe Consideratio digna est quæ attentius expendatur; nam si vel de sola maiori Puritate & sanctitate comparanda nuncageretur, satis quidem esset ad acuendos nostros animos ex tantæ rei pretio; Sed cum aliud subest, & alterutrum necessario additur, nisi sit puritas major, erit major impuritas; quis tam parum sui studiosus, hanc nouam hodie velit contrahere notam & maculam, vt qua die magis purificari debuit, magis fuerit inquinatus? *Si sal euauerit in quo salietur? Si sal insulsum fueris, in quo illud condietis?* Id est, si media illa quæ sunt apta & ordinata purificandis animis inquinentur, quibusnam aliis ipsa modis purgabuntur? Aut non erat gestandus hodie sacer ille Cereus quo tuam in Christum fidem producebas, aut affectus interior erat perpurgandus, quo fides illa vera esset & sincera, non ficta & adumbrata. Licet enim tibi videaris nihil affinxisse, nihil dissimulasse: si tamen affectus interior non is fuit qualem oportet eius esse qui se totum esse Christi profitetur; nihil nisi ficta & simulata fuit illa Professio; nihil nisi exterior fuit religionis species & vmbra pietatis, quæ sola dum habetur, ait Apostolus, *vera virtus abnegatur.*

Audi eundem de hoc nostro interiori statu differentem, qui ad externos religionis actus est adhibendus: *Accedamus, inquit, cum vero corde, in plenitudine fidei, aspersi corda à Conscientia mala, & abluti corpus aqua munda:* Quasi diceret, tam puro corde nos esse tum oportet, quàm cum baptismi gratiam & innocentiam suscepimus. Sic venturum Christum ad mundanda corda nostra, Propheta ille prædixit qui auditus est in hodierno, Sacro: *Ipsè, inquit, quasi ignis conflans, & quasi herba fullonum, & sedebit conflans & emundans argentum, & purgabit filios Leui, & colabit eos quasi aurum, & quasi argentum.* Id est, sicut aurum & argentum purgantur separatione metalli vilioris quod ipsis admixtum erat, sic purificantur corda, dum affectu semouentur à terrenis & mundanis. Quod alia similitudine sanctus Ioannes præcursor, exprimebat cum diceret, *cuius Ventilabrum in manu sua, & permundabit aream suam, & congregabit triticum suum in horreum, paleas autem comburet igni inextinguibili.* O quis tum sen-

sus impuri cordis? quis porro animus iam iam morituri Christiani quando religiosus ille Cereus in hunc extremum finem domi asseruatus, ad manus eius inferetur, quasi testimonium illius fidei quam professus est hodie. Poteritne tunc non recordari sui hodierni status? poteritne vero recordari & non reformidare iudicium suæ perfidiæ, suæ desidiæ, qua magis ac magis sordescere voluit quam purgari?

Ruga mea testimonium dicunt contra me, dicebat beatus Iob. Iob. 16. *At quid per rugas, nisi duplicitas designatur*, inquit S. Gregorius? *Rugæ itaque sunt sancta Ecclesia, omnes qui in ea dupliciter viuunt, qui fidem vocibus clamant, operibus denegant.* Et post pauca: *Has autem rugas in electis suis Sancta Ecclesia non habet, quia videlicet nesciunt aliud de se foris ostendere, & intus aliud habere.* Vnde recte egregius Predicator dicit: *ut exhiberet ipse sibi gloriosam Eccle-* Ephes. 5. *siam, non habentem maculam, aut rugam; Maculam quippe & rugam non habet qua & turpitudine operis, & duplicitate sermonis caret.* Vide eundem, tertia parte Pastoralis, admonitione duodecima.

ALIA VERITAS PRACTICA.

Hæc est magis aut minus puræ mentis nota certior, velle magis aut minus purificari.

RATIO est quia magis aut minus amare puritatem, nota est certior magis aut minus puræ mentis. Sed magis aut minus amare puritatem nihil est aliud quam magis aut minus purificari velle. Ergo hæc est etiam magis aut minus puræ mentis nota certior, velle magis aut minus purificari.

Quæ quidem Ratio est euidentissima, & posset esse communis omni probandæ virtuti; sed puritati tamen particulatim conuenit, quia hæc inter Virtutes cæteras magis est tenera & delicata, thesaurus est in vase fictili cui conseruando nisi mens omni custodia cor suum seruauerit, facile quatitur & dissoluitur. Non potest autem melius conseruari quam si augeatur in dies, roboretur & stabiliatur firmitus. Sic enim validius resistit oppositis, & sua se in incorruptibilitate tueretur. Sic Beata Virgo sicut erat omnium Virginum purissima, ita puritati conseruandæ & augendæ studebat omnium vehementissime. Vide quæ supra dicta

Fer. 6. post
Dom. 4.

sunt in Aduentu, & in Festo Conceptionis, quibus adde quod huius puritatis, affectu purgationis legem impleuit, vt quantum magis purificari posset, purificaretur, & nos exemplo suo efformaret ad huius Virtutis incrementum magis ac magis procurandum.

Lib. 50.
Homil.
Hom. 35.

Vide quibus id possis modis, & ne tantum attendas quale inde bonum proueniat, sed quale damnum importetur ex minori puritatis cura. Præclare sanctus Augustinus: *quidquid pul- crescit visu, quidquid dulcescit gustu, quidquid blanditur auditu, quidquid lenocinatur odoratu, quidquid mollescit tactu, in his omnibus si incauti fuerimus, surrepentibus concupiscentiis malis, Anima Virginitatem corrumpi permittimus: & impletur illud quod per Prophetam dictum est: Intrauit mors per fenestras vestras.*

Ier. 9.

Aptè etiam S. Gregorius ad illa verba primi Regum capite decimo quinto: *Vade & percutite Amalec, & demolire vniuersa eius: non parcas ei, & non concupiscas ex rebus ipsius aliquid; NON POTES*, inquit, tolli menti quod aliquo modo immunda non videat, sed in mirabilem vsum Puritatis deducitur, vt immunda videns, nulla delectationis labe maculetur. *Quisquis ergo sic præest carni, quisquis sic mentem regit, ideo præest, ideo regit, quia Amalec cuncta demoliri fortiter potuit. Quis est hic qui parcat Amalec nisi qui aut in cogitatione, aut in ore, aut in carne, lasciuia aliquid retinet? Non parcas ei, quia de tam nequissimo vitio nihil accendi debet in mente, nihil permitti ardere in opere. Non parcas ei, vt omnes libidinosi motus omnes obscena locutiones prorsus perimantur in corpore, &c.*

ALIA VERITAS PRACTICA.

AD HÆC SIMEONIS VERBA:

Tuam ipsius animam pertransibit gladius. Luc. 2.

Doloris gladium, Animæ Virginis, acerbiozem infert vita peccatoris, quàm Mors filij.

RATIO est, quia Virginis anima conformis erat animæ & voluntati patientis ac morientis filij.

Sed

Sed voluntas patientis ac morientis filij talis erat, ut ex vita peccatoris, acerbiori pungeretur doloris gladio, quàm ex morte sua.

Ergo & doloris gladium Anima Virginis acerbiozem infert vita peccatoris, quàm Mors filij. Quod certe est expauescendum omnibus, tum vero iis præcipue qui se Deuotos Virgini profitentur, nec desistunt à peccatis. Hæc sunt eorum peccata maxime quibus magis affliguntur Mater & Filius, quam ipsa morte Crucis crudelissima.

Ratio tota pendet à malitia peccati quæ est grauior apud Christum, cui haud dubie Mater erat conformis, quàm ipsa Christi Mors, propter has tres causas. Prima, quod peccatum sit offensa Dei & quoddam velut Deicidium, quo Deus moritur in anima Peccatoris, in qua ante peccatum viuebat per Charitatem & gratiam. Vnde dicitur, *Quasi Romphæa bis acuta omnis iniquitas*; ex duplici parte lethalem infert plagam, nempe Deo & animæ peccatrici, *Ecce peruenit gladius usque ad animam.* At Ier. 4. certe Mors Christi si tantum consideretur vt pœna, pœna est & mors hominis non ipsius Dei, nisi per communicationem Idiomatum. Et Christus vt homo vitam & honorem Dei Patris qui in peccato læditur, tanto pluris quàm vitam suam faciebat, quanto Pater maior ipso erat. *Quia Pater maior me est*, inquit, *Et in his quæ Patris mei sunt, oportet me esse.* Ioan. 14. Luc. 2.

Secunda causa est, quia Christus in Morte sua, videbat ordinationem Patris iustissimam quam summopere venerabatur, & inde omnia consequentia bona in Electorum salutem. At verò in peccato, nihil videt nisi quod est purum putum malum & mora inordinatio, directe opposita voluntati Diuinæ quæ nec velle peccatum nec amare potest, imo semper odit & punit. *Mundi sunt oculi tui ne videas malum, & respicere ad iniquitatem non poteris.* Atque ita peccatum simpliciter & absolute malum est & plane inuisum Deo; Passio vero Christi vt Passio, & vt malum est pœnæ, non ita malum est quin maxima in eo, & pretiosissima bona insint, quæ & Deus volebat, & quæ proinde Christus amabat. *Vt cognoscat Mundus quia diligo Patrem, & sicut mandatum dedit mihi Pater, sic facio.* Ioan. 14.

Tertia denique est, quod vt ait sanctus Thomas, Priuatio finis est grauior quàm eorum quæ ducunt ad finem: Finis autem patientis & morientis Christi quis erat nisi peccati sublatio.

nisi Paternæ gloriæ, salutisque humanæ reparatio, quæ tamen omnia pereunt per peccatum denuo perpetratum; Vnde quàm verum est illud commune Effatum: propter quod vnumquodque est tale, hoc ipsum magis est tale: tam verum sit oportet quod magis acerbum est Christo, Peccati malum, quam propriæ mortis, quia propter peccatum auferendum Mors illa est ordinata: propter Diuinam gloriam & humanam salutem recuperandam Mors illa suscepta est. *Iste omnis fructus, ut auferatur peccatum eius.* Et tamen per peccatorem refertur, & sic perit eius fructus & finis. *Qua utilitas in sanguine meo? Christus vobis nihil proderit. Euacuati estis à Christo, à Gratia excidistis. FILIVS Dei conculcatus, & sanguis testamenti pollutus est. O vulnus Christi dirius lethali quouis vulnere!*

Serm. 181. de temp. Cur me inquit grauiori tuorum criminum Crucì affixisti! Vide reliqua eius Verba quæ sunt ex S. Augustino relata, sacro die Parasceues: Vbi & multa quæ huc spectant exprimes, Vnde quàm clare pateat Veritas de acerbiori doloris gladio quem infert peccator Animæ Beatæ Virginis, non est apertius demonstrandum: sed qualis inde in peccato considerari debeat mali Grauitas, attentius est perpendendum. Quid enim est, peccator! Quid illud est, vno quasi ictu & Deum Patrem occidere; & Filium grauiori supplicio enecare quam morte Crucis; & Matrem acerbiori gladio transuerberare quàm aspectu pendentis in Cruce filij! Istane possunt credi & fieri? Certe quod credi debeant, motiua sunt cuiuscumque generis; fides est diuina & humana: Scripturæ id aperte pronuntiant, Patres ita exprimunt, sic suadet Ratio; quid ad conciliandum fidem efficacius? An vero id possis de peccato credere, & peccare velle! Nesciebas forte, nec cogitabas cùm peccasti; dolendum est, & dolore intimo diluetur peccatum. Sed deinceps, qui hæc iam audiisti: Quid deinceps acturus es? An sic liberè & effusè peccabis? an sic lethalem gladium proterue inferes in sinum dolentissimæ Matris? *Mucro, mucro, reuertere ad vaginam tuam. Vrge hunc motum vehementissimè.*

DIES FESTVS S. MATTHIÆ APOSTOLI,

nonnisi post Septuagesimam celebratur: quamobrem in secundam partem remittitur.



VERITATES PRACTICÆ.

COMMUNES OMNIBVS SANCTIS,
PRÆTERQVAM APOSTOLIS ET EVANGELISTIS,
QVIBVS PROPRIÆ DESIGNANTVR, SVIS LOCIS.

COMMVNIS OMNIBVS SS. MARTYRIBVS.

*Tamquam aurum in fornace probavit illos : & quasi
holocausti hostiam, accepit illos. Sap. 2.*

VERITAS PRACTICA.

Sicut Martyrio vita naturalis, sic Mortificatione vita
sensualis.

*SENSVS est, quod sicut ne pereat Fides, perdenda est Marty-
rio vita naturalis : sic ne pereat Fidelitas, perdenda mortifi-
catione, vita sensualis.*

*RATIO est, quia tale est meritum Fidei, & talis eius obligatio,
vt illi postponenda sit vita naturalis.*

*Sed tale est etiam meritum & obligatio Fidelitatis nostræ, vt illa
subjicienda sit vita sensualis.*

*Ergo equaliter hæc est exponenda, ne pereat Fidelitas : sicut ne pe-
reat Fides, non dubitatur exponi Martyrio vita naturalis.*

Ttt. ij.

I. PUNCTVM.



VAM sit mirabilis & magnificandus Deus in sanctis Martyribus suis; quanta sit horum gloria, & quantum inde ad perfectam mortificationem incitamentum, fusissime habes in vernacula Meditatione, ad id instituta.

Nunc vero ex multis quæ inde possunt ad praxim erui, hæc Veritas maximè practica & fructuosa videtur, *Vt sicut ne pereat Fides, perdenda est martyrio vita naturalis, sic ne pereat fidelitas, perdenda est mortificatione vita sensualis.*

Ratio fundamentalis hæc est, quia tale est meritum & obligatio Fidei nostræ, vt præferri debeat vitæ naturali; Quod quidem ex triplici capite potissimum declarari potest. Primum, quia Deus vt Dominus vitæ nostræ id meretur, vt quando imperat, vel quando agitur de honore eius, vitam illi nostram plane consecremus, *Morere*, ait Dominus Moyli: *mortuusque est Moyses seruus Domini, iubente Domino.* Sic plane quilibet nostrum debet eo iubente mori. Iubere autem intelligitur quando non aliter viueres, nisi eum offenderes, fidem abnegando: Tum potius dicendum cum Susanna: *Melius est mihi absque opere incidere in manus hominum, quam peccare in conspectu Domini.*

Deinde id debemus Christo Domino, tum quod restituit nobis vitam æternam, tum quod idcirco suam dedit quali modo scimus, *quàm probroso, quàm indigno! Christus passus est pro nobis, vobis relinquens exemplum, vt sequamini vestigia eius.* Et quotquot Christiani sumus, hoc veluti Sacramento & iuramento fidei ad illius obsequium ita tenemur, vt citra perfidiam & apostasiam resilire non possimus. *Qui negauerit me coram hominibus, negabo & ego eum coram patre meo.*

Denique id ipsum debemus animæ nostræ, & salutis æternæ, vt temporalem vitam tam libenter impertiamur, quàm probrosum, quàm inordinatum & indignum esset, Si propter modicum corruptibilis vita tempus, vt aiebat ille, *maculam: & execrationem sempiternam conquiramus, Nam etsi in presenti tempore supplicii hominum eripiar; sed manum Omnipotentis nec viuus nec defunctus effugiam.*

Hoc attendens in agone suo gloriosus Christi Athleta, non exhor- *S. August.*
ser. 44. de
sanctis.
rruit carcerem, ad Imitationem sui Capitis toleravit probra, susti-
nuit irrisiones, flagella non timuit: Et quot ante mortem pro Chri-
sto pertulit supplicia, tot ei de se obtulit sacrificia. Sic fuit S. Au-
gustinus. O quam facili pretio nobis conceditur, quod tam ca-
rò sancti emerunt. Numquid fratres vestri ibunt ad pugnam, & *Num. 32.*
vos hic sedebitis!

II. PUNCTVM.

SED tale est etiam meritum & obligatio Fidelitatis nostra, ut illi
subjicienda sit vita sensualis;

Non est dubium quin si de peccato mortali ageretur perinde
obligaremur atque in ipsa Martyrij occasione pro Fide, eamque
in rem egregius est tractatus apud S. Cyprianum de duplici
Martyrio, ubi hæc inter alia contra peccatorem. Cum Tyrannus
dicit, abnega Christum & immola Ioui, sæpe lingua negat corde
reclamante: quamquam hoc gravissimum crimen, tamen aliquam
impietatis culpam eleuat humana natura imbecillitas. Ibi satanas
tibi loquitur per tuam concupiscentiam: abnega Christum, & esto
dives, sacrificia mammonæ & Christo nuntium remittito: nec dicit,
morere, sed potius oblecta oculos. Et tamen tu hic sponte sub-
mittis genua Satanae, & abnegato Christo, te totum illi man-
cipas.

Et verò etiam ubi de veniali tantum ageretur, sicut profectò
saltem de eo agitur, quando inordinatus est motus sensualitatis;
quàm vera sit propositio vel ex eo patet, quòd vita sensualis
longè minor & inferior est vitæ naturali; At vita ipsa naturalis,
si opus foret, danda potius esset, quàm illud veniale commit-
tendum; Quanto igitur magis sensualis? Hinc apte Sapiens: *Ecclesi. 4.*
Pro Iustitia agonizate pro anima tua, & usque ad mortem certa pro
Iustitia.

Quod si triplex illud caput, unde meritum & obligatio fidei
petebatur in primo puncto, volueris attendere, profectò etsi
non eandem & omnino parem fidelitatis obligationem conclu-
des; at certè similem suo proportionato modo atque ita nos ob-
stringentem reperies, ut prorsus desinat esse fidelitas, si non sibi
subjiciat vitam sensualem. Quale enim illud, & quàm alienum à

fidelitate, præferre Deo, Christo & saluti, seu perfectioni animæ, nescio quam vanitatem, voluptatem & commoditatem corporis, malle offendere Deum, & Christum, quam suum appetitum! *Hæcine reddis Domino! Hæcine reddis Christo!* ubi nam illud quod debes, Cor totum, tota anima, tota mens, tota virtus, tota fortitudo, & omnes vires? Certè non ubi sensualitas; nam quantum est illi datum, tantum de toto detractum est.

2. Cor. 5. *Charitas Christi urget nos, aiebat Apostolus, estimantes hoc, quoniam si unus pro omnibus mortuus est; ergo omnes mortui sunt, & pro omnibus mortuus est Christus, ut & qui viuunt, iam non sibi vivant, sed ei qui pro ipsis mortuus est & resurrexit.*

Quid porro est, non sibi viuere sed totum Christo, nisi sensualitati renuntiare? Nam certè qui cedit appetitui, sibi viuunt, quantumcumque modice cedat: Mors nobis integra per mortem Christi imperatur: *Mortui sumus & consepulti cum illo;* nullus igitur motus vitæ sensualis relictus est, cum mors totam planè vitam excludat; aut mors dici non possit. Et cum Christus Dominus in hoc esse mortuus, & resurrexisse dicatur ab eodem

Rom. 6. *Apostolo, ut & mortuorum & viuorum dominetur:* Vidēsne quomodo mortuis dominatur? Vidēsne ut nullo prorsus motu mortui moueantur, quàm ex eius imperio? sic nos viuentes non aliter moueri deberemus. Sic propterea monemur, *exhibere corpora nostra hostiam viuentem, Sanctam, Deo placentem, rationabile obsequium nostrum.*

Ibid. 14.

Ibid. 12.

Quanto res verò modica & exigua nobis apparet, tantò fidelitas major probaretur, & tanto arguenda est infidelitas, quæ in re tantillâ, se Christo prætulit. Nec porrò leue putes animæ damnum quod hac infidelitate contrahitur; *Nam qui fidelis est in minimo, & in maiori fidelis est: & qui in modico iniquus est, & in maiori iniquus est,* inquit Dominus. Sic probatur fidelitas, ut in igne aurum. Audi scripturam: *Quomodo probatur in conflatorio argentum, & in fornace aurum, sic probatur homo ore laudantis.* Expende hoc anime, inter omnes vitæ sensualis actus, moueri suis laudibus, videtur leuius, aut certè parum graue; Et tamen inde probatur fidelitas, ut tibi innotescat nihil tam leue esse in hac materia quod non sit studiosè cauendum.

1. Cor. 16.

Præm. 27.

III. PUNCTVM.

ERGO similiter ne pereat Fidelitas, perdenda est mortificatione vita sensualis, sicut Martyrio perderetur vita naturalis, ne periret Fides, quia sic Deus vtroque meretur, hoc æquè debemus Christo Domino, hoc salutis & perfectioni animæ, quæ nihil carius post Deum nobis esse debet. *Si oculus tuus dexter scandalizat te, erue eum & proiice ab te: Et si dextra manus tua scandalizat te, abscinde eam: Et si pes tuus te scandalizat, amputa eum.* His tribus membris seu symbolis designatur triplex concupiscentia, unde tota conficitur sensualitas, quæ nos à Fidelitate reuocat, sub specie boni, honesti & delectabilis.

At vero, hic etiam considera, quàm longè dignius & securius triplex illud bonum reperiatur in ipsa fidelitate. Quid enim & honorificentius, & ad omnem commendationem gloriosius, quàm se ita fidelem exhibere Deo, ut ne latum vnguem, ne pro quolibet alio prætento bono, ab eo discedatur? Quibus non præconiis & laudibus hunc fidelem Dominus seruum effert? Comparata gloriâ quæ à Deo est, cum gloria quæ à mundo? Conferatam lobi commendationem, quam à Deo promeruit, cum alia quauis quam tibi mundus referre possit: *Numquid, inquit, considerasti seruum meum Iob; quod non sit ei similis in terra, homo simplex & rectus, ac timens Deum?* Vtrum securius probari à Deo, an ab hominibus? *Vt cum benedixerint vobis homines? Et si autem maledicant; Maledicent illi, & tu Domine benedices.*

Sic perge considerando de aliis concupiscentiis; Quæ commoditas sensualis præ utilitate fidelitatis? quænam voluptas sensuum præ gaudio animi & præ illa delectatione securæ mentis, quæ est iuge conuiuium? *Quid ergo tibi vis in via Aegypti, ut bibas aquam turbidam?* En Dominus Deus tuus tibi illud bonum longe præstantius offert, & tu illo deserto, paternisque deliciis abdicatis, mauis ad filiquas porcorum recurrere! Caue id omnino, & audi Christum Dominum: *Esto fidelis vsque ad mortem, & dabo tibi coronam vitæ.* Expende verba, *vsque ad mortem*, inclusiue, seu de vita naturali agatur, quæ sine dubio danda est, potius quàm vel leue peccatum admittatur: seu longè magis de sensuali, quæ potiori iure debetur, quoties fidelitas id exigit.

2. Cor. 4.

Et quia semper & ubique exigit, idcirco semper Mortificationem Iesu in corpore nostra circumferamus, ut & Vita Iesu manifestetur in corporibus nostris.



COMMVNIS SANCTIS CONFESSORIBVS PONTIFICIBVS.

Non est inuentus similis illi, qui conseruaret legem excelsi. Ecclesi. 44.

VERITAS PRACTICA.

Et communia singulariter, Et singularia communiter.

SENSVS est, quòd sic communia singulariter tractanda sunt, ut singularitatis nota vitetur, Et à communibus numquam discedas.

RATIO EST, Quia idcirco communia singulariter sunt tractanda, quod ad id Gratia quedam singularis, vnicuique à Deo detur.

Sed illa gratia notam affectata singularitatis abhorret, & à comuni lege non discedit.

Ergo vtrumque sic temperandum est, ut & communia singulariter obseruentur, & singularia communiter, seu sine præiudicio cōmunitatis. Quod est diligenter cauendum.

I. P V N C T V M.



QUOMODO de vnoquoque sancto Pontifice dicatur, non esse alium similem illi, quanta inde Christi Domini gloria, quantus vniuscuiusque Sancti Pontificis honor,

honor, & alia quæ in hanc rem quæri possent, habes in Meditatione de hoc argumento fusiùs explanata. Inde vero hæc Veritas ad praxim, & ad eorum imitationem deducitur, *quod sic communia singulariter tractanda sunt, ut singularitatis nota vitetur, & à communibus, quantum fieri poterit, numquam discedatur.* Verendum enim esset, ne in aliquod extremorum iretur, si communia communiter solum fierent, aut si relictis communibus, singularitas notaretur. Quamobrem vtraque simul iungenda, ut & communia singulariter, & singularitas à communione seu communitate non se disjungat. Sic sancti omnes, eandem & communem omnibus legem Excelsi, tam perfectè observarunt, ut in illa observatione singularis unusquisque extiterit, nec fuerit inuentus similis illi. Rursum verò singularitatem illam sic temperarunt, ut nullum inde affectationis maculam contraxerint, nec se à communi lege Excelsi separarint.

Hoc ergo primum expende, quod communia non communiter sunt tractanda, id est, non communi & neglecto modo, non perfunctoriè, non tepidè, non dissolutè, non ut fieri solet in iis quæ quotidiana sunt, & quæ quodammodo præ assiduitate vilescunt; *sed singulariter*, id est singulari quodam affectu, quasi res propria & noua esset, nouo in dies crescente feruore, quâ mentis attentione & deuotione possis, velut si primò ipsum opus inchoares, velut si extrema esset vitæ actio, de qua iam iam esses rationem redditurus, velut si de mundo conuertendo in ea quantacumq; parua actione ageretur, si denique quàm perfectè & absolute possis, secundum gratiam singularem ad id tibi datam. Nam, ut ait Apostolus, *unusquisque proprium Donum habet* ^{1. Cor. 7.} *ex Deo, alius quidem sic, alius vero sic.* Et fusiùs paulo post. *Di-* ^{Ibid. 12.} *uisiones gratiarum sunt, diuisiones ministrationem, Diuisiones operationum sunt, idem verò Deus, hæc omnia operatur unus atque idem Spiritus, diuidēs singulis prout vult:* sicut in vno & eodem corpore multa membra, quæ non eundem actum habent. Hæc & similia frequenter repetit, quæ sic intelligi possunt de Virtute quapiam unicuique singulariter impertita, ut ad eius singularem actum, singulasque illas actiones, quæ communes omnibus quotidianæ sunt, etiam referri debeant.

Sic enim idem Apostolus expressè de se, singulisque suis operibus: *Exhibeamus omnem hominē perfectum in Christo Iesu, in quo* ^{Coloss. 1.}

& laboro certando secundum operationem eius, quam operatur in me, in virtute. Audisne quod dicit secundum operationem eius quam operatur in me, Id est, in singulis actionibus, cum ad singula concurreret illa Dei operatio; cumque in hoc Apostolo esset singularis quædam virtus & gratia ad operandum: eius operatio, seu actio erat etiam ita singularis, & perfecta suo modo, ut eius perfectio non esset perfectio S. Petri, nec alterius Apostoli: sicque omnes perfecti essent diuerso perfectionis gradu, ut nullus alteri similis esset non tantum vniuersim pro toto vitæ decursu, sed pro singulis etiam actionibus, quas vnusquisque singulariter ex singulari suo dono exercebat.

I. Cor. 13. Sic denique, quod idem ait, *Super idem fundamentum superedificat alius aurum, alius argentum, alius lapides pretiosos, alius ligna, fœnum aut stipulam;* hoc est, vnam eandemque actionem quam multi facient, alius tam singulariter ab alio & perfectè exercebit, quàm diuersum est aurum ab argento, vel ligno, vel stipula. O qualis diuersitas, non quidem à diuersis actionibus, sed à diuerso agendi modo. Sancti fecerunt eadem quæ nos agimus, & nobis eadem penè, quæ ipsis sunt agenda: Sed aliter illi, & nos aliter! Illi velut aurum, argentum, aut lapides pretiosos actionibus suis singularem virtutem, quâ præditi erant, inferebant; Nos, virtute neglectâ, ex appetitu naturali tantum agentes, nihil nisi ligna, fœnum, stipulam, aut aliam ignis materiam inserimus operibus nostris! Expaucesce.

II. PUNCTVM.

SED illa Gratia notam singularitatis abhorret; & à communi lege non discedit.

Aduerte singularitatis tum esse notam, si quis sine legitima causa à communi lege discedit. Nam si legem seruandam seruat, etsi alij non obseruent, non est singularitas vitiosa, imo laudabilis: sed illa tantum singularitas vitio vertitur, quando quis neglectis communibus aliquid extraordinarium supra alios agit, vel in ipsis communibus obseruandis aliquem modum affectat, qui non est in vsu & communi approbatione sapientum vel Superiorum. *Non sum sicut ceteri hominum,* ait in corde suo homo singularis, & vanus. Ab hac autem affectatione seu nota singu-

laritatis longè est gratia, quæ singulis ad communia singulariter tractanda communicatur; Non enim seipsam destruit gratia, nec Deus est dissentionis Author, sed pacis & ordinis; ac proinde cùm communitatem ipse velit ab omnibus obseruari, licèt ad eius obseruantiam vnique det gratiam singularem, non vult tamen illà gratiã communitatem destrui, sed potiùs conseruari, efflorere, exornari, & vtiliorem reddi, sicut diuersi membrorum actus non impediunt, imò iuuant totum corpus; & sicut diuersæ voces simul conuenientes concentum gratiorem faciunt: sic planè Communitas exurgit vberior & formosior ex singulis cuiusque virtutibus, dummodo illæ virtutes ad eam obseruandam concurrant, & non destruendam. Hæc sunt prima opera quæ Deus fieri vult ab illo Episcopo qui multis vacabat aliis: *Sed habeo, inquit, aduersum te, quod charitatem tuam primam reliquisti. Memor esto itaque vnde excideris, & age penitentiam, & prima opera fac, si autem, veniam tibi cito, & mouebo candelabrum tuum de loco suo.* Vide primum de Imitatione Christi, capite decimo quinto, vbi hæc inter alia: *Cauendum ne piger sis ad communia, & ad singularia promptior, sed expletis integre, & fideliter debitis, & iniunctis, si iam ultra vacat, redde te tibi prout deuotio tua desiderat.*

III. PUNCTVM.

PATET ergo sic vtrumque temperandum, vt & communia singulariter fiant, & singularitas nihil communibus omnino præiudicet: Imò potius, cùm ipsa singularis gratia non detur nisi ad communitatem melius obseruandam, non aliter gratiæ cooperaberis, nisi vtroque simul iuncto, & Communitas singularitate exerceatur, & Communitati singularitas seruiat. Vide in quo deficias aut excedas. Audi S. Gregorium aptissimè ad hæc differentem in illa Iobi verba, *Iudica mihi si habes intelligentiam, quis posuit mensuras eius si nosti, vel quis tetendit super eam lineam? Cum miro, inquit, consilio author ac dispositor noster huic illa largitur quæ alij denegat: alij hæc denegat, quæ isti largitur; mensuras sibi positas egredi nititur, quisquis posse plusquam acceperit conatur. In præcipitio pedem porrigit, qui mensurarum suarum limitem non attendit: & plerumque amittit, & quod poterat, qui audacter ea, ad*

quæ pertingere non valet, arripere festinat. Nam & membrorum nostrorum tunc bene ministeriis utimur, cum sua eis officia distincte seruamus: lucem quippe oculis cernimus; vocem verò auribus audimus: si quis autem mutato ordine voci oculos, luci aures accommodet, huic incassum utraque patent. Si quis odores velit ore discernere, sapores nare gustare, utriusque sensus sibi ministerium quia peruerit, interimit, dum enim propriis hæc vñibus non aptantur, & sua officia deserunt, & ad extranea non assurgunt. Bene itaque David Propheta, intra acceptas ex diuina largitate mensuras pedem cordis prefferat, cum dicebat, neque ambulauit in magnis, neque in mirabilibus super me. Super se quippe in mirabilibus ambularet, si apparere magnus ultra quam poterat, quereretur: super se namque in mirabilibus attolitur, qui & in his ad quæ non sufficit, videri idoneus conatur. Bene intra has mensuras etiam in ipsa Paulus prædicationis suæ se latitudine coarctabat, cum diceret, non enim audeo aliquid loqui eorum, quæ per me non efficit Christus.



COMMVNIS SANCTIS DOCTORIBVS.

Qui soluerit vnum de mandatis istis minimis, & docuerit sic homines, minimus vocabitur in regno cælorum; qui autem fecerit & docuerit, hic Magnus vocabitur in regno cælorum. Matth. 5.


VERITAS PRACTICA.

Sic cauendum ne Scientia præferatur Virtuti, vt tamen Scientia non negligatur.

RATIO EST, Quia idcirco scientia non est præferenda Vir-

tuti, ne Virtus detrimentum, ex hac præferentia patiatur.
Sed ex neglecta scientia, Virtus etiam detrimentum pateretur.
Ergo dum cauetur ne Scientia præferatur Virtuti, cauendum est
ne negligatur.

I. PUNCTVM.

 V A M parua & pœnè nulla sit coram Deo scientia sine virtute; quàm magna virtus etiam sine scientia; quantus vero & quàm magnus, qui scientiam cum virtute coniunctam habet; satis ampla demonstrat Meditatio quæ est Communis sanctis Doctoribus; Inde vero quæ ad Veritatem nobis propositam illustrandam faciunt, pauca hæc eruemus. Ac primò vt apertiùs videas, quod prima propositione præmittitur, quale detrimentum Virtus patiatur, si ei Scientia præferatur, aduerte quid sit scientiam præferre Virtuti, nempe intellectu & iudicio saltem practico, pluris facere doctrinam atque doctos viros, itemque talenta docendi, concionandi, quàm humilitatem, simplicitatem, Religiositatem & alias Virtutes quæ non ita parent. Deinde voluntatem plus affici erga studium literarum, quàm Virtutis & propriæ perfectionis. Ac denique actu & opere tantum laboris & sollicitudinis impendere in studia, vt feruore studiorum intepefcat amor virtutum: Orationes, examina, & alia deuotionis exercitia negligentiùs fiant; passiones seu affectiones animi inordinatæ reuiuiscant; superbia, vanitas, æmulatio non bona, ambitio & alia vitia foueantur.

Ex quibus liquide patet quale quantumque detrimentum Virtutes vniuersæ patiantur, atque imprimis Humilitas, Deuotio, Religiositas, Pura intentio, Caritas, Fidelitas & vno verbo, Cura salutis ac perfectionis propriæ. *Comederunt alieni robur osce eius, & ipse nesciuit; sed & cani effusi sunt in eo, & ipse ignorauit.* Quæ Prophetæ verba paulo diutiùs expendenda essent ad concipiendum detrimentum illud quod Virtutes patiuntur. Duo nempe simul iunguntur, ex quibus tertium sequitur, quod est præcipuè expauescendum. Primum quod ait robur internum & spirituale comedi & consumi. Secundum quod dicit hoc ipsum nesciri & ignorari: Ac tertium denique, quod inde sequi-

Apos. 3.

tur nullum afferri remedium, & sic in peius quotidie ruere, & prolabi in eum statum, de quo dicitur: *Vtinam frigidus esses aut calidus, sed quia tepidus es, incipiam te euomere ex ore meo; quia dicis, dives sum, & locupletatus, & nullius egeas: Et nescis quia tu es miser & miserabilis, & pauper & cecus & nudus; Suadeo tibi emere à me aurum ignitum, ut locuples fias, & Collyrio inunge oculos tuos, ut videas*: Hoc item valde notandum, quia cum præcipuè iudicio erretur in præferenda Virtuti scientia, ut corrigatur hoc prauum iudicium, sanandi sunt mentis oculi, inspiciendus Christus Dominus, inquirendum eius iudicium, quanta fiat ei iniuria qui aliter iudicauit; quanta eius Sanguini & Gratia, quæ non pro scientia, sed pro virtute sunt effusa, quanta denique Cœlo, quod non scientiæ sed virtuti promittitur. *Erudire Ierusalem, ne fortè recedat à te anima mea, ne fortè ponam te desertam, terram inhabitabilem.*

Ier. 6.

II. P V N C T V M.

SED ex neglecta scientia, Virtus etiam detrimentum pateretur. Percurre quatuor Cardinales, ad quas cæteræ omnes Morales referuntur, & vide ut singulæ offendantur ex contemptu scientiæ necessariæ comparandæ, Prudentia, Iustitia, Fortitudo, Temperantia. Quis non videat ignorantiam, otium rusticitatem, & alios scientiæ defectus cum his pugnare virtutibus? Primò quidem Prudentiam, quid magis nutrit quàm scientia? quid magis destruit quàm ignorantia? quis credet ignorantibus? quis se illi aperiat & confidat?

Quid deinde à Iustitia magis alienum, quàm nescire artem quam profiteris? Quid illo iniquius, qui consultus de re aliqua ad fidem vel conscientiam pertinente, malè respondebit, & alios in errorem trahet? *Nonne si cecus cacum ducit, ambo in foueam cadent?* Nonne peccaret in iustitiam Medicus, qui ex neglecta scientia malè corpus curaret? & nonne id Sacerdoti à Domino exprobratur tamquam iniquum & criminofum; *Quia tu scientiam repulisti, repellam te à me, ne sacerdotio fungaris mihi.* Et Sapiens: *Qui euitat discere, sentiet mala.*

Matth. 15.

Ioseph. 4.

Prov. 17.

Fortitudinis etiam manifestus est defectus, qui laborem fugit studiorum, & inertia atque otio se abdicat: vnde est illa

multa malitia quam docet otiositas, ut ait Ecclesiasticus.

Ecclesi. 38.

Denique Temperantiæ quanta inde iactura, cum modus & medium in quo illa tota consistit, ignoratur? aut si ignorans sibi nimis fidit, quanta præsumptio, quanta vanitas, quanti indelapsus! errores, illusiones & hæreses, cum aperte dicatur: *propterea captivus populus meus ductus est, quia non habuit scientiam.* 1. s.

Et, QVÆCVMQVE quidem ignorant, blasphemant. Inde.

Quod si plebeio & Laico damnosa est ignorantia, quanto magis Sacerdoti vel religioso? *Ponet in Rationali iudicij,* ait Exodi 18.

Dominus, Doctrinam & Veritatem. Et rursus. *Præceptum sempiternum est in generationes vestras, ut habeatis scientiam discernendi* Levit. 10.

inter sacrum & prophanum, inter pollutum & mundum, doceatisque filios Israel omnia legitima mea. SI QVIS ignorat ignorabitur, ait 1. Cor. 14.

Apostolus. Vnde & suo Timotheo: *Mali homines & seductores* 2. Tim. 3.

proficient in peius, errantes, & in errorem mittentes. Tu verò permane in iis quæ didicisti, & credita sunt tibi, sciens à quo didiceris; Et quia ab infantia sacras literas nosti, quæ te possunt instruere ad salutem per fidem, quæ est in Christo Iesu. Omnis enim scriptura divinitus inspirata, utilis est ad docendum, ad arguendum, ad corripiendum, ad erudiendum in iustitia; ut perfectus sit homo Dei, ad omne opus bonum instructus. Væ nobis si timidos & ignaros habuissemus Patres; & væ illi animæ audaci, quæ se sine scientia necessaria, & sine studio scripturarum sibi & aliis satis scire præsumit. Usquequò imprudentes odibunt scientiam? Prov. 1.

Prov. 1.

III. PUNCTVM.

SIC igitur cavendum est ne scientia Virtuti præferatur, ut tamen scientia non negligatur; Cum non minus detrimenti virtus possit accipere ex neglecta scientia, quam ex nimio literarum studio: Sic itaque simul utrumque coniungendum est, ut alteri non obsit alterum, imò profit, & sese mutuo iuvent & foveant. Ex virtute scientia comparetur, & per scientiam virtus conseruetur. Robur accedat utrique ex utraque, dum per virtutem scientia conquiratur & exercetur, ac per scientiam virtus operatur & prævalet. Aptissimè Isidorus: *Tam vitâ, quam doctrinâ clarere deberet Ecclesiasticus Doctor, nam Doctrina sine vita arrogantem reddit, vita sine doctrina inutilem facit. Vbi tamen es*

De summo bono c. 36.

set contentio inter utramque, tūc planè cedat scientia, neque tempus aut locum virtutis vsurpet. Nam, ut ait S. Bonaventura, scientia pro virtute relicta postmodum melius per virtutem reperitur.

1. Tim. 4.

ATTENDE tibi & doctrina, ait Apostolus, insta in illis, hoc enim faciens & teipsum saluum facies, & eos qui te audiunt.

Ep. 81.

Hinc S. Augustinus, Sicut, inquit, per ignem & aquam tenenda est via, ut nec exuratur homo, nec demergatur; sic inter apicem superbiae & voraginem desidia, iter nostrum temperare debemus,

Vide 3.
par. disc.

40. pag.

1168. de
ordine.

sicut scriptum est, non declinetis neque ad dexteram, neque ad sinistram.

Præclare verò sanctus Bernardus de modo sciendi & fine, unde penè tota est scientiæ cum virtute coniunctio: *Ut scias*, inquit, quo ordine, quo studio, quo fine, quaque nosse oporteat. *Quo ordine*, ut id prius, quod maturius ad salutem; *Quo studio*, ut id ardentius, quod vehementius ad amorem; *Quo fine*, ut non ad inanem gloriam, aut curiositatem, aut aliquid simile, sed tantum ad edificationem tuam vel proximi. Sunt namque qui scire volunt eo fine tantum ut sciant, & turpis curiositas est; & sunt qui scire volunt, ut sciatur ipsi, & turpis vanitas est; & sunt qui scire volunt, ut scientiam suam vendant pro pecunia, pro honoribus: & turpis questus est. Sed sunt qui scire volunt ut adificent, & charitas est. Et item qui scire volunt ut adificentur, & prudentia est. Horum omnium soli ultimi duo, non inveniuntur in abusione scientiæ, quippe qui ad hoc volunt intelligere ut benefaciant.

Serm. 36.
in Cant.

SI sapientiam inuocaueris, & inclinaueris cor tuum prudentia: tunc intelliges timorem Domini, & scientiam Dei inuenies, quia Dominus dat sapientiam, & ex ore eius prudentia & scientia.

Pr. 2.



COMMVNIS SANCTIS CONFESSORIBVS NON PONTIFICIBVS.

Sint lucernæ ardentes in manibus vestris. Luc. 12.

VERITAS

VERITAS PRACTICA.


Quantum cuique est Vigilantiæ, tantum Virtutis & meriti.

RATIO EST, Quia ordinariè loquendo, tantum cuique est Virtutis & meriti, quantum sibi vim facit.

Sed quantum cuique est Vigilantiæ, tantum sibi vim facit.

Ergo & tantum est illi Virtutis & meriti. Quæ sanè consideratio multum valere debet ad commendationem Vigilantiæ.

I. PUNCTVM.

 VOD lucernæ illæ ardentes, quæ à Domino commendantur, Vigilantiæ significant; quanta sit in se illa Virtus, & quanta fuerit in sanctis Confessoribus, quantumque inde eluxerint, & progrediendo per tres perfectionis vias ad supremum eius gradum peruenerint, vide si vacat in meditatione ad id declarandum instituta. Veritas verò Practica quæ inde deducitur, & quam hic solum spectamus, tanti est momenti & ponderis, quanti res ipsa quam continet, nempe Virtus in actu, vel in habitu, de utroque enim intelligi potest: *Tantum scilicet esse unicuique virtutis & meriti, quantum erit vigilantia, seu animi vigilantis ad virtutis exercitium.*

Ratio verò quæ affertur, aperta est & sæpe alibi agitata, quòd tantum cuique est virtutis & meriti, quantum sibi vim facit, vt appetitum, seu partem hominis inferiorem subiciat rationi, & rationem Deo. In hac enim subiectione & subordinatione partium hominis, totius humanæ vitæ consistit ordo, cui constituendo deseruit tota virtutum connexio. Certè Virtus à Clemente Alexandrino non aliter definitur, *quàm concinna & congrua animi affectio, quæ per totam vitam rationi subijcitur.* L. 9. Poed. c. 13.

Ipsæ quatuor præcipuæ & Cardinales Virtutes, ad quas cæteræ Morales referuntur, non aliâ magis de causâ dicuntur esse necessariae, quàm vt istam subiectionem faciant vel conseruent. Vnde non tantum sic dictæ putantur Cardinales, quòd sint

præcipuæ; sed quod iis veluti Cardinibus, animâ suis in quatuor potentiis aperiatur Bono, quod est conforme & conueniens rationi, & claudatur Malo, quod est disconueniens. Sicque ad vnamquamque potentiam continendam & perficiendam sunt institutæ, vt Prudentia resideat in intellectu, Iustitia cum duabus aliis in voluntate: sed Fortitudo irascibili continendo deseruit, sicut Temperantia Concupiscibili. *Nihil autem perfectionis vsquam acquisita, quod in istis virtutibus non sit*, ait S. Prosper, & alibi fuse monstratum ex SS. Patribus, atque ex ipsa re, totam perfectionem referri ad illam partium seu potentiarum animæ subiectionem, quæ sicut fieri non potest sine virtutum exercitio, ita nec virtutes exerceri sine illa subiectione, & sine quadam vi illata homini ad illam efficiendam.

Qualis enim virtutis actus esset, si non subiceret appetitum rationi? An posset ille actus esse ordinatus, dum animus inordinatus esset? At nonne tum inordinatus est animus, cum appetitus non subest rationi? Vbi ergo in illa inordinatione virtus? Planè oporteret virtutem animi tam esse inordinatam, aut profus inutilem, si non subiceret appetitum rationi, quàm verum est tum inordinatum esse animum, quando non subest rationi appetitus. Sed virtutem esse inordinatam aut inutilem, nec ipsæ aures ferre possunt. Manet ergo virtutis exercitium consistere in illa subiectione faciendâ, & tantum esse cuique virtutis & meriti, quantum sibi vim facit ad illam subiectionem aggredendam & continendam. *Sic regnum cælorum vim patitur, & violenti rapiunt illud.* O quale motuum violentiæ sibi inferendæ.

II. PUNCTVM.

SED quantum cuique est vigilantia, tantum sibi cum diuina gratia vim facit, & tantum subicit appetitum rationi, & rationem Deo.

Ista enim subiectio tam rationabilis est, & ad eam efficiendam tot rationes nos mouent, vt si aduertat animus, nec vt solet, abripiatur à se ipso, aut indormiscat ratio, planè appetitum domet, ne ab illo dometur. Hoc est enim quod solum excusamus in lapsibus nostris quotidianis, non aduertebam, non cogitabam, quasi diceretur, non essem lapsus si aduertissem. Hoc

est etiam quod in Scripturis propterea tantopere commendatur, ut nobis attendamus, nobis inuigilemus, & ad singula quæque animum applicemus; quasi in hac vna vigilantia cura totum Rationis negotium esset positum, quasi hoc esset Virum esse. *Con-3. Reg. 2. fortare & esto vir*, inquit David moriturus filio suo Salomoni, *& observa custodias Domini Dei tui, ut ambules in viis eius: ut intelligas vniuersa quæ facis, & quocumque te verteris.*

Sic ipse Salomon sua scripturus Prouerbia, hunc sibi finem *Prou. 1.* proponit; *Vt detur*, inquit, *paruulis astutia, adolescenti scientia & intellectus*, ad singulas scilicet dirigendas actiones ex rectæ rationis & legis æternæ regula. Quod identidem repetens his & similibus sententiis; *Sapientia*, inquit, *callidi est intelligere* *Ibid. 14.* *suam.*

Quid quod ipse Dominus, ipsa incarnata Sapientia, nihil in suis præceptis repetit frequentius, nihil inculcat vehementius quàm verbis, quàm parabolis, quàm exemplis, quàm hoc vnum: *Vi- Marc. 13.* *gilate, videte, vigilate; quod autem vobis dico, omnibus dico, vigilate.* Et quod magis mireris, cum ipse in horto, seu monte Oliuarum adesset præsens suis illis tribus discipulis, quos socios suæ tristitiæ sibi ascuerat; *Vigilate*, inquit, *& orate, ut non intretis in tentationem*: Quasi apertè diceret, non satis illis esse, quod adesset præsens, nisi etiam vigilarent: si tamen vigilantiam adhiberent, nihil prorsus damni à tentatione futurum, adeo potens est vigilantia.

Certè sanctus Ioannes Chrysostomus non dubitauit asserere minorem gratiam cum hominis vigilantia plus effecturam, quàm si maior adesset gratia non ita vigilantia. Quod luculentè confirmat exemplo Salomonis & Iobi, quorum ille cum tam multis, quas à Deo consecutus est, gratiis miserè periit, quia non sibi satis attentè vigilauit; hic autem in media gentilitate constitutus, solo rationis lumine, non quidem sine gratia, sed longè impari, quantum saltem ad externa auxilia, sese contra vniuersas dæmonis vires seruauit, quia scilicet sibi semper præsens aderat, quia, ut ipse ait, *verebatur omnia opera sua, sciens quod Iob 9. & Deus non parceret delinquenti; Et semper quasi tumet super se fluctus* *31.* *timeret Deum, & pondus eius ferre non posset*; Id est, dum cogitaret se habiturum Deum offensum, si se impatientiæ daret; sese continuit, ne Deum haberet offensum: sicque sibi aduigilans.

nullum aut exiguum inordinati animi signum dedit. O quantā vis vigilantiae, cum diuina gratia ! O quanta mentis incuria, quā sic sibi non vigilat !

III. P V N C T V M.

QUANTVM ergo cuique est vigilantia, tantum est Virtutis & meriti ; Quia tantam sibi quisque vim facit ad subiiciendum Rationi appetitum, quantam ad id affert curam & sollicitudinem, ex qua subiectione appetitus, tota est Virtus & omne meritum. *Vos autem curam omnem subinferentes*, inquit S. Petrus, *ministrare in fide vestra virtutem, in virtute autem scientiam* : Et quæ plura prosequitur de singulis virtutibus, quæ ab illa cura procedunt : Tūc verò pergens ; *Cui enim*, inquit, *non præsto sunt hæc, cæcus est & manu tentans*. Quasi diceret : Totum est à vigilantia ; Si cui virtus ita est comparata & acquisita, ut præsto sit ad omne opus, inde est quia ille oculatus & vigilans fuit ad crebros virtutis actus exercendos. Si cui verò non præsto est virtus, non aliunde est, quàm quod is veluti cæcus fuit, & minimè vigilans ad rationis ductum & Gratiae.

Atque hinc mystica illa repræsentantur animalia, plena oculis antè & retro, in circuitu & iatus, id est, in ipsis oculis alij sunt oculi, ut qui vigilant magis adhuc aduigilent, sicut qui iusti & sancti sunt, magis adhuc iustificentur : Vnde est illud Apostoli : *Enigilate iusti, & nolite peccare* ; Id est, tantum adhibete vigilantiae, quantum necesse est, ad omne prorsus peccatum euitandum ; vel potius quantum nouæ in dies adhibueritis vigilantiae, tanto minùs peccabitis ; Et tantò maior fiet vobis accessio Iustitiae seu virtutis & meriti.

Nihil ne te ista mouebunt ad maiorem vigilantiam ? Nihilne te illud Christi Domini, *Esto vigilans ; NISI I vigilaueris, veniam ad te, tamquam fur, & nescies quā horā veniam ad te*. Nonne omni hora potest venire ? Nonne ergo omni hora vigilandum, ne te non vigilantem reperiat ? Nonne qui furem timet, eo cautiùs vigilat, quo certò scit in id furem maximè vigilare, ut incautum ipsum adoriatur & spoliet ? *Illumina Domine oculos meos, ne unquam obdormiam in morte, nequando dicat inimicus meus, prauulsi aduersus eum*.



COMMVNIS OMNIBVS
SANCTIS, ORDINIS RELIGIOSI
FVNDATORIBVS.

Mortuus est Pater eius, & quasi non est mortuus: similem enim reliquit sibi post se. Ecclef. 30.

Laudemus Viros gloriosos & Parentes nostros in generatione sua. Ibid. 44.

VERITAS PRACTICA.

Virtutum Patris nostri Gratia, non sermonibus exprimenda est, sed operibus comprobanda.

VERBA sunt S. Maximi de sancto Eusebio Vercellensi, Hom. 2. de S. Eusebio. quorum sensus non est, reticendam esse sermone laudem illius Sancti, quem laudat, cum ipse sibi pugnantia diceret: sed potius quia illum maxime laudandum putat, sic à suis laudari vellet, ut nihil de eius laudibus detraheretur: si verò tantum sermone laudaretur & non operibus, multum de eius laudibus detractum putat. *Vnde, inquit, non sermone sed operibus, comprobanda est virtutum eius gratia.*

AT QV E hinc Veritatis proposita Ratio est, Quia sic à suis præcipue Fundator Religiosi Ordinis laudandus est, ut quod est præcipuum in eius laude, non decerpatur.

Sed si tantum sermonibus & non operibus laudaretur, quod præcipuum est de eius laude, decerperetur.

Ergo non sermonibus tantum, sed operibus est laudandus.

I. P V N C T V M.

EX multis quæ de hoc argumento habentur in Meditatione Communi sanctis Religiosi Ordinis Fundatoribus, pauca hæc ad Veritatis propositæ declarationem excerpisse sufficiat: Primum est, maximam ex fundatione ordinis colligi eorum gratiam, virtutem, & meritum. Secundum deinde est, præcipuam inde mereri gratitudinem & laudationem à suis. Tertium denique, sic esse laudandos, ut quod est præcipuum in eorum commendationem & laudem, non reticeatur. Quis hæc non probet? Quis Religiosi Ordinis filius suum laudare Parentem nollet? Quis in eius laude quod præcipuum est & quod maximè facit ad Religiosi instituti & Sancti Institutoris commendationem dissimulari veller? Nonne præuaricari diceretur ille, qui coram populo Panegyricum sancti Patris aggressus, leuia quædam & vulgaria tantum expromeret, suppressis aliis, quæ vel maximè celebranda erant & ponderanda?

Heb. II.

Iac. 5.

Non est quidem in immensum efferenda laudatio, ut adulationis aut amplificationis oratoriæ speciem præ se ferat; sed neque est ita constringenda, ut quod ad Dei gloriam & Auditorum ædificationem dici potest, taceatur. Vide Ecclesiasticum, ut abundè laudat suos quosque præstantes viros. Lege Apostolum ad Hebræos, ubi eosdem antiquos Patres satis effusè commendat: Sic & consequentes anni Sanctorum vitas & illustriora facta, piè & religiosè venerati sunt. *Ecce beatificamus eos qui sustinuerunt*: Percurre aliquid mente aut etiam ore, quod in honorem Sancti profundas, & de quo hodie familiarem sermonem habeas.

II. P V N C T V M.

SED si tantum sermonibus exprimeretur eius laudatio, & non operibus comprobaretur; quod præcipuum est in eius laude, decerpatur.

Illud enim est præcipuum in aliquo commendando quod maximè id attingit, propter quod præcipuè commendatur. Certum est autem sancti Ordinis Fundatorem à suis maximè hoc

nomine coli, quia eorum Pater est & Institutor: vnde sequitur quòd quidquid spectat ad hanc institutionem, maximè spectat ad Institutorem; Et quòd Institutum est nobilius aut sanctius obseruatum, certe & Institutoris gloria nobilior, & laus illustrior. Nam licèt propriè vita filiorum vitam patris non attingat, & merita vtrorumque ita personis definiantur, vt vnusquisque quod gessit siue bonum, siue malum, id secum portet: si tamen spectes communem hominum sensum, & humanam æstimationem, eamque à ratione non abhorrentem; facile iudicabis, probatos filiorum mores in Patris gloriam redundare, aut eorum degenerem vitam in eiusdem confusionem & ignominiam quandam refluere. Vnde aperte Sapiens, *Confusio patris est de filio indisciplinato*; Viuit enim Pater in filiis, & licèt mortuus, *quasi non mortuus, similem enim reliquit sibi post se*. In cuius scilicet similitudine ita viuat, vt si sancto Patri filius sit similis, sanctus in filio Pater habeatur; aut si filius dissimilis, certe ne quid filio simile dicatur de Patre: hoc saltem dicetur, non representari nec commendari Patrem in filio, & proinde quod est præcipuum in eius laude, decerpatur.

Neque verò id tantum ex vulgi aut hominum opinione, sed ex ipsius sancti Patris Fundatoris, atque adeo ex ipsius Dei sensu id certissimum, quòd si eorum mens & sententia quæreretur, quâ re præcipuè commendari vellent in terris, Sanctos Religiosorum Ordinum Institutores: responderent haud dubiè, illâ potissimum, quæ peteretur ab instituti obseruantia & constanti Religiosorum disciplina. Cùm enim in Creatione talis instituti nihil aliud spectârint, quàm diuinam gloriam & animarum salutem ac perfectionem, quæ inde sequebatur ad perpetuam posteritatem: Quid aliud desiderare modò possint, quàm quod ipsi primo intenderunt? Quâ re vna magis glorificari & gaudere possint, quàm si quod instituerunt, sanctè obseruetur? Aut quid tandem de sua glorificatione, de suo accidentali gaudio, & de sua commendatione magis detrahi & decerpi dicent, quàm si quod maximè cupiebant, detrahatur?

Gaudium meum & corona mea, dicebat suis Apostolus: *Quæ est enim nostra spes, aut gaudium, aut corona gloriæ, nisi vos?* Quamdiu scilicet integritatem vitæ seruabant; vnde si deflexissent in prauitatem, certè illud gaudium & coronam gloriæ Apostolo

Ecclesi. 22.

Ecclesi. 30.

*Phil. 4.
1. Thess. 2.*

Phil. 3.

detraxissent. Vnde & ipse idem: *Multi ambulant, quos saepe dicebam vobis, nunc autem & flens dico, inimicos crucis Christi, &c.*

Ah quale probum Patri à Filio, quando inimicum se eius rei facit, quam præcipuè dilexit Pater! Et quale probum à Patre filio! Ne me voces Patrem tuum, quia te filium non noui: cum te per Crucem & disciplinam religiosam in Christo genuerim, quam tu excussisti.

III. PUNCTVM.

Serm. de
Mart.
Tom. 3.

Gal. 2.

Is. 46.

1. Cor. 1.

Is. 51.

ERGO non sermonibus tantum, sed longe magis operibus à Religioso filio, sanctus Pater est laudandus: Cum alioquin præcipuam eius laudem laudando decerperet; quod certè impium & non ferendum. Nam si sanctus Chrysostomus sermonem integrum de hoc argumento instituit, & more suo grauitè & Christiane probarit, non esse laudandos Martyres, aut esse imitandos: quanto magis id verum esse oportet de sancto Patre à filiis, aut non laudando, aut imitando. Nam, vt ante dixi, imò vt dicit Apostolus, alioquin præuaricari est; *Si quæ destruxi, inquit, iterum hæc ædifico, præuaricatorem me constituo.* At tu qui laudando religiosissimum Patrem, destruis Sermonem mundum & mundana, quæ conculcauit: nonne & ea rursus ædificas, cum re & opere te mundanum ostendis? Nonne ergo & te præuaricatorem constituis? *Redite præuaricatores ad cor; VIDETE vocationem vestram; videte Patrem vestrum: Attendite ad petram vnde excisi estis, & ad cauernam laci de qua præcisi estis; Attendite ad Abraham Patrem vestrum: & ad Saram quæ peperit vos, quia unum vocaui eum, & benedixi ei, & multiplicauimus eum.*

Thren. 4.

*Q*UOMODO obscuratum est aurum! mutatus est color optimus! dispersi sunt lapides Sanctuarij, in capite omnium platearum! Filij Sion inclyti, & amicti auro primo, quomodo reputati sunt in vasa testea, opus manuum figuli. Candidiores Nazaræi eius niue, nitidiores lacte, rubicundiores ebore antiquo, Saphyro pulchriores. Denigrata est super carbones facies eorum, & non sunt cogniti in plateis.

Hæc melius unusquisque de se dicat aut cogitet, quàm de aliis.



COMMVNIS SANCTIS VIRGINIBVS.

Prudentes acceperunt oleum in vasis suis, cum lampadibus. Matth. 25.

VERITAS PRACTICA.

Virgo sponsa Christi aut est vigilans ad integram perfectionem, aut non est Prudens.

RATIO EST, Quia in magnis captis, & iam foeliciter pene ad summum perductis, non est prudentis deficere ob exiguos qui supersunt sumptus.

Sed si Virgo sponsa Christi non esset vigilans ad integram perfectionem, ita deficeret.

Ergo aut erit vigilans, aut non erit prudens.

I. P V N C T V M.

ADVERTE primò quòd quidquid dicitur de Virginitatibus, id tam competit Viris, quàm Virginitas aut castitas his verè conuenit.

Secundò alias esse virgines mundi, alias esse virgines sponsas Christi, vt fusè habetur in meditatione de hoc argumento. Summa est, virginem sponsam Christi eam esse, quæ virgo est, vt sponsa Christi sit, & vt illi propius adhæreat, & ei soli placeat. *Respondi vos uni viro, virginem castam exhibere Christo.*

2. Cor. 11.

Tertiò denique talis virgo, & sponsa Christi non modo debet inuigilare suæ puritati corporali, sed & ipsius animæ, vt 1. Cor. 7. *sit sancta corpore & spiritu, & mundans se ab omni inquinamento*

2. Cor. 7.

carnis & spiritus, perficiat sanctificationem in timore Dei, vt ait Apostolus.

Hæc est Veritas modò consideranda, quæ duplici ex capite deduci & declarari potest; Primò quatenus virgo seu anima, sponsa est Christi, perfectioni seu perfectissimæ integritati corporis & animæ vacare debet, quia hoc exigit sacrum istud Conubium, vt sponsa tota sit sponsi, sicut sponsus totus est sponsæ; Et tanto firmiùs simul cohæreant, quanto magis similes & conformes inter se erunt. Et hoc videtur Christus Dominus inuissè cum virgines illas repulit à sacris nuptiis, quibus deerat in vasis oleum. *Columba mea*, inquit Sponsus, *perfecta mea*: Nihil illi desit oportet, quin vere dicat; *Dilectus meus mihi, & ego illi qui pascitur inter lilia*.

Cant. 6.

Ibid. 2.

Sed quia de hoc capite ac genere perfectionis supra dictum est; Secundum, vnde veritas proposita deducitur, & quod est paulo attentius expendendum, hoc scilicet est, quod alioquin virgo, sponsa Christi, non esset ex prudentibus, sed ex fatuis virginibus, nisi ad integram perfectionem vigilaret. Non est enim prudentis sed fatui deficere ab incæptis gloriosis propter exiguos aliquos sumptus qui supersunt, quique in manu sunt, postquam in illis iam plurimas expensas feceris, facillimèque ad exitum perduceres si quod est in manu, esset in opere; id est, si quod commodè posses, id velles exequi; Nam duplex ibi jactura est deploranda: Illa scilicet quâ inchoatum est opus; Et ea quâ imperfectum relinquitur. Est porrò sapientis sic ante initium operis præuidere finem, vt nisi videat posse perficere, non illud incipiat, aut si præuidit posse, réque ipsâ possit perficere quod incipit, non desistat. Hoc Christus Dominus duplici similitudine grauitè æquè ac planè demonstrat. *Quis enim*, inquit, *ex vobis volens turrim edificare, non priùs sedens computat sumptus qui necessarij sunt, si habeat ad perficiendum, ne posteaquàm posuerit fundamentum, & non potuerit perficere, omnes qui vident, incipiant illudere ei, dicentes: quia hic homo cepit edificare, & non potuit consummare? Aut quis Rex, &c.* Certè si ille ridendus vt imprudens & fatuus, qui non potuit consummare quod cepit: quanto magis ille, qui nolit, licèt possit.

Luc. 14.

II. PUNCTVM.

SED si virgo sponsa Christi non esset vigilans ad integram perfectionem, ita deficeret ab inceptis, ob exiguum aliquid quod superest post tam multas impensas, quas iam ultrò & sponte fecit.

Expende primò, quale sit opus, quàm arduum, quàm difficile, quàm gloriosum, vouere aut consecrare Deo virginitatem, pudicitiam aut castitatem, sicut Religiosi, vel Sacerdotes, aut alij sese Deo dicant. Quàm multæ simul virtutes concurrunt ad illud coeleste consilium suscipiendum! quanta è coelo gratia! quanta ex animo virtus! quot luctæ, quot certamina, quot victoriæ de mundo, de carne, de dæmone! Martyrij genus est nobilissimum perpetua illa castitas, siue ob rei dignitatem, siue ob religiosam consecrationem, siue ob difficultatem. Assume, inquit S. Hieronymus, *scutum fidei, lorica m iustitiæ, galeam salutis, procede ad prælium: habet & pudicitia seruata martyrium suum.* Et S. Augustinus. *Sicut Castitas, Veritas, & Iustitia Christus est: sic & ille qui eis infidiatur, persecutor Christi est: Ille vero qui castitatem in aliis & seipso custodire voluerit, Martyr erit.* GENVS Martyrij est, inquit S. Bernardus, *illo quo caduntur membra, horrore quidem mitius, sed diuturnitate molestius.*

Ep. 8. de Virg.

De Honest. mul. c. 13.

Serm. 30. in Cant.

Eò igitur cum virgo iam venerit, cum sublime hoc & Angelicum viuendi genus, omnibus abdicatis oblectamentis, suscepit: nonne dicenda est expensas iam fecisse plurimas & præcipuas ad illius mysticæ turris ædificationem, seu ad perfectionis finem attingendum? Quod vero superest, quid tandem potest esse? Vanitas fortè aliqua expurganda, sollicitudo forte intentior in pietatis exercitiis, linguæ moderatio, aut quid simile, cui si virgo paululum aduigilaret, facillimè rem totam conficeret, & perfecta esset. Desinat verò vigilare, tum certe vana erit & superba, indeuota, intemperans linguæ & oculorum, vno verbo imperfecta. At nonne hoc est deficere propter exiguum nescio quid, post tot impensas factas? Tanta passa erit sine causa! *cur non recogitat dicens; Cui laboro, & fraudo animam meam bonis? Quid prodest ei, quod laborauit in ventum? Quamdiu enim vana, aut indeuota erit, non attinget perfectionem, cui tamen attingendæ tantum contulerat, quanta est virginitas*

Gal. 3.

Eccl. 4. & 5.

cæteræque eius comites & administræ virtutes.

III. PUNCTVM.

Rom. 79.
in Matth.

ERGÓ certissime non est prudens, sed fatua illa virgo, quæ in re tam exigua deficit, qualis est modica vigilantia; cuius tamen defectu totum perit, quod prætendebat, aut certe non consummatur & perficitur. Cum enim perfectio prætendatur, illaque desit ob defectum vigilantiaæ necessariae, certè non consummatur opus; & est virgo deridenda vt fatua. Neque aliter quinque illæ Virgines sic denominatae sunt à Sponso, quàm quia, vt ait S. Ioannes Chrysostomus, *maiori certamine superato, in faciliore totum perdiderunt.* Quid est enim pecunia illa, vel diligentia quæ ipsis oleo conquirendo erat necessaria, si compareretur cum virginitatis gloria? & tamen defectu illius pecuniae, vel diligentiaæ, Virginitatis effectum non obtinerunt. *Nescio vos*, inquit Sponsus, licet virgines essent, licet haberent lampades, licet expectassent ad ianuam, licet pulsarent fores, & miro sponsi affectu tenerentur: quia tamen non vigilantes, non attentæ lampadibus suis quæ erant sine oleo, nesciuntur, repelluntur, & irridentur.

O quàm illud potens & efficax ad perpetuam sui custodiam & vigilantiam! Est enim naturale & supernaturale, quatenus id humanæ naturæ est, velle prudentem haberi, aut certe nolle fatuum reputari: & id gratiaæ ac supra naturam, sic velle à Deo commendari, aut nolle ab eo reprobari. Ergo in id Anima mea quantum tibi est naturæ & gratiaæ, in id totum confer & collige, vt vigiles ad omnia, nihil per incuriam aut desidiam negligas: non indormites, ne statim postea dormias, sicut istæ virgines fatuæ dormitauerunt, & dormierunt, id est, à leui culpa, seu negligentia in grauiorem ceciderunt.

Tob. 3.
De disciplina
& habitu
Virginu.

Denique sicut in materia Castitatis, sic vbique vigila, sic certa, sic vince pro integritate perfectionis, vt possis vniuersim cum Sara Coniuge Tobiaæ dicere: *Mundam seruauimus animam meam ab omni concupiscentia.* Sic apte S. Cyprianus ad virgines; *Quorum*, inquit, quod sublimior gloria, maior & cura est. Flos est ille Ecclesiastici germinis &c. Neque inanis hæc cautio est, & vana formido, quæ ad salutis viam consulit, quæ Dominica & vitalia præcepta

Virgo sponsa Christi aut est vigilans ad omnem, &c. 539
custodit, ut quæ se Christo dicauerint, & à carnali concupiscentia re-
cedentes tam carne quàm mente se Deo vouerint, consumment opus
suum magno premio destinatum.



COMMVNIS SANCTIS NON VIRGINIBVS.

Mulierem fortem quis inueniet? Prou. 31.

VERITAS PRACTICA.

Quâ ratione difficile est Mulierem fortem inuenire, eâdem facile est inuentam prædicare.

RATIO EST, Quia idcirco difficile est Mulierem fortem inuenire, quòd ut mulier fortis inueniatur, multa sunt illi expugnanda quæ difficile est expugnare.

Sed si semel ea expugnauerit, sicque fortis inuenta fuerit, tum valde laudanda est Mulier, atque inde propterea facile est illam prædicare.

Ergo quâ ratione difficile est mulierem fortem inuenire, eâdem facile est inuentam prædicare, seu summis efferre laudibus: Unde discas quid sit verè laudabile in muliere: quid sit quod fortem & laudandam efficiat.

I. PUNCTVM.

QUÆ Sancta Mulier colitur, non dubium quin fuerit fortis, cum ad sanctitatem nonnisi fortitudine perueniri possit. Quod autem tam fortis fuerit, ut ad eam sanctitatem peruenerit quæ in ea colitur, inde potissimum laudanda

est & prædicanda : Sicut enim tam rarum est mulierem fortem inuenire, vt sapiens quærat, quis eam aliquando inueniet ; ita, si quæ fortis inuenta fuerit, inde profectò est tanto magis laudabilis, quanto est rarior. Atque ipsâ illâ ratione, quâ difficile est fortem inuenire, eâdem facile fiet, vt inuenta laudetur & prædicetur ; seu quod idem est, vt quam sit laudabilis, demonstretur. Quæ quidem Veritas modò expendenda sic vniuersim declaratur, vt particulatim sanctæ Mulieri de qua celebritas siue sermo instituitur, accommodari possit, & vnicuique fructum inde colligenti qui potest elici.

Age ergo quanam est ratio, cur sit tam difficile mulierem fortem inuenire ? Hæc nempe est, quòd vt fortis inueniatur, multa sint illi expugnanda, quæ difficile est & perrarum expugnare. Est enim omnis mulier, atque illa præsertim quæ viro nupsit, naturali propensione tam variis affecta & addicta mundi rebus, vt humanum affectum inde extrahere, sit quàm difficile. Nisi autem affectu suo sit valde temperata, nunquam fortis censebitur ; cum in eo potissimum sita sit fortitudo, vt affectionibus animi resistatur, quibus qui cedit, non nisi mollis, infirmus, & imbellis habetur.

Quanam porro sint illæ res, quibus nupta Mulier seu mater familias communi sexus inclinatione, seu particulari sui ductu ingenij afficiatur ; tu ipse vide quantæ sint, quæ naturalem appetentiam vehementius excitent, & agnosce illas omnes esse, quæ illius animum implicant ; diuitiæ abundantes, domus ampla, supellex varia, vestes excultæ, ornatus omnis, viri summa autoritas, natorum gratia non vulgaris, & quicquid demum oculis placet, hoc totum mulier appetit ; & in hoc appetitu tota conquiescit & tota viuit, nisi totis viribus sibi resistat, nisi secum pugnet, vt appetitum rationi & gratiæ subiciat. Quod quàm sit difficile, vel ex eo patet quòd sibi ab aliis resisti vix vniquam patiatur mulier, quanto minùs à se, si potest sibi indulgere quod cupit ? Quod si non potest, eò acrius cupiditas excitatur, amor in dolorem transit, & dolori resistere non est minor difficultas, quàm amor. Hinc aptè Sapiens, *Mulier si primatum habeat, contraria est viro suo, & si non ambulauerit ad manum tuam, confundet te in conspectu inimicorum* : Quia scilicet cupiditate solâ mouetur, qua etiam ceteros mouere vellet potius, quàm ab ea

Et difficile est mulierem fortem inuenire, sic facile est, &c. 541
dimoueri. O quàm sapienter Apostoli toties iterant & commen-
dant, *ut sint mulieres subiectæ viris suis.*

*Ephes. 3.
Coloss. 3.
1. Per. 3.*

II. P V N C T V M.

SED si semel difficultates illas expugnauerit Mulier, sicque fortis
inuenta fuerit, tum valde laudanda est, atque inde propterea fa-
cile est illam predicare.

Certè si sit inde valde laudanda, facile est etiam, inde illam
predicare, seu suis ornare laudibus. Quod inde autem sit valde
laudanda, tam manifestum est, quàm Virtutem esse laudabilem,
& quàm apertè pater seipsum vincere, virtutem esse præcipuam,
totque eximios esse virtutum actus, quot variæ occurrent sui
vincendi occasiones & difficulates. Atque hîc si à thesi ad hypo-
thesim seu ad particularem alicuius mentionem descendas, ex-
poni possunt, quæ & quanta habuerit peruincenda, quâ fortitu-
dine peruicerit, quibus inde virtutibus eluxerit, & quibus pro-
pterea laudum encomiis sit euehenda. Neque enim duntaxat vi-
rium quod à cupiditate proficiscitur, hac fortitudine impeditur,
sed illa cupiditate semel repressâ, omne genus boni in domesti-
cos & externos exercetur. Nam sicut vbi malè mulier, nihil pe-
ius; sic vbi bene, nihil melius. Vide Ecclesiastici caput vicesi-
mum quintum, & vicesimum sextum, in quorum altero, quan-
tùm de muliere nequam, tantùm in altero de muliere sancta fuse
differitur. Percurre etiam quæ de forti muliere Prouerbiorum
trigesimo primo capite referuntur, & quanta inde virtutum &
laudum seges colligi posset, facile est intueri.

*Ecclesi. 25.
& 26.*

Prou. 31.

O quantum nobis bonorum quotidie deperit nostrâ negli-
gentiâ! En mulier in re sua domestica, in lana & lino, in omnî
denique manuum suarum opere, sanctitatis cumulum sibi col-
legit, nos ne toto anno id consequemur, quod vno illa mo-
mento!

III. P V N C T V M.

QUA ratione igitur difficile est mulierem fortem inuenire, eâ-
dem facile est inuentam predicare, Cum difficultas inue-
niendæ fortis proueniat à difficultate fortitudinis exercendæ

contra naturalem sexus propensionem in omnium rerum cupiditatem, quæ cupiditas quando etiam reprimatur, tum fortis apparet mulier, & tantis propterea digna est laudibus, quantæ res erant concupiscibiles quæ fortiter vel omnino contemptæ sunt, vel ad solum vitæ vsum ex virtutis præscripto reservatæ.

In Officio
Eccles.

Regnum mundi & omnem ornatum seculi contempsit propter amorem Domini mei Iesu Christi. Hoc est esse mulierem fortem; hoc est esse tam præclarum, quàm rarum; hoc denique est quod tam facile de inuenta prædicatur, quàm difficile est inuenire de qua prædicetur.

Num. 31.

Hinc fortassis Israelitæ, cùm de acceptis donis insigniores Deo gratias referre vellent, vel offensum sibi efficacius propitiare Numen, nihil excogitarunt accommodatius, quàm vt Deo præsentarent, quod cupiditatem habendi solet vehementius, seu in viris, seu præcipuè in mulieribus excitare: nempe periscelides & armillas, annulos & dextralia, ac murenulas, quæ cuncta Deo magnificè ab ipsis oblata commemorantur, non tam ex rei oblata pretio, quàm ex Offerentium animo, qui re admodum carâ & desiderabili sese viriliter denudabant.

Esth. 14.

Eximia est in hoc genere, Temperantia & Fortitudo Regina Esther, quæ sic de se, Domino. *Tu scis, inquit, necessitatem meam, quod abominer signum superbia & gloria mea, quod est super caput meum in diebus ostentationis meæ, & detester illud quasi pannum menstruata, & non portem in diebus silentij mei.* Si sic Iudæa mulier, quid Christiana? Numquid hæc Regina surget in iudicio contra mundanam animam, quæ à Christo edocta mundum contemnere, minùs contemnit quàm illa Christi prorsus ignara? Recte admodum sanctus Gregorius Nazianzenus: qui ex omnibus humanis & terrenis bonis hoc vnum verè bonum reperiebat, quod in his haberemus quæ propter Deum possemus deferere, & nos ei simul cum bonis dare.



I N
DEDICATIONE
ECCLESIAE.

Pauete ad sanctuariū meum, ego Dominus. Leuit. 26.

VERITAS PRACTICA.

In loco sacro non pauere, pauendum est.

RATIO est, qui vbi se Deus magis praesentem & magis colendum prabet, ibi non pauere, pauendum est.

Sed in loco sacro se Deus magis praesentem & magis colendum prabet.

Ergo ibi non pauere, pauendum est, & profectò cauendum.

I. PUNCTVM.



*Q*UOD ait Sapiens, *Nemini spatium peccandi de-* *Ecc. 15.*
disse Deum, de locorum ac temporum spatio
perinde posse intelligi, nemo ignorat, qui sciat
Deum non minus esse immensum quàm æter-
num. Sicut enim æternitate sua Deus omnium
spatia temporum sic comprehendit vt nullum
fit tempus quo non sit Deus, & quo colendus non sit, ita prorsus
immenitate sua, locorum vastitatem omnium sic complectitur,
vt nullus sit omnino locus, in quo non subsistat, & vbi non sit ti- *Act. 17.*
mens. In ipso enim viuimus & mouemur & sumus.

Verum his non obstantibus, sicut certos quosdam dies desi-

ZZZ

gnauit, quibus insigniùs coleretur; ita quædam sibi loca sacrat & dedicat, in quibus singulari cultu vult timeri. *Custodite*, inquit, *Sabbata mea, & pauete ad sanctuarium meum*. Videsne vt loci simul ac temporis venerationem iungat? Audisne verò quo exprimat verbo loci cultum quem exigit? *Pauete*, inquit, ad illum quem mihi dico confecroque locum. Quis crederet ita esse tremendum, nisi Deus ita ipse imperaret? Quis autem dubitet sic ipso edicente? Et tamen quàm id paucis persuasum est? quàm multi è contra sunt, qui non modo non pauent aut tremunt in locis sacris sed vix à profanisea discernunt, neque minus audacter & libere quidquid animo libuerit, & cogitant & effutiunt, quàm si sacer & sanctus non esset locus, aut quàm si nulla sanctitatis eius esset habenda ratio.

Quamobrem illud in primis ad praxim, quando de locis sacris agitur, intelligendum est, quo sint à nobis cultu frequentandi. Sicut verò ille cultus non alio potuit expressius verbo designari quàm *pauoris*, ita quàm sit debitus ille pauor vix aptius repræsentari queat, quàm si dicatur, *In loco sacro non pauere, pauendum est*. Sic enim cum diuina gloria non modo res nostra coniungitur, sed in re nostra damnum æquè proponitur ac emolumentum, id est, damnosum æquè demonstratur, non pauere; ac pauere, fructuosum: Quod genus persuadendi plurimùm valet.

Sic vtrumque porrò demonstratur. Vbi se Deus magis præsentem ac colendum præbet, ibi non pauere, pauendum est; Quæ quidem in propositione tria videntur distinctè perpendenda. Primum, quid sit quòd Deus se in vno magis loco præsentem statuatur quàm in alio, cum sit æquè præsens in omnibus. Secundum, quid sit & quamobrem Deo præsentipauor ille concitandus? Ac denique Tertium, cur nisi tum pauetas, sit propterea magis pauendum.

De primo, non minor esse posset quæstio, cur dicatur Deus esse in loco: quàm cur dicatur in vno potius quàm alio? nam si propriè loqui velis, Deus nullibi est quàm in seipso; quapropter à sanctis Patribus dicitur illocabilis, incomprehensibilis, incircumscriptus, & non esse in loco, sed ipsum sibi esse locum. Sic inter alios S. Ioannes Damascenus. Quid est igitur cur non tantum esse in loco, sed vbique locorum & creditur, & ipse per Prophetam testatur: *Numquid non calum & terram ego impleo? dicit*

L. I. de fide
c. 16.

Ier. 23.

Dominus? Respondet, & acutè simul ac piè difficultatem soluti *L. 2. Mor.
c. 12.*
sanctus Gregorius. Ipse manet intra omnia, ipse extra omnia, ipse
supra omnia, ipse infra omnia; & superior est per potentiam, & infe-
rior per sustentationem, exterior per magnitudinem, interior per subti-
litate; sursum regens, deorsum continens, extra circumdans, inte-
rius penetrans; nec alia parte, superior; alià, inferior; aut alia ex par-
te exterior, atque alia manet interior, sed vnus idemque totus ubi-
que presidendo sustinens, sustinendo presidens, circumdando penetrans,
penetrando circumdans. Vnde superius presidens, inde inferius susti-
nens, & vnde exterius ambiens, inde interius replens; sine inquietu-
dine superius regens, sine labore inferius sustinens, interius sine exte-
nuatione penetrans, exterius sine extensione circumdans. Est itaque
inferior & superior sine loco, est amplior sine latitudine, est subtilior
sine extenuatione. Ac tandem paucis hæc omnia contrahens sic
concludit, dum per molem corporis nusquam est, per incircumscri-
ptam substantiam nusquam deest.

Quod & sanctus Ilidorus insigniter: Immensitas Diuina magni- *L. 1. de
summo bo-
no c. 2.*
tudinis ita est vt intelligamus eum intra omnia, sed non inclusum: ex-
tra omnia, sed non exclusum: & ideo interiorem vt omnia contineat,
ideo exteriorem vt incircumscripta magnitudinis suæ Maestate omnia
concludat.

Ex quibus Sanctorum Patrum dictis cùm pateat nihil repu-
gnare quod nullibi simul & vbique Deus dicatur esse propter
miros & diuerfos existentis agentisque Dei modos; sic plane fit
euidens, cur in vno prædicetur potius esse loco quàm alio, quia
videlicet in vno potius se præsentem exhibet quàm in alio. Quid
est se præsentem exhibet, nisi quòd maiora seu noua suæ præsen-
tiae simul & operationis signa ponit, aut alicuius monimenta be-
neficij, natiuæque bonitatis argumenta, quæ dum in vno signi-
ficantius præstat loco quàm alio, non se aliis propterea subtra-
hit locis, nec minus vbique præsens est, sed non est tamen ita
præsens nec tam aperto præsens modo, quàm vbi se adesse
& interesse nobis apertius manifestat. Et ad eum veniemus, in-
quit, & mansionem apud eum faciemus. VENIUNT scilicet cùm *Ioan. 14.*
se illic esse ostendunt; veniunt ad nos, dum venimus ad eos: veniunt
subueniendo, illuminando, implendo; venimus obediendo, intuen-
do, capiendo. Sic S. Augustinus. Vnde in coelo potius quàm in
terris esse Deus præsens dicitur, quia se illic indefinenter Beatis

Is. 66.
Ps. 113.

omnibus videndum ac fruendum per omnem exhibet æternitatem, ac propterea cœlum in scripturis vocatur eius Domus, eius tabernaculum & eius sedes. *Cœlum*, inquit, *sedes mea. Deus autem noster in cœlo.*

Gen. 28.

Pari quoque sensu dum in terris vnum designat locum, vbi aliquid singulariter operetur, & singularem operis sui velit à nobis haberi rationem, nonne tum in illo etiam singulariter dicens est esse loco? Nonne sic Iacob apertè loquitur: *Verè Dominus est in loco isto & ego nesciebam.* Nonne sciebat vbique Deum esse? Cur ergo dicit se nesciuisse quod in isto esset loco, nisi quia singulari quem ignorabat modo præsens illic aderat, quem vt cognouit, in has protinus erupit voces: *Verè Dominus est in loco isto*; quasi non illic ante, vel quasi non esset alibi, quia reuera nec ante nec alibi, tali erat modo, quo tum esse agnoscebatur; vnde & locum Iacob vocauit *Bethel*, id est, Domum Dei.

Ier. 7.

Sicut anima licet in toto sit corpore, magis tamen in capite vel in oculis residere dicitur, quia maiores ibi & insigniores sensuum præstat effectus; sic vbi se suaque Deus attributa vel Iustitiæ vel Bonitatis & Potentiæ notiora facit, ibi adesse potissimum denuntiatur, *Ego ego sum, ego vidi, dicit Dominus.*

Iob. 26.

Exodi 33.

Hebr. II.

Si à mortali homine sic videretur, quis non tremere, quis in eius conspectu non paueret? *cum columna cœli contremiscant & paueant ad nutum eius.* Sed infirmiores sunt oculi carnei. *Non poteris videre faciem meam, non enim videbit me homo & viuet*, ait ipse Deus Moyse, de quo Propheta sic Apostolus; *Inuisibilem tamquam videns sustinuit*, quasi diceret, satis Mosi fuit, & fidei nostræ satis esse debet ad omnem cultum inuisibili Deo tanquam visibili persoluendum, quod talem ille cultum à nobis exigit his ipsis signis, quibus sensibilem suam facit præsentiam. Atque hoc est secundum ex tribus propositum, quod explanemus, de affectu pauoris qui tunc loci & temporis singulariter Deo debetur. Certe non est in toto Terrarum orbe locus vbi Deus non sit summè colendus, sed tamen vt est Optimus sicut & Maximus, remittit ipse aliquid de illa summa veneratione cum interna tum externa, quam meretur & quam teneremur reddere, nisi indulgeret. At verò in illis locis vbi se magis præsentem indicat adeo non remittit de reuerentia sibi exhibenda, vt illam imperet, nisi reddatur. *Solue*, inquit Mosi, *calceamenta de pedibus tuis, locus enim in quo stas*

terra sancta est. Et paulo post cum descenderet Dominus super montem Sinai; *Constitues, inquit, terminos populo per circuitum, ibid. 19. & dices ad eos, caute ne ascendatis in montem, nec tangatis fines illius, omnis qui tetigerit montem, morte morietur.*

Licet igitur hoc vnum esset, quod in illis locis ubi apparet, ita religiose velit coli; nonne id sufficeret ad omnem ei cultum deferendum, sicut hoc vnum sufficit ad illum præcipua veneratione colendum certis quibusdam diebus, quia sic præcipit? Verum adde huic diuinæ ordinationi iustissimam causam & æquissimam rationem, quæ petitur à dignitate & Maiestate se manifestantis Dei, à Bonitate Beneficientis, à Potentia operantis, à Iustitiâ punientis, aut alia quauis perfectione, quam illustrius exhibet. Quanta putas eum veneratione dignum? quanto tum credis animi corporisque famulatu, religione, obsequio, Deum esse demerendum?

Quis non timebit te Domine? Hoc videlicet in Apocalypsi dicunt *Apoc. 15.* quibus insigniora quædam notificunt diuina opera; vnde in stuporem rapti dum mirantur quàm sit inde timendus Deus, simul admirantur si quis illum non timeat: sic enim pari affectu omnes, in vnum & idem conueniunt vt dicant: *Magna & mirabilia sunt opera tua Domine Deus omnipotens. Iusta & vera sunt via tua, Rex sæculorum, quis non timebit te Domine, & magnificabit nomen tuum?* Quasi dicerent, nullus est, ubicumque locorum sit, qui te sibi præsentem & operantem attentius cogitet, qui non illico timeat.

Atque hic timor qui ex Diuina concitatur præsentia talis est, vt non aliter aptius possit significari, quàm hoc pauoris nomine, qui singularis affectus est quo totus in se homo colligitur, vt se totum in diuinum impendat cultum; & cum se totum etiam impenderit, agnoscat se nihil præstitisse præ summa illa Maiestate quam Primores & Beatiores creaturæ non satis dignæ sunt venerari.

Sic Iacob ille vir Dei, qui dixerat, *verè Dominus est in loco isto, & ego nesciebam,* nonne statim in hunc transit affectum, cum statim scriptura de illo dicat *pauensque, quàm Terribilis est, inquit, locus iste! non est hic aliud nisi Domus Dei & porta cæli!* Mirum sanè si non paueret ad terribilis conspectum loci, sed magis mirum quod locus ille dicatur terribilis qui est Domus Dei & porta cæli! Quid de Purgatoriis aut aliis infernis locis diceretur acer-

bis, quàm quod terribilis illorum esset aditus & ingressus? sed aliud est esse terribilem horrore pænæ ac præsentia dæmonum, & aliud horrore sanctitatis ac diuinæ præsentia.

Iac. 2.

Dæmones contremiscunt, inquit sanctus Iacobus; numquid & ipsæ tremunt supremæ potestates? sed tam diuersus est vtrorumque spirituum tremor, quàm supremi distant ab infimis, quàm cælestes ab infernis, quàm Beati à damnatis. Sic in nobis aliud est tremere vel terreri propter solam pænam, & aliud propter solam offensam, siue propter solum Deum, à quo verearis te subducere, & in cuius conspectu apparere timeas, quòd non sis satis mundus & purus. Sic dicebat suis Mo-

Exodi 12.

ses, nolite timere, vti enim probaret vos venit Deus, & ut terror illius esset in vobis & non peccaretis. Quibus ex verbis duplex necessariò colligendus est timor. Nam & vetat simul & præcipit vt timeant ad aduentum siue ad præsentiam Dei; non timeant, in-

Hebr. 12.

quit, vt fugiant Deum; sed timeant vt eam colant. Sic expressè Apostolus postquam dixit, *non accessistis ad tractabilem montem & accensibilem ignem*, vt scilicet timeretis supplicia, sicutamen consequenter addit, *seruiamus placentes Deo cum metu & reuerentia; Etenim Deus noster ignis consumens est.* Quasi apertè diceret, non apparet quidem nobis Deus sicut olim in accenso & ardenti supra montem igne vt nos terreat & disperdat: sed tamen ignis est qui metu & timore quem vocat reuerentialem, sit timendus: aut certè licet occultus sit, non desinit illos tamen consumere qui non præsentem timeant.

Ex quo sane Apostoli dicto, quod tertium est declarandum, satis clarè innotescit, *non pauere pauendum est.* Velenim prorsus Atheum illum esse oportet, qui dum se magis præsentem Deus exhibet, non magis esse credat; vel omnino stupidum & impium, qui diuinæ signa præsentia non sentiat, aut nullo pietatis sensu moueatur. Qui ab igne recedit longiùs, non accendetur, aut qui accedit propiùs, consumetur. Sic illi planè, vel absunt à Deo longiùs, quem non esse præsentem credunt; vel audaciùs sese illi communicant qui nullo præsentis metu deterrentur. At nonne vtrumque pauendum est? Qui te adire nimis verentur, nesciunt mansuetudinem tuam; dicebat Augusto Cæsari quidam adulator: aut qui non satis verentur, nesciunt Maiestatem tuam. Nonne hoc verius inuerecundis illis qui nil timent, obiciat? Nec di-

cant sibi non esse liberum aut in sua positum potestate, moueri, pauere, & terreri ad præsentem Deum; Neque enim tam affectus sensibilis quæritur, quàm effectus rationalis, vt tum eo se componant modo quem diuinæ decet reddere Majestati, quæ se propterea præsentem reddit. An minùs illi possunt quod Babylonij, Persæ, & Medi, quibus Rex Darius imperauit, *vt contremiscerent* Dan. 6.
 & *pauerent Deum Danielis*? aut si æquè possunt, cur non æquè velint Christiani: Nonne id stupendum & pauendum? Patebit paulò pòst, etiam apertius. & 14.

II. PUNCTVM.

SED in locis sacris, nempe in Ecclesijs seu templis Deo dicatis ac consecratis, se Deus magis præsentem facit, maioraque suæ præsentia signa, Bonitatis Beneficentiæ, Potentiæ, Iustitiæ, caterarumque virtutum siue perfectionum monimenta constituit.

Quod primò quidem patuit in illa deserti parte, vbi Tabernaculum & quidquid ad diuinum spectabat cultum cœpit erigi & spectari: sic enim scriptura refert; *postquam omnia perfecta sunt,* Exodi vii.
operuit nubes tabernaculum testimonij, & gloria Domini impleuit illud: Nec poterat Moyses ingredi tectum faderis, nube operiente omnia & MAIESTATE DOMINI CORVSCANTE. Deinde verò pòst apertius etiam in templo Salomonis, dum Deo dicaretur, lic tum præsens adfuisse Diuinum numen refertur, *vt imple-retur Domus Dei nube, nec possent sacerdotes stare & ministrare pro-pter caliginem: complenerat enim gloria Domini domum Dei.* Tunc 2. Par. 52.
 Salomon ait, Dominus pollicitus est vt habitaret in caligine; ego autem 6.
 ædificaui domum nomini eius, vt habitaret ibi in perpetuum. Et post 7.
 multa: Cùmque compleisset Salomon, fundens preces, ignis descendit de calo, & deuorauit holocausta & victimas; & MAIESTAS DOMINI impleuit domum: nec poterant Sacerdotes ingredi templum, eo quod impleisset Majestas Domini templum Domini. Et nonnullis interiectis, lic ipse Dominus: *Oculi quoque mei erunt aperti, & aures meæ erectæ ad orationem eius qui in loco isto orauerit: elegi enim & sanctificaui locum istum, vt sit nomen meum ibi in sempiternum, & permaneant oculi mei & cor meum ibi cunctis diebus.*

Poterantne dari Diuinæ Præsentia testimonia certiora? atque hæc cum dicerentur & fierent, quo tempore templum Domino

dedicabatur, quis non videat quàm sit antiqua & religiosa tēplo-
rum dedicationis institutio? cuius cum festus etiam dies solenni
ritu Ierosolymis ageretur, ipse Christus Dominus interesse vo-
luit: & quam vocabant Encāmiorum celebritatem, sua cohōne-
stauit præsētia.

Nec sileri debet quod in libris Machabæorum refertur de quo-
dam Heliodoro qui cum impietatis pœnas in templo malè mul-
ctatus dedisset, non cessabat illam quam suo licet damno & pu-
dore senserat diuinam præsētia deprædicare, venerari & sus-
picere, eo quod, inquiebat, *in loco sit verè Dei quædam virtus; nam
ipse qui habet in calis habitationem, visitator & adiutor est loci illius.*
Sic ille palam profitebatur.

Quæ quidem potiori iure de nostris Templis Christiano more
solenniter dedicatis debent intelligi, vbi longè est aliud sacrifi-
cium, vbi Deus, vbi Deus ipse homo factus, sacerdos est & iuge
sacrificium incruentum, ratione cuius prædictum est à Propheta,
quod nostrorum maior templorum futura esset gloria quàm
templi Salomonici. *Spiritus, inquit, meus erit in medio vestrum,
nolite timere quia hæc dicit Dominus exercituum: adhuc vnum modic-
um est, & ego commouebo calum & terram & mare & aridam, &
mouebo omnes gentes: & veniet desideratus cunctis gentibus, & im-
plebo domum istam gloria, dicit Dominus exercituum. Meum est argen-
tum & meum est aurum dicit Dominus. Magna erit gloria domus istius
nouissima plusquam prima, dicit Dominus, & in loco isto dabo pacem,
dicit Dominus exercituum, Id est, omne bonorum genus, & præ-
fertim internorum ac spiritualium, quæ certè templo illi Ieroso-
lymitano quod vel à Zorobabele vel ab Herode restauratum est,
non ita planè conueniunt ac nostris modo Ecclesiis, vbi Deside-
ratus Ille gentibus nobiscum indefinenter adest vsque ad con-
summationem sæculi: completurque fideliter illud, quod ab alio
prænuntiatum fuit Propheta: *Dabit vobis Dominus panem arctum
& aquam breuem; & non faciet auolare à te ultra doctorem tuum; &
erunt oculi tui videntes præceptorem tuum, & aures tuæ audient ver-
bum post tergum monentis: hæc est via, ambulate in ea, & non decli-
netis neque ad dexteram, neque ad sinistram. Et contaminabis laminas
sculptilium argenti tui & vestimentum conflatilis auri tui, & disper-
ges ea sicut immunditiam menstruata. Egredere, dices ei, Nempe
omni profano ritui.**

Quod

Quod & alius Propheta palam fecit, cum sic Iudæis templum suum restaurantibus, Dominum loquentem refert: *Non est mihi voluntas in vobis & munus non suscipiam de manu vestra: ab ortu enim solis usque ad occasum, magnum est nomen meum in gentibus: Et in omni loco sacrificatur & offertur nomini meo oblatio munda, quia magnum est Nomen meum in gentibus, dicit Dominus exercituum, Id est, in omni terrarum tractu locus erit ad sacrificium oblationis mundæ mihi destinatus: Ego autem in illo magnificabor loco, siue per oblatum tale sacrificium, siue per gratias inde ac per reliqua Sacramenta tam vbertim & effuse profluentes, quàm erunt capaces hominum mentes ad eas recipiendas.*

Ibi fons ille patens promissus in ablutionem peccatoris. Ibi prapatus ille mōs Domus Domini in vertice montium, & eleuabitur super colles, & fluent ad eum omnes gentes. Et ibunt populi multi & dicent, *venite & ascendamus ad montem Domini, & ad domum Dei Iacob, & docebit nos vias suas, & ambulabimus in semitis eius. Ibi germen Domini est in magnificentia & gloria & fructus terra sublimis, & exultatio his qui saluati fuerint de Israel. Ibi piscina salutifera non vni per sanando, non in anno semel, non per Angelum commouenda, sed quoties quiuis agrotus, ô beneficium, ô præsentem diuinam manum; quoties quis sanari velit, promptiorem sentiet ipsius Dei sanantis manum quàm æger vulnus detexerit. Ibi aperta mensa, ibi Cana magna nunquam deficiens esurientibus. Ibi Iesus Christus heri & hodie & in secula, clamare nunquam cessat, si quis sitit, veniat ad me. Venite ad me omnes qui laboratis & onerati estis, & ego reficiam vos. Ibi Pater misericordiarum expectat filium prodigum; ibi eum in gratiam recipit, veste, annulo, conuiuioque excipit singulari. Illuc bonus Pastor perditam ouem refert; illic denique Cælum reseat pœnitenti & infernum claudit.*

Quid manifestius ad declarationem Præsentia? quid sublimius ad excellentiam Maiestatis? quid vtilius ad Bonitatis & misericordiæ largitatem effundendam? quid ad Potentiæ vim & operationem efficacius? cùm semper sensibilibus signis Sacramenta contineantur, & suū semper effectum habeāt, nisi quid à nobis obstat. Certè illic sæpe Christi visas imagines nulla humana depictas manu, sæpe ipsum Christum sese multis spectandum & colendum dedisse, sæpe olim ac modò etiam sat fre-

3. Dial.
6. 30.

quenter multa illic patrata miracula legimus & videmus. Sanctus quoque Gregorius quod suo contigit tempore refert *in magna serenitate aëris super altare Ecclesiæ nubem cælitus descendisse, suoque illud velamine operuisse, omnemque Ecclesiæ tanto terrore ac suauitatis odore repleuisse, ut patentibus ianuis nullus illic præsumeret intrare.* Sic ille ad verbum. Sed quantumcumque mira sint & stupenda quæuis prodigia, mihi nihil validius ad diuinam in templis credendam & colendam præsentiam, quàm quod Christiana fides docet de Sacramentis, quæ ibi quotidie conficiuntur, & de perennibus gratiis quæ inde ad nos omnes indefinenter fluunt.

3. Reg. 8.

Ergo ne putandum est, quòd verè Deus habitet super terram? si enim Cælum & cali cælorum te capere non possunt, quantò magis Domus hæc quam ædificauit? quasi diceret Salomon, non est dubitandum quin verè Deus habitet in hoc loco, cum tot ibi singularis suæ præsentia Bonitatis & prouidentia signa manifestet: sed id mirum quod ita velit ea manifestare; aut quod eâ manifestatione tam parum homines moueantur, ut nec debitum Deo cultum exhibeant, nec fructum pietatis reportent.

Ps. 5.

Non sic Dauid, non sic Regius ille Psalter qui non aliter se introiturum in templum affirmabat, quàm in timore Domini. *Introibo, inquit, in Domum tuam, adorabo ad templum sanctum tuum in timore tuo. QVOD magnum est præsidium procedentibus ad salutem, ait ibi sanctus Augustinus.*

III. PVNCTVM.

Quantum hinc igitur patet, locis sacris sacrum & debitum esse pauorem, tantum ibi non pauere, profecto pauendum est. Quia quidam Dei præsentis contemptus est, qui se propterea magis præsentem indicat, ut magis ibi timeatur; & quis sit ille timor, satis euidenter exprimit, cum expressè dicat, *Pauete ad sanctuarium meum;* pauete non corporali sensu sed spiritali, talem exhibendo cultum quem excitaret Diuina ipsa maiestas, si præsens oculis cerneretur, aut si quod patraret miraculū; aut sicut denique cum animus ad aliquod insolitum & stupendum spectaculum sic totus pauet & rapitur, nullâ ut aliâ re prorsus à spectando reuocetur. Sic planè sic attentum esse oportet, & affixum vel sacrifi-

cio quod peragitur, vel officio quod celebratur, vel orationi quam fundis, vel imagini quam reuereris, vel Christo quem adoras, vt ibi totus sis animo & corpore sic ad pietatem & venerationem compositis, nulla vt parte desis.

Hoc est pauere sicut iubebat Dominus, hoc est pauere non ad malum, sed ad bonum, sicut Propheta futurum prædixit in noua præsertim lege. *Pauebunt, inquit, ad Dominum, & ad bonum eius in nouissimo dierum.* Hoc est pauere, hoc est quod pij quique, quod Angeli, quod ipse Angelorum Dominus, dum oraret, pauebat, & toto se, contremiscebat, quantus quantus ille esset, toto se ipso, contremiscebat, dum oraret; sic enim habes, postquam *capit pauere & tedere, procidit super terram & procidit in faciem suam*, non tantum semel cum in horto Patrem orauit, sed *in diebus carnis sue*, inquit Apostolus, id est semper pro more suo, *preces supplicationesque ad Deum, qui possit illum saluum facere à morte, cum clamore valido & lachrymis offerens, exauditus est pro sua reuerentia.* Quæ certæ verba si accuratiùs expendantur, tam stupendam in oratio, Christi designant demissionem & quãdam velut trepidationem spiritus, vt te contra nil trepidare in conspectu Dei, prorsus stupendum sit & pauendum!

Quid, quòd modò dum hæc meditaris, vel dum in templo inambulas, aut sedes otiosus, aut negotia mente tractas, aut colloquia misces cum alijs; quid quod inquam, ipse Christus Dominus in altari factus hostia Deo Patri mactanda, tam demisso, tam humili, tam omni prorsus ex parte religioso se constringit modo! Tu verò, tu quises? tu peccator! tu tam multis obnoxius criminibus, tam multis addicendus supplicijs, tu non modò nil vereberis, nil pauebis! Sed neque tuam præfractam agnoscas audaciam? Plane id pauendum, sed miserando illo pauore quem minatur Deus, *Pavor & terror & laqueus super te.* Recordare zeli quem præ se tulit in templo, cum inde semel & iterum eiecit vendentes & ementes, dicens: *Domus mea, Domus orationis est.* Quanta putas animaduersione puniret, inquiunt sancti Patres, si inuenisset ibi risui vel vaniloquio vacantes, aut alij cuilibet vitio mancipatos? si enim ea quæ alibi liberè geri poterant, Dominus in domo sua temporalia negotia geri non patitur: quanto magis ea quæ nusquam fieri licet plus celestis ira merentur, si in ædibus Deo sacra- tis agantur?

Rom. 36.
in 1. ad
Cor.

Postquam vero Diuus Chrysostomus liberiores hanc Christianorum licentiam arguit, tum vehementius ad eam coercendam, & ad sanctum illum pauorem qui à nobis desideratur excitandum, sic pergit: *Nec enim tonstrina aut unguentaria taberna; Ecclesia est, aut officina forensis, sed locus Angelorū, locus Archangelorum, Regia Dei, Cælum ipsum. Quemadmodum igitur si cælum quispiam in angustum redactū illuc inducat, etiamsi fratrem, etiamsi Patrem videas, tamen præ stupore non alloquare; Sic nec hīs aliud quidquam quā sancta seruare decet.* Et nonnullis interiectis: *Nunc autem foro nihil differt, & si non sit temerarium dictum, fortasse nec scena ipsa; adeo prostitutis scortis petulantius, quæ hūc mulieres congregantur sese communt, & sine dubio non paucos hic sollicitant homines intemperatos. Si quis corrumpere matronam conatur, locum hunc maximè idoneum putat. Ah nimis vera verba! Rursusque alibi: Stat Sacerdos Dei orationem offerens cunctorum: tu autem rides, nihil timens, non contremiscens, non colligens te ipsum: & in aulam quidem regiam intraturus, & habitu, & oculis, & incessu, & in cunctis aliis componis & ornas temetipsum: huc autem ingressurus, ubi est aula regis, & talis, qualis cælestis est, rides!*

Hom. 15.
ad Hebr.

Ezech. 9.

1. Pet. 4.

Vide quid in hoc genere pecces, aut alios peccare videas, quos possis arguere. Iam ante pridem contra profanos in Templis ausus, lata est sententia, cum ex omnibus puniendis eos in primis Deus plecti velit qui grauius ibi deliquerint. *A sanctuario meo, inquit, incipite.* Cui quidem sententiæ satis apertè Princeps Apostolorum videtur subscribere, dum ait, *tempus est ut incipiat iudicium à Domo Dei.* Verum, non est satis, non peccare in templo, sed ne quidem illuc cum peccato, esset accedendum. Qua de re sequens est Veritas quæ præcedentem plurimū confirmabit.

AD HÆC OFFICII ECCLESIASTICI: DE HODIERNO FESTO, VERBA.

In gra-
duali Mis-
sa.

Locus iste à Deo factus est, inestimabile Sacramentum, Irreprehensibilis est.

VERITAS PRACTICA.

Ad sacrum locum, velut ad Sacramentum.

SENSVS & RATIO est, quòd sicut sacer locus, locus est à Deo factus, in quo præcipuè decenti colatur cultus, sic nos decet hunc ei cultum exhibere.

Sed nisi ad sacrum locum accedatur velut ad Sacramentum, talis ei cultus non exhibetur.

Ergo ad sacrum locum velut ad Sacramentum, non equali quidem ex causa, sed prope simili, prout dicebat David: Domum Ps. 92. tuam decet sanctitudo Domine; & prout in discursu declaratur.

I. PUNCTVM.

MVLTVM certè Dauidi debet Religio, quòd primus de Domo Dei construenda cogitarit, quòd magnificam idcirco cogitationem suscepit, atque ad illam cumulare perficiendam ingentes pararit sumptus, quos impendendos Salomoni reliquit filio. Sed meâ quidem sententiâ, plus est Dauidem nos diuinum coluisse cultum quem in templo seruaremus, quàm parasse sumptus in templi fabricam. Quid est enim templum sine diuino cultu? *Hac dicit Dominus exercituum Deus Israël: Bonas facite vias vestras & studia vestra, & habitabo vobiscum in loco isto. Nolite considerare in verbis mendacij dicentes, templum Domini, templum Domini est, quoniam si bene direxeritis vias vestras & studia vestra, & quæ plura prosequitur, quibus aperte indicat se sui cultum magis velle, sine templo, quàm templum sine sui cultu.* 1er. 7.

Quod nos autem David docuit, non illos tantum intelligo Psalmos, quos in Ecclesia non decantari peius esset, inquit sanctus Chrysostomus, quàm solem non lucere; sed ex multis illis Psalmis tres duntaxat volo versiculos, quibus totum pene cultum, quem nos in templis adhibere par est, comprehendit. *Domine dilexi decorem Domus tue & locum habitationis tue: hoc primum quo templo cultus redditur, decor loci siue omnium quæ* Ps. 25.

ad eum spectant locum. Deinde verò reuerentia quam sic exprimit: *Adorabo ad templum sanctum tuum in timore tuo.* Ac denique quod est præcipuum, sanctitas non loci tantum aut sacrarum rerum, sed personæ templum adeuntis, de qua sic pronuntiat. *Pf. 92. Domum tuam decet sanctitudo Domine.* Quod ego quidem dico esse præcipuum colendo in templis Deo, quia hoc præcipue Deus in his spectat. *Gen. 4. Respexit ad Abel & ad munera eius,* inquit scriptura de primo sacrificio, non ex muneribus Abel, sed ex Abele munera. *Ier. 11. Numquid carnes sancta auferent à te malitias tuas?* quasi diceret, nisi tu ipse sanctitati tuæ studeas, nisi tu ipse nolis malitias tuas, nulla loca, nulla sacrificia, nulla Sacramenta, quantumcumque sacra & sancta poterunt illas à te auferre. Ne aliò accedas animo.

Quod ita certè nobis est persuasum, vt nemo nisi desperatus audeat ad Sacramentum quòdvis accedere nisi cum animo respiciente qui lethali opponatur culpæ: neque enim aliter prodesset Sacramentum, imò & noceret, ac nouum esset peccatum accedenti cum peccato.

Non ita quidem affirmandum de accessu ad templum: non est dicenda noua esse culpa si cum culpa sacrum locum sicut si Sacramentum frequentares: sed hac posita differentia, Veritas est plurimum commendanda, quâ dicitur: *Ad Sacrum locum, sicut ad Sacramentum,* non ex tali necessitate, non ex æqualitate, non ex pari omnino ratione, sed ex simili quadam proportionem. Sicut si dicerem, accedendum esse pari sanctitate ad Cænam magnam quæ hîc in Sacramento sumitur, sicut ad illam quæ in Cælo percipitur; quis non videt sanctitatis disparitatem quæ ad vtramque necessario requiritur? Et tamen rectè id potest dici, dum rectè intelligatur non de omnimoda paritate. Sic plane de locis sacris, sicut dixit Dauid, *Domum tuam decet sanctitudo,* sicut semper intellexit Ecclesia, sicut denique sacer locus dicitur *Sacramentum*, vnde proposita veritas est deducta, quæ ex adiectis verbis, *Locus iste à Deo factus est,* sic declaratur.

Sicut sacer locus, locus est à Deo factus in quo præcipue decet colatur cultu, sic nos decet hunc ei cultum reddere. Cur enim à Deo factus esse dicitur, nisi vt à nobis ibi præcipuo colatur cultu? Nonne omnia fecit ille loca & spatia, sine quo nihil est factum? An putes sibi locum fecisse quasi palatium terre-

ni Regis cuius ambitu concludatur? cuius ornatu decoretur? cuius propugnaculis protegatur? Nonne ille est quem *calum &* 2. Par. 6.
cali cælorum non capiunt, vt ait Salomon, *& qui non in manufactis* Act. 17.
templis habitat, indigens aliquo, sicut ait Apostolus. Gentilium ista credulitas est, qui nihil humanum supra vel regium morem de Dijs suis cogitantes, illos credebant ita suis habitare in delubris, vt illic molliùs & tutiùs quam alibi requiescerent & tegerentur. At Deus noster cum sit Cœli & terræ Dominus, cum in se contineat omnia, cum nihil extra se prorsus ad beatitatem suam quærat, sibi suus est locus, sua domus, sua quies, sua tranquillitas; nec ipse sibi locum facit quasi loco indigeat, qui sibi vnus sufficit, & qui propterea *Saddaj* dicitur, id est, sibi sufficiētissimus.

Restat igitur finis ille propter quem locum faciat, vt studium eò tuum acrius excitet ad sanctiorem sui cultum, quò sanctior erit locus ab ipso propterea factus & electus, sicut sanctiora quædam sunt tempora quæ nos vehementius acuant. *Elegi enim* 2. Par. 7.
& sanctificaui locum istum, vt sit nomen meum & cor meum ibi.

At nonne decet talem loco, seu potiùs Deo, talem à nobis adhiberi cultum quem postulat? an poterit ibi cor tuum cum corde Dei esse, si non illi conforme fuerit, in eo præsertim sine propter quem ibi cor habet? Cur illuc Eum adis potius quàm aliò, nisi quia potius se vult illic à te coli quàm alibi? At quo vult etiam ibi coli cultu, cur non eum coles? Nonne si modus colendi Deum tam verè factus à Deo est quam ipse locus, tam verè decet modum seruare cultus quàm locum? Nonne hoc denique metuendum ne inde accidat quod suis exprobrat Dominus: *appropinquat populus iste ore suo, & labiis suis glorificat me, cor au-* Is. 29.
tem eius longe est à me, sine causa autem colunt me, vel vt ait Sanctus Math. 23.
Marcus in vanum me colunt. Quæ postrema verba sic à Christo Marc. 7.
prolata non leue pondus addunt sententiæ. Perinde enim est ac si Deus diceret, non sum ipse causa cur me colant, cum me non corde colunt & quo velim ab eis modo. Non mei gratiâ me conueniunt; nam simul aliud, quod requiro non negarent; ac proinde etiam frustra me colunt & in vanum, quia nullum aut certè modicum nec eum referunt suarum precum fructum quem retulissent. Vide in 3. p. fer. 4. hebdomada 14.

II. PUNCTVM.

SED nisi ad sacrum locum accedatur velut ad Sacramentum, cultus hic decens quem petit Deus, & quem decet nos ei reddere, non redditur, non exhibetur.

Non enim frustra nomen hoc Ecclesia de suis vsurpat templis, non frustra in altari, hoc est in sanctiori officio quod de hodierna festiuitate celebrat, postquam dixit, *locus iste à Deo factus est*, statim adiungit, *inestimabile Sacramentum, irreprehensibilis est*. Certè reprehensibilis esset iste loquendi modus, nisi quadraret, nisi conueniret rei de qua est sermo: Non conueniret autem nisi de Sacramenti nomine, seu potius de vi ac virtute nominis participaret aliquid sacer locus. Non esset, inquam, nec verè sacer locus dici posset Sacramentum, nisi Sacramentum inter & sacrum locum intercederet non leuis aliqua similitudo. Quod ita verum est vt licet nominis Sacramenti sit varia multiplexque significatio, vix tamen vlla sit quæ non sacro conueniat loco.

Triplex potissima reperitur quam hic obiter explanare non erit alienum. Prima est, qua serium & momentosum aliquid designetur, quod non passim diuulgari, sed secreto teneri debeat, & religioso silentio seu pia quadam ignorantia venerationem habeat. Sic Tobia duodecimo, *Sacramentum Regis abscondere bonum est*; & quarto Danielis: *omne Sacramentum non est impossibile tibi*. At quis nesciat in locis sacris siue dum consecrantur, siue dum sacra sunt, tam multa multum seria religiosaque fieri, quæ pene omnes latent, vt verè locus dici possit hoc sensu *Sacramentum*? Quid enim est quod Episcopus antequam templum sacrat, ingreditur, foris expectat, & clausas templi fores ipse suo baculo pastoralis pulsant & aperit? Quid, quod ingressus templum eodem baculo describit in pavimento consperso cinere, græcis & latinis literis, alphabetum? Quid quod parietibus Cruces certa imprimuntur forma, & sacro inunguntur oleo? Cur sit ibi mixtio quædam aquæ, cineris, salis & vini? Sacramenta sunt, secreta sunt quæ nos venerari magis decet quàm curiosius indagare. Sic sanctus Augustinus suis Neophytis seu Catechumenis: *Omnia, inquit, Sacramenta quæ acta sunt & aguntur in vobis per misterium seruorum Dei, exorcismis, orationibus, canticis spiritualibus, insufflationibus*

*Tract. de
Symbolo
ad Catech.*

insufflationibus, cilicio, inclinatione cernicium, humilitate pedum, Et quæ plura pergit ad sacri loci cum Sacramento similitudinem exprimendam.

Secundò, Sacramenti nomen vsurpatur pro ipsa rerum vniuersa mole quam Deus condidit, vt ex visibilibus inuisibilia, ex corporalibus spiritualia, ex terrenis cælestia, ex humanis diuina cognoscamus, iuxta illud Apostoli: *quod notum est Dei, manifestum est in illis, Deus enim illis manifestauit: inuisibilia enim ipsius à creatura mundi per ea quæ facta sunt, intellecta conspiciuntur; semperiterna quoque eius virtus & diuinitas, ita vt sint inexcusabiles; si videlicet non cognouerint nec amauerint inuisibilia quæ nosse poterant ex visibilibus.* Sic illos expressè Sapiens arguit: *Errauerunt & nescierunt Sacramenta Dei.* Rursumque paulò post; *Non abscondam à vobis Sacramenta Dei,* hoc est, ignota quæ rebus creatis Diuina Sapientia recondidit, & quæ inde ad vestram animorum vtilitatem possunt erui, faciam vobis manifesta. Quo in sensu quis non videt quàm aptè locus hic sacer dicatur Sacramentum; non quia tantum quod ait S. Augustinus, *quidquid in templis manufactis agitur, totum in nobis spiritali adificatione completur:* sed quia visibilis ipsa templi moles, velut moles vniuersitatis in se aliquid mystici continet, quo inuisibile, spiritale, & cæleste cognoscamus.

Videris quanta qualisque sit hæc structura? quàm multi simul compacti lapides? quàm diuersi diuersos in vsus compositi? Quàm sint alij demissi & alij sublimati? Quantis quosque necesse fuit tundi, secari, cædi malleorum ictibus, vt sic cohærent & suo quique consisterent gradu? Sic plane nos ædificamur, sic construimur, sic *tamquam lapides viuì* dicimur, siue in terris, siue in cælis constituti. In terris quidem vna simul fide, spe, & charitate coniuncti templum vnum siue Ecclesiam quæ vna est, in toto terrarum orbe, conficimus. In cælis verò charitate strictiori, & eadem vniti beatitudine longe felicius vnā in Domino seruamus vnitatem. *Etenim quod & ciuitas sursum sit, & Ecclesia & celebras,* inquit S. Ioannes Chrysostomus, *audi Paulum dicentem, accessistis ad ciuitatem Dei viuētis, Ierusalem cælestem, & Ecclesiam primitiuorum qui conscripti sunt in cælis & ad multorum millium Angelorum frequentiam.*

Sed quod Sacramenti vim ac virtutem præcipue connotat,

quamdiu mortales hic agimus, sic sumus antè poliendi, tundendi & parandi lapides, vt possimus in vnum conuenire; primò hic quidem charitate christiana, tum aliquando felicitate perpetua; sicut videmus lapides istos, non aliter quàm prout contusi sunt & *In Ps. 121.* præcisi simul inter se cohærent. Sic apertè S. Augustinus, *præcidū-*
drantur vt intrent in structurā sempiternam. Et alibi: quod hic fiebat, *Ser. 256.* quādo ista surgebant, hoc fit modò cū congregantur credentes in Christum: credendo enim quasi de sylua & montibus ligna & lapides præciduntur: cum verò catechisantur, baptisantur, formantur, tanquam inter manus fabrorum & opificum dolantur, collineantur, compaginantur. Ligna ista & lapides si non sibi certo ordine cohærent, si non se pacificè connecterent, si non se inuicem, cohærendo sibi, quodammodo amarent, nemo huc intraret. Et quæ plura prosequitur de charitate mutua, quæ sic tandem concludit: quod hic factum corporaliter videmus in parietibus, spiritualiter fiat in mentibus: & quod hic perfectum cernimus in lapidibus & lignis, hoc adiscante gratia Dei, perficiatur in corporibus vestris.

Sic alij sancti Patres sentiunt, eoque referunt quod de templo Salomonis scriptum habetur: *Domus autem cum edificaretur, de* *1. Reg. 6.* *lapidibus dolatis atque perfectis edificata est: & malleus & securis & omne ferramentum non sunt audita in domo cū edificaretur.* Hoc nempe est quod alibi dicitur de habitantibus cæleste tabernaculum quod describitur; *Absterget Deus omnem lachrymam ab oculis* *Apoc. 21.* *eorum & mors ultra non erit, neque luctus, neque clamor, neque dolor erit ultra, quia prima abierunt.* Quasi diceretur, prima illa sunt primò ferenda in terris, luctus clamor & dolor, antequam illò perueniatur, vbi nihil tale cernitur nec auditur.

Quod & vniuersa sentit Ecclesia, dum de vtroque loci ac temporis diuerso statu sic canit; *hic Margaritis emicant patentque cunctis ostia; Virtute namque præuia, mortalis illuc ducitur; amore Christi percitus, tormenta quisquis sustinet. Scalpri salubris ictibus, & tunfione plurima: fabri polita malleo, hanc saxa molem construunt; aptisque iuncta nexibus, locantur in fastigio.*

TERTIA denique Sacramenti significatio vulgarior simul & augustior, ipsa est quæ septem solis Sacramentis propriè conuenit, nempe vt sit signum visibile seu sensibile non modò aliquid aliud in se contentum significans, sed illud quod continet,

cum sit gratia sanctificans, sic illam conferunt gratiam, ut ipsa nos sanctificare dicantur Sacramenta. Quo in sensu præcisè considerato, manifestè quidem patet, quòd locus sacer non sit ita Sacramentum, quia non ita certam ex sese siue ex ordinatione sua communicat gratiam, quæ suum singularem & determinatum semper producit effectum. At verò tamen cum quivis sacer locus idcirco sit consecratus & à Deo factus, ut dum ibi Deus singulariter colitur, singularem & ipsi cultores inde referant gratiam quam ex alio non referrent loco: Quis neget hoc etiam postremo sensu dici Sacramentum? cum præsertim gratiæ quæ illic potiores conferuntur, signis quibusdam sensibilibus contineantur & exprimantur, in qua expressione ut diximus, tota videtur esse posita Sacramenti ratio?

Cum sint autem illa plura signa sensibilia, tum ad quinque potissimum referuntur, de quibus aptè S. Bernardus in primo quem de Dedicatione Ecclesiæ sermonem habet. *Quando, inquit, domus ista per manus Pontificum dedicata est Domino, propter nos sine dubio factum est, non solum qui presentes sumus, sed & quicumque usque in finem sæculi Domino sunt in hoc loco militaturi. In nobis proinde spiritualiter impleri necesse est, quæ in parietibus visibilibus præcesserunt. Et si vultis scire, hæc utique sunt, aspersio, inscriptio, inunctio, illuminatio, benedictio. Hæc utique in hac visibili domo fecere Pontifices, hæc & Christus assistens Pontifex futurorum bonorum inuisibiliter quotidie operatur in nobis. Primò siquidem aspergit nos hyssopo, ut mundemur, lauemur, dealbemur, dicaturque de nobis, Quæ est ista quæ ascendit dealbata? lauat, inquam, nos in confessione, lauat nos lachrymarum imbre, lauat sudore penitentia, magis autem lauat nos aqua illa preciosa, quæ de fonte pietatis, id est ab eius latere emanavit. Aspergit nos hyssopo quæ humilis herba est & pectoris purgativa: aqua sapientia salutaris, quæ est timor Domini, initium sapientiæ & fons vitæ: etiam condimentum salis admiscens, ne sit insipidus timor sine spe, sine deuotione. Non solum autem sed inscribit digito Dei, in quo eiciebat Dæmonia, haud dubium quin in Spiritu sancto. Inscribit, inquam, legem suam non iam in lapide, sed in tabulis cordis carnalibus, propheticam implens promissionem, quæ se pollicitus est ablatum cor lapideum, & carneum cor esse daturum, id est, non durum, non obstinatum, non Indaicum; sed pium, sed mansuetum, sed tractabile, sed deuotum. Beatus quem tu erudieris Domine & de lege tua docueris*

eum. Beati, inquam, qui docti & memores sunt mandatorum eius sed ad faciendum ea. Alioquin scienti bonum & non facienti peccatum est illi; Et servus sciens voluntatem Domini sui & non faciens plagis vapulabit multis. Vnde necesse est ut unctio spiritualis gratia adiuvet infirmitatem nostram, observantiarum & multimode penitentia crucis devotionis sue gratia leniens: quia nec sine cruce sequi Christum, & sine unctione crucis asperitatem ferre quis posset? Hinc est quod multi abominantur & fugiunt penitentiam, crucem quidem videntes, sed non etiam unctionem. Vos qui experti estis, ecce scitis quia verè crux nostra inuncta est, & per gratiam spiritus adiuvantis, suavis & delectabilis est penitentia nostra, & ita dicam, amaritudo nostra dulcissima. At postquam unctio gratie huius praeceperit, iam lucernam suam Christus non ponit sub modio sed super candelabrum: quia tempus est ut luceat lux nostra coram hominibus, & videant opera nostra bona & glorificent Patrem nostrum qui in cælis est. Iam verò benedictionem quidem expectemus in fine, quando aperiet manum suam & implebit omne animal benedictione. Nam in quatuor præmissis merita constant, in benedictione sunt præmia, in benedictione tota complebitur gratia sanctificationis, quando iam in domum transibimus non manufactam, æternam in cælis.

Ex quibus sancti Patris verbis cùm evidenter pateat, gratias illas quæ in loco sacro conferuntur, sensibilibus significari signis, ac proinde rationem continere Sacramenti, quid restat, nisi ut qua sanctitate acceditur ad Sacramentum, accedatur ad sacrum locum, cum sit eadem non solum nominis, sed & rei quædam similis ratio: siue positivum quod aiunt bonum, siue negativum spectes? Cur enim non nisi sanctè & purè adeuntur Sacramenta? Nonne quia sic exigit cultus divinus qui Deo redditur in usu Sacramentorum, & nostra utilitas in recipienda Sacramenti gratia, quæ non nisi à puris recipitur? At nonne est eadem prope ratio de sacris locis? nonne sic adeuntur ad reddendum divinum cultum, & ad nostram utilitatem, seu ad referendas inde quas postulamus gratias? Nonne ad hunc utrumque finem si non omnino necessaria, saltem ita decens & opportuna videtur eadem sanctitas, ut nulla quidem possit decentior, sed & nulla inferior debeat adhiberi?

Esto non imperarit Deus, ut quo imperio & quo iure iussit afferri sanctitatem ad Sacramentum, sic ad sacrum afferretur lo-

cum : an idcirco non est adhibenda ? Semperne trahendi sumus ad debita nostra persoluenda grauioris metu supplicij ? Numquamne duci nos sinemus quo filios decet , pietatis ac obseruantia liberali motu ? Timesne plura persolvere quàm Deo debeas , cui cum dederis omnia , plus ei debes quod illa receperit , quàm ille tibi quod dederis ? Affer quantumuis sanctum & decentem cultum in Ecclesia , profectò mirum si fuerit satis colendo tantæ Maiestatis Deo , quem non satis digni sunt colere qui sunt digniores in cælo Spiritus : Tu tamen ex illa tenuitate tua non times etiam detrahere , quod vnum erat dignius nempe sanctitatem & puritatem animæ ? Quid quæris in Dei domo , si non quæris Dei cultum ? Quid quæris in Dei cultu si non quæris Deo placere ? At quomodo te placitum Deo putas in peccato ? aut quomodo peccatum tolles sine illa ipsa sanctitate qua Sacramentum adis ? *Lauamini, mundi estote, auferre malum cogitationum vestrarum, & if. uenite.* Nonne his inuitaris ad sacrum locum sicut ad ipsum Sacramentum , nonne his saltem decet vocibus obsequi ?

Quod si dicis te tuam etiam in Domo Dei salutem quærere , ceteraque tibi opportuna vitæ præsentis ac futuræ subsidia ; Veni sanè tua quaesiturus ; sed an putas illa tam certò reperies non gratus & acceptus Deo , sicut si gratus esses ? An nescis quòd qui promissit se suas aures aperturum orantibus in loco sacro , dixit peccatoribus ; *cum extenderitis manus vestras, auertam oculos meos If. i. a vobis, & cum multiplicaueritis orationem, non exaudiam.* An ignoras quod mortale tuum peccatum longe est grauius , longe Deo magis odiosum , & tibi perniciosius quàm originale Infantis nondum baptizati : nam illud tuum est actuale & voluntarium in teipso , tua est culpa , tua malitia. Et tamen ille infans quando in templum Deo præsentandus offertur , non vltra primum effertur templi aditum , quin sacris tingatur aquis , quin peccati labe purgetur , quin illa denique sanctitate quæ domum Dei decet , decoretur , quia non placeret alioquin Deo sibi suo in templo præsentatus infans , nisi prius esset natali culpa purus. Tu verò impie , non vna , non aliena culpa , sed & tuis & multis & grauibz maculatus peccatis , audebis illam ipsam Dei domum ingredi ? nec vereberis sacra ipsa & tremenda penetrare adyta ? & dum caput aperias , dum genu flectas & aliquid ore promas , tu satis decenti cultu Deum putabis colere ? ô te inconsultum !

Ioan. 4.

Ps. 50.

Dic fodes, quem tu facis Deum? an externo duntaxat intentum cultui? nec internis nostri cordis vacantem motibus? An putabis sine corde corpus sufficere Deo decenter colendo? quid est autem cor adhibere nisi cor sit purum & expers illius maculae, quæ cor inuisum Deo facit? An nescis quod dixit Christus, *Venis hora & nunc est quando veri adoratores adorabunt patrem in spiritu & veritate: nam & pater tales querit qui adorent eum in spiritu & veritate, Spiritus est Deus, & eos qui adorant eum, in spiritu & veritate oportet adorare.* Quibus ex verbis si quis inferret solo spiritu non etiam corpore Deum colendum, malè inferret; sed peius etiam sentit qui solo corpore non etiam spiritu cultum Deo diceret exhibendum, aut qui se spiritum putaret adhibere nisi rectus esset: aut qui se rectum habere spiritum crederet, nisi prius cor sibi mundum procuraret. Sic enim ordinate David precabatur *cor mundum crea in me Deus, & spiritum rectum innoua in visceribus meis.* Vbi sanctus Gregorius. *Vide, inquit, ordinem, primò cor mundum, deinde spiritum rectum, Propheta à Deo requirit. Prius enim abrenuntiandum est tibi omni peccato, & omnis à corde vitiorum feditas eliminanda, ut omne quod agitur aut dicitur, eo purum in conspectu Dei ac lucidum appareat, quòd ex bonæ intentionis origine quasi de puro quodammodo fonte manat. Scriptum est enim, bonus homo de bono thesauro profert bona, & malus homo de malo thesauro profert mala.* Quod sancti Doctoris dictum si de omni actione, de omni tempore, ac de omni loco potest intelligi, quantò magis id verum est de actione illa, de tempore, ac de loco quibus præcipue Deum intendas colere. Nam si nusquam Deus colitur nisi colentis pura sit intentio; nec sit pura intentio, nisi sit prius cor mundatum: quanto minus colitur Deus in illo loco qui tantum factus est ut mundo corde colatur.

Eccl. 4.

Non est itaque tantum decens ille Dei cultus, sed non est Dei cultus, nisi sit ille decens, quem idcirco dicimus illi similem quo ad Sacramentum accedimus, ut sic apertius intelligatur, quis ille sit, & quàm nullus decens absque illo, sit alius. Hinc quod ait Ecclesiastes, *Custodi pedem tuum ingrediens domum Dei*, sic Chaldaea reddit, *ne venias plenus peccatis ante Dominum.* Vnde & ibi addit Sapiens, *multò enim melior est obedientia quàm stultorum victima qui nesciunt quid faciunt mali*; hoc est, qui antequam Deum adeant, non recogitant peccata sua pœnitentes, sic se stultos esse produnt,

quia non agunt quod agunt, non colunt Deum quem præ se ferunt colere: multòque meliùs & veriùs Deum colerent abstinendo peccatis quàm victimas offerendo, vel peccata prius deplo-
rando quàm se Deo vel quidquid aliud in templis offerant.

III. P V N C T V M.

ERGO ad sacrum locum sicut ad Sacramentum, quocumque sensu vox ista sumatur, dum sublit etiam ille sensus qui declaratus est, non quasi pecces si cum peccato accedas ad sacrum locum, sicut peccares accedendo ad Sacramentum, sed quia sic sacrum decet locum, sic decet finem propter quem locus est sacer, sic decet Dei cultum quem sibi Deus optat ibidem exhiberi, sic decet nostram erga illum pietatem, sic decet nostram circa salutem animæ curam ac providentiam. *Ecce tabernaculum Dei cum hominibus, & habitabit cum eis, & ipsi populus eius erunt, & ipse Deus cum eis erit ipsorum Deus.* *Apoc. 21.* Ecce vox magna quam audiuit Ioannes de Throno Dei, ecce quo modo Deus habitat & conuenit cum hominibus, nempe in Sanctitate & decentia, nam expressè de sancta Ciuitate Ierusalem quam tum idem vidit Apostolus, sermo est, & quam ait *paratam sicut sponsam ornata viro suo.* Quæ qualis illa sit Ciuitas, & qualis eius ornatus, non exprimitur, sed hoc vnum affirmatur quod quæcunque sit illa, sancta est, & ornata quàm decenter: atque vt sic sancta est, tum declaratur esse *tabernaculum Dei cum hominibus.* Certè hoc dignum quod paulò attentius consideretur. Quadruplex reperitur in scripturis Ciuitas Ierusalem quæ sit tabernaculum Dei, secundum quadruplicem scripturæ sensum, & huic quadruplici ciuitati sanctitas tam apprimè conuenit, vt non sit aliter tabernaculum Dei quàm prout sancta est. Prima ex sensu anagogico, calum est seu *Cælestis* *Heb. 12.* Ierusalem, quæ vox expressa est Apostoli. Quàm sit porro verè tabernaculum Dei cum hominibus & quàm verè sancta sit illa ciuitas, clarius est quàm vt magis illustretur: *non intrabit enim in eam aliquod coinquinatum.* *Apoc. 21.* Secunda ex sensu allegorico, Deiparæ Virginis vterus est in quo *Verbum caro factum est & habitauit in nobis,* vel ipsa Christi humanitas in quo *Diuinitatis omnem plenitudinem inhabitasse corporaliter,* ait Apostolus. *Col. 2.* De quo vtroque tabernaculo quàm sit sanctum, vel hoc vno constat versiculo, *sanctifi-* *Ps 45.*

cavit tabernaculum suum altissimus. Tertia ex sensu tropologico seu morali, est anima Iusti, quæ hoc ipso quo sancta est sanctificante gratia quæ lethali noxæ opponitur, dicitur habitaculum
 Ephes. 2. & templum Dei. *Sicut dicit Deus, quoniam inhabitabo in illis, & inambulabo inter eos, & ero illorum Deus, & ipsi erunt mihi populus: propter quod exite de medio eorum & separamini, dicit Dominus, & immundum ne tetigeritis & ego recipiam vos.* Quarta denique ex literalis sensu est Ecclesia, non modo illa quæ dicitur Congregatio fidelium, sed ipse sacer locus ubi fideles congregantur, de qua illud Apostoli perinde usurpatur, quod Timotheo suo commendat, *ut scias quomodo oporteat te in Domo Dei conuersari quæ est Ecclesia Dei viui.* Sic disertè Cornelius ex S. Ioanne Chrysostomo, cuius hæc verba sunt ad hunc Apostoli locum: *Alludit ad Bethel de qua viso ibi Domino, Iacob dixit, verè non est hic aliud nisi Domus Dei & porta cæli; & ad tabernaculum templumque Iudaorum quod Ecclesia typus fuit.* Et pergens de Apostolo dicere, quod in primis nostrum spectat scopum; *Simul, inquit, tacite admonet omnes fideles ut reuerenter & sanctè se gerant in Ecclesia cogitantes se viuere & versari, non in aula Regis sed in domo Dei, adeoque in oculis ipsius Dei Optimi Maximi.*

Nonne hoc est non modo dicere ciuitatem aut tabernaculum Dei cum hominibus esse Ecclesiam seu sacra hæc loca; sed hæc ipsa etiam debere esse sancta sanctitate personarum, sicut iam sancta sunt sanctitate Consecrationis & sanctitate rerum quæ ibi peraguntur?

Est enim notanda triplex illa sanctitas quæ templis conuenit. Prima quæ dicitur relatiua, quatenus Deo sacrata sunt, cui quid-
 Leuit. ult. quid consecratur, sanctum est, ut patet ex Leuitico. Quod & expressè de templis Dominus contra Phariseos: *va vobis Duces cæci*
 Matth. 23. *qui dicitis, quicumque iurauerit per templum nihil est; qui autem iurauerit in auro templi, debet.* Stulti & cæci! quid enim maius est, aurum an templum quod sanctificat aurum? quasi diceret, longe maior est ratio dicendi templum esse sanctum quàm aurum, cum aurum non sit sanctum nisi ex templo cui seruit. Deinde verò est sanctitas rerum omnium quæ in sacris tractantur locis, nihil ut agatur vitiosum, nihil profanum, nihil non approbatum & permissum, cum alioquin Dominus diceret: *Auferte ista hinc, & nolite facere Domum Patris mei, domum negotiationis.* Denique sanctitas est personarum

sonarum quæ se ad templum conferunt, quæ non ita quidem præcise est necessaria, sicut diximus, ut qui forte non sint in ea, quam vocamus, sanctificante personas gratia non possint templum ingredi, nec suas preces fundere, solis id enim interdictum Excommunicatis, vel qui aliis Ecclesiæ tenentur censuris; sed quæ ita tamen est opportuna & decens, ut quantum agnoscis ibi esse tabernaculum Dei cum hominibus, quantum ibi optas Deum colere, & de rebus tuis cum ipso agere, tantum tibi expediat sanctitatem illam habere, quæ sola vera est sanctitas, & qua sola verè sancta, & parata & ornata est Ciuitas illa Ierusalem, quæ tabernaculum Dei cum hominibus esse prædicatur.

Recole quod iam de cælo, de Deipara, & de anima iusti dictum est, qua sanctitate scilicet cælum esset sanctum, qua sanctitate Deipara, qua iusti anima, quid videtur? Nonne illa sanctitas est quæ mortali saltem repugnat noxæ? cur porro, nisi quia sic ista decet Domum Dei sanctitudo, quæcumque sit tandem ista Dei domus, sic vniuersim sentiendum, *Domum Dei decet ista sanctitudo*, non relatiua, non extrinseca, sed vera & solida, qualis est illa quæ nos sanctificat. Nonne id agnoscis? Putasne quemquam posse cælum ingredi, aut cælum esse Dei domum cum peccato? Non putas opinor, aut si qui fortè opinentur id posse fieri, nemo tamē est qui non affirmet, id non decere. Quod de sanctissima ipsa Virgine matre, sanctus Anselmus expressè ait, *non ea quidem necessitate fuisse sanctissimam, quasi de peccatrice parente iusta proles nasci nequinerit; sed quia decebat non ex alia quàm mundissima Virgine Deum nasci.* Non poterat certe Christi humanitas non esse sancta quæ tabernaculum erat Diuinitatis ita sibi vnitæ ut non alia subsisteret quam diuina hypostasi, satis tamen Apostolo fuit ad eius sanctitatis commendationem dicere, quod *talis decebat ut nobis esset Pontifex, Sanctus, innocens, impollutus, segregatus à peccatoribus.* Cur non ista igitur decentiæ ratio tibi sufficiet in adeundis templis? Nonne credis & profiteris hanc Ecclesiam cuius hodierna est dedicatio, singulari quodam modo Domum Dei esse, sicut ceteras quas diximus Dei Domos? cur non eandem igitur credes decere sanctitatem, cum de omni generatim domo Dei sit dictum, quod eam decet sanctitudo? Vel si hoc credis, cur ingrediens Ecclesiam non illam affers sanctitatem? Nam cum sit personæ non loci sanctitas, de qua hîc modo agitur, neq;

L. de Conc.
Vir. c. 38.

Hebr. 7.

hæc aliter sanctitas loco conueniat aut applicetur quàm prout persona locum attingens fuerit sancta, profecto non est aliud dicere quod Ecclesiam decet talis sanctitudo, quàm dicere, quod te talem decet afferre sanctitatem quando Ecclesiam ingrederis.


Sic sancti Patres quando dicunt tempus ieiunij vel cuiusquam celebrandæ festiuitatis decere sanctitatem, quid aliud dicunt, quam decere nos esse sanctos illo quo ieiunamus vel festum agimus tempore? Neque enim alia est propriè temporis aut ieiunij sanctitas quam personæ ieiunantis. Vnde sanctus Chrysostomus, *Hom. 3. ad pop.* *honor ieiunij non ciborum abstinentia, sed peccatorum fuga.* Quod & aptè S. Leo, *Excellens*, inquit, *super omnia Passionis Dominicæ Sacramentum purificatis corporibus & animis celebremus.* *Serm. 4. de Quadr.* Quia quidem sancti Patris sententia nihil ad confirmandam Veritatem propositam, concludendumque discursum dici opportunius potest. Vides enim vt Dominicæ Passionis tempus vocet *Sacramentum*, non ea certe proprietate quâ septena dicuntur Sacramenta, nam & excellens super omnia vocat Sacramentum, quod de solo Christi Corpore fas est pronuntiare. Sed nouerat ille Vir magnus, nouerat sacris temporibus atque locis hanc etiam Sacramenti vocem competere, quæ visibili signo suas etiam significarent & contine- rent gratias; atque hæc inter Sacramenta Tempus Dominicæ Passionis excellere, quia maiorem scilicet rectè dispositis animis conferret gratiam. Quid est verò *rectè dispositis animis*? Quam ille putas animorum dispositionem expetebat? audi, nec vnquam obliuiscaris, *purificatis*, inquit, *corporibus & animis Sacramentum hoc celebremus*; quasi apertè diceret, *sicut ad ipsum Sacro-sanctum Sacramentum*; neque enim ad hoc alia requiritur dispositio quàm vt purificatis corporibus & animis accedamus.

Ecclesi. 19. Quamobrem hîc præsertim locum habeat, quod ait Sapiens: *Da locum timori Altissimi*, primas in templo Timori cede; primus ingredientis actus sit illius timoris actus, qui peccatum expellit. *Ibid. 1.* Dum te lustrali mundas aqua, non ore tantum, sed corde, sed sincero affectu petas mundari, & amplius atque amplius à peccato lauari. Sic ipse *Iustus aperiet os suum in oratione & pro delictis suis deprecabitur*, quantò magis iniultus? Qui si tamen cum Publicano dicat, *Deus, propitius esto mihi peccatori*, magis probabitur & iustificabitur, quàm qui cum Phariseo gratias Deo agat; Nam hoc est quod prius & vehementius commendatum nobis vult

Dominus : *Munda prius quod intus est, ut fiat id quod deforis est,* *Matth. 23.*
mundum.

Hoc est credere quod dicitur de sanctitate decenti Domum Dei, si decentem illum decorem diligas : hoc est autem illum diligere si cum possis illum adhibere, non negligas, sicque reipsa cum Dauide dicas & sentias : *Domine dilexi decorem domus tuæ, &* *Psal. 25.*
locum habitationis tuæ. Ne perdas cum impiis animam meam. Ego autem in innocentia mea ingressus sum, redime me & miserere mei. Tum verò quod sequitur longè aptius & verius fiet : *In Ecclesiis benedicam te Domine. HOC EST ENIM benedicere Deum in Ecclesiis,* inquit S. Augustinus, *sic viuere ut per mores cuiusque benedicatur Deus. Nam qui benedicit Domino lingua, & factis maledicit, non in Ecclesiis benedicit Domino. Lingua prope omnes benedicunt, sed non omnes factis.* Et ad illum Psalmi versum, *Tollite hostias & introite* *Psal. 95.*
in atria eius. QVAS hostias nobiscum portaturi sumus? sacrificium Deo spiritus contribulatus, cor contritum & humiliatum Deus non spernit. Cum humili corde intra in domum Dei & cum hostia intrasti. Ne sit verò quælibet hostia, sed quæ est excellentior, holocaustum : sic Idem ad istos versus, *Introibo in domum tuam in holocaustis; Reddam tibi vota mea, &c. TOTVM meum consumat ignis tuus,* *Psal. 65.*
nihil mei remaneat mihi, totum sit tibi. Erunt illa holocausta; Et quid erit in holocaustis? Reddam tibi vota mea quæ distinxere labia mea. Quæ est distinctio in votis? hæc est distinctio, ut te accuses, illum laudes. Atque in illud denique, *Intrate portas eius in confessione, atria eius* *Psal. 99.*
in hymnis. A CONFESSIONE, inquit, *incipite : opus est ut te reprehendas, ne ille reprehendat qui damnaturus est. QUANDO INTRAS, TE REPREHENDE; CVM INTRAVERIS, LAVDA ILLVM.*

FINIS PRIMÆ PARTIS.



I N D E X

RERVM PRÆCIPVARVM PRIMÆ PARTIS.

- A** *BNEGATIO.* Vide, *Appetitus.*
Mortificatio.
Abstinencia. Quale sit perfectionis signum. pag. 452. V. *Temperantia.*
Acedia. Quàm sit contraria gratiæ & deuotioni. 100.
Aduentus. Duplex Christi Aduentus, & duplex ei conformis renouatio. 14. V. *Christus.*
Aduersitas. Non contristabit iustū quidquid ei acciderit. 223. non quia mala sunt, perturbamur in aduersis; sed quia perturbamur, aduersa mala sunt. 334. æquè in aduersis magnificandus Deus. 369. nisi probè paratus sis ad aduersa, nec ad ipsa prospera benè paratus es. 400. de cohibendo murmure in aduersis. V. *Murmur.*
Affectus. Quando est inordinatus, obstat Confessioni & Contritioni. 2. quando sunt boni, multum conferunt ad agnoscendum Christum. 81. quàm sint mortificandi ad pœnitentiam & conuersionem. 106. statim sequi debent discursum in meditando. 164. circumcidendi ad puram intentionem. 177. magis tenemur omnes affectu nostra relinquere quàm effectu Apostoli. 280. qui grauior in nobis est, eò minus curari volumus. 432. V. *Appetitus.* *Mortificatio.*
Amor Dei. Apparet in dono filij. 18. quàm purus noster esse debeat. 84. non uiuitur in amore sine dolore. 90. Amor non est otiosus. 94. Amor non nisi amore compensatur. 97. Aut non amatur Christus aut amatur asperitas. 113. amor sponsæ Christi qualis. 441. V. *Charitas.*
Amor proximi. Alienis bonis gaudet vt propriis. 124. sicut non sunt amanda vitia propter amicos homines, sic non sunt odio habendi homines propter eorum vitia. 373.
Amor sui. Tantum proficies, quantum à te deficies. 360. hæc sponsæ fides est, vt sicut neminem præter sponsum velit diligere, sic velit à nullo diligi. 440.
S. Andreas. Quo amore Crucem amaue- rit. 448.
Apostolus. Hæc eius duo signa certiora: velle abstinere libenter ab omnibus bonis, & mala quæuis sustinere. 452.
Appetitus. Quomodo subiiciendus rationi. 392. 528. qui non renuntiat omnibus quæ possidet, non potest esse Christi discipulus. 422.
Arrogans. Quàm bene de Christo humilis, tam malè meretur arrogans. 72.
Auauitia. Omnis copia quæ Deus non est, egestas est. 130.
C *ASTITAS.* Securior est castitatis victoria fugiendo, quàm pugnando. 137. Qui diligit cordis munditiam, habebit amicū Regem. 155. Aut puritatem Beatissimæ Virginis neget impurus, aut concedat se abnegatum à tam pura Virgine. 471. Nemo amans impuritatis amat Beatam Virginem. 474. quam in se amat

- B. Virgo puritatem, in nobis amat, & quam in se odit impuritatem in nobis odit. 475.
- Certamen. V. Tematio.*
- Charitas.* Sic Deus dilexit mundum, ut sic mundus diligeret Deum, sicut dilectus est. 18. cui nimis adhuc durum videtur pati pro Christo, nimis etiam durum videtur amare Christum. 112. Est quidem certum in Charitate unionem esse perfectionis: sed non est certò hæc dicenda Charitas, neque hæc unio nisi in obedientia quæ dicitur Charitatis. 364. V. *Amor Dei.*
- Christus D.* Nemo Christianus Christi iudicio condemnabitur, nisi qui prius suo Christum iudicio condemnauerit. 1. Primus Christi Aduentus, mundano tam timendus quam secundus. 5. Quam rarò cogitas Christum tam crebrò resistis Spiritui sancto. 24. Vix ullus est qui non se verè putet desiderare Christum, & vix ullus est qui eum verè desideret. 27. se anteponebat Christo qui se omnibus non postponit. 65. ubi de eius incarnatione. Affectu potius quam studio Christus cognoscitur. 79. ubi & per integram hebdomadam, de variis eius titulis, nominibus, gratiis, virtutibus & aliis quæ ad eum spectant. Magnificentior in præsepi quàm Salomon in throno suo. 144. Cū simplicibus sermocinatio eius. 166. Noui & veteris hominis diffidium. 160. 404. Non tam à magno Regno Rex magnus est, quàm à Magno Rege Magnum eius Regnum. 205. V. *Concupiscentia, imitatio, & pro variis eius titulis à pag. 417.*
- Cognitio sui.* Multum ei profunt hæc multum expensa verba: Tu quis es. 72.
- Communio. V. Sacramentum.*
- Concupiscentia.* Non nisi tribus oblati
- concupiscentiis Rex Christus recognoscitur. 201. Totius difficultatis de pura intentione solutio, studium est continuum reprimendæ concupiscentiæ. 189. Febris est animi animo longe periculosior, quam febris corporis corpori. 288.
- Confessio. V. Penitentia.* Quod magis confert ad faciendam confessionem minus efficitur. 312.
- Confessor. SS.* Confessoribus Pontificis communis consideratio & veritas. 518. non Pontificibus. 526.
- Conscientia.* Qui contra peccant, magis peccant. 49. vox clamantis est in deserto cordis post peccatum, peccatori audienda. 75. multorum est cauteriata & peruersa. 307.
- Constantia. V. Aduersitas, fortitudo.*
- Contemptus. V. Mundus.*
- Contritio.* Nulla est, non deposito prauo affectu. 2. 107. 313.
- Conuersatio.* Ne quid nimis, aut quid minus cum proximo. 170. nemo securè apparet nisi qui libenter latet. 244.
- Conuersio. V. Contritio.*
- Culpa.* Culpæ reatus grauior est quàm pænæ. 10.
- DEDICATIO ECCLESIAE.** 543.
- Desideria. V. Christus.*
- Deus.* Quanto se humilis minorem facit, tanto magis magnificat Deum. 127. aut nullam vitæ partem, aut totam Deo debes. 194. nisi te subdas Deo, Deum tibi subdis. 255. non dixeris per Deum abest. 301. si non semper, nunquam magnificas Deum. 369. de immensitate & singulari præsentia Dei sacris in locis, ac de diuino cultu ibidem exhibendo. V. *Dedicatio Ecclesie. Murmur.*
- Deuotio.* Nescit tarda molimina, sicut nec ipsa Gratia. 121. sensitiuæ deuotionis subtractio, veræ & solidæ deuotionis est probatio. 231.
- Difficultas.* Quanta sit penitendi pro-

pter affectus. 107. sic facta sunt aspera in vias planas, vt tam iucunde per aspera quàm per plana viuamus. 109. maius est Christi beneficium amaritudines siue difficultates nobis reliquisse amabiles quàm nullas reliquisse. 111. Quò longius differes, difficultatem difficilius tolles. 344. qui à lege excludit aliquid quod putet difficilius, excludit à se totam legē. 503.

Dilatio. V. Deuotio. Dum luget, ambulandum; ne tenebræ fiant. 197. periculum in mora. 484.

Directio. Ne dicas sufficiens mihi sum. 316. *vbi de hac materia fufus per totam hebdomadam.*

Discipulus. Non minus modò quàm olim Christus in propria venit, nec fui magis eum recipiunt. 114. Qui non renūtiat omnibus non potest esse Christi discipulus. 422. **V. Imitatio.**

Discretio. In bonis etiam operibus exercendis. 522.

Doctrina. Doctor. Si quid nos reuocat à doctrina Christi, vel ob id maximè recipienda est. 290. Christum non recipit, qui doctrinam eius non recipit. 115. **V. Scientia. SS. Doctoribus** communis consideratio & veritas.

Denum. Vt certum sit amoris signū certas habet notas. 19. si vis quod non habes, da quod habes. 269.

EFFECTVS. Comitari debet affectum in se offerendo & meditando. 21. 164.

Excusatio. Quam sibi fingunt homines vel à dignitate sua, vel à difficultate rerum, vel à tempore, nulla est. 502.

Exemplum. V. Imitatio.

Exequutio. V. Effectus. Et communia singulariter, & singularia communiter.

FIDES. FIDELITAS. Substantia seu subsistentia est rerum futurarum. 10. In paruis maior est serui Dei fidelitas. 436. Sicut ne pereat fides, perdenda est martyrio vita naturalis: sic ne pereat fidelitas, perdenda morti-

ficatione vita sensualis. 513.

Fortitudo. Iniuriam infert Gratia maximam, qui pro ferenda iniuria non certat fortiter. 149. Mulierem fortem quæ faciant. 539.

Fragilitas. Quanta sit in humano corpore. 340.

S. Franciscus Xauerus. 451.

GAVDIVM. Non magis fidendum humano gaudio quàm homini mentienti. 275. **V. Prosperitas.**

Gloria. Nulla re homo quantumuis gloriosè gloriari potest. 50. nulla res est in humanis verè gloriosa. 53.

Gratia. Non est lenta. 120. 197. 346. si ad humanam gratiam diuina postulas, diuinam ipsam repellis gratiam. 277. gratiarum diuisiones. 519.

Gratitudo. Facit vt quo quis est maior, eò sit humilior. 62. gratitudo animi nulla formari potest digna beneficio vocationis, nisi se animus dignè conformet vocationi. 386.

HVMILITAS. Ita pugnat cum honoribus, vt non repugnet obedientiæ. 59. *vbi plura per totam hebdomadam de hac virtute.*

IESVS. De pretio nominis Iesu, tantò plus circumciditur & nobis deperit, quantò minus perfectè nos circumcidimus. 174. discedat ab iniquitate omnis qui nominat nomen Domini. 179.

Imitatio. Magis laudat sanctos quàm laus ipsorum. 46. exemplo suo Christus nos magis vrget quàm imperio. 238. qui dicit se in ipso manere, debet sicut ille ambulauit & ipse ambulare. 256.

Immortificatio. Facit cauteriatam & insensibilem conscientiam. 309. **V. Mortificatio.**

Indifferentia. V. Aduersitas. Mortificatio.

Inimici. Magis prodesse possunt odio quàm profuissent obsequio. 158.

Inuentio. De hac fusè à pag. 177.

Inuidia. Quàm sit contraria charitatē

- quæ alienis bonis gaudet vt propriis. 124.
- S. Ioannes Baptista.* Laudatur à Domino. 39. laudat Dominum. 69.
- S. Ioannes Euangelista.* Valde honorandus est. 153.
- S. Ioseph.* Qualis quantusque vir. 35.
- Iudicium.* In quo consistat verum de rebus iudicium. 54. quomodo iudicent homines Christum, antequam à Christo iudicentur. 1. quale iam Christus de mundo iudicium tulerit. 6. quæ futura mundi renouatio in extremo iudicio. 24. quòd humana nimis, neque satis diuina timeantur iudicia. 427.
- LABOR.* Nisi diligenter aduertas, fluito labore consumeris. 295. Vide *Difficultas*.
- Laus.* In quo vera consistit. 40. Ad laudes nostras tremere potius conuenit quàm exultare. 55. Melius laudantur Sancti nostris operibus quàm verbis. 36. 532.
- Laxitas.* Nō quod liceat, spectandum est; sed quid expediat. 217.
- Libertas.* Quenam sit vera. 43.
- Lingua, Loquela.* Nemo securè loquitur nisi qui libenter tacet. 244.
- MANSVETUDO.* Procurat pacem & internam Christo domum. 136. qualis sit Christiana. 254.
- Maria Virgo.* Quantæ dignitatis. 32. Quantæ potestatis ad procurandum hominum salutem. 33. Quantum à nobis colenda. 34. Quàm humilis per omnes huius virtutis gradus. 62. & tota sequenti hebdomada. Eius conceptio. 465. Eius puritas. 471. Eius cultus maturandus. 484. Eius purificatio. 215. 500. & seq.
- Martyrium Martyres.* SS. Martyribus consideratio & veritas communis. 513. V. *Fides*.
- Mediocritas seu Moderatio.* Quàm sit vbi-que adhibenda. 171. 220.
- Meditatio.* Discursum affectus & affectu effectus statim sequi debent. 164. Quàm sit necessaria veritatum Evangelicarum meditatio. 413.
- Mortificatio.* In primis necessaria ad rectam intentionem 177. 189. Totus in ea profectus spiritualis. 362. perfecta est in obedientia charitatis. 366. Non est minus perfectæ mortificationis bene vti rebus, quàm non omnino vti. 391. sicut à veteri lege, sic à veteri homine abstinendum. 404. Crux non esset bona, nisi bonum esset cruciari. 447. V. *Fidelitas*.
- Mundus.* A Christo iam iudicatus. 7. Mors mundanorum in peccato. 9. Iudicium Christi de rebus huius mundi. 55. Aut Christus fallitur, aut Mundus errat. 140. Vbi de eius contemptu, & 542.
- Murmur.* Quantò minus murmuramus, aut omnino tacemus flagellati à Domino, tantò altius altissimum eius dominium prædicamus. 418.
- S. NICOLAVS.* Quàm multis ornatus donis. 452.
- OBEDIENTIA.* Non illi repugnat humilitas. 59. perfecta obedientia quæ dicitur charitatis. 364. V. *Voluntas*.
- Oblatio.* Debet esse effectiua sicut affectiua. 21.
- Officium.* Hoc est vere laudabile laudari ab officio. 39. 519.
- Opera.* In bonis etiam operimus faciendis opus discretionem & directionem. 319.
- Oratio.* Iungenda illi opera faciliora quæ possis; vt quæ non possis, obtineas. 269. Non minus in prosperis quàm in aduersis orandum ne illa cœcant. 274.
- Otium.* Non est amor Dei otiosus. 84.
- PASSIO.* Seruilis est. 44. V. *Appetitus, Mortificatio*.
- Patientia.* Pati & amare Christum, sunt idem. 123. pati iniurias, quàm sit Christianum.

- Christianum.** 254. veri Apostolatus nota certior est patientia. 453.
- S. Paulus.** Eius conuersio. 495.
- Pax.** Quàm sit idonea Christo recipiendo. 137. quòd sit in amaritudine pax & in pace amaritudo. 220.
- Peccatum.** Eius grauitas ex Christo passio. 12. tremendum est in eius periculo. 57. nomini Iesu oppositum. 179. Non sunt facienda mala vt eueniant bona. 184. Non tam à dæmone immundo immunda sit anima quàm à seipsa. 285. Non scrupulosa sed rationabilis sollicitudo habenda de peccatis remissis. 348. Ex peccato tanquam ex vulnere potest capi remedium persanandi peccati. 489. Christo & Beatæ Virgini grauius est quàm ipsa Christi mors. 511.
- Perfectio & Profectus.** Progressus perfectionis per tres vias 360. certior perfectio in obedientia charitatis. 364. probrosum est incepisse nec prosegui. 537. Tantùm proficies, quantum à te deficies. 360. ex ipsis proficiendum est culpis. 490.
- Penitentia.** Licet omni peccatori sit necessaria, vix tamen vllus est, qui quæ sunt ei necessaria faciat. 106.
- Persuerantia.** Multùm ad eam confert præsidium B. Virginis. 32.
- Præsumptio.** Fallit præsumentes. 11. sicut non desperandum, sic neque præsumendum. 349.
- Prosperitas.** Quàm sit cauenda. 221. Non minus timenda quàm aduersitas. 274. nec in ea magis gaudendum quàm in aduersis. 127. quàm sit aduersum, nimis affici prosperis. 401. Vide Aduersitas.
- Providentia diuina.** Hinc nulla re contristatur iustus, & æquali semper est animo. 225. 227. tantò his amplior & fidelior quòd sibi minùs prouidèt. 462.
- Prudentia.** Vt est opposita simplicitati.
- Vide simplicitas; non quid liceat, sed quid expediat, attendit. 217.
- Puillanimitas.** Quàm sit cauenda. 349.
- RATIO.** Quomodo subiiciatur Deo. 392.
- Religio.** Religiosus, Vide vocatio. Religiosorum Ordinum SS. Fundatoribus communis consideratio & veritas. 531. Non verbis, sed moribus à filiis Religiosis Pater laudatur. *ibid.*
- Respectus humanus.** Quantum noceat. 49.
- Renouatio.** Quid sit, & quàm debita Christo, mundum aduentu suo renouanti. 14. non tam aliud agendum quàm aliter, 152. quàm sit crebrò facienda, & facilis eius praxis. 496.
- SACRAMENTVM.** Suam ille vestem nuptialem recusat induere, qui recusat instrui de debito Sacramenti vsu. 319. Ad sacrum locum velut ad Sacramentum. V. Dedicatio Ecclesiæ. Vbi susè, cur Ecclesiæ dicatur inextimabile Sacramentum.
- Salus.** Valde periculosa in hoc mundo. 339. Incerta. 348. nulla eius certior certitudo quàm in sua vocatione. 379. quod grauius in nobis malum est, hoc minus curari volumus, quod est saluti valde obnoxium. 432.
- Sanctitas.** In certo est propriæ vocationis gradu. 382. quamnam decet Dei Domum. V. Dedicatio.
- Scandalum.** Actiuum est & passiuum, & vtrumque damnosum. 47. 217.
- Scientia.** Sic cauendum ne scientia præferatur virtuti, vt tamen scientia non negligatur. 522.
- Sensualitas.** Si quid interdum sensibus licitè indulgetur, non vt sensuale est, sed vt est licitum, accipiendum est. 395.
- Seruitus.** Seruus. Dura seruitus cupiditatum. 44. quàm sit debita Christo D. nostra seruitus. 237. In paruis maior est serui Dei fidelitas. 436.

- Silentium.* Vide *Loquela*.
Simplicitas. Cum simplicibus sermocinatio Christi. 166. quàm sit Christo accepta. 266. Væ duplici corde 324. 507.
Sollicitudo. Quamnam sit habenda de peccatis remissis. 348. de seruando corde 355. quanta de suis, aut de Christi rebus. 462.
Spiritus. Tantò magis ei resistitur, quantò minus de Christo cogitatur. 24. septem eius dona. 87. Si spiritu viuimus, spiritu & ambulemus. *ibid*.
S. Stephanus. Quanta eius fortitudo & virtus. 149.
Superbia. Superbus qui contra obedientiam vult esse humilis. 61. quàm sit timenda in donis. 64.
TEMPERANTIA. Sibi non Domino viuunt qui temperatè non viuunt. 103.
V. Mortificatio.
Tentatio. Timenda ex nostris laudibus. 57. nemo periculosè magis tentatur, quàm qui se non putat tentatum. 246. peregrinantis in corpore animæ maius est periculum, quàm periclitantis in nauis corporis. 339. improuisis instat. 357.
S. Thomas Apostolus. Quantæ post lapsum fuerit fidei. 489.
Timor. Quis sit bonus & salubris de salute. 348. commendatur à B. Virgine. 478.
Tristitia. Quàm sit cauenda. 221.
VANITAS. Vanus & stultus labor mundanorum. 295.
Veritas. In quo consistat. 54. veritatum Evangelicarum neglectus. 3. quò minus dignæ apparent quæ considerentur; tantò magis considerandæ. 412. quomodo veritas in iniustitia detinetur. 45.
Vigilantia. Quanta sit adhibenda seruando cordi. 354. quanta cuique est vigilantia, tantum virtutis & meriti. 527. 555.
Virginitas. SS. Virginibus communis consideratio & veritas. 535. non Virginibus. 539.
Virtus. Probat in contrariis. 232. veras virtutes magis times quàm amas. 265.
Vita. Tota Deo debetur. 194.
Vocatio. Salutis & perfectionis certior est via. 379. *vbi plura de hac materia.*
Vnio. In obedientia charitatis. 364. quæ spectant & promouent viam vnitiuam. 74.
Voluntates. In adimplenda diuina voluntate, vera laus hominis. 40. Ex obedientia cognoscitur diuina voluntas. 60. nihil fructuosum sine illa 224. hinc in aduersis & prosperis idem animus. 227. in illa magis ac magis facienda, renouandi animi ratio consistit. 497. Quenam sit bona nostra voluntas. 22. 190. Nisi tuam voluntatem diuinæ subdas, diuinam subditæ voluntati. 235. grande malum propria voluntas. 320.
ZELVS. Non viuunt in amore Christi sine zelo & dolore. 92. zelum communicandi Christi, multum promouere debet hæc veritas, quòd nemo magis sibi Christum seruat, quàm qui minus sibi soli seruat. 260.

ideren-
a. 412.
ia deti-

da fer-
que est
c meri-

munis
na Vir-

2. ve-
amas.

certior
ria.

4. qua
vnti-

volun-
x obe-
untas.
a 224.
idem
magis
o con-
nostra
volun-
subdis
aalum

Chri-
com-
remo-
nemo
m qui

derent
a. 412.
ia deti-

da fer-
que est
c meri-

munis
na Vir-


2. ve-
amas.


certior
ria.


4. qua
vnti-

volun-
x obe-
untas.
a 224.
idem
magis
o con-
nostra
volun-
subdis
aalum


Chri-
com-
remo-
nemo
m qui







De Mansuetudine V. & 16 Januarij. n^o 251. De Solitudine B. V. & 14^a



VERITATIS

Practica

ex Vita B. N. I. Christi

per Rina. Henrich.

à Dnica 1^a Adventus

ad Septuagesimam

et.

Assent. Lat.

N^o 9.